

*Xi libriya ni rasuidy*  
HISTORIAS XTUNY  
**LA BIBLIA**





LIBRO RE' XTUNY




*Xi libriya ni rasuidy*  
HISTORIAS XTUNY  
LA BIBLIA

© 2012  
WATCH TOWER BIBLE AND TRACT SOCIETY  
OF PENNSYLVANIA  
Derechos reservados

*Xi libriya ni rasuidy historias xtuny la Biblia*

Chú layibu buny láani  
LA TORRE DEL VIGÍA, A.R.  
Heraldo 104, Col. Clavería, 02080 México, D.F.



Guirá textos ni sitné la Biblia  
ni sieed ló libro re' diti caani  
guidopyni. Cuáni diitz nayadit  
par que mbioxien guientzaay  
láani. Textos ni sieed ñe' cada  
toib historia caa pu lagary  
sietni ló la Biblia.

Impresión de 2012

Guiich re' diti rado'ni, láani goya'ni par guigaisni lo guidopynac gudxlio par  
guisuidy buñ láani toibsi né la Biblia. Né láani ria'ni por guirá donación.

Guirá texto ni sieed re' biréni ló Biblia *Traducción del Nuevo Mundo  
de las Santas Escrituras (con referencias)*.

*My Book of Bible Stories*  
Zapotec (Lachiguiri) (my-ZPL)

Impreso en México

# XI LIBRIYA NI RASUIDY HISTORIAS XTUNY LA BIBLIA

**L**IBRO re' rani' historias ni nigolú góe. Guirá historias re' biréni ló toib libro ni más rasac ló Gudxlio, laani la Biblia. Guirá historias re' rasuidyni looy ximod gosaló Dios bisa' guirá ni no' ló Gudxlio hasta ló xtzúno. Láaca rabyni looy xi ni gony Dios ló dzú ni sietra.

Libro re' moda rasuidyni looy xi guirá sitné la Biblia. Rabyni looy de guirá buñ ni bibany dzúcu né xí ni bunyibu. Raduidy xiro' confianz lóono ni Dios gony né Gudxlio re' que guidxin gacni toib lagary móz ro cuésno tipzó.

Libro re' sitné 116 historias. Bidzoni en xhoon midid. No' toib página ro rasaló toib midid ro rarexa tidxo diitz ro rabyni lóono xi guirá ni guisuidyno. Guiráxadit historias ni sieed ló libro re' cuáni, xomodpa gocni. Nde' racné looy par guienlo pu dzú gocni né ximod canalni xitzca sa'ni.

Guirá historias ni no' re' cuáni nayadit. Xidal mbioxien labúu go'ol guirá nde' sin toib ni gacné layibu. Guirá ni ma no' xiin saduidybu cuent que ximbioxbu sioladx guicadiag xidal buelt historias re' órni bixiosbu go'ol láani. Saduidyno cuent que libro re' sitné xidal cós ni guioladxno, ná mbioxhlas o buñgol lóono.

Ro radopy toib historia no' xidal textos. Biquiin Biblia par go'ol lo guirá textos ro' sieed historias re'. Órni ma bilox bíil lo toib historia non gonylo guirá galrranabdiitz ni sieed ro ralox historia 116. Né buny por guisetnaladxlo ximod rarexani.

# NI SIEED LÓ RE'

## MIDID 1 RASALÓ RIA' GUIRÁ CÓS HASTA GUIÉRODANN

- |  |   |
|--|---|
| 1 Dios rasaló rasa' xidal cós            | 6 Toib góc buñtzay né toib góc<br>buñ mal |
| 2 Toib lagary sacroyen                   | 7 Toib buñguieeu ni gop balory            |
| 3 Primer buñguieeu né primer<br>buñgona' | 8 Nefilim ló Gudxlio                      |
| 4 Ximod bisnityibu lidxyibu              | 9 Noé rasa' toib arca                     |
| 5 Rasaló galnagan                        | 10 Toib guiérodann                        |

## MIDID 2 GUIÉRODANN HASTA ÓRNI BIRE'YIBU EGIPTO

- |  |  |
|--|--|
| 11 Primer bip ni gonaa lóo               | 23 Xpaca'al Faraón                         |
| 12 Buñ rasa' toib torre naso'            | 24 José rago' prueby buch                  |
| 13 Abrahán ximig Dios                    | 25 Family ni radxiin Egipto                |
| 14 Dios rago' prueby fe xtuny<br>Abrahán | 26 Job rony ni ná Dios                     |
| 15 Tze'el Lot bidxiguet lóo              | 27 Toib Faraón mal rony<br>mandary Egipto  |
| 16 Toib gona' tzaay ni guica' Isaac      | 28 Bada' ni laa Moisés ralaá               |
| 17 Cuach ni diti góc toibsi clas         | 29 Xigony bixony Moisés                    |
| 18 Jacob riée Harán                      | 30 Yac gúch ni cacáa gui                   |
| 19 Xidal xiin Jacob                      | 31 Moisés né Aarón rieyibu<br>nisló Faraón |
| 20 Dina riab ló galnagan                 | 32 Chii plagas                             |
| 21 Rianladxyibu José                     | 33 Cadudyibu nisda' Xináa                  |
| 22 José no' press                        |  |

## MIDID 3 DESDE NI BIRE'YIBU DE EGIPTO HASTA PRIMER NI BUNY MANDARY ISRAEL

- |                         |                             |
|-------------------------|-----------------------------|
| 34 Toib galrro copy     | 37 Toib yo' ro rac adorar   |
| 35 Jehová raduidy xiley | 38 Doce buñ ni riée ralaách |
| 36 Torien ni góc de or  | 39 Xiac Aarón rialaá guié'  |

40 Moisés raguin xiac ló guiee  
41 Be'el de cobre  
42 Toib bor ni rani'  
43 Josué buñguieeu ni rasanir  
44 Rahab racachlan ni raláach  
45 Cadudyibu gu'uc Jordán  
46 Muros ni nap gudx Jericó  
47 Toib gobáan gudx Israel

48 Gabaonitas naní xcalrrien  
49 Govitz ria'anni toibsi lagary  
50 Chop buñgona' ni gop balory  
51 Rut né Noemí  
52 Gedeón né 300 buñguieeu  
53 Jefté raduidy xtiitz  
54 Toib buñguieeu ni más nadip  
55 Toib mbiox rony xchiin Dios

#### MIDID 4 PRIMER NI BUNY MANDARY ISRAEL HASTA ÓRNI SÉEYIBU GUDX BABILONIA

56 Saúl ni primer buny mandary  
Israel  
57 Dios golú David  
58 David né Goliat  
59 Xigony raxony David  
60 Abigail né David  
61 David rony mandary  
62 Rio' galnagan lidx David  
63 Salomón buñnan ni rony  
mandary  
64 Salomón rasa' yo' xiro'  
65 Gobierno radzoni  
66 Jezabel gona' mal ni rony  
mandary

67 Jehosafat nap confianz  
lío Jehová  
68 Chop mbioxien rabany stoib  
69 Mbioxgona'yen racné buñxirop  
70 Jonás né beel xirop  
71 Dios rani' guiduidy Gudxlio móz  
72 Dios racné Ezequías  
73 Último ni rony mandary  
tzaay Israel  
74 Toib buñguieeu ni diti radzuiby  
75 Tap mbioxhliasien gudx  
Babilonia  
76 Jerusalén ranitló

#### MIDID 5 DZÚ NI SÉEYIBU BABILONIA HASTA DZÚ NI BISA'YIBU MUROS NI NAP JERUSALÉN

77 Diti bixixipyibu  
78 Diitz ni caa cué yo'  
79 Daniel lad betz ons  
80 Israel care' Babilonia

81 Confianz que Jehová racné  
82 Mardoqueo né Ester  
83 Muros ni nap Jerusalén



## MIDID 6 DZÚ GOOL JESÚS HASTA DZÚ GOITYBU

84	Toib ángel riguen Maria	93	Jesús raya'an xidalguixo buñ
85	Jesús rál lainy xorraa nimal	94	Randxi'bu mbioxien
86	Racanalyibu toib vitzón	95	Ximod rasuidy Jesús
87	Jesús mbioxhlasien lainy yo' xiro'	96	Jesús rasial buñguitz
88	Juan ragonis Jesús	97	Jesús ried xomod ni rony Mandary
89	Jesús rasiá yo' xiro'	98	Ló dainy Olivos
90	Né toib buñgona' ro' pós	99	Lainy cuart ni sob guic yo'
91	Jesús rasuidy buñ laidx toib dainy	100	Jesús lainy lagary sacroyen
92	Jesús ralis gue'et	101	Ragaityibu Jesús

## MIDID 7 DZÚ NI BIÁS JESÚS LAD GUE'ET HASTA DZÚ NI PABLO GOYO' PRESS

102	Jesús nabany	108	Ló néz ni sée Damasco
103	Lainy cuart ni nayeg	109	Pedro riguen Cornelio
104	Jesús rabiguet guibá	110	Timoteo ni racné Pablo
105	Ria'anyibu lainy gudx Jerusalén	111	Toib mbiox ni gonás baca'al
106	Rare'yibu press	112	Ralaayibu ló toib isla
107	Ragasguieeyibu Esteban	113	Pablo lainy gudx Roma

## MIDID 8 NI SIEED LÓ LA BIBLIA RADXIIN RACNI

114	Dzú ni guilox guirá cós mal	116	Ximod guibanyno tipzó
115	Gudxlio sac toib lagary móz		

Ni guinabdiitzno órni guisuidyno  
*Xi libriya ni rasuidy historias xtuny la Biblia*

Galrranabdiitz ni sitné cada historia  
rasalóni ro radopy historia 116.

## *Rasaló ria' guirá cós hasta Guiérodann*

*¿Ximod bidxin góc guibá né Gudxlio? ¿Ximod goya' govitz, be'ò né vitzón né xidal cós ni no' ló Gudxlio? Biblia racapy tzaay órni raníni que Dios bisa' guiráni. Por ngú, libro re' rasaló né historias ni sieed ló Biblia ni rani' ximod bisa' Dios guirá nde'.*

*Rasuidyno que ni Dios primer bisa' ngú buñ xomod láabu ni diti labúu rabino ni rabés lainy guibá. Gocyibu ángeles. Per Gudxlio re' Dios bisa' láani par buñgudxlio xomod lóono. Por ngú, Dios bisa' primer buñguieeu ni góc laa Adán né primer buñgona' ni góc laa Eva né Dios golo' layibu lainy toib lagary sacroyen. Per layibu diti bisobbu Dios né bisnityibu de guibanyibu tipzó.*

*Dzú ni bisa' Dios Adán hasta dzú ni bieed guiérodann re' goduidy 1,656 iz. Dzúcu bibany xidal buñ mal. Ruc lainy guibá bibany buñ ni diti labúu rabino, layibu Buñdzab né ángeles ni góc toibsi ni buny pór cós mal. Ló Gudxlio re' bibany Cain, xidal buñ mal, né goyo' buñxiblo ni diti góc xomod lóono. Per láaca goyo' buñtzay ló Gudxlio. Xomod Abel, Enoc né Noé. Historias de Midid TOIB guisuidyno de guirá buñ re' né xí ni góc dzúcu.*

# DIOS RASALÓ RASA' XIDAL CÓS 1

**G**UIRÁ cós tzaay ni napnó Dios biduidybu láani lóono. Láabu bisa' Govitz par guiduidyni guii lóono rodzu, Be'o né vitzón par guisaníni gue'el, né biduidybu toib Gudxlio móz par labúu guibanyo loni.


Govitz, Be'o né vitzón ditini ngú ni Dios bisa' nirdiguié. ¿Nanlo xí ni bisa'bu nirdiguié la? Gocni buñ xomodca láabu. Diti labúu rabino layibu, xomod diti labúu rabino Dios. La Biblia rani' layibu ángeles. Dios bisa' guirá ángeles par nabésyibu toibsi lainy guibá né láabu.

Dios bisa' nirdiguié toib ángel ni más gondxi'bu. Gócbu primer Xiin Dios né bunybu dxiin né Bixiosbu. Gocnébu Dios bisa' stipnés cós ladni no' Govitz, Be'o, vitzón né láaca Gudxlio ro rabésno.

¿Ximod góc Gudxlio dzúcu? Dzúcu diti no' chú labúu bibany ló Gudxlio. Nosi nís bigua' guidopynac ló Gudxlio. Goniiny Dios ño' buñ par nabany ló Gudxlio. Por ngú, gosalobu bunytzaaybu láani par lóono. ¿Xí bunybu?

Primer bibíbu Gudxlio raquiinni guii. Por ngú, biduidybu Govitz par guicaptza' ló Gudxlio. Bunybu láani par ño' rodzu né gue'el. Diti xidzú bunybu que nís ni no' ló nisdá' ña'ach loni né ña'an Gudxlio loguia'.

Dzúcu xitcal goyo' ló Gudxlio. Gocni xomod dibuj ni rabilo re'. Diti no' xi goyo' loni, ni guie', ni yac, ni nimal. Né láaca lainy nisdá' diti goyo' beel. Nigolú xiro' dxiin gop Dios par que nimal né buñ nabany nasac ló Gudxlio.






# TOIB LAGARY SACROYEN

2

¡BIBI' lagary re'! ¡Balaati móz nací!  
Bibi' guixbata', guirá yac ni no'  
loni, guie' né guirá nimal. ¿Rabilo pu  
saga' xol né pu náaxh betz ca la?

¿Ximod bidxin gocni toib  
lagary móz? Nigore' guibino  
ximod Dios bunytzaay Gudxlio  
par lóono.

Nirdiguié ni bisa' Dios  
ngú góe guirá guixbata',  
par ñatni guidopy ló  
Gudxlio. Láaca bisa'bu




guirá clas yacgu'ën né yacxirop. Guirá nde' rony que Gudxlio guienni sacró. Per diti ngúsi, láaca xidalni raduidyni cuánnax naníx ni labúu guaano.

Diti xidzú bisa'bu beel par nagua' lainy nís né guirá clas nimal ni rasapy lainy guibá. Bisa'bu bu'k, m'ích, mainy, nimal xirop né nimal biox. ¿Xí nimal rimbulo? ¡Dios nigolú natzaaybu portín biduidybu guirá nde' lóono!

Dios bunybu toib lagary ló Gudxlio nigolú móz. Dios gole' laa lagary re' Edén. Dios bisa' tzaay láani. Guidopy lagarycu nigolú móz gocni. Goniiny Dios que guidopynac ló Gudxlio nadxín ñac xomod lagary móz ni rabino re'.

Bibi' dibuj re' stoib buelt. ¿Nanlo xí ngú ni bibi' Dios ni riatz lainy lagary re' la? Guibino guidoni.

Génesis 1:11-25; 2:8, 9.



# PRIMER BUÑGUEEU NÉ PRIMER BUÑGONA'

3

¿XÍ NI rabilo ni ma bidza' re'? Re' ma no' buñ. Ngú primer buñgueieu né primer buñgona'. ¿Chú bisa' layibu? Dios. ¿Nanlo ximod laabu la? Laabu Jehová. Né buñgueieu né buñgona' ni no' re' góe laayibu Adán né Eva.

Jehová Dios bisa'bu Adán scare': biquimbu tidxo yoo par bisa' tzaaybu Adán né láabu bidxinbu góebu toib buñ xomod lóono ni no' guic, ña né ñe'. Golóbu buu xe' Adán né Adán gosalo' bibany.

Dios biduidy toib dxiin Adán. Goleschinbu Adán par nabe' laa guirá clas nimal. Par labúu nabe' Adán laa guirá nimal re' nír bimbutzaybu ximod ronyimu. Órni Adán gole' laa guirá nimal re', biduidybu cuent de toib cóe. ¿Nanlo xí cóe góe ni la?




Guirá nimal xinéschop goyo', goyo' xol ningol né xol nigona', betz ningol né betz gona'. Adán diti goyo' xcompañerbu né nabann goyobu. Por ngú, Jehová buny que Adán nana'as toib baca'alnix láabu par labúu nabe'bu toib dxit de xcoxtil Adán. Coxtil re' biquiin Jehová par bisa'bu toib buñgona', né nde' bidxin góc tze'el Adán.

¡Adán nigolú bibaladxbu! Eva láaca bibaladx ni bidxinbu lainy toib lagary móz ro guibanybu né ro labúu tzó xiinyibu né cuésyibu toibsi sacrodiguie'.

Jehová goniiny que Adán né Eva nabany tipzó. Goniiny Jehová ñonyibu que guidopynac Gudxlio ñac toib lagary sacroyen xomod Edén. ¡Adán né Eva nigolú bibaladxibu que layibu gonybu que gacni scú! Pal nabanylo dzúcu, ¿ñoladxlo ñacnélo ñac Gudxlio re' toib lagary sacroyen la? Galrrabaladx ni gosacyibu diti goclani xidzú. Guibino xigony.

Salmo 83:18; Génesis 1:26-31; 2:7-25.







**B**IBI' gannlo xi ni cayac. Care' Adán né Eva lainy lagary sacroyen ni laa Edén. ¿Nanlo xigony la?

Portín bunyibu toib cós ni nigolú mal. Por ngú, Jehová diti caduidy lagary guianyibu cú. ¿Nanlo xí ni buny Adán né Eva la?

Bunyibu ni Dios góoch layibu que diti non ñoyibu xcaa yac re'. Dios góoch layibu que labúu guáyibu stipnés xcaa yac ni no' lainy lagary móz cú. Per xcaa toib yac cuánnax Dios góoch layibu que diti guáyibu láani pal ñoyibu láani saityibu. Yac cuánnax re' diti xtunyibu gocni, né nánno mal láani guica'no xtuny stoib buñ, nigore' guibino ¿xí gocyibu?

Toibtica dzú órni nosi Eva bian lainy lagary móz cú, toib be'el goniné láabu. ¡Bunysi xpensarylo! Be'el re' goniné Eva que ñobu xcaa yac cuánnax ni Dios góoch layibu diti non ñoyibu. Órni Jehová bisa' guirá be'el diti golóbu laay layimu par guinimu. Goyo' stoib buñ ni buny que be'el re' naní. ¿Nanlo chú láabu la?

Diti gócbu Adán. Ni buny guirá nde' ngú toib buñ ni Jehová bisa' dzú ni yása guisa'bu Gudxlio. Guirá buñre' ángeles gocyibu né diti labúu rabino layibu. Ángel re' farmay gócbu. Bunybu pensary gony mandarybu xomod Dios né que stipnés buñ guisob láabu diti a Jehová. Láabu bunybu que be'el re' goní.

Ángel re' biscu' Eva. Órni ángel re' góoch láabu que pal ñobu cuánnax cú nadxín ñacbu xomod Dios, Eva biluladx ni goní ángel re'. Por ngú, godóbu cuánnax re' né Adán láaca godó láani. Adán né Eva diti bisobbu Dios, por ngú, bisnityibu lidxyibu lainy lagary sacroyen re'.

Sio' dzú Dios sony que Gudxlio re' guidxin gacni toib lagary móz xomod góc Edén. Re' guisuidylo xi non gonylo par labúu gacnélo que Gudxlio guidxin gac toib lagary móz. Nigore' guibino xi gosaclo Adán né Eva.

ÓRNI Adán né Eva bire'yibu lainy Edén goyoyibu ló xiro' galnagan. Par ño' ni ñoyibu bunyibu dxiin nadip. Xa lagary yac cuánnax, ma gúch bibi'yibu golainy guirá lad. Nde' góç órni Adán né Eva ma diti bisobyibu Dios né bisian góç ximigyibu Dios.

Né ni más pa Adán né Eva ma diti labúu bibanyibu tipzó. Bisednaladx, Dios góoch layibu que saityibu pal ñoyibu xcaa toib yac ni Dios góoch layibu



diti non ñoyibu. Dzú, ni godóyibu xcaa yac re' gosaló bioxyibu né goityibu. ¡Nigolú nga'al gocyibu ni diti bicadiagyibu ni ná Dios!

Adán né Eva gosaló goyo' xidal xiinyibu órni ma bire'yibu lainy Edén. Nde' biduidy diitzy que guirá xiinyibu láaca ño'x né ñaity.

Pal Adán né Eva nasobyibu Jehová, nabanyibu sacroyen né xiinyibu. Labúu nabanyibu sacró né tipzó ló Gudxlio. Diti no' chú ño'x, naxo' né ñaity.



Dios nigolú raniiny láabu guibany buñ tipzó né goxtiguie, né ranibu que sio' dzú gacni scú. Gudxlio diti nosi gacni mózdiguie', láaca guirá buñ sac nasacdxiich. Guirácano sacno ximig guirá buñ, né ximig Dios.

Eva bisian góc ximig Dios. Por ngú, ma nagann gocni par láabu nasanbu bada' né ma biob lainybu. Nigolú mal goyeeni layibu portín diti bisobdiitziyibu Jehová. Ni bunyibu, ¿ximod rabilo láani?

Goyo' xidal xiin buñguieeu né xiin buñgona' Adán né Eva. Órni gool primer xiinyibu golébu laa nde', Caín. Ni rarop xiimbu golébu laa Abel. ¿Nanlo xí gosaclo chop biinre' la?

Génesis 3:16-23; 4:1, 2; Revelación 21:3, 4.



# TOIB GÓC BUÑZAY NÉ TOIB GÓC BUÑ MAL

6

**N**IGORE' bibi' Caín né Abel. Guiropcabu ma nigox nacyibu. Caín ronybu dxiin ló layoo. Ragobu binii né rasaga'bu yac cuánnax ni ro buñ.

Abel ran xiil. Láabu rioladxbu ganbu xilieen. Guiráyimu ranisyimu né radxiin racyimu xiil nigox, né diti xidzú radalyimu né ma xidalmu rap Abel.

Goyo' toib dzú guiropcabu binéyibu ni biscatyibu Dios. Caín riné galrro ni láabu bidxi'pbu. Abel riné toib xilieen ni más móz nac ni napbu. Jehová rioladx ni rony Abel né ni láabu rascad. Per diti rioladxbu ni rony Caín né ni Caín riné. ¿Nanlo xigony la?



Ditini por ni más mós nac ni Abel riné que xtuny Caín. Portín Abel buñtzay láabu. Randxibu Jehová né buchbu. Per Caín mal nachu diti nadxibu buchbu.


Por ngú, Jehová góoch a Caín natzá mod ni nac. Per Caín diti golo' cuent. Cadzuitzgolúbu portín Dios golú Abel. Caín góoch Abel: Tzóno gui'ix laidy dainy. Ruc guiropsibu goyobu né cú Caín bunynaa láabu. Nadip bunynaa Caín láabu né goitybu. ¿Raluladxlo que ni Caín buny nigolú mal gocni la?

Ná Abel goity Jehová rasetnaladx láabu. Abel buñtzay gócbu, né Jehová diti rialadx buñ ni nac de clas cú. Por ngú, sadxin toib dzú que Jehová gony que Abel guibigué guibany stoib. Né dzúcu Abel ma diti saity.

Labúu sabanybu tipzó ló Gudxlio. ¿Diti galán ngú guimbuno buñ xomod láabu la?

Dios diti rioladx buñ ni rony xomod Caín. Órni Caín bigaity Abel, diti xidzú Dios buny castigar láabu, Dios bixel láabu sit de rono' xhomilbu. Caín sée salés stiplad né binébu toibtica bisanbu né nde' bidxin góe tzeelbu.

Goduidy dzú gosaló goyo' xiinyibu. Stipnés xiin Adán né Eva láaca bitzñayibu né goyo' xiinyibu. Diti xidzú gosaló bidal buñ ló Gudxlio. Guimbuno tipnésyibu.




# TOIB BUÑGUIEEU NI GOP BALORY 7

**Ó**RNI bidal buñ ló Gudxlio xidalyibu buny cós mal xomod Caín. Per goyo' toib buñguieeu ni diti góe xomod layibu. Góe laabu Enoc. Láabu gopbu balory. Buñ ni bigua' né láabu pór cós mal buny, per Enoc diti bisiambu de biambu Dios.

¿Nanlo xigony guirá buñ ni bibany dzúcu nigolú bunyibu cós mal la? Buny xpensarylo, ¿chú buny que Adán né Eva diti nasobdiitzyibu Dios né ñoyibu cuánnax ni Dios góoch layibu diti non guáyibu? Nde' góe toib ángel ni diti bisob Jehová. La Biblia rani' que ángel mal re' laabu Buñdzab. Rayobybu mod par gacno buñ mal.

Toib dzú Dios gochbu Enoc que guinibu toib diitz ni guirá buñ diti rioladx guicadiag. Enoc gochbu a guirá buñre': Guidxin dzú Dios guinitlo guirá buñ mal. Nde' sigory





bitzuitz guirá buñ ni bicadiag láabu. Sigory biyopyibu mod par nagaityibu Enoc. Por ngú, Enoc gócbu toib buñ ni nap balory par labúu guinibu ni gony Dios.

Dios diti biduidy lagary que Enoc nabany más xidzú toibsi né guirá buñ mal ni goyo' cú. Nosi bibanybu 365

íz. ¿Xigony ranino «nosi 365 íz»? Portín dzúcu goyo' buñ más nadip né bibanyibu más que ló xtzúno. ¡Scú láani, Matusalén xiin Enoc bibany 969 íz!

Órni ma goity Enoc, guirá buñre' bunyibu más cós mal. La



Biblia ná que guirá ni goyo' ló xpensaryibu pór mal gocni guirá ór. Ló Gudxlio goyo' pórsi cós mal.

¿Nanlo xigony goyo' xiro' gálnagan ló Gudxlio dzúcu la? Buñdzab no' ni biquiimbu né nde' biné layibu bunyibu cós mal. Guibino xi nde' buny Buñdzab.

Génesis 5:21-24, 27; 6:5;  
Hebros 11:5; Judas 14, 15.



**P**AL ño' toib buñ ni ñeet ro nóolo né guicbu nadxín guic yo', ¿xí ñonylo pensary órni nabilo buñ de clas cú? ¡Bay que toib buñ ni nigolú naso' né nadip láabu! Ló Gudxlio goyo' buñ de clas cú. La Biblia ná que ni góc bixiosyibu ngú ángeles ni no' lainy guibá. ¿Ximod góc guirá nde'?

Bisednaladx ángel ni diti bisob Dios ni laa Buñdzab golo'gulubu galnagan ló Gudxlio. Láaca bunybu que stipnés ángeles xtuny Dios ni dxiip lainy guibá ñony cós mal. Conformá dzú stipnés ángeles bicadiag láabu. Bisianyibu dxiin ni Dios biduidy layibu lainy guibá. Bietjyibu ló Gudxlio né gocyibu xomod buñgudxlio. ¿Nanlo xigony la?

La Biblia ná que bietjyibu né bibíbu guirá buñgona' móz ni goyo' ló Gudxlio né goniiny layibu nabesnéyibu guirá gona' re'. Por ngú, bietjyibu ló Gudxlio né bitzñayibu. Biblia ná que ni bunyibu mal gocni, portín Dios bisa' guirá ángeles re' par guibanyibu lainy guibá.

Órni ángeles re' goyo' xiinyibu né guirá buñgona' móz ni goyo' ló Gudxlio, gadzé clas buñ góc xiinyibu. Órni gocyibu bimbiox sigory gocyibu xomod cualquiersi mbiox. Conformá dzú gonísyibu né gocyibu buñxiblo, nadip gocyibu né bidxin gocyibu buñ naso' né góc laabu Nefilim.

Nefilim buñ mal gocyibu. Né como buñ naso' né buñxiblo gocyibu bunynaayibu buñ. Bunyibu que stipnés buñ ñac mal xomod layibu.

Enoc ma goity per goyo' toib buñguieeu ló Gudxlio ni góc buñtzay. Buñguieeu re' góc laa Noé. Láabu bunybu guirá ór ni Dios goniiny gonybu.

Goyo' toib dzú Dios gochbu Noé que ma bidxin ór que Láabu guinitlobu guirá buñ mal. Per Dios guilábu Noé né xhomil né xidal nimal. Guibino ximod bunybu guirá nde'.





**N**OÉ goyo' toib tzeelbu né tzón xiimbu. Xiimbu góe laa Sem, Cam né Jafet. Guionca xiimbu goyo' tze'el. Guirá family xtunybu gocyibu xhoon.

Dios buny que Noé nasa' toib cóe ni diti ma bibi' buñ dzúcu. Gochbu Noé nasa' toib arca rodann. Arca re' goci nirodann xomod toib bark o xomod toib caj rodann né si'ól. Dios góoch láabu: Buny láani de tzón píis, né bisa' cuart lainyni. Cuart cú góe par Noé né xhomilbu, par nimal né galrro par guiráyibu.

Dios gochbu Noé que nasa' tzaaybu láani par diti labúu ño' nis lainyni. Dios goní que guitébu toib guíerodann par guinitlobu buñ ni no' guidopynac ló Gudxlio, ni diti no' lainy arca cú saity.

Noé né guirá xiimbu bisobdiitzyibu ni ná Dios né gosalayibu bisa'bu arca cú. Per stipnés buñ cú nosi bixiich láabu. Diti bisianyibu ni nacyibu. Diti no' chú biluladx órni Noé goní ni Dios gony.





Arca re' nirodann gocni por ngú gócla par goya'ni. Goduidy xidal íz par bilox goya' tzaayni. Dzú ni ma biloxni, Dios gochbu Noé que nago'bu chop de tipnés clas nimal lainyni, toib ningol né toib nigona'. Stipnés clas nimal, Dios góoch láabu que nago'bu gatz. Láaca gochbu Noé que nago'bu lainy arca guirá clas nimal ni rasapy. Noé buny guirá ni Dios góoch láabu.

Órni ma bilox bunybu guirá nde' Noé né xhomil láaca goyoyibu lainy arca. Bilox gócl guirá nde' Dios bisieg xpuertni. Ma ni noyibu lainyni Noé né xfamily golésyibu. Buny pensary que looy nóolo lainyni né cabéslo. ¿Nigolú sieed toib guiérodann ni Dios goní la?

Génesis 6:9-22; 7:1-9.

**G**UIRÁ buñ ni bian fuer bibanyibu suusi antes. Diti ma ronyibu crer guieed toib guiérodann. Nigolú bixiichyibu de Noé, per galraxiich xtunyibu diti xidzú goclani.

Tisintiempsi gosaló biab guié. Biabni de guibá, xomod raxú buñ nís por cubet. ¡Guirá ni goní Noé nigolú gocni! Per ma diti no' chú labúu ño' lainy arca ni bisa' Noé, portín Jehová ma bisiegdxiich ro' xpuert arca cú.

Naguel rolach bidzaguelni de nís. Nís bixonyni xomod gu'uc ni siné siil nís. Golanyxanni yac, bituidydainyni guieerop né nigolú ruid bunyni. Buñ bidzuiby né bunyni que ñiápyibu laidy dainy ni más naso'. ¡Balaati goniiny layibu nacadiagyibu



Noé né ño'yibu lainy arca dzú xobialsani! Per nigore' ma goduidy ór.

Nís biápyni né biápyni más, cuarent dzú né cuarent goxin goyo' guié. Nís cú naguel biápyni né bunyni que guirá dainy ni más naso' bian lainy nís. Gocni xomod goní Dios, guirá buñ né nimal ni bian fuer goity. Per guirá buñ né nimal ni goyo' lainy arca cú bilaa.

Noé né guirá xiin bunyibu toib galán dxiin ni bisa'yibu arca. Nís cú golís arca re' né láani bisoblóni. Órni bilox góe guiérodann re' gosalo' biraa né gonaa lóo govitiz. ¡Móz bienni ór cú! Pórsi nís goyo' guirá lad. Nosi ni goyo' cú gocni arca ni casobló.

Ma diti goyo' buñ ni góe laa Nefilim. Ma diti sonyibu mal buñ stoib. Guiráyibu goity, né ni gosann layibu, né guirá buñ mal. ¡Xí góe né bixiosyibu?





Bixios guirá Nefilim re' diti gocyibu buñ xomod lóono. Nacyibu ángeles ni bietj ló Gudxlio né bibany xomod buñgudxlio. Por ngú, órni bidxin guiérodann re' diti goityibu xomod stipnés buñ.

Órni bieed guiérodann re' ángeles cú bisianyibu de gocyibu buñgudxlio né bibiguetyibu lainy guibá xomod ángeles. Dios ma diti biduidy lagary que ñacyibu ángeles xtunybu stoib, ma ángeles xtuny Buñdzab gocyibu. Biblia rimbu layibu demony.

Dios buny que toib buro'dant nalopy né nís ni bitné guiérodann re' gosaló bia'ach loni. Goduidy gáay be'o arca re' bia'nni laidy toib dainy. Goduidy xidal dzú, ni dxee lainy arca labúu bibi'yibu nisfuer né ma labúu bibi'yibu guic dainy. Nís gosaló bia'ach loni más.

Ór cú Noé bixel toib nimal ni rasapy ni laa bia'ij nare' lainy arca. Láamu gosapymu tiprat né bibiguwetmu stoib buelt portín diti goyo' lagary ro labúu ñanmu. Pór scú bunymu né rabiguwetmu rabubymu laidy arca.

Goniiny Noé gann pal ma bia'ach nís ló Gudxlio, por ngú, nigore' bixelbu toib palom ñée nabi'. Per palomien re' láaca bibiguwetmu portín diti bidzelmu lagary ro nabubymu. Noé bixel palomien re' rarop buelt, né láamu nigore' ma bibiguwetmu né tipla' guixien lainy bichogro'mu. Nigore' Noé gon que nís cú ma bia'ach loni. Noé bixel palomien re' ni rion buelt, né nigore' palomien re' ma bidzelmu lagary ro cuésmu.

Nigore' Dios goniné Noé: Bire' lainy arca looy né xhomilo né guirá nimal. Layibu goyoyibu lainy arca más de toib íz. ¡Bunysi xpensarylo balaati bibaladxyibu ni ma noyibu fuer stoib né nabanyibu!

## *Guiérodann hasta órni bire'yibu Egipto*

*Nosi xhoon buñ bilaa órni góc guiérodann, per diti xidzú iz bidxin gocyibu xidalguixo buñ. Abrahán gool 352 iz de goló biab guiérodann cú ló Gudxlio. Guisuidyno ximod Dios buny ni gonibu que Abrahán tzó toib xiin ni gac laa Isaac. De guirop xiin Isaac Dios golú Jacob.*

*Jacob gop toib family rodann, goyo' doce xiin buñgueeu né láaca tipnés buñgoná'. Chii xiin Jacob bianladxyibu buchbu ni más mbioxhlasien ni góc laa José, né bito'yibu José par ño' xan xomandary egipcios. Más xidzú José bidxin góc toib buñnan ni buny mandary Egipto. Órni bieed toib galsii, José golo' prueby a guirá buch par labúu ñanbu pal layibu ma bisian mod nac. Bidxin dzú guirá xfamily Jacob ni góc laa israelitas bidxinyibu Egipto. Guirá nde' gocni órni ma godudy 290 iz de goló gool Abrahán.*


*Guirá dzú ni bibany israelitas lainy gudx Egipto gocni 215 iz. Órni goity José goyo'yibu xan xomandary Faraón. Godudy xidal iz né Moisés gool, ór cú Dios biquiin láabu par gole' guirá israelitas xan xomandary guirá buñre'. Pal ragabno guirá iz re' rasa'ni 857 iz de historia ló Midid CHOP.*



¿NANLO xí ngú primer buny Noé né xfamily órni bire'yibu lainy arca la? Láabu no' ni biscatbu Dios. Bibi' ni cayonybu ló dibuj ni sieed lainy guet re'. Noé biscat nimal par guixquixbu Dios por ni bilaa xfamilybu de toib guiérodann.

Looy xí ronylo crer, ¿bioladx Jehová ni Noé biscat láabu la? Nigolú bioladx Jehová ni Noé biscat láabu. Por ngú Dios gochbu Noé que ma diti sanitlóbu Gudxlio né toib guiérodann.

Diti xidzú bibich nís ló guidopynac Gudxlio, né Noé né xfamily gosalayibu bunyibu dxiin dzú bire'yibu lainy arca. Dios biduidy xilaay layibu, né gochbu a Noé né xfamily: Tzó xidal xiinnto né guidalto ló guidopynac Gudxlio.





Per más xidzú, órni buñ guicadiag de guiérodann cú sigory sadzuiyibu que gacni stoib buelt. Por ngú, Dios no' ni biduidy par guibi buñ né guisetnaladx ni Dios goní que ma diti guitnébu stoib guiérodann. ¿Nanlo xí biduidybu par labúu guisetnaladxno láani la? Láani ngú toib bip.

Xidal buelt bip re' rienlóno láani órni rarecaa lóo Govitz órni ma bilox biab toib guiéyen. Bip rienni de xidal color sacroyen. ¿Ma bibilo toib bip toibtica buelt la? ¿Rabilo bip ni caa ló dibuj re' la?

Nde' ni Dios goní: Na' radudi xtiidza diti sanitlóya guirá buñ né nimal né toib guiérodann. Cayoni que bip tzóni ló xcaay né órni bip guiré loni ló xcaay, na' guisetnaladxi que goniya diti sanitlóya Gudxlio stoib né guiérodann.

Por ngú, órni guibilo toib bip, ¿xí guisetnaladxlo? Láani ni Dios goní, que láabu ma diti sanitlóbu Gudxlio né toib guiérodann.


# BUÑ RASA' TOIB TORRE NASO' 12

**G**ODUDY xidal íz, xiin Noé goyo' xidal xiin. Né xiin xiimbu gonís né láaca goyo' xidal xiin. Diti xidzú bidal buñ ló Gudxlio.

Toibtica biinre' góe xiin xiac Noé, ni góe laa Nemrod. Láabu nigolú buñ mal góebu, gonasbu né bigaitybu mainygui'ix né láaca gonasbu né bigaitybu buñ. Nemrod láaca nigolú buny mandarybu stipnés buñ. Dios diti bioladx ni buny Nemrod.

Guirá buñ ni goyo' dzúcu toibsi diitz goníyibu. Nemrod goniiny láabu que guirá buñ nagua' toibsi lagary, par scú láabu ñony mandarybu guirá buñ. Por ngú, ¿nanlo xí bunybu la? Gochbu a guirá buñ, que ñonyibu toib gudx né nasa'yibu toib torre naso' lainy gudxcú. Ló dibuj re' rabilo layibu cayonyibu basoyáay.


Jehová diti bioladx ni bisa' guirá buñ toib torre naso'. Láabu goniiny que guirá buñ ñée stiplad par nabanyibu ló guidopynac Gudxlio. Per layibu goníyibu: Gonyno toib gudx né toib torre naso' ni guidxin guibá. ¡Par que stipnés guidziguia' lóono! Goniiny layibu que stipnés buñ nasanadx layibu, né diti a Dios.



Por ngú, Dios buny que nasianyibu de nasa'yibu toib torre naso'. ¿Nanlo ximod buny Dios láani la? Bunybu que tisintiyibu buñ goní xidal clas diitz ni diti goyo' ló dzúcu, né ma diti goníyibu toibsi diitz. Ma diti bienyibu xí diitz ni goníyibu. Por ngú, gudx re' góc laa Babel o Babilonia ni rarexa «Bidza' diitz».

Nigore' gosalogyibu birezlasyibu de Babel. Gosaló bitop sa' guirá ni rani' toibsi diitz né séeyibu salésyibu stoib lagary ló Gudxlio.

Génesis 10:1, 8-10; 11:1-9.





**T**OIB lagary ro buñ sée salés órni godudy guiérodann cú góc laa Ur. Gudx Ur bidxin góc toib gudx ni gop pór yo' móz, ni xidal buñ bimbu. Buñ ni golés cú pór dioxh falz bienyibu. Scúca bunyibu dzú bigua'yibu Babel. Buñ gudx Ur né de Babel diti gochybu xomod Noé né Sem, ni bisob ni ná Jehová.

Godudy 350 íz ni góc guiérodann, Noé ni buny ni ná Dios goity. Nosi chop íz godudy gool buñguieeu ni rabilo ló dibuj re'. Láabu gócbu toib buñ ni Dios gondxi'. Góc laabu Abrahán. Láabu golés né xfamily lainy gudx ni góc laa Ur.

Goyo' toib dzú Jehová gochbu a Abrahán: Bisian Ur né xfamily né goyee stoib gudxrop ni guilooya looy. ¿Bisobbu Dios né bisiambu Ur gudx móz ro golesbu sacró la? Bunybu láani, Abrahán guirá mod bisobbu Jehová por ngú góc laabu ximig Dios.

Abrahán né tidxo xfamily bisiambu gudx Ur. Ni buny compañer láabu ngú Sara tzeelbu, bixiosbu Taré né xiacbu Lot. Godudy dzú, bidxinyibu toib lagary ni góc laa Harán, né lagarycu goity Taré bixios Abrahán. Sit goyo'yibu de Ur.

Abrahán né guirá ni golés né láabu bire'yibu de Harán né bidxinyibu toib lagary ni góc laa Canaán. Cú Jehová goní: Lagary re' guidudi looy né xiinlo. Abrahán bia'anbu Canaán né golésyibu lainy yo' lairy.

Dios gosaló gocnébu Abrahán né nde' bidxin gop xidalguixo xilieen né stipnés nimal né láaca xidal mós gopbu. Per láabu né Sara diti goyo' xiinyibu.

Órni Abrahán gop 99 íz, Jehová góoch láabu: Na' radudi xtiidza, sadxinlo saclo' bixios de xidal gudx de buñ. Per ¿ximod ñac guirá nde'? ¿Labúu ño' xiin Abrahán né Sara ná ma buñgol layibu la?

# DIOS RAGO' PRUEBY FE XTUNY ABRAHÁN

¿RIENLÓLO xí cayony Abrahán la? Ca'bu toib gudxil ñabu né ralooypani guigaitybu xiimbu. ¿Nanlo xigony la? Primer guibino ximod Abrahán né Sara labúu goyo' xiinyibu.

Bisednaladx, Dios góoch layibu que sio' toib xiinyibu. Per nde' nagann gocni par layibu portín Abrahán né Sara ma buñgol nacyibu. Per Abrahán biluladxbu que Dios labúu rony cós que par lóono nagann. Por ngú, ¿xí láani góc?

Órni Dios goní guirá diitzre' godudy toib íz. Órni Abrahán bidxin ló 100 íz né Sara 90, gopyibu toib bada' ni góc laa Isaac. ¡Dios buny cumplir xtiitz, que ño' toib xiinyibu!

Órni Isaac gonís né gop más íz, Jehová golo' prueby fe xtuny Abrahán. Bica'bu rudx: ¡Abrahán! Né Abrahán cuapy: ¡Re' no'ya! Ór cú Dios goní: Cua' xiinlo toibguielot ni naplo, Isaac, né goyee dainy ni guilooya looy. Cú bigaity xiinlo né biscat láabu na'.

Abrahán nigolú nabann gosacbu portín gondxigolubu xiinga'nbu. Per bisednaladx Dios goní que guirá xiin Abrahán nalésyibu lainy gudx Canaán. ¿Ximod ñac nde' pal Isaac ñaity? Abrahán diti biembu xigony Dios buny nde', ná scú gocni láabu bisobdiitzbu Dios.

Órni bidxinbu dainy cú, Abrahán bilipbu né godi'xbu Isaac ló toib lagary ni bunytzaaybu né guiee. Ór cú golébu gudxil par guigaitybu xiimbu. Órcuca ángel xtuny Dios bicarudx láabu: ¡Abrahán, Abrahán! Né Abrahán cuapy: ¡Re' no'ya!

Dios goní: Diti gonyنالo xiinga'nlo. Nigore' ma naana que naplo fe na', portín diti biaalo xiinlo toibguielot ni naplo par naduidylo láabu na'.

¡Nigolú xiro' fe gop Abrahán lóo Dios! Biluladxbu que diti no' cós nagann par Jehová, né que Jehová labúu salís Isaac lad buñ ni ma

goity. Per Dios diti goniiny láabu nagaity Abrahán Isaac, bunybu que toib xilieen ñag lad toib bidzony gahxca ronoyibu né gochbu Abrahán que nagaitybu nimalien cú xalagary Isaac.

Génesis 21:1-7; 22:1-18.





**L**OT né xfamily golésyibu toibsi né Abrahán lainy gudx Canaán. Toib dzú Abrahán gochbu Lot: Yadi xiro' layoo par ximalno. Ma diti guigua'no toibsi lagary. Pal looy tzélo lad re' na' tzaaya stiplad ruc.

Lot bibi' lagarycu. Bibi'bu que xiro' lagary de gudxcú sacroyen nacní no' nís né no' guix par guá ximalbu. Nde' góc Rolo Jordán. Por ngú Lot biné xfamily né ximal lagarycu né diti xidzú bisa'bu lidxbu lainy gudx, Sodoma.

Buñ ni bibany Sodoma nigolú buñ mal gocyibu. Nde' nigolú bitzuitzni Lot portín láabu buñtzay gócbu. Nde' láaca bitzuitzni Dios. Por ngú Dios bixel chop ángeles par tzaguny abís Lot,



que guinitlóbu Sodoma né toib gudx ni goyo' gahx ni góc laa Gomorra, portín buñ ni golés lainy gudxcú nigolú mal gocyibu.

Chop ángeles re' gochyibu Lot: ¡Naguelsi né biob! ¡Cua' tze'el lo né guiropca xiindzaplo né bire' de lagary re'! Lot né xfamily cayaclayibu, por ngú chop ángeles re' godabioo ñayibu né gole' layibu lainy gudxcú. Ór cú toibtica ángeles goní: ¡Colguixony par guilaato! Diti guidxiguet lóto. Colguixony sit gu'ixlas par diti gaityto.

Lot né guiropca xiindzap bisobdiitziyibu né bire'yibu de Sodoma. Diti golés bixonyibu ni tiprat, né diti bidxiguet lóoyibu. Per tze'el Lot diti bisobdiitz. Órni ma golsityibu, tze'el Lot gosaga' né bidxiguet lóo, órcuca tze'el Lot bidxin góc toib pilary de suudy. ¡Labúu rabilo láabu ló dibuj re' la?

De guirá nde' no' ni rasuidyno: que Dios ralaa a ni rasobdiitz láabu, per ni diti rasobdiitz láabu raity.

Génesis 13:5-13; 18:20-33; 19:1-29; Lucas 17:28-32; 2 Pedro 2:6-8.




# TOIB GONA' TZAAY NI GUICA' ISAAC

16

¿RIMBULO gona' ni no' ló dibuj re' la? Laabu Rebeca. Né buñguieeu ni cabés láabu ngú Isaac. Gona' re' guidxin gac tzeelbu. ¿Nanlo ximod gocni par naca' sa'yibu la?

Guibino guidoni, Abrahán bixios Isaac goniiny láabu que tze'el xiimbu ñac toib gona' tzaay. Diti goniiny láabu naca' Isaac toib buñgona' de Canaán, portín buñre' dioxh falz bieenyibu. Por ngú, Abrahán góoch



toibtica xomós: Nainy na' que guibigueto rono' xfamily gudx Harán né guitnélo toib buñgona' par gac tze'el Isaac.

Órcuca xomós Abrahán cua' chii camey né gonás néz sée. Órni mápa guidxinbu ro rabés family xtuny Abrahán, bisagadzubu ro' toib pós. Mápa godzuda' láani, órni guirá buñgona' riée ratuidy nís ro' pós. Por ngú, xomós Abrahán gonab lóo Jehová: Buñgona' ni cué nís par na' né guirá camey ni sitnéya láabu ngú ni looy cabúlo par gac tze'el Isaac.

Ór cú Rebeca bidxin par cué nís. Órni xomós Abrahán gonab tidxo nís láabu par gue', láabu biduidybu nís go' xomós Abrahán. Ór cú láabu gosalobu golébu siil nís par guirá camey ni sitné xomós Abrahán ni calangulu nís. Nadip bunybu dxiin portín guirá camey nigolú nadip re'mu nís.

Órni Rebeca bilox, xomós Abrahán gonabdiitz láabu ximod laa bixiosbu. Láaca gonabdiitzbu pal labúu nadudybu gue'el rio' lidxyibu. Rebeca cuapy: Bixiosa ngú Betuel, né rio' no' lagary par guia'anlo. Xomós Abrahán ma nambu que bixios Betuel góe laa Nacor, nde' góe buch Abrahán. Por ngú, bixixipbu né biduidybu guixquix Jehová portín Jehová biné láabu rono' stipnés family xtuny Abrahán.

Goxin cú xomós Abrahán gochbu Betuel bixios Rebeca né Labán bisan Rebeca xigony no'bu cú. Guiropyibu goníyibu que labúu tze Rebeca par gony galtze'el né Isaac. Gonabdiitziyibu Rebeca, ¿náni looy tzélo né láabu la? Rebeca goní, que nainy láabu tzébu. Por ngú, stoib dzúcu gonásyibu néz né cua'yibu camey par cubiyibu ló néz né bibiguetyibu Canaán.

Órni bidxinyibu ma gue'el láani, ór cú Rebeca bibi'bu toib buñguieeu ni casaa lainy gui'ix. Láabu ngú Isaac né nigolú bibaladxbu órni bibi'bu Rebeca. Xina'bu Sara pénsa bisa' tzón iz de goló goity, por ngú, láabu nabann no'sabu. Per nigore' Isaac gosalo gondxigolubu Rebeca né bibaladxbu stoib.


# CUACH NI DITI GÓC TOIBSI CLAS 17

**M**BIOXHLAS ni rabilo re' diti toibsi clas buñ nacyibu. ¿Nanlo ximod góC laa guiroPCA mbioxhLAS ca la? Ni bigaity mainy gu'ix láabu ngú Esaú, ni ran cú xilieen ngú Jacob.

Esaú né Jacob nacyibu xiin cuach Isaac né Rebeca. Isaac bixiosbu, bioladx guirá mod ni buny Esaú portín láabu bigaitygolu'bu mainy gu'ix né bitnébu galrro par guáyibu. Rebeca gondxibu más Jacob portín Jacob góC buñdzuu né buñtzay.

Bixiogolbu Abrahán nabanySA, por ngú, labúu gonyno xpensaryno que órni Abrahán goní de Jehová, Jacob bioladx né bicadiag. Abrahán goitybu órni bisa'bu 175 íz, par dzúcu chop cuach re' ma nap 15 íz.

Órni Esaú bisa' 40 íz bitzñabu né chop buñgona' de gudx Canaán. Nde' buny que Isaac né Rebeca ño' nabann, portín chop buñgona' re' diti buny adoraryibu Jehová.



Goyo' toib dzú no' ni buny que Esaú bidzuitzné buch Jacob. Bidxin dzú ni ma guiduidy Isaac laay xiin lagol. Esaú golés laay cú portín láabu lagol ló Jacob. Per Esaú nír bito'bu láani cua' Jacob, laay ni non naca'bu. Dzú ni yása gályibu Dios goní que Jacob ngú ni non guica' laay cú. Né scú gocni, Isaac biduidybu laay cú cua' Jacob.

Órni Esaú gon nde' bidzuitznébu Jacob. Nigolú bidzuitzbu né gonfibu guigaitybu Jacob. Órni Rebeca gon nde' biduidyni galrasa' láabu. Por ngú, gochbu Isaac ni nac tzeelbu: Nigolú guio'opni lóono pal xiinga'nno Jacob gotzña né toibtica buñgona' ni nac de Canaán.

Por ngú, bixelca'bu né gochbu a xiinga'nbu Jacob nde': Diti guica'lo toib buñgona' de gudx Canaán. Más galán ngú, goyee ro rabés bixiogol lo Betuel ni no' gudx Harán. Bitzña né toibtica xiac Betuel xiindzap Labán.

Jacob bisobdiitz ni góoch bixiosbu láabu né goyo'bu néz né séebu ro rabés xfamilybu gudx Harán.

Génesis 25:5-11, 20-34; 26:34, 35;  
27:1-46; 28:1-5; Hebreos 12:16, 17.



¿NANLO chú layibu ni caniné cú Jacob la? Ma xidal dzú de goló casaa Jacob bidzel layibu gahxca ro' toib pós. Layibu cayanyibu xiil, né Jacob gonabdiitz layibu: ¿De chú gudx lóoto?

De gudx Harán, cuapyibu.

¿Rimbuto Labán la? Gonabdiitz Jacob.

Rimbudo, cuapyibu. Bibi', ca sieed xiindzapbu Raquel né guirá xilieen xtunybu. Looy, ¿labúu rabilo Raquel cabigax la?

Órni Jacob bibi' guirá xilieen xtuny bixiobu Labán ni sitné Raquel, goyebu né golébu guiee ni náaxh ro' pós par labúu gue' guirá xilieen re' nís. Ór cú Jacob biduidy toib bixit Raquel né gochbu Raquel que bixiosbu laa Isaac né láabu ngú Jacob. Raquel nigolú bibaladx, goyee cabu lidxbu né gochbu bixiosbu Labán xí gosaclobu.


Labán bibaladx que Jacob ña'an riolidxbu. Labán bibaladx órni Jacob góoch láabu que nainy guica'bu Raquel. Per Labán gonab a Jacob que



par labúu guica'bu Raquel napbu xi de gonybu dxiin ló xalioo Labán gatz íz. Jacob buny láani portín nigolú gondxibu Raquel. Per órni bidxin dzú par gotzñayibu, ¿nanlo xí góc la?

Labán diti biduidybu Raquel naca' Jacob napli Lea xiin lagolbu biduidybu Jacob. Órni Jacob gosaguel gony dxiin gatz íz más né Labán, láabu láaca biduidybu Raquel xiindzapbu par guidxin gac tzeelbu. Dzúcu Dios raduidybu lagary que buñguieeu labúu gotzña né más de toib buñgona'. Per ló xtzúno, xomod rasuidy la Biblia, buñguieeu non gony galtze'el né toibsi buñgona'.

Génesis 29:1-30.







¿RABILO guirá xiin Jacob ni no' ló dibuj re' la? Layibu ngu doce mbiox ni bidxin góe xiin Jacob. Per láaca goyo' xiimbu ni góe buñgona'. ¿Nanlo ximod laayibu la? Guisuidyno de layibu.

Lea gosambu Rubén, Simeón, Leví né Judá. Órni Raquel biduidy cuent que diti cayo' xiimbu bisac nabambu. Por ngu, biduidybu xcriatbu Bilhá a Jacob, né Bilhá goyo' chop xiimbu ni góe laa Dan né Neftalí. Ór cú Lea láaca bunybu scúca biduidybu xcriatbu ni góe laa Zilpá a Jacob, né Zilpá gosambu Gad né Aser. Lea láaca goyo' más xiimbu nde' góe laa Isacar né Zabulón.

Bidxin dzú ma labúu goyo' toib xiin Raquel, golébu laa nde' José, ló historia ni sietra guisuidyno más de José, portín láabu bidxin góebu toib buñxirop. Guiráyibu góe once xiin Jacob ni gopbu, órni no'bu né Labán bixios Raquel.

Jacob láaca goyo' xiimbu buñgona', per la Biblia nosi laa toibticabú rasetlaa, láabu góe laa Dina.

Bidxin dzú Jacob bisiambu Labán né bibiguetbu Canaán. Bitopbu xfamilybu né guirá xilieen né guirá clas nimal ni gopbu né gonasbu néz séeyibu.

Órni ma bibiguetbu Canaán, Raquel gosann stoib bada'. Nde' gocni órni no'bu ló néz. Por ni diti labúu gosann Raquel bada' re' sacró, goitybu. Per bada'yen cú nasac gool. Né Jacob gole' laabu Benjamín.

Guisetnaladxno laa doce xiin Jacob portín guidopy gudx Israel bieed de layibu. Scú láani doce family xiro' ni goyo' Israel sinéni laa chii xiin Jacob né chop xiin José. Isaac bibanybu más íz de goló gool guirá mbioxtee re', né bibaladxbu ni goyo' xiacbu. Guibino xi gosaclo xiacbu, Dina.



¿RABILO chù layibu sée Dina saguen la? Láabu sée saguen chop tzón mbioxhlas ni rabés lainy gudx Canaán. Pal Jacob nabi' ni cayony Dina, ¿ñoladxbu la? Ni labúu gacné looy guicapyllo diitzre' láani ngú guisetnaladxlo ni Abrahán né Isaac buny pensary de guirá buñgona' de gudx Canaán.

¿Goniiny Abrahán que xiimbu Isaac naca' toib mbioxhlas de Canaán la? Yaca. ¿Goniiny Isaac né Rebeca que xiimbu Jacob naca' toib mbioxhlas de Canaán la? Yaca. ¿Nanlo xigony la?

Nde' gocni portín guirá buñ de Canaán pór dioxh falz bienyibu. Diti gocyibu buñguieeu né buñgona' tzaay par gacyibu tze'el buñ, né láaca par gacyibu ximigdxin buñ. Por ngú labúu guinino que Jacob diti ñoladxbu que xiindzapbu ñac ximig mbioxhlas ni no' lainy gudx Canaán.

Dina riab ló galnagan. ¿Labúu rabilo ló dibuj buñguieeu de Canaán ni cabí a Dina la? Laabu Siquem. Toibtica dzú órni Dina goyee biguen guirá mbioxhlas de Canaán, Siquem gonás lafuers né gotné láabu. Ni bunybu mal gocni portín nosi buñguieeu né buñgona' ni nac tze'el ngúsi labúu ratné sa'. Cós mal ni buny Siquem a Dina gole'ni xiro' galnagan.

Órni bisan Dina gon guirá ni góc, nigolú bidzuitzyibu. Chop de layibu Simeón né Leví, nigolú bidzuitz né binéyibu toib espad ni nac xomod machet né bio'yibu tisintieemp lainy gudxcú. Simeón né Leví né buchyibu bigaityibu Siquem né guirá buñguieeu ni no' né láabu. Guirá cós mal ni buny xiin Jacob nigolú bitzuitzni bixiosbu.

¿Ximod gosalo guirá galnagan re'? Nde' góc portín Dina bidzak né guirá buñ ni diti bisob ni ná Jehová. Lóono diti guiypopyno buñ de clas cú.

**¡BIBI'** mbioxhlas re' nigolú nabann no'bu, ma diti no' ni gacné láabu! Láabu ngú José. Tipnés buchbu mer ma bito' láabu né buñ ni sée Egipto. Lagary re' José sadxin sio' xan xomandary buñre'. Buch José, ¿xigony bunyibu cós mal re' ni bito'yibu buchbu? Portín radzuitzyibu José.

Bixiosyibu Jacob gondxigolubu José. Portín godibbu toib lairyol móz par José. Órni chii buch lagolbu bibi' ximod nadxi Jacob láabu, gosaló bidzuitznéyibu né bianladxyibu José. Per láaca goyo' stoib razón por ni bianladxyibu buchbu.

José goní xca'albu chop buelt. Ló chop buelt ni goní xca'albu bibi'bu guirá buchbu caxixip nislóbu. Per galrrianladx ni gop buchyibu gocxiro'ni más, órni José góoch layibu xi ni goní xca'albu.

Toibtica dzú, órni guirá buch lagolbu dxee cayap xiil, Jacob ranab José tze tzáguen pal labúuga dxee buchyibu. Órni buchyibu rabí que José cabigax, tipnéyibu goní: ¡Guigaityno láabu! Per Rubén ni lagol ló guiráyibu, goní: ¡Yaca, diti gonyto nga! Lagary de ñonyibu ngú rago'yibu José lainy toib pós bich. Ór cú ragua'yibu rooyibu diitz ximod gonyibu né José.

Cusadxeyibu godudy tipnés buñ ismaelitas. Judá raiby a buchyibu:




Guito'no láabu né buñre'. Né ngú ni bunyibu. ¡Bito'yibu José por 20 nilas ni góe de plata! ¡Ni bunyibu nigolú mal gocni portín diti gopyibu galronladx!

Nigore' guirá buch lagol José, ¿xí gaibyibu bixiosbu? Ragaityibu toib chiv né rago'bu xidal buelt xhap móz yo'ol José lainy runy. Ór cú rinéyibu xhap móz yo'ol José rono' bixiosyibu né raniyibu: Bidzeldo nde', bibi' né gon pal diti xhap José láani.

Jacob raduidy cuent que ngú láani. Rani' ribdxa'bu: Toib nimal gui'ix bigaity José. Buch José scú nayibu que bixiosbu gony xpensary. Nigore' Jacob nigolú rio' nabann né ribdxa'gulu por xidal dzú. Per José diti nigolú goity, guibino xi rascalobu ro radxinbu.

Génesis 37:1-35.



**J**OSÉ nap diecisiete iz órni no' ni siné láabu Egipto. Lagarycu rasi' toib buñguieeu láabu, ni laa Potifar. Potifar rony xchiin ni rony mandary Egipto ni góc laa Faraón.


Nadip rony José dxiin par xpixuanbu, Potifar. Por ngú órni José gop más iz, Potifar rasian lidx xcuent José. Per ¿xigony biab José press? Láani ngú xtol tze'el Potifar.

Órni José ranís radxinbu racbu toib buñguieeu móz, tze'el Potifar nainy láabu que José gatné láabu. Per José nann que pal gonybu nde' mal láani, né diti rasaguelbu. Tze'el Potifar radzuitzgulu. Por ngú órni tzeelbu radxiin rio' ron'bu láabu rascúbu né ranibu: ¡José buñ mal láabu buny lafuersbu na' par ñatnéya láabu! Potifar raluladx ni raiby tzeelbu láabu, né radzuitznébu José. Por ngú rasalbu José press.

Ni ran lainy press cú raduidy cuent que José nigolú buñtzay láabu. Por ngú ronybu que José gacné láabu gann a guirá ni no' press. Godudy dzú Faraón bidzuitz né ni rago' ni re'bu né láaca bidzuitzbu né ni gole' xpáabu, né rasalbu chop biinre' press. Toibtica gue'el, cada toib biinre' goní toib xca'alyibu ni diti bienyibu. Pero diti gonyibu ximod rarexa ni goní xca'alyibu. Raraa stoib gue'el cú José raiby layibu: Colgaiby na' xí goní xca'alto. Né ór cú José né galnani xtuny Dios, rabexa xí láani ngú goní xca'alyibu.

José raiby a ni rago' ni re' Faraón: Ló tzón govitz ma sare'lo press, né sago'lo ni gue' Faraón stoib. Por ngú, José raiby láabu: Órni ma bire'lo, goní de na' nisló Faraón, né gocné na' par guiréya re'. José raiby a ni gole' xpáa Faraón: Ló tzón govitz Faraón guigaity looy.

Ló tzón govitz rac guirá ni goní José. Faraón ragaity ni rabe' xpáabu, per ni rago' ni re'bu rabébu ngú press né rasaló rony xchiimbu stoib. ¡Per ni rago' ni re' Faraón rialadxbu José! Diti ranibu xitcal de José nisló Faraón, né por ngú José diti rare'bu press.





**M**A GODUDY chop íz né José no'sabu press. Né ni rago' ni re' Faraón digundi guisednaladxbu José. Ór cú toibtica gue'el Faraón rani' xca'al chop buelt ni diti biembu, né diti nambu ximod rarexani. ¿Rabilo láabu natiasybu ca la? Órni raraa gue'el raxelca'bu guirá buñnan, né ranibu xí goní xca'albu. Per layibu diti labúu raibyibu a Faraón ximod rarexa baca'al re'.

Nigore' buñguieeu ni rago' ni re' Faraón rasetnaladxbu José. Raiyibu Faraón: Órni na' goyo'ya press goyo' toib buñguieeu ni labúu rabexa baca'al. Ór cú Faraón rabébu José press.

Faraón gochbu José xí goní xca'albu:  
Bibi'ya gatz vac nadann móz. Né láaca  
bibí'ya gatz vac ni nigolú naguitz. Né guirá  
vac guitz godaibymu guirá vac nadann.



Né ni rarop ni goní xca'ala láaca bibi'ya gatz doo mbochdot né niguyaa ni canís laidy toibsi yac. Ór cú bibi'ya gatz doo ni bársi nac né nabich. Né gatz doo ni bársi nac godaibyni a gatz doo mbochdot cú.

José raibybu Faraón: Guiropca baca'al re' toibsi mod rarexani. Gatz vac nadann né gatz doo mbochdot rarexani gatz íz, né gatz vac naguitz né gatz doo ni bársi nac láaca rarexani gatz íz. Gatz íz sio'golu galrro lainy gudx Egipto né gatz íz sio' govinn galrro.

Por ngú, José raibybu Faraón: Golú toib buñguieeu ni nigolú nann né biduidy dxiinre' láabu par guitopbu galrro ló gatz íz ni sio'golu ni guá buñ. Ór cú buñ diti saity de galrralán órni guidxin gatz íz de govinn galrro.

Faraón rioladx ni raiby José láabu. Né golúbu José par guitop xiro' galrro. José ngú ni canal xiitz Faraón ni nac buñxirop lainy gudx Egipto.

Radudy xhoon íz, galrralán má gosaló, ór cú José rabí tipnés buñguieeu ni sieed rono'bu. ¿Nanlo chú layibu la? ¡Layibu ngú chii buch lagolbu! Jacob, bixiosyibu bixel layibu Egipto portín ma cará galrro lainy gudx Canaán. José bimbu guirá buch, per layibu diti bimbuyibu José. ¿Nanlo xigony la? Portín José ma nigox nac né ma gadzé clas lairy nócbu.

José rasetnaladx dzú nacbu mbioxien goní xca'albu que guirá buchbu sieed caxixip nislóbu. ¿Rasetnaladxlo órni bíil lo de láani la? Por ngú José raduidy cuent que Jehová bixel láabu Egipto, né por toib razón galán. ¿Nanlo xí rony José la? Guibino guidoni.




**J**OSÉ nainy láabu gann pal chii buchyibu nac buñtzay né napyibu galronladx. Por ngú ranibu: Lóoto galrolachsi sieedto par guibíto pu lagary diti raquiin xcudxdo.

Layibu racapyibu: Yaca diti sieldo por ngú. Lóodo nacdo buñtzay. Guirádo buchdo sa'do. Primer gócdo doce per toibbu ma diti no' né lóodo, né ni más mbioxhlasien bian rio' né bixiosdo.

José rony sani diti raluladx layibu. Ronybu que Simeón rian press, né raduidybu lagary que stipnés buchyibu riné galrro lidxyibu a Canaán. Per raibybu a guirá biinre': Órni guibiguetto stoib, guitnéto buchto ni nac más mbioxhlasien né lóoto.

Órni rabiguetyibu lidxyibu lainy gudx Canaán, buch José raibyibu



a Jacob guirá ni gosacloyibu. Jacob no' nabann né gonibu: José ma diti no' né na' né nigore' Simeón láaca ma diti no' né na'. Diti guiduidy lagary tzanéto Benjamín xiinga'na ni más mbioxhlasien. Per órni ma cará galrro ni napyibu, Jacob nap xi de guiduidy lagary que tzanéyibu Benjamín a Egipto par labúu guitnéyibu más galrro.

Nigore' José rabíbu que buchyibu sieed ronó'bu. José rabaladx órni rabíbu buchienbu Benjamín ni más mbioxhlasien. Ni toibyibu raduidy cuent que buñxirop ni rony nde' ngú José. José nigore' no' ni rony par co' prueby a chii buch.

José rony que guirá xomósbu rastzaa de galrro sac xtunyibu. José diti raset ni gonybu, nosi ronybu que xomósbu, co' copa de plata xtunybu lainy sac xtuny Benjamín. Órni ma golsityibu tidxo ló néz José raxel tipnés xomós tze tzágal layibu. Órni rigalyibu guirá buch José, xomós José raiby layibu: ¿Xigony golannto copa de plata xtuny xpixuando?

Layibu cuapyibu: Diti golanndo copa xtuny xpixuanto. Pal guidzelto que toibtica de lóodo napdo láani, labúu guigaityto ngú.

Por ngú, guirá xomós José rayopyibu lainy guirá sac xtuny buch José, né radzelbu copa xtuny José lainy sac xtuny Benjamín, xomod rabilo ló dibuj re'. Xomós José raiby a guirá buch José: Lóoto labúu guibiguetto, per Benjamín non guieed né lóodo. ¿Xí gony guirá chii buch José nigore'?

Guiráyibu rabiguetyibu né Benjamín lidx José. José nigore' raiby a guirá buch: Guiráto labúu guibiguetto lidxto, per Benjamín guía'an par tzó xan xomandari.

Nigore' Judá rani': Pal na' rabigueta sin Benjamín, bixiosa gaity, portín láabu nigolú nadxibu Benjamín. Por ngú, ranába lólo, biduidy lagary na' guía'ana tzóya xan xomandarylo né biduidy lagary guibiguett buchienna.

José raduidy cuent que ma bisianyibu mod ni gocyibu. Ma nacyibu buñtzay né napyibu galronladx. Guibino nigore' xí rony José.

**J**OSÉ ma diti labúu rony guantary más, né raibybu guirá xomósbu guiré rono'bu. Órni ma no'bu toibsi né buchyibu, José rasaló ribdxa'. Labúu gonyo xpensaryno ximod bidziguia' guirá buchyibu, portín diti nanyibu xigony ribdxa' José. Nigore' José rani': Na' ngú José. ¿Nabanyasa bixiosa la?

Guirá buchyibu radziguia' láabu né diti radzel xi guini'yibu. Radzuibyibu. Per José ná: Ranába lóoto, golta' colguibig rono'ya. Órni ronyibu láani, ranibu: Na' nga bucho José, ni bito'to Egipto.

José rani' nadadiguié' né layibu: Diti guigotzto dool saato ni bito'to na' re'. Dios ngú ni bixel na' Egipto par guilaa buñ. Faraón buny que na' gony mandary guidopy gudx re'. Por ngú colguibiguet ni maca rono' bixiosa né colgaiby láabu guirá ni ma bibi'to. Né colgaiby láabu guieedbu cuésbu re'.



Ór cú José ragu'uch né raduidy bixit a guirá buch. Órni Faraón racadiag que guirá buch José bieed, raibybu José: Ca no' carret, biquiin láani par guitnélo bixioslo né xfamily par guidxinyibu re'. Guidudi layibu layoo ni más galán nap Egipto.

Ngú ni bunyibu. Re' labúu rabilo José cani' diohx bixios órni bixiosbu bidxin Egipto né guirá xfamily.


Xfamily Jacob nigolú ma bidalyibu. Órni bidxinyibu Egipto nacyibu 70, Jacob né guirá xiin né xiac. Per né láaca bidxinébu guirá tzeelbu, né láaca guirá xomósbu. Guiráyibu gosalo golésyibu lainy gudx Egipto. Góc laayibu israelitas, portín Dios bitzá laa Jacob né gole' laabu Israel. Bidxin gocyibu toib gudx ni Dios gondxigolu, xomod guisuidyno ló historia ni sietra.

Génesis 45:1-28; 46:1-27.



¿XÍ RASACLO' órni rabilo buñguitz ni no' ló dibuj re'? Laabu Job, né buñgona' ni no' né láabu ngú tzeelbu. ¿Nanlo xí cayaibybu Job la? Láabu cayaibybu Job: Goní mal de Dios né goity. Guibino xigony goníbu diitz mal re', né xigony Job nigolú godudy ló galnagan.

Job bisobbu né bunybu guirá ór ni ná Jehová. Láabu golesbu lainy toib gudx ni góc laa Uz, ni goyo' gahx de Canaán. Jehová nigolú gondxibu Job, per goyo' toib ni bianladx láabu. ¿Nanlo chú ngú ni bianladxgulu a Job la?



Nde' góc Buñdzab. Bisednaladx, Buñdzab ngú toib ángel ni rianladx a Jehová. Láabu bunybu que Adán né Eva diti nasobyibu Jehová, né xpensarybu ngú que guirá buñ scúca ñony. Per ¿birebu' ni goní Buñdzab la? Yaca. Bunysi xpensarylo, guirá buñguieeu né buñgona' ni ma bisuidyno ni buny ni ná Dios. ¿Balacyibu labúu guisetlalo?

Dzú ni Jacob né José goity lainy gudx Egipto, Job bidxin góc toib ni más buny ni ná Jehová ló guidopynac Gudxlio. Jehová gochbu Buñdzab: Bibí Job. Láabu ngú toib buñ ni nigolú rony ni raabi. Né diitzre', Jehová bislooy Buñdzab que diti labúu sonybu que guirá buñ gac buñ mal.

Buñdzab goní: Láabu ronybu ni nálo, portín looy rasiablo xilaaylo né raduidylo xiro' cós buen láabu. Per pal gahxlo guirá ni biduidylo láabu sani'bu mal de looy.

Por ngú, Jehová góoch láabu: Goyee gohx guirá ni napbu. Buny mal

láabu guirá mod nainy looy. Guibino pal guinibu mal de na'. Nosi gop cuidad diti guigaitylo láabu.

Ni primer buny Buñdzab láani ngú que tipnés buñ golann xidal clas nimal xtuny Job né camey, né xilieen xtunybu goity. Né bigaitybu guirá chii xiin Job ló toib buró'dant. Né bica'bu galguitz re' laidy Job né por ngú nigolú godudybu ló galnagan. Por ngú tzeelbu góoch láabu: Goní mal de Dios né goity. Job diti gosaguel. Láaca bidxin tzón ximig falzbu né góoch láabu que no' ni bunybu nagach nisló Dios. Per Job diti bisiambu de bunybu ni ná Jehová.

Nde' buny que Jehová nabaladx, né láaca biduidybu xilaaybu cua' Job xomod rabilo ló dibuj re'. Bisialbu xcalguitz Job. Job goyo' sa chii xiin ni nigolú móz góoc, né bidal xinimalbu, camey né xiil ni gopbu, né guirá nde' chop midid bidalyimu más que ni gopbu antes.

¿Sonylo ni ná Jehová guirá ór xomod Job la? Pal sonylo ni nábu, Dios láaca saduidy xilaay looy. Labúu sabanylo tipzó ló Gudxlio órni sadxin sácni toib lagary móz xomod góoc Edén.

Job 1:1-22; 2:1-13; 42:10-17.






# TOIB FARAÓN MAL RONY MANDARY EGIPTO

27

**G**UIRÁ buñguieeu ni rabilo re' cayony lafuersbu buñ par gony dxiin. ¡Bibi' ni cagasguit a toib buñ ni cayony dxiin ló dibuj re'! Guirá ni cayony dxiinre' xfamily Jacob layibu né laayibu israelitas. Né ni cayony lafuers layibu par gonyibu dxiin, ngú egipcios. Israelitas ma noyibu xan xomandary buñre'. ¿Ximod gocni scú?


Por xidal íz guirá xfamily Jacob golésyibu goxtiguie lainy gudx Egipto. José bidxin góe buñxirop lainy gudx Egipto ni buny mandary rarop xalagary Faraón láabu gonbu a israelitas. Per bidxin dzú goity José. Lainy gudx Egipto gosalo buny mandary stoib Faraón ni diti binladx a israelitas.

Faraón buñ mal gócbu, golóbu xan xomandarybu a israelitas. Né



bunybu que tipnés buñ ni diti nap galronladx né ni nigolú buñ mal góç, ñony lafuersyibu a israelitas par ñony dxiin nadip né ñonyibu más gudx par Faraón. Ná scú, layibu bidalyibu. Né más xidzú guirá egipcios bidzuibyibu que israelitas ñac toib gudx más xidal né nadip que layibu.

¿Nanlo xí buny Faraón la? Gochbu a guirá buñgona' ni racné a israelitas par gál xiin: Naptó xí de guigaityto a guirá mbioxguieuyen ni gál. Per guirá buñgona' tzaay re' diti bisobyibu Faraón. Diti bigaityibu guirá bada'yen.



Por ngú, Faraón góoch a guirá buñ xcudxibu: Mbioxguieuyen israelitas colguigaity layibu. Nosi colguisian guibany pórsi mbioxgona'yen. Nigolú nadzu'py ni bunyibu. Guibino ximod bilaa toib mbioxguieuyen.

**B**IBI' bada' re' nigolú cayibdxá'bu né caguiebu bicuña mbioxhla ca. Nde' Moisés. ¿Nanlo chú ngú gona' móz ca la? Láabu toib princes de gudx Egipto né xiindzap Faraón láabu.

Xina' Moisés bicachlan láabu hasta órni bisa'bu tzón be'o, portín diti goniiny láabu que egipcios nagaity xiimbu. Per láabu biduidybu cuent que ma diti labúu guicachlanbu más a Moisés, por ngú no' ni bunybu par labúu nalaabu Moisés.

Bunyzaaybu toib dzoim ni diti labúu ño' nís lainy. Ór cú golóbu Moisés lainy dzoim re' né bicachlanbu dzoim re' lainy gui'ix cué gu'uc ni laa Nilo. Gochbu Míriam, bisan Moisés, que ña'an gahxca rono'bu par nabi' xí cayac.

Órcuca xiindzap Faraón goyee góos ro' gu'uc ni laa Nilo. Tisintiempsi bibi'bu toib dzoim lainy gui'ix cué gu'uc. Gochbu a xcriatbu: Godané dzoim ca na'. Órni bixalbu dzoim re', ¡toib bada' móz bibi'bu! Bada'yen re' ni laa Moisés cayibdxá'bu, né xiindzap Faraón binladx láabu. Princes, xiindzap Faraón diti goniiny láabu ñaity bada'yen re'.

Ór cú Míriam bidxin rono'yibu. ¿Labúu rabilo láabu ló dibuj re' la? Míriam gonabdiitzbu a xiindzap Faraón: ¿Labúu guiyobi toib buñgona' israelita par gann bada'yen re' la? Né princes re' cuapy: Goyee buny mod ni nálo.

Órcuca Míriam nigolú raxony sagúch xina'. Órni xina' Moisés bidxin rono' princes re', princes re' góoch láabu: Cua' bada'yen re' né bisnís láabu né na' saguiixi looy.

Scú gocni, xina'ca Moisés gon láabu. Né órni Moisés gonís, xina'bu biné láabu rono' xiindzap Faraón par ma láabu nasnísbu más a Moisés xomod xiimbu. Por ngú Moisés gonísbu lidx Faraón.



**B**IBI' Moisés caxonybu de Egipto. ¿Labúu rabilo buñ ni canal láabu la? ¿Nanlo xigony nayibu guigaityibu Moisés la? Guibino guidoni pal labúu ganno láani.

Moisés gonísbu lidx Faraón ni rony mandary Egipto. Por ngú gócbu buñnan né buñxirop. Moisés gonbu que diti buñ egipcio láabu né que bixiosbu né xina'bu israelitas layibu né noyibu xan xomandary Faraón.

Órni Moisés bisa'bu 40 íz, golo' guicbu tzáguenbu ximod no' buñ xcudxbu. Diti noyibu sacró portín egipcios nigolú cayonynaa layibu. Moisés bibi'bu toib egipcio cayonynaa toib israelita ni no' xan xomandary Faraón. Moisés bibi' guirá lad, né gonbu diti no' chú cabí láabu bunynaabu né bigaitybu egipcio re', né ór cú bicachlanbu gue'et re' lainy yohx.

Stoib dzú Moisés goyee goyguen ximod dxee buñ xcudxbu. Biluladxbu que labúu ñacnébu buñ xcudxbu par diti ño'yibu xan xomandary Faraón. Per bibi'bu chop israelita cacalsa', né Moisés góoch a ni nap dool: ¿Xigony cayonynaalo buñ xcudxlo?

Buñguieeu re' goní: ¿Chú buny que looy gony mandarylo né gaiby lóodo xí ngú ni non gonydo? ¿Guigaitylo na' xomod bigaitylo toib egipcio cú ne'eg la?

Nigore' Moisés bidzui by né gonbu que no' buñ ni ma nann que bigaitybu egipcio cú. Órni Faraón gonbu ni buny Moisés, bixelbu



buñ par guigaityibu Moisés. Por ngú Moisés bixony né bisiambu Egipto.

Órni Moisés bisiambu Egipto, sieebu sit, né bidxinbu gudx ni góc laa Madián. Lagarycu bimbubu Jetró né xfamily né bitzñabu né toibtica xiindzap Jetró ni góc laa Ziporá. Moisés bidxin gop xiil xtuny Jetró né bibanybu 40 íz gudx Madián. Par nigore' ma napbu 80 íz. Goyo' toib dzú órni Moisés cayap guirá xiil xtuny Jetró gosaclobu toib cós ni radziguia' buñ, né nde' bitzá mod ni bibanybu. Bich'i'ix guich par ganno xi cós góc nde'.

Éxodo 2:11-25; Hechos 7:22-29.



# YAC GÚCH NI 30 CACÁA GUII

**M**OISÉS ro cayopybu guix par guá guirá xiil ni cayambu bidxinbu lagary ni góe laa Horeb, laidy dainy re' bibi'bu toib yac gúch ni cacáa guii, né jyac re' diti ra'ijni!

Moisés bidziguia'bu. Né goníbu: Tzabiya xi cayac né yac gúch ni no' ca. Órni bibigbu rono' yac gúch cú goyo' toib ni goní né láabu: Diti guibiglo más. Gole' galguit ni caa ñe'lo, portín na' no'ya re'. Jehová biquiimbu toib ángel par goninébu Moisés por ngú Moisés bicachlan lóo.

Ór cú Dios góoch láabu: Rabiya xcudxi nigolú cadudyibu ló galnagan lainy gudx Egipto. Na' salaaya layibu né caxel looy par cuélo layibu de lagarycu. Jehová guinébu xcudxbu a toib lagary mózdiguie' ni laa Canaán.

Moisés cuapy: Diti no' chú sago' cuent na', ¿ximod labúu gony nde'? Né pal tzaaya layibu saibyibu na': ¿Chú bixel looy? ¿Xí guiniya ór cú?

Dios goní, nde' guicapyló layibu: JEHOVÁ, Dios xtuny Abrahán, Dios xtuny Isaac né Dios xtuny Jacob





bixelbu na' ro nóoto. Jehová goní:  
Nde' laaya por tipzó.

Moisés cuapybu Dios: Pal diti  
raluladxyibu que looy bixel lo na',  
¿xí goni ór cú?

Dios gonabdiitz láabu: ¿Xí láani  
ca'lo ñalo?

Ór cú Moisés cuapy: Tipla' yac.

Dios goní: Bisal láani layoo.  
Órni Moisés buny láani, yac re'  
gocni toib be'el. Ór cú Jehová  
bunybu toib cós ni radziguia' buñ  
né goníbu: Golo' ñalo lainy xhaplo.  
Moisés buny láani, né órni golébu  
ñabu niquiichni xomod yel né  
ralooypani caa galguitz ni laa lepra  
ñabu. Ór cú Moisés cua' xcalnadip  
Jehová par labúu ñony guirá ni  
radziguia' buñ, ni rion buelt. Né  
por último Jehová góoch láabu:  
Guirá cós ni radziguia' buñ gony  
que guirá israelitas guiluladxyibu  
que na' bixel looy.

Moisés bibiguet lidx né gochbu a  
Jetró: Canab lólo, que guiduidylo'  
lagary na' guibiguet Egipto né  
tzáguen ximod no' guirá xfamily ni  
no' Egipto. Ór cú Jetró gochbu  
Moisés que sacró guiebu. Né  
Moisés gonás néz bibiguet Egipto.

Éxodo 3:1-22; 4:1-20.





# MOISÉS NÉ AARÓN RIEYIBU NISLÓ FARAÓN

ÓRNI Moisés bibiguet Egipto, gochbu buchbu Aarón de guirá galrradziguia'. Órni Moisés né Aarón bilooyibu guirá galrradziguia' re' a guirá israelitas layibu biluladxuibu que Jehová no' né layibu.

Ór cú Moisés né Aarón goyeyibu nisló Faraón. Né gochyibu Faraón. Jehová, Dios xtuny Israel ná: Biduidy lagary xcudxi por tzón govitz par tzeyibu gony adoryibu na' ló yoovich. Per Faraón cuapy: Na' diti raluladxi Jehová. Diti sadudi lagary israelitas tze.


Faraón nigolú biduizt, portín guirá israelitas nayibu cuéyibu tiemp ló xchiinyibu par gony adoryibu Jehová. Por ngú, buny lafurersyibu a guirá israelitas par gony dxiin más nadip. Guirá israelitas bigotzyibu dool Moisés por guirá mal ni cadudyibu ló, né nde' bunyni que Moisés goyo' nabann. Per Jehová góoch láabu que diti tzóbu ló xcalrasa'ni. Né Jehová goni: Na' goni que Faraón guiduidy lagary xcudxi.

Moisés né Aarón goyeyibu nisló Faraón stoib buelt. Nigore' ma bunyibu toib ni radziguia' buñ. Aarón bisal xiac layoo, né nde' bidxin góoc toib be'el bief. Per buñnan ni goyo' xan xomandary Faraón láaca bisalyibu yac ni napyibu layoo né nde' láaca bidxin góoc be'el. Per ¡bibi! be'el xtuny Aarón cagaiby be'el xtuny buñnan ni no' xan xomandary Faraón. Ná scú gocni Faraón diti biduidy lagary guirá israelitas par née ñony adoryibu Dios.

Bidxin ór Jehová godi'x Faraón xalagary. ¿Nanlo ximod bunyibu láani la? Biduidybu chii plagas, ni godudy Faraón lainy gudx Egipto.

Órni ma godudy xidal plagas cú, Faraón raxelca'bu né raibybu a Moisés: Biscués plaga re' né na' guiduidy lagary Israel tze. Per órni Moisés rascués plaga re', Faraón ratzá mod nac xpensary. Diti raduidybu lagary tzeyibu. Per órni bilox godudy chii plaga cú biduidybu lagary israelitas nare'.

¿Rimbulo cada toib de chii plagas cú la? Bichi'ix guiich, né guisuidyno cada toib plaga re'.



**B**IBI' guirá dibuj re'. Ló cada toibni rabino xi plagas bixel Jehová par gudx Egipto. Ló primer dibuj re' rabilo Aarón caguimbu xiacbu ló gu'uc ni góe laa Nilo. Ór cú nís gu'uc re' bidxinni gocni runy, né beel ni no' lainy gu'uc re' goity né gu'uc re' gosalo bilanikni.

Nigore' Jehová buny que nare' mbuuch lainy Nilo. Né goyo'yimu lainy horno, lainy xigyac ro ronytzaayibu páa né ronó' loón né guirá mbuuch re' goyo'yimu guirá lad. Órni guirá mbuuch re' goity, egipcios bitop montón layimu, né gudx Egipto nigoló bilanikni.

Ór cú Aarón godimbu xiacbu layoo, né yodée re' gocni malatz, láamu nacmu toib nimalien ni rasapy né ni rot, né nde' góe ni rion plaga lainy gudx Egipto.

Stipnés plagas cú nosi egipcios bunyni mal, per israelitas diti no' xi gosacloyibu. Ni rasa'ni tap plaga gocni por bionn, né goyo'yimu laniolidx guirá egipcios. Né ni rasa' gáay plaga cú bigaityni xidalguixo ximal egipcios. Xidal yós, xiil né chiv ni gop guirá egipcios goityimu.

Nigore' Moisés né Aarón bisalbu par guia' por ladxña dée, né nde' gole' gutz laidy guirá buñ, né láaca laidy guirá ximalyibu bire' gutz. Nde' bidxin góe ni rasa' xhoop plaga.

Bilox godudy guirá nde' Moisés goliskia' ña, né Jehová buñ que ñac guié guisio'o né guié laver, guiéda're nigolú nadzu'py gocni né egipcios diti ma bibi'yibu guiérodann xomod guié re'.

Ni rasa' xhoon plaga bitné xidalguixo gozóo. Antes né después de ngú diti goyo' xidalguixo gozóo. Nimal re' godóyimu guirá guix ni guié laver diti binitló.

Ni rasa' ga' plaga gocni galnacay. Ló tzón govitx goyo' galnacayaskin guidopynac gudx Egipto, per ro golés guirá israelitas diti goyo' galnacay.

Órni mápa guilox tudy plagas ni Dios bixel ronó' egipcios, Dios góoch a xcudx que nagáasyibu xiruny toib xiil o chiv ro' puert riolidxyibu. Ór cú ángel xtuny Dios godudy lainy gudx Egipto, né órni ángel re' rabíbu runy ro' toib puert diti ragaiyibu ni toib buñ ni rabés cú. Per órni rabíbu que diti góos runy ro' toib puert órcuca ragaiyibu xiin lagol family né nimal ni nirdiguié gool. Nde' ni rasa' chii plaga ni godudy Egipto.

Órni ma godudy última plaga re' Faraón biduidy lagary que guirá israelitas nare', né como ma noyibu puext, goxincuca gosaló bire'yibu Egipto.

Éxodo, capítulos 7 a 12.



**¡B**IBI' xí ni cayac ló dibuj re'! Moisés ngú ni casca' ña né toib yac ló nisda' Xináa re'. Guirá israelitas ni dxee stiplad ni no' né Moisés ngú ni bilaa. Per Faraón né guirá soldadbu caye'yibu nís. Guibino ximod góe guirá nde'.

Xomod ma bisuidyno, órni bilox chii plagas gudx Egipto, ór cú Faraón góoch a guirá israelitas que nare'yibu lainy gudx Egipto. Bire' xidalguixo buñguieeu, 600,000 israelitas bire'yibu, né láaca bire' buñgona' né mbioxien. Né láaca bire' xidal buñ ni biluladx Jehová ni buny compañer a guirá israelitas. Guiráyibu órni bire'yibu lainy gudx Egipto binéyibu xiil, chiv né guirá bisa' clas nimal ni gopyibu.



Dzú ni bire'yibu lainy gudx Egipto gonabyibu lairy né cós ni goya' de or, né plata. Né como guirá egipcios nigolú bidzuibyibu por última plaga ni cua'yibu, buny cuentyibu guirá ni gonab israelitas layibu.

Diti godudy xidal dzú guirá israelitas bidxinyibu ro' nisda' Xináa. Lagarycu layibu bisaladxibu. La'ga israelitas casaladxibu ro' nisda', Faraón né guirá buñ ni rony compañer láabu biduidyibu cuent que diti láani ngú ni bunyibu. Layibu goníyibu: Biduidyno lagary buñ ni no' xan xomandaryno sée.

Ór cú Faraón bitzá mod ni goníbu stoib. Órcuca Faraón goyo'bu puext né xidalguixo soldadbu né láaca golóbu puext xcarretbu. Gosaló goynalyibu a guirá israelitas né 600 carret ni goya'tzaay nosi par tzanéyibu ló guerr, né láaca goynéyibu stipnés carret ni goyo' lainy gudx Egipto.



Órni guirá israelitas bibi'yibu sieed Faraón né xidalguixo soldadbu, israelitas nigolú bidzuibyibu. Layibu biduidyibu cuent que diti no' pu lad guixonyibu. Portín biduidyibu cuent que bianyibu galay, tiplad goyo' nisdá' Xináa né stiplad sieed guirá egipcios. Per Jehová golo' toib xcaay. Por ngú egipcios diti labúu bienláyibu a guirá israelitas né ma diti labúu cualóyibu gudx Israel.

Nigore' Jehová gochbu a Moisés que nasca'bu ñabu né xiachbu ló nisdá' Xináa. Órni Moisés buny nde', Jehová bunybu que ñetj toib buro'dant niis ro ralainy Govitz. Né ór cú bixal gala' nisdá' né gocni xomod toib néz xilag par labúu nadudyibu.

Ór cú guirá israelitas gosalo'yibu godudyibu gala' nisdá' re' por ló yoo nabich. Millón de israelitas né guirá ximalyibu biquiinyibu xidal ór par labúu nadudyibu stiplad nisdá'. Órni bilox godudyibu, guirá egipcios ma labúu bibi' a guirá israelitas stoib buelt, né goyo'yibu lainy nisdá' né cuanalyibu israelitas.

Órni bunyibu nde', Dios buny que xcarretyibu ñab xiruedni né ma diti labúu naxonyni. Egipcios nigolú bidzuibyibu né gosaló bica'yibu rudx: Jehová cayacné a guirá israelitas par guicaló lóono. ¡Guixonyno de re'! Per ma diti labúu bunyibu láani.

Ór cú Jehová gochbu Moisés que nasca'bu xiachbu ló nisdá' Xináa, xomod ma bibilo ló dibuj. Nigore' nisdá' re' gosaló biotzni a guirá egipcios né guirá xcarretyibu. Guiránacyibu goyo'yibu lainy nisdá', jni toibguielotyibu bilaa!

¡Balaati bibaladx xcudx Dios por ni bilaayibu! Ór cú guirá buñgueeu bílyibu toib cántico par biduidyibu guixquix a Jehová, né goníyibu: Jehová buny gann. Guirá nac xcarretyibu né xomanyibu bisal Jehová lainy nisdá'. Míriam, bisan Moisés gole' toib pandereta nde' toib cós narik ni rasuch, nde' biquiimbu par bílbu toib cántico, né guirá buñgona' láaca bunyibu scúca. Biyáyibu né bílyibu cántico: Jehová buny gann. Bisalbu guirá mainy né guirá ni dxiip láamu lainy nisdá'.

## *Desde ni bire'yibu de Egipto hasta primer ni buny mandary Israel*

*Desde órni Moisés gole' israelitas xan xomandary Egipto hasta órni bidxinyibu laidy dainy ni góe laa Sinái, ro Dios biduidy Xiley, Moisés ngú ni gosanir nislóyibu. Después, Moisés bixel doce buñguieeu par naláach gudx Canaán. Per chii buñguieeu bibiguét ron'bu né toib diitz mal. Bunyibu que buñ naniiny nabiguét lainy gudx Egipto. Por ni diti gop israelitas fe, Dios buny castigar layibu modre' gosarelyibu ló yoovich por 40 iz.*

*Bidxinni ór goyo' ni golú a Josué par nasanir nisló gudx Israel par labúu nago'bu Israel lainy gudx Canaán. Jehová buny xidal galrradziguia', né modre' Jehová goe né layibu naca'yibu gudx Canaán. Jehová bicaabu gu'uc Jordán, que muros ni nap Jericó ñabni, né Govitz ñanni toibsi lagary guidopy dzú. Godudy xhoop iz israelitas gohx xalioo guirá cananeos.*

*Israel por 356 iz goyo' xan xomandary pórsi jueces, gosaloni né Josué. Rasuidyno de tipnésyibu xomod Barac, Gedeón, Jefté, Sansón né Samuel. Láaca rasuidyno de buñgona' xomod Rahab, Débora, Jael, Rut, Noemí né Dalila. Pal ragabno guirá iz re' rasa'ni 396 iz de historia ló Midid TZÓN.*



¿NANLO xí láani catop buñ layoo la? Ralooypani yel. Niquiichni, nalasie'nni né nara'yni. Per ditini yel, nacní ni labúu ro buñ. Ma godudy más de toib be'ò de goló bire' israelitas de gudx Egipto. No'sayibu ló yoovich. Lagarycu yaidygolú galrro par gua buñ, por ngú ratzotz ro'yibu: Más galán nagaity Jehová lóono lainy gudx Egipto. Lagarycu godóno nitisi nainy lóono.

Por ngú Jehová rani': Goni que guiab ni gua buñ layoo. Né ngú ni ronybu. Raraa stoib gue'el cú, órni israelitas rabi'yibu cós niquiich re' ni dxee layoo, ranabdiitzyibu: ¿Xí láani?

Moisés rani': Nde' galrro ni Jehová raduidy lóoto par guáto. Buñ rimbu láani MANÁ. Maná re' láani toib galrro ni nac xomod páanax ni riné dxin búscer.

Moisés raiby a buñre': Cada toibto colguitop ni labúu guáto. Por ngú, guirá rosil ronyibu ni raiby Moisés layibu. Né órni ma rarecaa lóo Govitz né ma rotni, maná ni rian layoo rayaani. Moisés láaca rani': Diti no' chù labúu co'tzaay maná par stoib dzú. Per noyibu rony láani.

¿Nanlo xí rac órni riotzaayni la? ¡Raraa stoib dzú maná ni riotzaay rio' bicoity láani né rasaló rala'ni mal!

Per Jehová raiby layibu que toib dzú lainy xomal labúu guitopyibu maná ni labúu guáyibu ló chop govitz, dzú xhoop, dzúcu rimbuno láani xomod dzú vierna. Né Jehová raiby layibu que co'tzaayibu ni guáyibu ni rarop dzú, portín diti sonybu que guiabni ló dzú gatz ni rimbuno xomod dzú sábdá. ¡Órni rago'tzaayibu maná re' hasta dzú gatz xomod raiby Jehová layibu diti rio' bicoity maná ni ratopyibu né diti rala'ni mal! ¡Nacní stoib galrradziguia' ni rony Jehová!

Guirá íz ni goyo' israelitas ló yoovich, godóyibu maná.



# JEHOVÁ

## RADUIDY XILEY

35


**C**HOP tzón be'o ma godudy de goló guirá israelitas bire' lainy gudx Egipto, né layibu radxiinyibu dainy ni góe laa Sinaí, ni láaca góe laa Horeb. Lagary re', Dios goniné Moisés ló yac gúch ni gonás guii. Israelitas ragua'yibu lagary re' por xidal be'o.

La'ga guirá buñ cabésyibu ñe' dainy, Moisés ria'py guic dainy. Lagarycu Jehová raibybu Moisés que nainy Láabu que israelitas guisobdiitz né guidxin gac Xcudxbu ni gandxi'bu. Órni Moisés rietj rono'yibu, Moisés raiby layibu guirá ni Jehová góoch láabu. Buñ ni no' né láabu rani' que guisobyibu né gacyibu xcudx Jehová.

Nigore' Jehová rony toib cós ni radziguia' buñ. Ronybu que rasoo go'ox guic dainy, né ronybu que rani' guisio'o. Láaca raibybu a xcudxbu: Na' Jehová, Dios xtunyto ni gole' lóoto Egipto. Ór cú Jehová raiby layibu ni non gonyibu: Nosi na' gony adorarto diti a stipnés diohx.

Dios raduidy saa ga' leyes a xcudx. Buñ ni no' cú radzuiby. Né raibybu Moisés: Looy goniné lóodo, portín radzuibydo pal Dios guininé lóodo saitydo.

Nigore' Jehová raibybu Moisés: Bia'py guic dainy re'. Na' guidudi looy chop guieetabla, ro ma bica'ya leyes ni nainy na' guisobdiitz gudx. Ór cú Moisés ria'py dainy cú rarop buelt. Por 40 dzú né 40 goxin ria'anbu lagarycu.



Dios nigolú nap xidal leyes par xcudx, né Moisés raca' láani. Dios láaca raduidy chop guieetabla re' a Moisés. Né ló guieetabla re' Dios bica' chii leyes ni ma gochbu a xcudx bu. Leyes re' laa Chii Diitz.

Chii Diitz re' leyes ni nigolú rasac láani. Per láaca rasac stipnés leyes ni Dios biduidy a guirá israelitas. Toibtica de láani nde': Non gandxi'lo Jehová, Dios xtunyo né guidopy xcalnabanylo, guidopy xcalrrienlo, guidopynaclo, né guidopy xcalnadiplo. Né stoibni nac: Non gandxi'lo sa'lo xomod nadxilo looyca. Jesucristo xiin Dios goníbu que chop leyes ni biduidy Dios ni ma bisetlano ngú ni más rasac ni biduidybu xcudx bu Israel. Ló historias ni sieed guisuidyno más cós ni buny Xiin Dios né ni bisuidybu.

Éxodo 19:1-25; 20:1-21; 24:12-18; 31:18; Deuteronomio 6:4-6; Levítico 19:18; Mateo 22:36-40.



¡GANNLO xí ni cayonyibu nigore! ¡Cayenyibu toib torien!  
 ¡Xigony cayonybu nde'?

Órni Moisés rian xidzú laidy dainy, gudxcú rani': Diti nánno xí gosaclo Moisés. Guisa'no toib dioxh par cué lóono de lagary re'.


Aarón buch Moisés rasaguel né ranibu: Colcue' guirá cós de or ni naptó, né colguitné láani rono'ya. Órni gudx rony nde' Aarón raca' or rasiaabu láani né rasa'bu toib torien de or. Gudx rani': ¡Nde' Dios



xtunyno ni gole' lóono lainy gudx Egipto! Ór cú ronyibu toib lanii ro' né rienyibu torien ni nac de or.

Órni Jehová rabí ni cayonyibu, radzuitzgulubu. Né raibybu Moisés: Naguelsi bietj dainy re'. Gudx nigolú cayonyibu cós mal. Ma diti rasetnaladxbu guirá leyes ni bidudi layibu, né caxixipyibu nisló toib torien de or.


Moisés rietj ni maca dainy re', né órni radxinbu gahx, nde' ni rabíbu. ¡Buñ ni dxee cayó'olyibu canción né cayáyibu rono' torien! Moisés radzuitzgulu, rasalbu guieetabla ni nap leyes layoo né nde' rioy. Ór cú Moisés raca'bu torien re' rasiaabu ronybu torien re' dée.



Ni buny gudx re' nigolú mal gocni. Por ngú Moisés raiby a stipnés buñguieeu que naca'yibu espad xtunyibu, ni nac xomod toib machet. Né Moisés goní: Guirá buñ mal ni bien torien re', non gaityibu. Xidal buñguieeu ronyibu ni raiby Moisés layibu. ¡Por ngú, ragaityibu 3,000 buñ! ¿Diti raduidy nde' diitz que nosi Jehová non gony adorarno, diti diohx falz la?

Éxodo 32:1-35.

¿NANLO xí láani yo' re' la? Láani toib yo' nosi par gac adorar Jehová. Laani yo' ro rac adorar Jehová. Gudx Israel ló toib iz



bislo'ox bisa'yibu láani de goló bire'yibu Egipto. ¿Nanlo chú láabu goní nasa'yibu yo' re' la?

Jehová ngú ni goní que nasa'yibu láani. La'ga Moisés no' guic dainy ni laa Sinaí, Jehová góoch láabu ximod nasa'bu láani. Jehová goní que nasa'bu láani de toib mod que labúu nachiilyibu láani naguel. Modre' labúu ninéyibu láani stoib lagary, né labúu ñonytzaayibu láani stoib buelt lagary ro nadxínyibu. Por ngú, órni israelitas rieyibu stoib lagary ló yoovich, rinéyibu yo' re' toibsi né layibu.

Pal rabilo cuart mitien ni caa cué yo', lainyni no' toib caj. Caj re' laani, caj ni rasetnaladx acuerdo ni buny Jehová né Israel. Láani gopni chop ángeles o querubines de or cada lad. Dios bica' stoib buelt Chii Diitz ló chop guieetabla, portín Moisés bixó'oxbu guieetabla ni Jehová biduidy láabu nirdiguié. Né guieetabla re' goyo'tzaayni lainy caj ni rasetnaladx acuerdo ni buny Jehová né Israel. Láaca goyo'tzaay toib ru' ni bidza maná lainyni. ¿Rasetnaladxlo xí ngú maná la?

Jehová golúbu a Aarón buch Moisés par guisanir nisló israelitas, par gony adoraryibu Jehová. Né guirá xiin Aarón láaca gocné láabu ló dxiin ni cua'bu.

Nigore' bibi' cuart ni más xiro' ni nap yo' ro rac adorar Jehová. Chop midid de cuart mitien re' láani. ¿Rabilo cajien ni no' ló dibuj ro care' go'ox la? Lagary re' rio' ni rasanir nisló israelitas par gony go'ox, láani ngú toib cós ni ralaxiin. Láaca bibi' candeler ni nap gatz lámparas. Ni rion ni no' lainy cuart láani toib mexh, né loni dxee doce páa.

Ló láachlu' no' toib cós xiro' ni bidza nís ro raquiin ni rasanir nisló israelitas par raguipyibu ñayibu né ñe'yibu. Láaca no' toib lagary xiro', ro rasa'ijyibu nimal par guiscadyibu láamu Jehová. Yo' ro rac adorar Jehová no'ni galay, né rolooni rabés guirá israelitas lainy yo' lairy. Éxodo 25:8-40; 26:1-37; 27:1-8; 28:1; 30:1-10, 17-21; 34:1, 2; Hebreos 9:1-5.



**B**IBI' cuánnax ni no'oy buñguieeu ni rabilo ló dibuj re'. Bibi' balaati xiro' rasim balach. Chop buñguieeu no'oy láani né naxiga'ni ló yac. Láaca bibi' granad né higo ni nal ló yac. ¿Pu lagary sieed guirá cuánnax móz re'? Láani sietni de Canaán. Bisednaladx, Canaán góe lagary ro golés Abrahán, Isaac né Jacob. Galrralán ni goyo'



lagarycu, ngú buny que Jacob né xfamily goyeyibu goylésyibu lainy gudx Egipto. Ma godudy 216 íz, Moisés rabiguetné israelitas a Canaán. Nigore' noyibu ló yoovich, toib lagary ni laa Qadés.

Lainy gudx Canaán rabés buñ mal. Por ngú Moisés raxel doce buñ ni riée raláach, né Moisés raiby layibu: Colgann balac buñ rabés lainy gudxcú, né pal buñ nadip layibu. Colgann pal napni layoo tzaay. Né diti guialadxtó guitnéto tipnés cuánnax.

Órni buñ ni goyee biláach rabiguetyibu lagary ni laa Qadés, raibyibu Moisés: Nigolú toib lagary galán láani. Né par naduidyibu diitz que nigolú ni cani'yibu ralooyibu cuánnax ni bitnéyibu. Per chii buñ ni goyee biláach rani': Buñ ni rabés lagarycu nigolú naso'yibu né nadipyibu. Pal gonyno por guica'no xcudxbu, sagaityibu lóono.

Israelitas radzuiby órni racadiagyibu nde', né raniyibu: Más galán láani ñaityno lainy gudx Egipto o ló yoovich re'. Ló ro cadíilno né layibu saityno, né sanásyibu tzeelno né xiinno. ¡Guiyobyno stoib buñguieeu xalagary Moisés ni guisanir nislóno, né guibiguetno gudx Egipto!

Per chop buñguieeu ni goyee biláach rapyibu confianz Jehová, né rayopyibu mod que gudxcú guiguadzu. Chop buñguieeu re' laayibu Josué né Caleb, guiropyibu raniyibu: Diti guidzuibyto. Jehová no' né lóono. Diti nagann sácni par lóono guica'no gudxcú. Per layibu diti racadiagyibu. Né raniiny layibu guigaityibu Josué né Caleb.

Ni ronyibu nigolú ratzuitzni Jehová, né raibybu Moisés: Ni toib buñ ni nap 20 né más de 20 íz sio' lainy gudx Canaán. Layibu ma bibi'yibu galrradziguia' ni buni lainy gudx Egipto né ni buni ló yoovich né digundi gapyibu confianz na'. Por ngú, sasarelto ló yoovich 40 íz hasta gaity último ni nap 20 íz. Nosi Josué né Caleb sio' lainy gudx Canaán.



**B**IBI' guie' né almendras niguyaa ni raga' ló yac re'. Xiac Aarón láani. ¡Guie' né cuánnguyaa re' gonísni tipgue'elsi! Guisuidyno xigony gocni scú.

Israelitas gosarelyibu ló yoovich xidal íz. No' ni diti raluladx que Moisés non guisanir nislóyibu, né que Aarón diti non guisanir par gony adoryibu Jehová. Ni nac xpensary modre' ngú Coré, Datán, Abiram né 250 ancianos ni rasanir lainy gudx Israel. Guiráyibu rieedyibu rono' Moisés né nayibu: ¿Xigony loopya nálo gony mandarylo lóodo?

Moisés raibybu a Coré né guirá ni góc toibsi né láabu: Guixí rosil colguica' cós ro rac go'ox né colgony go'ox ni ralaxiin. Ór cú coltze' rono' yo' ro rac adorar Jehová. Guibino chú láabu rabú Jehová.

Raraa stoib gue'el cú Coré né 250 ni góc toibsi né láabu radxiinyibu lagary ro rac adorar Jehová. Xidal buñ radxiin rac toibsi né layibu. Jehová nigolú cadzuitz. Colgalsit riolidx buñ mal re', ná Moisés. Diti cannto xital ni nac xtunyibu. Buñ racadiag, né ralsityibu riolidx Coré, Datán né Abiram.

Ór cú Moisés rani': Modre' lóoto sannto chú láabu ngú ni Jehová cabú. Gudxlio saxal né sagaibyni a guirá buñ mal re'.

Ralox rani' Moisés, Gudxlio raxalni. Né ragaibyni lidx né guirá ni nap Coré, Datán, Abiram né ni no' né layibu né ór cú Gudxlio rie'eg. Órni stipnés buñ rien xirudx buñ ni sée lainy yoo, raca'yibu rudx: ¡Colguixony! ¡Gudxlio láaca labúu caibyni lóono!

Coré né 250 ni góc toibsi né láabu no'sayibu gahx rono' yo' ro rac adorar Jehová. Por ngú, Jehová raxel guii né guiráyibu ra'ijyibu. Ór cú Jehová raiby a Eleazar xiin Aarón que guica'bu cós ro rac go'ox ni biquiin buñ ni ma goity, né guisiaabu guip re' par guigasbu láani laidy ro rasa'ijyibu nimal ni rascadyibu Jehová. Bunyibu nde' par

guieen guirá israelitas que nosi Aarón né guirá xiin non gacné láabu par guisanir nislóyibu par gony adoraryibu Jehová.

Per Jehová ná que guieen tzaayibu que láabu golúbu Aarón né guirá xiin par guisanir nisló israelitas par gony adoraryibu Jehová. Por ngú raibybu Moisés: Ni rasanir lainy toib family de Israel guitrné xiac. Ni rasanir lainy family xtuny Leví, Aarón ngú ni guitrné xiac. Ór cú cua' xiacyibu né bisaga' láani nisló caj ni rasetnaladx acuerdo ni buny Jehová né Israel. Xiac buñguieeu ni na' golúya par guisanir nisló Israel par gony adoraryibu na', sabe'ni guie'.

Órni Moisés rabi láani stoib dzúcu, ¡ló xiac Aarón rare' guie' né almendras niguyaa! ¿Raduidylo cuent nigore' xigony buny Jehová que xiac Aarón gole'ni guie' la?

Números 16:1-49; 17:1-11; 26:10.



# MOISÉS RAGUIN XIAC LÓ GUIEE 40

**R**ADUDY xidal íz, ¡10 íz, 20 íz, 30 íz né 39 íz! Né israelitas no'sayibu ló yoovich. Per guirá íz re' Jehová ran xcudx. Jehová raya'an layibu né maná. Jehová ragonés layibu né xcaay rodzu né toib guii órni rasaló rio' gue'el. Láaca diti bioox xhapyibu, né diti bio'ob ñe'yibu.


Nde' primer be'o de 40 íz de goló bire'yibu Egipto. Nigore' israelitas ma noyibu Qadés stoib buelt. Lagary re' bigua'yibu órni doce buñgüieeu goyee biláach Canaán né mápa mer guisa' 40 íz de goló bire'yibu Egipto. Míriam bisan Moisés goitybu lagary re' ni góc laa Qadés. Né xomod dzúcu nigore' láaca no'sa galnagan.

Buñ ni dxee re' diti labúu radzel nís par gue'. Rieyibu rono' Moisés né ratzotz ro'yibu: Más galán ngú ñaityno. ¿Xigony gole'lo lóodo lainy gudx Egipto né bitnélo lóodo lagary re' ro diti sacró nac, né ro xitcal raga'? Re' yadi galrro, yadi higos, yadi balach, yadi granad. Diti no' ni tidxóyen nís par gue' buñ né nimal.

Órni Moisés né Aarón rieyibu yo' ro rac adorar par guininéyibu Dios, Jehová raiby a Moisés: Bitop gudx né nisló guiráyibu goniné guiee ni rabilo ca. Ló guiee re' sadaa siil nís par gue' guiráyibu né par gue' guirá xinimalyibu.

Ór cú Moisés ratop guirá buñ, né ranibu: ¡Colguicadiag, lóoto ni diti nap confianz lóo Dios! ¿Aarón né na' non cuédo nís ló guiee re' par lóoto la? Ór cú Moisés raguin xiac ló guiee re' chop buelt, né rasaló radaa siil nís ló guiee re'. Ma no' siil nís par guirá buñ né guirá nimal ni nonéyibu cú.

Per Jehová radzuitznébu Moisés né Aarón. ¿Nanlo xigony la? Portín Moisés né



Aarón goníyibu que *layibu* ngú ni gole'yibu nís ló guíee cú. Per ni buny láani ngú Jehová. Né portín Moisés né Aarón diti goníyibu ni nigolú, por ngú Jehová rani' que gony castigar layibu. Lóoto diti sonyto que xcudxi tzó lainy gudx Canaán, ná Jehová.

Diti xidzú israelitas rare'yibu lagary ni góc laa Qadés. Né láaca diti xidzú radxiinyibu laidy dainy ni góc laa Hor. Laidy dainy re' goity Aarón, par ló dzure' ma napbu 123 íz. Israelitas nigolú nabann noyibu por ni goity Aarón, por ngú ribdxa'yibu por ló treint dzú. Eleazar bian xalagary bixiosbu xomod ni rasanir nisló israelitas, par gony adoraryibu Jehová lainy gudx Israel.


Números 20:1-13, 22-29; Deuteronomio 29:5.



**R**ALOOYPANI nabany be'el ni no' ló yac. Per diti scú láani. Goya'ni de cobre. Jehová gochbu Moisés que nachelbu be'el cú ló yac né nalsikia'bu yac re' par labúu ñenlóo buñ láamu né diti ñaity. Per stipnés be'el ni casaa layoo por be'el ni nabany láamu. Godómu buñ né buñ bixo'. ¿Nanlo xigony la?

Nde' góe portín israelitas goníbu mal de Dios né de Moisés. Ratzotz ro'yibu: ¿Xigony gole'lo lóodo lainy gudx Egipto par gaitydo ló yoovich re'? Diti no' galrro ni nís lagary re'. Ma bixacladxdo né ma diti nainy guaado maná re' guirá dzú.

Per maná nací toib galrro ni naníx. Jehová biduidybu maná xomod toib cós ni radziguia' buñ né nís láaca biduidybu láani scúca. Per buñ cú ratzotz ro' né diti rioladxyibu ximod ran Jehová layibu. Por ngú raxelbu be'el ni rot né ni ragaity, nde' gocni toib castig ni bixel Dios par layibu. Be'el re' rot layibu né xidalyibu raity.



Radxiin midid buñ riée rono' Moisés né raniyibu: Bichédo portín gonido mal de looy né de Jehová. Gonab lóo Jehová par cué guirá be'el ni dxee re'.

Ór cú Moisés ranab lóo Jehová par gacné layibu. Jehová raiby a Moisés que guisa'bu toib be'el de cobre. Raibybu Moisés que guichelbu be'el re' laidy toib yac, né guirá buñ ni ma but be'el re' non guibiyibu be'el de cobre ni bisa' Moisés. Moisés rony ni ná Jehová. Né buñ ni ma but be'el rabiyibu be'el cobre ni bisa' Moisés, né rialyibu.

De guirá nde' no' ni rasuidyno. Guiráno nacno xomod israelitas ni but be'el. Biduidy cuent, guirá buñ rio'x, raxo', né raity. Nde' gocni scú, portín primer buñguieeu Adán né primer buñgona' Eva golsityibu de Jehová, né lóono nacno xiinyibu. Per Jehová caxalbu toib néz par scú labúu guibanyo tipzó.

Jehová bixelbu Xiimbu Jesucristo ló Gudxlio. Jesús golxiga'bu ló toib yac nadop, portín xidal buñ buny pensary que láabu gócbu buñ mal. Per Jehová biduidy Jesús par guilaa lóono. Pal rabino láabu o pal racanalno láabu, labúu guibanyo tipzó. Ló historias ni sietra guisuidyno más ni bunybu.

Números 21:4-9; Juan 3:14,15.





¿MA BICADIAGLO toibtica buelt de toib bor ni rani' la? Sigory nde' no' ló xpensarylo: Yaca, nimal diti rani'. Per la Biblia ná que toib bor goní. Guibino ximod góe nde'.

Israelitas ma noyibu puext par tzóyibu lainy gudx Canaán. Balac, toib buñguieeu ni rony mandary gudx Moab, radzuibybu israelitas. Por ngú, raxelca'bu toib buñguieeu ni naní xcalrrien ni laa Balaam par guieed rono'bu né guini' mal de guirá israelitas. Balac, raduidybu xtiitzbu guiduidybu xiro' bidxiich a Balaam, por ngú Balaam rabuby xpor né ranás néz riée rono' Balac.

Jehová diti nainy láabu que Balaam guini' mal de Xcudx bu. Por ngú, raxelbu toib ángel né toib espad si'ól par guisaga' ló néz par guicaabu Balaam. Balaam diti labúu rienlóo ángel ni saga' ló néz, per xporbu labúu rabí ángel ni bixel Jehová. Bor re' bunymu par narecue'mu ló néz ro saga' ángel, né órni ma diti radzelmu xi gonymu ratmu ló néz. Balaam nigolú radzuitz, né ragasyacbu xporbu.



Ór cú Jehová rony que Balaam rien ni rani' xpor. Xpor Balaam ranabdiitz: ¿Xí buni looy par gonynalo na'?

Balaam raiby a xpor: Xtol lo ralooypani toib buñ nga'al na', ¡pal na' ñapa toib espad nigore' nagati looy!

Bor ranabdiitz láabu: ¿Ma buni looy scá toibtica buelt la?

Yaca, cuapy Balaam.

Ór cú Jehová raduidy lagary que Balaam guibí ángel ni saga' ló néz né ca' ladxña toib espad. Ángel re' ranabdiitz láabu: ¿Xigony bigasyaclo xporlo? Bieela bicaaya lólo par diti tzélo guinilo mal de Israel. Pal xporlo diti nabecue' looy ló néz ro saga'ya na' nagati looy, per diti no' xi ñoni láamu.

Balaam ná: Bichéya. Diti góna pal saga'ló ló néz. Ángel re' raduidy lagary tze Balaam, né Balaam ranás néz riée riguen Balac. Láabu ronybu por guinibu mal de Israel, per Jehová rony que Balaam rasiab xilaaybu tzón buelt rono' Israel.


Números 21:21-35; 22:1-40; 23:1-30; 24:1-25.



# JOSUÉ BUÑGUIEEU NI RASANIR 43

**M**OISÉS nainy guio'bu gudx Canaán né israelitas. Por ngú raibybu a Jehová: Jehová, ranába lólo biduidy lagary na' tudi gu'uc Jordán, par labúu guibiya lagary móz. Per Jehová góoch láabu: ¡Ma no'! ¡Diti guisetlalo nga stoib! ¿Nanlo xigony góoch Jehová láabu ndé' la?

Jehová goní ndé' por ni bunybu órni godimbu



xiacbu ló guiee. Bisednaladx: Moisés né Aarón diti bunyxiro'bu laa Jehová. Diti gonibu nisló Israel que Jehová ngú ni gole' nís lad guiee. Por ngú Jehová góoch layibu que diti saduidy lagary tzóyibu lainy gudx Canaán.


Diti godudy xidal be'ò, de goló goity Aarón, Jehová raiby a Moisés: Caa no' Josué, né biné láabu nisló gudx né nisló Eleazar ni rasanir nisló israelitas par gony adoryayibu Jehová. Nisló guiráyibu goní que Josué ngú buñguieeu ni guisanir nislóyibu nigore'. Moisés rony mod raiby Jehová láabu, xomod rabilo ló dibuj re'.


Ór cú Jehová raiby a Josué: Nadip góç, né diti guidzuibylo. Looy guisanirlo nisló israelitas né sago'lo layibu lainy gudx Canaán ni na' goniya guidudi lóoto, né na' tzóya né looy.

Jehová raibybu Moisés guia'pybu né guixopbu guic dainy ni laa Nebo ni rian rono' gudx Moab. Desde lagary re' Moisés labúu rabí gu'uc Jordán né rabibu lagary sacroyen ni nap Canaán. Jehová raibybu Moisés: Nde' layoo ni goniya guidudi xiin Abrahán, Isaac né Jacob. Ma bidudi lagary looy bibi'lo láani, per diti guidudi lagary que looy guio'lo lagary re'.

Laidy dainy re' ni góç laa Nebo goity Moisés. Napbu 120 íz órni goitybu. Nadip nacbu né nasacdxiih bisalóbu órni goitybu. Gudx Israel nabann rio'yibu né guiráyibu nigolú ribdxa'yibu ni goity Moisés. Per rabaladxyibu que nigore' Josué ngú buñguieeu ni guisanir nislóyibu.

Números 27:12-23;  
Deuteronomio 3:23-29; 31:1-8,  
14-23; 32:45-52; 34:1-12.





# RAHAB RACACHLAN NI RALÁACH

**C**HOP buñguieeu ni rabilo re' noyibu ló galnagan. Non guixonyibu par diti tzó ni guigaity layibu. Layibu buñ israelitas ni raláach, né buñgona' ni racné layibu ngú Rahab. Rahab rabésbu lainy toib yo' ni sob laidy muro naso' de gudx Jericó. Guisuidyno ximod góe nde'.

Israelitas mápa mer tudyibu gu'uc Jordán par tzóyibu lainy gudx Canaán. Per Josué nír raxel chop buñ ni tze tzaláach. Josué raiby layibu: Colguibí ximod nac gudx Jericó né ximod nac layoo ni napni.

Órni buñ ni sée saláach radxiin gudx Jericó riefyibu lidx Rahab. Per no' ni riée rigudx buñguieeu ni rony mandary gudx Jericó né ranibu: Gue'el re' bieed chop israelitas biláach xcudxno. Órni bicadiagbu nde' bixelbu tipnés buñguieeu par née nigudx Rahab: ¡Gole' buñguieeu ni no' laniolidxlo! Rahab ma bicachlan chop buñguieeu re' guic yo' lidx. Por ngú ranibu: Tipnés buñguieeu bieed lidxi, per diti naana chú buñ layibu. Órni goyogue'el gonásyibu néz séeyibu órni yása guieg xpuert gudx. ¡Pal raxonyto labúu sig'alto layibu! Né layibu raxonyibu rinalyibu biinre'.

Órni ma séeyibu, Rahab raxony ria'py guic yo' né raibyibu a chop buñguieeu re': Na' naana que Jehová saduidy gudx re' lóoto. Ma bicadiagdo ximod Jehová bixalbu gala' nista' Xináa órni lóoto bire'to Egipto, né ximod bigaityto Sehón né Og ni buny mandary gudxcú. Na' góca buñtzay né lóoto, por ngú ranába lóoto colguiduidy xtiitzto, que scúca gonyto né na'. Colguilaa a guirá xfamily, bixiosa, xina'ya, bisana né beela.

Chop buñguieeu ni raláach raduidybu xtiitzbu que gonybu scú, per no' ni non gony Rahab par labúu guilaa. Chop biinre' raibyibu a Rahab: Cua' do' xináa re' né bilip láani ro' bentan, né bitop guirá xfamilylo laniolidxlo. Né órni guibiguetdo par guinitlódo gudx Jericó guibído do' xináa re' né diti sagaityo ni toib xfamilylo ni no' laniolidxlo. Órni rabiguet chop biinre' raibyibu Josué guirá ni góe.

**¡B**IBI! ¡Israelitas cadudy gu'uc Jordán! Per ¿xigony gu'uc re' diti napani nís? Portín ló dzúcu timguié gocni, né gu'uc re' gopni siil nís órni yása guio'yibu lainyni. ¡Per nigore' ma yadi nís lainy gu'uc! ¡Né israelitas cadudy gu'uc Jordán ló yoo nabich xomod godudyibu nísda' Xináa! Per ¿pu sée nís ni gop gu'uc re'? Guibino xí ni góc.

Órni bidxin dzú, par labúu nadudy israelitas gu'uc Jordán, ndé góoch Jehová a Josué guini' nisló gudx Israel: Ni rasanir nisló israelitas par gony go'ox ngú ni non go'oy caj ni rasetnaladx acuerdo ni buny Jehová né Israel, né guisaniryibu nislóno. Órni layibu co'yibu ñe'yibu lainy nís gu'uc Jordán nís re' sabés saxonyini.

Ór cú ni rasanir nisló israelitas par gony go'ox ralísyibu caj ni rasetnaladx acuerdo ni buny Jehová né Israel, né rasaniryibu né caj re' nisló buñ. Órni radxiinyibu gu'uc Jordán rio'yibu lainy nís. Gu'uc re' nadipni né guelni. ¡Órni rago'yibu ñe'yibu lainy nís órcuca rasaló ria'ach loni! ¡Toib galrradziguia' láani! Par guia' ro sieed gu'uc, Jehová bicaa loni. ¡Gu'uc re' ma diti gopni nís!

Guirá ni rasanir nisló israelitas par gony go'ox no'oy caj ni rasetnaladx acuerdo ni buny





Jehová né Israel né radxiinyibu galay gu'uc ni nabich. ¿Labúu rabilo layibu ló dibuj re' la? ¡La'ga noyibu cú, guirá israelitas rasaló radudyibu ló gu'uc nabich!

Órni ma bilox godudyibu gu'uc Jehová góoch a Josué gaibybu a doce buñguieeu ni nadip: Coltzé galay gu'uc ro saga' guirá ni rasanir nisló israelitas par gony gó'ox ni no'oy caj ni rasetnaladx acuerdo ni buny Jehová né Israel. Colguitop doce guiee né guicuatzaayto láani ro guiráto tudyto gue'el. Né scú ló dzú ni sietra órni xiinnto guinabdiitz xí raduidy diitz guiee ni dxee re' ór cú non guicapyto que nís gu'uc Jordán bibich órni godudy caj ni rasetnaladx acuerdo ni buny Jehová né Israel. ¡Guiee ni dxee re' gony que guisetnaladxto ni buny Jehová! Josué láaca ratopbu né racuatzaaybu doce guiee lainy gu'uc ro gosaga' guirá ni rasanir nisló israelitas par gony gó'ox.

Órni ralox ronyibu guirá nde' Josué raiby a guirá ni rasanir nisló israelitas par gony gó'ox ni no'oy caj ni rasetnaladx acuerdo ni buny Jehová né Israel: Colguire' lainy gu'uc Jordán. Órni ronyibu nde' nís rasaló raxonyni stoib.



¿XÍ LÁANI cayony que cayab muros ni nap gudx Jericó? Ralooypani no' guerr lagary re' né gudxrop de Jericó canitlóni. Per diti scú láani. ¡Láani ngú stoib galrradziguia' ni cayony Jehová! Guisuidyno ximod góç guirá nde'.

Bicadiag tzaay ni Jehová góoch a Josué: Looy né soldad ni no' né looy guiduidyto xaij roloo Jericó. Non gonyto nde' toibsi buelt ló tipdzú, por xhoop govitz. Tzanéto caj ni rasetnaladx acuerdo ni buny Jehová né Israel. Gatz buñguieeu ni rasanir nisló israelitas par gony go'ox non tze nisló caj re' né non guicudxbu dxitguic nimal.



Órni guisa' gatz govitz guiduidyto xaij roloo gudx Jericó gatz buelt. Ór cú guicudxto xiro' ór dxitguic nimal, né guica'to rudx fuers. ¡Né muros ni nap gudx Jericó guiabni!

Josué né gudx Israel ronyibu ni ná Jehová. La'ga casaayibu roloo gudx Jericó, diti raniyibu. Nosi ni racadiag buñ, ngú ruid ni ronyibu né dxitguic nimal láaca ruid ni ronyibu né ñe'yibu órni rasaayibu. Labúu guinino que guirá xi enemigyibu de gudx Jericó bidzuiby. ¿Labúu rabilo do' xináa ni nal ro' bentan ca la? ¿Chú láabu rabés lainy yo' ro caa bentan ca? Scú láani, Rahab ma bunybu ni góoch chop buñguieeu ni goyee biláach Jericó. Guirá xfamilybu no' né láabu lanio' né cabíyibu xi ni cayac.

Órni radxiin gatz govitz, dzú ma bilox biduidyibu xaij roloo Jericó gatz buelt, rasaló racudxyibu dxitguic nimal, Josué né soldad ni no' né láabu raca'yibu rudx, né muros ni nap gudx Jericó riabni. Josué rani': Colguigaity buñ né colguisa'ij Jericó né guirá ni napni, per diti guisa'ijto plata, or, cobre né hierro, guirá nde' guitnéto láani par yo' ro rac adorar Jehová.

Josué raiby a chop buñguieeu ni goyee biláach gudx Jericó: Colguio' laniolidx Rahab né colcue' láabu né guirá xfamilybu. Layibu ralaayibu xomod goní chop biinne'.

Josué 6:1-25.



**¡B**IBI' buñgüieeu xí ni cacachbu lainy yo' lairy ni napbu! Toib lairy móz, tipla' or né tipnés nilas de plata. Guirá nde' golébu láani lainy gudx Jericó. Per rasetnaladxlo, ¿xí goní Josué que gac né guirá cós re'?

Guirá nde' non nanitlóyibu láani, per or, né plata non ninéyibu láani yo' ro rac adorar Jehová. Buñre' diti bisobyibu Dios. Golambu ni nac xtuny Dios. Buñgüieeu re' laa Acán, né buñ ni no' né láabu ngú xfamilybu. Guibino xí góC.

Después ni Acán golann guirá nde', Josué raxel tipnés buñgüieeu par tíil né gudxrop ni góC laa Hai. Per gudx Hai rony gann layibu. Tipnésyibu raity, né stipnésyibu raxony. Josué nigolú rio' nabann. Josué raquí'ich lóo layoo né raibybu a Jehová: ¿Xigony raduidylo lagary guisaclo do nde'?

Jehová racapy láabu: ¡Biás! Israel biab ló galkié. Cua'yibu cós ni non nanitló o cós ni non ninéyibu yo' ro rony adorarto na'. Golannyibu toib lairy móz né diti ma bisetyibu ni bunyibu. Diti sisiaba xilaaya ro nóoto hasta que gunitlóto lairy móz




cú né buñ ni golann cós re'. Jehová raiby a Josué que salooybu chú ngú buñ mal re'.

Ór cú Josué ratop gudx Israel, né Jehová bilooy buñguieeu mal ni laa Acán. Acán ná: Biab ló galkié. Bibi'ya toib lairy móz né tipla' or, né tipnés nilas de plata. Bisobladxi guirá cós re' cua'ya láani. Labúu sadzelto guirá nde' ro bicach láani lainy yo' lairy ro rabésa.

Órni radzelyibu guirá cós re' ritnéyibu láani rono' Josué, láabu raibybu a Acán: ¿Xigony golo'lo lóodo ló galnagan? ¡Nigore' Jehová sony láani looy! Ór cú guirá buñ ragasguiee Acán né xfamily hasta raityibu. ¿Diti rasuidy nde' lóono que diti non guica'no cós ni diti nac xtunyno la?

Órni ma godudy guirá nde', Israel riée radiilyibu stoib né gudxrop ni laa Hai, né nigore' Jehová racné layibu né ronyibu gann.

Josué 7:1-26; 8:1-29.




## GABAONITAS NANÍ XCALRRIEN 48

**X**IDAL gudx de Canaán rio'yibu puext par tíilyibu né Israel. Raluladx yibu que gonyibu gann. Per buñ ni rabés lainy gudx Gabaón diti raluladx. Raluladx yibu que Dios ngú ni racné a Israel, né diti nainy layibu guicalóyibu Dios. ¿Nanlo xí rony gabaonitas la?

Radxiinyibu toib acuerno que gonyibu sani sieedyibu de toib lagary nigolú sit. Por ngú tipnéyibu roc lairy yox né racañé' galguit yox. Rago'oyibu xporyibu pór sac yox né rinéyibu paa ni ma rioy né nachóngni. Ór cú rieyibu rono' Josué né raniyibu: Sieldo de toib gudx nigolú sit portín bicadiagdo guirá ni ma buny Dios xtunyto, Jehová. Bicadiagdo guirá ni bunybu por lóoto órni goyo'to Egipto. Né buñ ni rasanir lainy xcudxdo gochyibu lóodo ñonytzaaydo galrro par ninédo ló néz né ñaibydo lóoto nde': Lóodo nacdo xomósto. Biduidy xtiitzlo que diti tiilto né lóodo.

Lóoto labúu rabíto que xhaphdo ma biooxni portín nigolú sit sieldo, né paa ni bitnédo ma rioyni né ma paa chóng láani.



Josué né ancianos de Israel raluladxyibu ni rani' gabaonitas. Por ngú raduidyibu xtiitzzyibu que diti tilyibu né layibu. Radudy tzón govit, layibu raduidyibu cuent que gabaonitas rabés gahx ro dxeeeyibu.

Josué ranabdiitz layibu: ¿Xigony góochto lóodo que sieedto de toib gudx ni no' sit?

Gabaonitas racapyibu: Portín goyo' ni góoch lóodo que Dios xtunyto, Jehová, goní que guica'to guidopynac Canaán. Né lóodo bidzuiydo nagaityto lóodo. Israelitas bunyibu ni goníyibu diti bigaityibu gabaonitas. Xalagary de nagaitybu gabaonitas ronyibu guirá nde' xomósyibu.

Buñguieeu ni rony mandary Jerusalén radzuitznébu gabaonitas portín ma gocyibu toibsi né Israel. Buñguieeu ni rony mandary Jerusalén raibybu a tap buñguieeu ni láaca rony mandary stipnés gudx: Golta' né colgacné na' par guicalóno Gabaón. Né gáay buñguieeu re' ngú ni rony. ¿Góc gabaonitas buñ ni naní xcalrrien por ni gocyibu toibsi né Israel, nigore' que gáay buñguieeu ni rony mandary stipnés gudx ná guinitló layibu la? Guibino guidoni.


Josué 9:1-27; 10:1-5.



## GOVITZ RIA'ANNI TOIBSI LAGARY<sup>49</sup>

**B**IBI' a Josué. Láabu rani': ¡Govitz, diti saalo! Né Govitz ria'anni toibsi lagary. Diti rasaani guidopynac dzú. ¡Ni rony ndé' ngú Jehová! Per guisuidyno xigony Josué ná que Govitz guisaní.





Órni gáay buñguieeu mal ni rony mandary gudx Canaán rasaló racalóyibu gudx Gabaón, gabaonitas raxelyibu toib buñguieeu par tze tzágudx Josué par gacné layibu. Né buñguieeu re' ranibu: ¡Goda' ro nóodo ni maca! ¡Bilaa lóodo! Gáay buñguieeu ni rony mandary stipnés gudx cacalóbu lóodo.

Órcuca Josué né guirá soldad xtuny ríeyibu par gacnéyibu gabaonitas. Rasaayibu guidopynac gue'el. Órni radxiinyibu gudx Gabaón, guirá soldad xtuny gáay buñguieeu re' radzuibyibu né rasaló raxonyibu. Ór cú Jehová rony que guiab laver ropdann, né raity más soldad por laver que ni ragaity soldad xtuny Josué.

Josué rabíbu que Govitz mápa mer tza'isni. Ma tzógue'el, né xidal soldad xtuny gáay buñguieeu mal re' saxonyibu. Por ngú, Josué raninébu Jehová né ór cú ranibu: ¡Govitz, diti saalo! Né órni Govitz casaníni, israelitas labúu ronyibu gann.

No' stipnés buñguieeu mal ni rony mandary gudx Canaán ni rianladx xcudx Dios. Josué né guirá soldad ni no' né láabu, xhoop íz rinéni layibu par guinitlóyibu guirá buñguieeu ni rony mandary 31 gudxrop. Órni bilox bunybu nde', Josué ratzóobu gudx Canaán par guirá family ni caquiin layoo.

Radudy xidal íz, né Josué raity órni napbu 110 íz. La'ga Josué né ximigyibu nabany, buñ rasob Jehová. Per órni goityibu, buñ rony cós mal né rio'yibu ló galnagan. Nigore' ma raquiinyibu que Dios gacné layibu.



# CHOP BUÑGONA' NI GOP BALORY 50



**Ó**RNI israelitas rio' ló galnagan ranabyibu lóo Jehová par gacné layibu. Né Jehová racapy layibu, por ngú raxelbu buñ ni nap balory ni guisanir nislóyibu par gacné layibu. La Biblia rani' layibu jueces. Josué góe primer juez, né stipnés jueces ni goyo' después de láabu góe laa Otniel, Ehúd né Samgar. Per chop buñ ni gocné a Israel gocyibu buñgona', chop buñgona' re' góe laayibu Débora né Jael.

Débora góe toib buñgona' ni rani' xí gac dzú ni sietra, láabu raibybu gudx Israel xí ni ná Jehová. Débora láaca góebu juez. Láabu gorúbu xan toib yac laidy dainy, né buñ ried ron'bu par gacnébu buñ ni cadudy ló galnagan.

Ló dzúcu Jabín rony mandary Canaán. Napbu 900 carret ni goya'tzaay nosi par tzanéyibu ló guerr. Napbu xidalguixo soldad né por ngú xidal israelitas no' xan xomandary Jabín. Buñguieeu ni rony mandary guirá soldad re' laabu Sísara.



Goyo' toib dzú, Débora raxelca' juez Barac né raibybu, Jehová goni nde': Cua' 10,000 buñguieeu né biné layibu dainy Tabor né lagarycu goni que Sísara guidxin ro nóolo. Né na' goni que looy gonylo gann Sísara né guirá soldad ni no' né láabu.

Barac raibybu Débora: Tzaaya lagarycu pal looy tzélo né na'. Débora rasaguel, per raibybu a Barac: Diti looy guisanadx buñ por ni gonylo gann layibu, portín Jehová guiduidybu lagary que toib buñgona' guigaity Sísara. Né scú gocni.

Barac rietjbu laidy dainy ni laa Tabor par guitzaglóobu soldad ni sieed né Sísara. Tisintiempshi, Jehová ranitló layibu né toib guiérodann, né guirá soldad ni nac enemig xtuny Jehová re' nís. Sísara rietj lainy xcarret né raxonybu.


Diti xiro' ór, Sísara radxinbu lagary ro rabés Jael, né Jael raiby a Sísara que tudybu lanió', né raduidybu tidxo lech re' Sísara. Nde' rony que ranás toib baca'alnix Sísara. Ór cú Jael raca' toib estak né ratza'isbu láani guic Sísara. ¡Órni Barac radxiin, Jael ralooy láabu a Sísara ma gue'et nac! Ni goní Débora birebu'ni.

Radxiin midid rio' ni ragaity Jabín ni rony mandary Canaán, né por xidal íz ragua'yibu goxt.

**L**Ó LA Biblia sadzelo toib libro ni laa Rut. Nacní toib libro ni rani' de toib family ni bibany ló dzú ni gop Israel jueces. Rut toib mbioxhlas de gudx Moab; láabu diti nacbu buñ de Israel, xcudx Dios. Per órni Rut rasuidy de Jehová ni rasuidy xinésni, Rut rasaló randxigolu Dios. Noemí ni gocné a Rut par bimbu a Jehová ma buñgol nacbu.

Noemí buñ israelita láabu. Láabu né tzeelbu né guiropca xiimbu goylésyibu gudx Moab órni goyo' govinn galrro ro golés israelitas. Toibtica dzú tze'el Noemí goity. Godudy dzú xiin Noemí cua'yibu chop mbioxhlas moabitas ni góe laa Rut né Orpá. Godudy chii iz de goló cua'yibu buñ goityibu. ¡Nde' nigolú golo' nabanni Noemí! ¿Xí láani gonybu nigore'?

Toibtica dzú Noemí rago' guic guibiguet ro dxee buñ xcudx, toib lagary nigolú sit. Rut né Orpá náapa tze né



láabu, né láaca rony compañeryibu Noemí. Per órni ma xiro' gosaayibu ló néz, Noemí raiby a chop mbioxhlas re': Colguibiguét lagary ro sieedto né colguian né xina'to.

Noemí raduidy bixit a guiroppca xolidx né ranibu sacró coltzé. Layibu rasaló ribdxa'yibu, portín nadxigolúyibu Noemí. Raniyibu: ¡Yaca! Lóodo tzódo né looy rono' buñ xcudxlo. Per Noemí racapy layibu: Xiindzapa, lóoto non guibiguétto. Sieeni más galán lóoto rono' xfamilto. Ór cú Orpá ranás néz né rabiguét lidx. Per Rut diti rabiguét.

Noemí radxiguét lóo né raibybu a Rut: Orpá ma bibiguét. Bibiguétné láabu. Per Rut racapy: ¡Diti gonylo que guisiana looy! Biduidy lagary na' gony compañer looy. Ro tzélo na' tzaaya, né ro cuéslo cú cuésa. Xcudxlo sac xcudxi né Dios xtunylo gac Dios xtuni. Lagary ro gaitylo na' gati, né cú sacachyibu na'. Órni Rut ralox rani' guirá nde', Noemí raduidy lagary gony compañer Rut láabu.

Radxiin dzú chop buñgona' re' radxiinyibu Israel. Lagary re' rabésyibu. Rut ni maca rasaló rony dxiin, portín xtzú ni ratop buñ cebada láani. Toib buñguieeu ni laa Boaz raduidy lagary guitopbu cebada lainy xalioobu. ¿Nanlo chú ngú xina' Boaz la? Láabu ngú Rahab, de gudx Jericó.

Toib dzú Boaz raiby a Rut: Ma bicadiaga xidal cós tzaay de looy né que buñtzay naclo' né Noemí. Nandxichi que bisianlo bixioslo, xina'lo, xcudxlo né sieedlo sitléslo lad toib gudx ni diti ma bimbulo. ¡Raniiny na' que Jehová guiduidy galnasác looy!

Rut racapy: Looy nigolú buñtzay naclo' né na'. Guirá cós buen ni ma gochlo na' galán láani par na'. Boaz nigolú rioladxbu mod nac Rut né diti xidzú ronyibu galtze'el. ¡Guirá ni ronybu rabaladx Noemí! Per Noemí más rabaladx órni Rut né Boaz rio' primer xiinyibu ni gole'yibu laa Obed. Después Obed radxiin rac bixiogol David, de buñguieeu re' ni laa David guisuidyno más ló historias ni sietra.

**¿**RABILO xí cayac ló dibuj re' la? Buñ ni no' re' soldad xtuny Israel ni riée guerr layibu né cayachca'da caye'yibu nís. Juez ni laa Gedeón saga' gahxca layibu. Gedeón cabí ximod caye' soldad nís.

Bibi' tzaay diti toibsi mod caye' guirá buñguieeu re' nís. Tipnéyibu par gue' nís raqui'ich lóo. Per toibbu ragaipj nís né ña par gue', né scú labúu guibí xí cayac ro dxeeyibu. Nigolú rasac



gonyibu modre' portín Jehová góoch a Gedeón que nosi cuubu soldad ni rabí xí cayac ro dxeeyibu órni caye'yibu nis. Stipnés ni diti rony modre' non guibigué riolidx. Guibino xigony.

Israelitas noyibu ló galnagan stoib portín diti ma bisobyibu Jehová. Madianitas ma gocyibu más nadip né ronyibu mal a Israel. Por ngú israelitas ranab lóo Jehová par gacné layibu, né Jehová racadiag ni ranabyibu.

Jehová raiby a Gedeón que guiyopybu soldad, por ngú Gedeón ratop 32,000 buñ ni riée guerr. Per soldad ni guicaló layibu nac 135,000 buñguieeu. Por ngú, Jehová raiby a Gedeón: Naplo xidalguixo soldad. ¿Xigony raiby Jehová láabu scá?

Jehová goní scú portín pal israelitas gony gann ló guerr, labúu ñonyibu pensary que diti no' chú gocné layibu, né que diti raquiin que Jehová gacné layibu par gonyibu gann. Por ngú Jehová raiby a Gedeón: Góoch a guirá ni radzuiby guibigué lidx. Órni Gedeón rony ni rani' Jehová, 22,000 soldad rabigué. Nde' rony que nosi 10,000 soldad rian par tze guicaló 135,000 soldad.

Per bibi' gannlo xí ná Jehová: Xidal soldad no' né looy. Por ngú ronybu que Gedeón gony que soldad ni no' né láabu gue' nís gu'uc ro dxeeyibu né radxiguébu riolidx guirá ni riachca'ða par gue' nís. Jehová raduidy xtiitz a Gedeón: Looy sonylo gann né 300 soldad ni go' nís né ni bibi' xí ni cayac ro dxeeyibu.

Radxiin dzú ni ma tzeyibu ló guerr. Gedeón ratzoo tzón midid 300 soldad ni napbu. Cada toib soldad raduidybu toib dxitguic nimal né láaca toib palory né lainy palory ragobu tiplá' yac ni cayalguii. Órni máyaaca guidxin gala' gue'el, guiráyibu ragooyibu lagary ro dxee xi enemiyibu. Ór cú toibsi ór, racudxyibu dxitguic nimal né rala'yibu palory ni napyibu, né raca'yibu rudx: ¡Espad xtuny Jehová né xtuny Gedeón! Órni soldad ni nac xi enemiyibu rare' baca'al lóo, diti radzel xi gonyibu né radzuibyibu. Guiráyibu raretzlayibu né israelitas rony gann.

¿MA GOYO' toibtica buelt biduidylo xtiitzlo né nagann goni par gonylo láani la? Scá gosaclo buñguieeu ni rabilo ló dibuj re', né por ngú no'bu nabann. Láabu ngú Jefté toib juez de Israel ni gop balory.

Jefté nabany ló xtzú israelitas órni layibu ma diti cayony adoryibu Jehová. Cayonybu cós mal stoib. Né Jehová raduidy lagary que buñ gudx Amón gony mal layibu. Israelitas ranab lóo Jehová: Bichédo nislólo. ¡Ranabdo looy bilaa lóodo!

Israelitas rasac mal por guirá ni bunyibu. Raslooyibu láani modre', ni rony adoryibu Jehová stoib. Por ngú Jehová racné layibu stoib.

Gudx Israel raloyña a Jefté par guicalóbu ammonitas. Jefté raniinygolu Jehová gacné láabu órni guicalóyibu ammonitas. Por ngú raduidybu xtiitzbu a Jehová: Pal looy ronylo que na' gony gann guidudi looy primer buñ ni guiré riolidxi né guitzacróo na' órni guibigueta órni ma buny gann ammonitas.


Jehová rago' cuent xtiitz Jefté né racnébu a Jefté par gony gann. Órni Jefté rabiguet, ¿nanlo chú ngú primer buñ ni rare' par guicacuent láabu la? Láabu ngú xiindzap guielót Jefté. Jefté ribdxa': Xiindzapa, xiindzapa, casac nabann por looy. Per na' ma bidudi xtiidza a Jehová né nigore' non goni ni ma goniya.



Órni xiindzap Jefté ran xí ni goni bixiosbu primer rio'bu nabann portín guisiambu bixiosbu né ximigbu. Per la'ga nabanybu sonybu dxiin lainy yo' ro rac adorar Jehová gudx Siló hasta guidxin dzú gaitybu. Por ngú raibybu a bixiosbu: Pal looy ma biduidylo xtiitzlo a Jehová, non gonylo láani.

Por ngú xiindzap Jefté riée Siló la'ga nabanybu ronybu xchiin Jehová lainy yo' ro rac adorar Jehová lainy gudx Siló hasta guidxin dzú gaitybu. Buñgona' gudx Israel riée riguen a xiindzap Jefté tap govitz ló toib íz né ragua'yibu sacró la'ga noyibu né mbioxhlas re'. Buñ nadxibu xiindzap Jefté portín láabu ronybu ni ná Dios, Jehová.

Jueces 10:6-18; 11:1-40.







¿NANLO ximod góe laa buñgueeu ni más nadip ni bibany la? Láabu ngú toib juez ni góe laa Sansón. Jehová ngú ni buny que ñacbu toib buñ nadip. Órni yása gálbu Jehová góoch a xina'bu: Mába mer tzó toib xiinlo. Láabu ngú ni guisanir par guilaa a gudx Israel de guirá filisteo.

Filisteos nacyibu buñ mal ni rabés Canaán. Napyibu xidal soldad ni riée ló guerr, né layibu ronyibu mal israelitas. Toibtica buelt Sansón riée ro rabés filisteos, toib betz ons nigolú bief raca'mu rudx né racaló láabu. Per Sansón ragaity betz re' nosi né ña. Láaca ragaitybu xidalguixo buñ filisteos ni nac buñ mal.

Ór cú Sansón rioladx toib gona' ni laa Dalila. Buñgueeu ni rasanir nisló filisteos raduidyibu xtiitziyibu que cada




toibbu guiduidy 1,100 nilas de plata a Dalila par guinibu xí láani rony nadip a Sansón. Dalila raniiny guica'bu bidxiich re'. Diti nacbu ximigdxin Sansón, ni de xcudx Dios. Por ngú láabu diti rasiambu de ranabdiitzbu Sansón xí láani rony nadip Sansón.

Radxiin midid Sansón raset né raibybu a Dalila xigony nga nigolú nadipbu. Diti ma bigaa guitzguica, ranibu. Desde dzú goola, Dios biloyña na' par goni xchiimbu né por ngú na' nac nazareo. Pal nagaayibu guitzguica, ma diti ñaca buñ nadip.

Órni Dalila racadiag nde', rastiasybu Sansón ló ñe'bu. Ór cú ronybu que toib buñgueieu rio' né ragaa guitzguic Sansón. Órni Sansón rare' baca'al lóo, ma diti nadipbu. Filisteos rio' rono'bu né ranás láabu. Rabexcoo guiropca bisalóbu né ronyibu que Sansón tzó xan xomandaryibu.

Toibtica dzú filisteos napyibu toib lanii ro' par gony adoraryibu dioxh ni laa Dagón, né rabe'yibu Sansón press par guixiichyibu Sansón. Par ló dzure' guitzguic Sansón ma biga' stoib. Sansón raibybu a mbiox ni canás ñabu: Biduidy lagary na' caana pilary ni nanás yo' xiro' re'. Ór cú Sansón ranabbu lóo Jehová par gony nadip láabu, ór cú ranásbu pilary cú. Né raca'bu rudx: Biduidy lagary na' gati né filisteos. No' 3,000 filisteos ló lanii ni cayac, né órni Sansón rachupia' pilary ni nanás yo' xiro' re', yo' xiro' re' riab layoo né ragaityni guirá buñ mal ni dxeé cú.

Jueces, capítulos 13 a 16.





**N**IGOLÚ móz nac bada' re'. Laabu Samuel. Né buñguieeu ni caguinña guicbu ngú Elí, ni rasanir nisló israelitas par gony adoryyibu Jehová. Ni riné láabu rono' Elí ngú bixiosbu Elqaná né xina'bu Ana.

Samuel nosi nap tap o gáay íz, né radxinbu par cuésbu lainy yo' ro rac adorar Jehová toibsi né Elí né stipnés ni rasanir nisló israelitas. ¿Xigony bitné Elqaná né Ana a toib mbioxien xomod Samuel par gony dxiin lainy yo' ro rac adorar Jehová? Guisuidyno guidoni.

Nir ñac guirá nde', Ana goyo' nabann. Nde' gocni por digaldi ño' xiimbu, né goniinygolu ñapbu toib bada'. Por ngú, toib dzú goyebu yo' ro rac adorar Jehová, né gonabbu lóo Dios: ¡Jehová, diti guialadxlo na'! Pal looy gonylo que tzó toib xiinna, na' radudi xtiidza que sadudi láabu looy, par labúu gonybu xchiinlo ló guidopynac dzú ni guibanybu.

Jehová cuapy ni gonab Ana, né godudy tipnés be'o gosanbu Samuel. Ana gondxi xiinien, né gosaló bisuidybu xiimbu ni ná Jehová órni niye'ensabu. Ana góoch tze'el: Nosi cuésa que Samuel nís tidxo né ma diti guiquimbu na', tzanéya láabu lainy yo' ro rac adorar Jehová par gonybu xchiin Jehová lagarycu.

Láani ngú ni rabino cayony Ana né Elqaná ló dibuj ca. Samuel nigolú rioladxbu gonybu xchiin Jehová lainy yo' ro rac adorar a Jehová, portín bixiosbu né xina'bu bisuidytzaay láabu. Guirá íz bixiosbu né xina'bu rievedyibu ritguenyibu xiinienbu rono' yo' ro rac adorar Jehová né láaca par gony adoryyibu Jehová. Ana guirá íz láaca ritné toib lairy móz ñaron ni godibbu par Samuel.

Radudy íz, Samuel cayonysa dxiin lainy yo' ro rac adorar Jehová, gudx Israel né Jehová rioladxlyibu mod nac Samuel. Per guiroppca xiin Elí, Hofní né Finehás, diti nacyibu buñtzay. Layibu ronyibu xidal cósmal, né láaca ronyibu que stipnés diti guisob ni ná Dios. Elí non

nabe' layibu de ñacyibu buñ ni rasanir nisló israelitas par gony go'ox, per diti ronybu láani.

Ná mbioxhlasien nac Samuel diti raduidybu lagary que cós mal ni rac lainy yo' ro rac adorar Jehová cuégan láabu de guiembu a Jehová. Per por xidzú íz Jehová diti ma goninébu ni toib buñ, portín tidxósi buñ nigolú nadxi láabu. Órni Samuel ranísbu tidxo más, nde' ni rac.

Ro náaxh natiasy Samuel lainy yo' ro rac adorar Jehová, bicadiagbu toib ni goní, nde' gole' baca'al lóbu. Láabu cuapybu: Re' no'ya. Né raxonybu riásbu riebu rono' Elí, né ranibu: Bicarudxlo na', né re' no'ya.

Per Elí racapy: Na' diti bicarudxi looy, bibiguet go'ot. Por ngú Samuel rabiguet ló xilo'on stoib.

Rarop buelt racadiagbu rudx re' stoib: ¡Samuel! Por ngú Samuel riás né rabiguet rono' Elí, né ranibu: Bicarudxlo na', né re' no'ya. Per Elí racapy: Diti bicarudxi looy xiinga'na. Bibiguet go'ot. Né Samuel rabiguet ló xilo'on stoib.

Ni rion buelt racadiagbu rudx re' stoib: ¡Samuel! Por ngú Samuel riás né rabiguet rono' Elí. Né Samuel ranibu: Re' no'ya, nigore' looy nga ni cacarudxlo na'. Nigore' Elí nann que Jehová ngú ni cacarudx. Raibybu a Samuel: Goyga'at stoib, né pal láabu ranibu, looy guicapylo: Goní Jehová portín ni rony xchiinlo cacadiag looy.

Ngú ni rony Samuel órni Jehová racarudx láabu stoib. Nigore' Jehová raiby a Samuel que sony castigarbu a Elí né guiropca xiin. Diti xidzú, Hofní né Finehás raityibu ro cacalóyibu filisteos, né órni Elí ran ni góç, riabbu ria'ach yainybu né raitybu. Modre' góç guirá ni goní Jehová.

Samuel ranís, né radxinbu racbu último juez de gudx Israel. Órni radxiin racbu buñgol, gudx Israel raiby láabu: Golú toib buñ ni gony mandary lóodo. Samuel diti nainy láabu gonybu nde', portín ni rony mandary layibu ngú Jehová. Per Jehová raiby láabu que guicadiagbu ni ná gudx Israel.

## *Primer ni buny mandary Israel hasta órni séeyibu gudx Babilonia*

*Saúl góc primer buñguieeu ni gosalo buny mandary Israel. Per Jehovah gole' Saúl tiplad, né golúbu a David par gony mandary xalagarybu. Guisuidyno xidal cós ni buny David. Dzú nacbu mbioxhlasien, cualóbu buñguieeu ni nigolú naso' ni góc laa Goliat. Diti xidzú de goló góc nde', David bixony de Saúl ni bianladx láabu. Ór cú buñgona' mós ni góc laa Abigail bicaa lóbu de ñonybu toib cós nga'al.*

*Láaca guisuidyno de xidal cós ni buny Salomón, xiin David, ni buny mandary Israel xalagarybu. Primer tzón buñguieeu ni buny mandary Israel, cada toibyibu buny láani por 40 iz. Órni goity Salomón, gudxrop de Israel bidzoni en chop gobierno, toibni góc de chop family xiro' né stoibni góc de chiï family xiro'.*

*Gobierno de chiï family xiro' buny mandary por 257 iz né ór cú binitló buñ asirios gobierno re'. Godudy 133 iz láaca binitló gobierno de chop family xiro'. Nigore' goyo' ni biné a israelitas xomod buñ ni sée press Babilonia. Pal ragabno guirá iz re' Midid TAP rasa'ni 510 iz de historia, né ló guirá iz re' radudy xidal cós ni sioladxno guisuidyno.*

# SAÚL NI PRIMER BUNY MANDARY ISRAEL

56

**B**IBI' Samuel cagotz aceity guic buñguieeu re'. Ló dzúcu scá ronyibu par guislooyibu chú ngú ni cabúyibu par gony mandary. Jehová raibybu a Samuel guigotz aceity guic Saúl, aceity re' gadzé clas láani portín ralanaxni.

Saúl diti biluladxbu que labúu gony mandarybu xcudx Jehová. Láabu raibybu Samuel: Na' sieela de xfamily Benjamín ni más nahuin de Israel. ¿Xigony nálo que na' gony mandary? Jehová rioladx mod nac Saúl portín diti raniiny láabu gacbu toib buñxirop. Por ngú Jehová rabú láabu par gony mandarybu gudx Israel.

Per Saúl nacbu buny ric. Xhomilbu nap xiro' bidxiich né toib buñguieeu móz láabu né naso'bu. ¡Radudytzoobu guic guirá israelitas! Saúl láaca nambu raxonybu, né nigolú nadipbu. Buñ rabaladx que Jehová golúbu Saúl par gony mandary. Guiráyibu raca'yibu rudx: ¡Ni rony mandary guibany xidzú!

Guirá xi enemig israelitas nadipsayibu. Diti xidzú de goló gosalo buny mandary Saúl, ammonitas bia'py par guicaló layibu. Per Saúl ratop xidalguixo buñ, né ronyibu gann ammonitas. Gudx Israel rabaladx que Saúl cayony mandary layibu.

Radudy xidal íz, Saúl rasanir nisló israelitas par gony gann xidal buelt ló guerr. Saúl láaca no' toib xiimbu ni nap balory, laabu Jonatán. Né Jonatán racné gudx Israel par gony gann xidal buelt ló guerr. Filisteos nacsá enemig ni más rianladx gudx Israel. Toibtica dzú, xidalguixo filisteos rieved par guicaló Israel.


Samuel raibybu Saúl que diti gac naguelbu gonybu toib galrrascad Jehová, que cuésbu Samuel. Per Samuel racla. Saúl radzuiby que filisteo saló tíil né layibu, por ngú rac naguelbu né

lásibu ronybu galrrascad cú Jehová. Órni Samuel radxiin rono'bu raibybu Saúl que diti bisobbu Jehová. Samuel raiby láabu: Jehová sabú stoib buñ par gony mandary Israel.

Diti xidzú de goló góc nde', Saúl diti rasobbu Jehová stoib. Samuel raiby láabu: Más galán láani guisob buñ Jehová que ni guiscad buñ xidal xiil ni más nasac láabu. Por ni diti bisobdiitzlo Jehová, láabu gonybu que guisianlo gony mandarylo Israel.

De guirá nde' no' ni rasuidyno, que nigolú rasac guisobno Jehová guirá ór. Nde' láaca rasuidy que buñ ni natzaay xcalrrien xomod góc Saúl, labúu gac buñ mal.  
¡Diti guisaclo no xomod gosaclobu!

1 Samuel, capítulos 9 a 11;  
13:5-14; 14:47-52; 15:1-35;  
2 Samuel 1:23.







¿LABÚU rabilo xí góc re' la? Mbioxien re' ma bilaabu xilieen de toib ós. Per ós re' gonásmu xilieen re' par guámu né mbioxien re' cuanal ós né bilaabu xilieen re' de ro' ós cú. ¡Né órni ós re' biás, mbioxien re' gole' herid né bigaity láamu! Stoib ór mbioxien re' láaca bilaabu toib xilieen de toib betz ons. Guirá ni buny mbioxien re' raduidyni diitz que napbu balory. ¿Nanlo chú ngú mbioxien re' la?

Láabu ngú David né rabésbu lainy gudx Belén. Bixiogolbu góc Obed, xiin Rut né Boaz. ¿Rasetnaladxlo layibu la? Né bixios David ngú Jesé. David ran xiil xtuny bixios. David gool chii íz después ni Jehová golú Saúl par gony mandary.

Radxiin dzú Jehová raiby Samuel: Cua' aceity ni ralaxiin né goyee lidx Jesé ni rian lainy gudx Belén. Ma golúya toibtica xiinga'nbu par gony mandary. Órni Samuel rienlóo Eliab, xiin lagol Jesé, raibybu láacabu: Nde' láabu. Per Jehová raiby láabu: Diti guibilo por ni naso'bu né ni buñguieeu móz nacbu. Diti golúya láabu par gony mandary.

Ór cú Jesé raca' rudx xiinga'n ni laa Abinadab né rinébu nde' nisló Samuel. Per Samuel ná: Yaca, Jehová láaca diti golú láabu. Después, Jesé ritné xiinga'nbu ni laa Samah nisló Samuel. Yaca, Jehová láaca diti golú láabu, ná Samuel. Jesé ritné gatz xiin nisló Samuel, per Jehová diti rabú ni toibyibu. Samuel ranabdiitz: ¿Guirá nde' xiinlo la?

Jesé racapy: Rian ni más mbioxhlasien. Yadibu, cayambu xiil. Órni ritnéyibu David, Samuel labúu rabí que toib mbioxhlas móz nacbu. Nde' láabu, ná Jehová. Bigotz aceity guicbu. Samuel rony mod ná Jehová. Radudy dzú, David radxiin rony mandary lainy Israel.

**F**ILISTEOS rieved stoib buelt par guicaló Israel. Tzón buch lagol David no' lad guirá soldad ni nap Saúl. Por ngú toibtica dzú, Jesé raxel David: Gonyné galrro né páa par guá buchlo. Bibi' pal labúuga dxeeyibu.

Órni David radxiin ro dxee soldad, raxonybu rayopybu buchbu lagary ro radiil guirá soldad. Buñguieeu filisteo ni naso' ni laa Goliat rare' né raxiichbu de guirá israelitas. Por 40 dzú ronybu modre' guirá rosil né gue'el. Raca'bu rudx: Colguiyopy toib buñ par guicaló na'. Pal láabu ronybu gann né ragaitybu na', lóodo si'o'do xan xomandaryto. Per pal na' gony gann né guigati láabu, lóoto si'o'to xan xomandarydo. Rasian láani en lóoto pal labúu guidzelto toib buñ ni labúu guicaló na'.

David ranabdiitzbu tipnés soldad: ¿Xí láani guica' ni guigaity filisteo cú, né ni cué Israel ló galnatoy?

Saúl saduidy xidal cós ni rasac láabu, né láaca saduidybu toib xiindzapbu

par gac tze'el ni gony gann filisteo, ná toib soldad.

Per guirá israelitas radzuiyibu Goliat portín toib buñguieeu nigolú naso' láabu. Naso'bu casi 3 metros, né napbu toib soldad ni ro'oy escudo xtunybu.

Tipnés soldad riée né raibyibu Saúl que David nainy tze guicaló Goliat. Per Saúl raibybu David: Diti labúu gonylo láani. Toib mbioxsa looy, né láabu ma xidzú no'bu ló galsoldad. David racapy: Na' bigati toib ós né toib betz ons ni ná ño xiil ni



nap bixiosa. Nigore' filiteo  
ca láaca nacbu xomod toibtica  
nimal cú. Jehová gacné na'.  
Por ngú Saúl raiby láabu:  
Goyee, Jehová tzó né looy.

David rietj ro' gu'uc né  
ratop gáay guíee nadxipdoot  
né rago'bu láani lainy  
xmorralybu. Ór cú ria'pybu né  
honda xtunybu par guicalóbu  
Goliat. Goliat diti raluladx  
láani. Láabu ronybu pensary  
que diti naganni guigaitybu  
David.

Goda' re', ná Goliat, né  
guidudi xpéelo guá nimal ni  
rasapy né stipnés nimal. Per  
David racapy: Looy cacalólo  
na' né toib espad né toib lanza,  
per ni cayacné na' ngú Jehová.  
Dzure' Jehová guiduidy looy  
ladxñaya né guigati looy.

Nigore' David raxony  
rono' Goliat. Rabébu lainy  
xmorralybu toib guíee,  
rago'bu láani lainy honda  
xtunybu, né rasalbu guíee re'  
né guidopy xfuersbu rono' Goliat. ¡Guíee cú ria'isyni guic Goliat, né  
Goliat riab layoo! Filisteos órni rabíyibu Goliat, ni racné layibu par  
gonyibu gann ló guerr, ma náaxh layoo raxonyibu. Israelitas racanal  
layibu né ronyibu gann guerr.



ÓRNI David ragaity Goliat, Abner ni rony mandary xidalguixo soldad de Israel riné láabu rono' Saúl. Saúl rony que David gony mandary xidalguixo soldad, né láaca ronybu que David cués lidxbu.

Órni guirá soldad rabiguet radiil né filisteos, buñgona' ro'ol toib canción: Saúl ma bigaity miles, per David bigaity chii miles. Saúl rianladx David portín rasanadxyibu más David que láabu. Per

Jonatán xiinga'n Saúl diti rianladxbu David, láabu nadxbu David né David láaca nadxi láabu. Por ngú raniyibu que diti guisianyibu de gac ximigdxin sa'yibu.

David ro'oltzaaybu arpa, né Saúl rioladx racadiag mod ro'ol David láani.

Per toibtica dzú xcalrrianladx Saúl riné láabu gonybu toib cós mal David. La'ga David cay'o'ol arpa, Saúl ralis lanza

né ranibu: ¡Guitza'is David cué yo'!, né rasalbu láani. Per David rarecue'. Stoib ór, Saúl rasal lanza ca stoib buelt rono' David per láaca rachébu. David nigore' nann que napbu xi de gapbu más cuidad guirá ór.

¿Rasetnaladxlo xí goní Saúl gony la? Láabu gonibu que guiduidybu xiindzapbu



gac tze'el buñguieeu ni guigaity Goliat. Radxiin ór, Saúl raibybu David que labúu guica'bu Mical, per nír guigaitybu 100 filisteos. ¡Bunysi xpensarylo! Ni nainy Saúl ngú que filisteos guigaity David. Per diti racni scú, né Saúl raduidy xiindzap par gac tze'el David.

Toibtica dzú Saúl raibybu Jonatán né a guirá xomós que nainy láabu guigaitybu David. Per Jonatán raiby láabu: Diti gonylo mal David. Láabu ni toib buelt ma bunybu mal looy. Láabu ma gocnébu looy. Goyo'bu puext ñaitybu órni bigaitybu Goliat né órni bibilo láabu bibaladxlo.

Saúl racadiag ni raiby Jonatán láabu, né raduidybu xtiitzbu que diti sonybu mal David. Ronyibu que rabiguet David lidx Saúl né láabu rasaló rony dxiin né Saúl stoib. Per toibtica dzú órni David nipeen no' cayo'ol arpa, Saúl ná guigaity láabu stoib buelt né lanza. David rarecue', né lanza re' racáni cué yo'. ¡Nde' ni rion buelt ni rony Saúl láani láabu! ¡Nigore' David ma nann que non guixonybu!

Gue'el cú David riée lidx, per Saúl raxel tipnés buñ par guigaity láabu. Mical nann xí láani ná bixiosbu gony. Raibybu David: Bire' goxin re', portín guixí ma gue'et looy. Goxin cú Mical racnébu David par guirébu niis ro' toib bentan. Yaaca gatz íz David rio' nagach né diti rio'bu toibsi lagary par diti guidzel Saúl láabu.

1 Samuel 18:1-30; 19:1-18.



¿RIMBULO gona' mós ni sidguen a David la? Laabu Abigail. Láabu naní xcalrriembu, né racaabu David par diti gony toib cós mal. Par labúu ganno xigony cayonybu nde', nír guisuidyno xí ni cayac né David.

Diti xidzú de goló bixony David de Saúl, láabu racachlanbu lainy toib bile'. Buchbu né stipnés xfamilybu rieved ridguen láabu. Láaca 400 buñguieeu rieved rono'bu, né David rasanir nislóyibu. Ór cú



David riée rono' buñgüieeu ni rony mandary gudx Moab né raibybu buñgüieeu re': Ranába lólo, biduidy lagary que bixiosa né xina'ya guia'an re' rono'lo hasta órni gann xí gac né na'. Ór cú, David né guirá buñgüieeu ni no' né láabu rasaló racachlanyibu gu'ix.

Radudy tidxo dzú, David rimbu Abigail. Tze'el Abigail laa Nabal, láabu nac toib buñgüieeu ric ni nap xiro' layoo. Napbu 3,000 xiil né 1,000 chiv. Nabal nigolú nagudx xcalnabanybu. Per tzeelbu Abigail nigolú móz nac. Láaca nambu ronybu xinésni. Toibtica buelt hasta bilaabu xhomilbu. Guibino ximod bunybu láani.

David né guirá buñgüieeu buñtzay góe portín gonyibu xiil xtuny Nabal. Toibtica dzú David bixel tipnés buñgüieeu ni no' né láabu par ñeyibu nanabyibu lóo Nabal cóe ni caquiinyibu. Layibu radxiinyibu rono' Nabal la'ga buñgüieeu re' né xomós cagaayibu laidy xiil. Nabal no'bu ló lanii né napbu xiro' galrro par guá buñ. Por ngú buñgüieeu ni raxel David raniyibu: Lóodo ma góedo buñtzay né looy. Diti golanndo ni toib xiil ni naplo, per goenédo looy gopdo layimu. Ranabdo lólo, biscat tidxo galrro lóodo.

Nabal rani': Diti sadudi galrro a buñ xomod lóoto. Nachóng rony xtiitzbu né ranibu cóe mal de David. Órni guirá buñgüieeu re' raibybu David ni gosacloyibu, David nigolú radzuitz né ranibu: ¡Colguica' espad ni naptó! Né ranásyibu néz par tzagaityibu Nabal né guirá buñgüieeu ni no' né láabu.

Toibtica xomós Nabal bicadiag guirá diitz nachóng ni goní Nabal, né rigudxbu guiráni Abigail. Órcuca Abigail ronytzaay galrro, rago'oybu láani laidy tipnés xporbu né ranásbu néz. Órni radzaglóo sa'yibu ló néz, Abigail rietj laidy xpor, riachca'dabu né ranibu: Ranába lólo, diti colcuent ni goní Nabal tze'ela. Toib buñ nga'al láabu, né cuenunysi ronybu. Cua' ni cascada looy. Ranába lólo cua' láani, né bituidy xcalkiédo scási'.

David racapy, naclo' toib buñgona' ni naní xcalrrien. Ma bicaalo na' par diti guigaity Nabal por guirá cóe mal ni bunybu lóodo. Nigore' bibiguet lidxlo goxt. Órni Nabal raity, Abigail radxiin rac toibtica tze'el David.



## DAVID RONY 61 MANDARY



**S**AÚL nainy guinásbu David stoib buelt. Rinébu 3,000 soldad ni nantzaay riée ló guerr par guiyopyibu David. Órni David radxiin ran xi cayony Saúl, raxelbu buñ tze tzaláach pu lagary dxee Saúl né guirá soldad goxin cú. Ór cú David ranabdiitz chop soldad ni no' né láabu: ¿Chú lóoto ná gony compañer na' ro dxee Saúl né guirá soldad?

Na' tzaaya, racapy Abisai. Abisai láabu ngú xiin zeruyá, bisan David. La'ga Saúl né guirá buñguieeu ni no' né láabu dxee natiasy, David

né Abisai rio' nagach lagary ro natiasyibu. Raca'yibu lanza né toib ru' ni no' nís lainy ni raquiin Saúl, ni náaxh niis cué guic Saúl. Ni toibyibu raduidy cuent pu ór rio'yibu, portín guiráyibu natiasy.

Nigore' bibi' David né Abisai. Ma bixonyibu né noyibu laidy toib dainy lainy guí'ix. David raca'bu rudx a buñguieeu ni rasanir ló guirá soldad ni nap Saúl: Abner, ¿xigony diti cayaanlo xpixuanlo, ni rony mandary lóoto? ¡Bibi'! ¿Pu no' xilanzbu né ru' ro rago'bu nís?

Saúl rare' baca'al lóo. Rimbubu xtiitz David, né ranabdiitzbu: David, ¿looy nga la? ¿Labúu rabilo Saúl né Abner ni no' lainy guet dibuj ca la?

David racapy: Scú láani looy ni rony mandary, re' no'ya. Né David ranabdiitz: ¿Xigony cayopylo mod par guínaslo na'? ¿No' cós mal ni buni la? Saúl looy ni rony mandary, re' no' xilanzlo. Bixel ni guieed guityopy láani rono'ya.

Diti láani ngú ni buni, ná Saúl. Diti goyo' xcalrriena, cuenunysi buni. Ór cú David ralsit, né Saúl rabiguet lidx. Per David rani' lainy xcalnabany: Toibtica dzú Saúl sagaity na'. Non guixony né tzaaya xcudx filisteos. Né ngú rony David. Raguiktelbu filisteos, né ronybu sani ma gócbu toibsi né guirá filisteos cú.

Diti xidzú filisteos rieyibu racalóyibu Israel. Saúl né Jonatán raityibu órni cacalóyibu filisteos, né láani rony que David rio'golú nabann, né raca'bu toib cántico móz, né ro'olbu láani modre': Rasac nabana por looy buchi, Jonatán. ¡Balaati binladxi looy!

David rabiguet Israel, lainy gudx ni laa Hebrón. Órni radxinbu buñguieeu rasaló radiil, portín tipnés ná que Is-bóset, xiin Saúl, gony mandary. Né stipnéyibu ná que David gony mandary layibu. Radxiin midid buñguieeu ni no' né David ronyibu gann. Órni David rasaló rony mandary napbu 30 íz. Por gatz íz gorol rony mandarybu gudx ni laa Hebrón. Tipnés xiin David ni rál lagary re' laayibu, Amnón, Absalón né Adonías.

Radxiin dzú David né guirá buñguieeu ni no' né láabu rio'yibu raca'yibu gudx móz ni laa Jerusalén. Joab, stoib xiin Zeruyá, bisan David, rasanir lóoyibu ló guerr. Por ngú David rabú Joab par guisanir ló xidalguixo soldad. Nigore' David rasaló rony mandary gudx Jerusalén.

1 Samuel 26:1-25; 27:1-7; 31:1-6;

2 Samuel 1:26; 3:1-21; 5:1-10;

1 Crónicas 11:1-9.



ÓRNI David ma cayony mandary gudx Jerusalén, Jehová racné guirá soldadbu par gony gann xidal guerr. Jehová biduidy xtiitz a Israel que gac xtunyibu gudx Canaán. Nigore' Jehová racné layibu par guica'yibu guidopynac gudx Canaán, xomod goníbu.

David natzaay xcalrriembu par gony mandary. Láabu nadxibu Jehová. Por ngú, órni rio'yibu raca'yibu gudx Jerusalén ni nirdiguié ronybu, rinébu caj ni rasetnaladx acuerdo ni buny Jehová né Israel lainy gudx Jerusalén. Raniiny láabu guisa'bu toib yo' xiro' par gac adorar Jehová ro co'bu caj re'.

Órni radudy tipnés íz, David riab ló toib galkié rodann. Láabu nambu que mal guica'no ni nac xtuny stoib buñ. Per toib godzu, órni no'bu guic yo' ro rony mandarybu, desde ro saga'bu rabíbu toib buñgona' móz. Láabu laa Bat-seba, né tzeelbu toib soldad xtuny David, ni laa Urías.

David raniinygolu tzone'bu Bat-seba né raxelca'bu gona' re' guieed lagary ro rony mandarybu. Tze'el Bat-seba no' sit ló guerr. Órni David ratné Bat-seba diti xidzú ranbu que Bat-seba nacxiin. David rio' ló xcalrasa'ni por ngú ronybu que Joab ni rasanir ló xidalguixo soldad guisaga' Urías nisló ro más nadip no' guerr par gaity Urías. Né órni Urías raity, Bat-seba radxiin rac tze'el David.

Jehová radzuitznébu David. Raxelbu Natán ni rony xchiimbu par co' David ló razón por guirá galkié ni bunybu. ¿Labúu rabilo Natán né David ló dibuj ca la? David rasacbu mal por ni bunybu, né Jehová diti ragaity láabu. Natán raiby láabu: Por ni bunylo' cós mal re', sio' xidal galnagan lidxlo. Scú gocni, ¡Nigolú rio'bu ló galnagan!

Nirdiguié galnagan ni gopbu, xiin Bat-seba goity. Ór cú xiin lagol David ni laa Amnón ranás lafuers bisanbu, Tamar, par gatné láabu. Órni Absalón stoib xiin David gon nde' bidzuitzgulu né bigaitybu Amnón. Diti xidzú, Absalón rayopy mod par xidal buñ cobioo láabu

né ronybu que buñ guiloyña láabu par gony mandarybu. Radxiin midid Absalón raity, né David rony gann guerr. Scú láani, David rio'bu ló xidal gálnagan.

Órni cadudybu ló guirá nde', Bat-seba rio' toib xiimbu ni laa Salomón. Órni ma buñgol David né ma caxo'bu, xiimbu Adonías rony por guidxin gac ni gony mandary. Ór cú David rony que toib buñguieeu ni rasanir lainy gudx Israel ni laa Sadoc guigotz aceity guic Salomón par guislooy que Salomón ngú ni non gony mandary. Diti xidzú, órni David nap 70 íz raity. Láabu buny mandarybu 40 íz. Nigore' Salomón cayony mandary.

2 Samuel 11:1-27; 12:1-18; 1 Reyes 1:1-48.



# SALOMÓN BUÑNAN NI RONY MANDARY

63

**S**ALOMÓN toib mbioxhlasien nacbu órni radxiin rony mandarybu. Nadxibu Jehová, né rasobbu litz ni biduidy bixiosbu láabu. Jehová rioladx mod nac Salomón, né por ngú toibtica gue'el ló toib baca'al Jehová raiby láabu: Salomón, ¿xí nainy looy guidudi looy?

Salomón racapy: Jehová Dios xtuni, toib mbioxhlasien na' né diti naana ximod gony mandary. Por ngú, biduidy galnann na' par labúu gony mandary galán xcudxlo.



Jehová rioladx ni Salomón ranab láabu. Por ngú ranibu: Por ni gonablo galnann né diti gonablo guibanylo xidzú né ni gapló xidal cós ni rasac, sadudi looy más galnann que stoib buñ ni bibany hasta nigore'. Per diti ngúsi sadudi looy, láaca saduidy cós ni diti gonablo na', scú láani, sadudi xiro' cós ni rasac né guidxin gacló buñxirop.

Diti xidzú chop buñgona' rieved rono' Salomón xtol toib galnagan. Toib de layibu ná: Gona' re' né na' rabésdo toibsi yo'. Na' gosann toib bada'yen, né godudy chop govitz láabu láaca gosambu toib bada'yen. Toibtica gue'el, xpada'bu goity. Per la'ga natiasy, godi'xbu xpada'bu ni ma goity cue'ya né cua'bu xpada'ya. Órni bire' baca'al lóoya né bibi'ya bada' re' ma goity, biduidy cuent que diti xpada'ya láabu.

Órni stoib buñgona' cú bicadiag nde', goníbu: ¡Yaca! ¡Bada' ni nabany ngú xpada'ya, né ni ma goity ngú xtunybu! Primer gona' ni goní racapy: ¡Yaca! ¡Bada' ni ma goity ngú xtunylo né ni nabany ngú xtuni! Scú radídiitzyibu. ¿Xi gony Salomón né layibu nigore'?

Ranabbu toib espad, né órni ritnéyibu espad rono'bu, Salomón rani': Colguichoc chopla' bada' ni nabany cú, né colguiduidy tripla' cada toibyibu.

Buñgona' ni nigolú xiimbu bada' re' raca'bu rudx: ¡Yaca! Ranába lóto, diti guigaityto láabu. ¡Colguiduidy bada' re' gona' ca! Per stoib gona' ná: Ni toibdo guica'do bada' re', colguichoc láabu chopla'.


Nigore' Salomón rani': ¡Diti guigaityto bada' ca! Colguiduidy láabu primer buñgona' ni gosaló goní. Nigolú xiimbu bada' re'. Salomón nann nde' portín gona' re' nadxigolúbu xpada'bu que goyo'bu pueyt naduidybu xiimbu a stoib buñgona' par diti nagaityibu bada'yen re'. Órni buñ bicadiag ximod Salomón golexa galnagan re', rabaladxuyibu que Salomón cayony mandary layibu.

Ló guirá dzú ni Salomón buny mandary, Dios bisiab xilaay rono' xcudxibu né bunybu que layoo biduidyni xiro' trigo né cebada, balach, higos né stipnés ni ro buñ. Buñ godóc pór lairy móz né golésyibu lainy yo' sacró. Nigolú goyo' cós buen par guirá buñ.

**D**ITI xidzú ni ma gaity David, gochbu Salomón ximod ná Dios non guisa'bu yo' xiro' ro rac adorar Jehová. Tap íz de goló cayony mandary Salomón, rasaló rasa'bu yo' xiro' ro rac adorar Jehová, né par guislo'oxbu láani rinéni gatz íz gorol. Xidal mil buñguieeu bunyibu dxiin par labúu ña' yo' xiro' re', xiro' bidxiich góc gaxt portín

goynéni xidal or né plata.

Yo' xiro' re' napni chop cuart ni más rasac, xomod gop yo' ro rac adorar Jehová ni bisa'yibu nirdiguié. Per cuart ni nap yo' xiro' re' chop midid más xiro'ni que yo' ro rac adorar Jehová ni bisa'yibu nirdiguié. Salomón rony que caj ni rasetnaladx acuerdo ni buny Jehová né Israel



tzóni lainy cuart ni no' más lanió', né stipnés cós ni gop yo' ro rac adorar Jehová rago'yibu láani lainy stoib cuart cú.

Órni ralox ria' yo' xiro' re', rac toib lanii ro'. Salomón raxixip nisló yo' xiro' re' né raninébu Jehová, mod rabilo ló dibuj re'. Guidopynac guibá diti riga'lni par looy, ná Salomón, por ngú, yo' xiro' ni bisa'ya láaca diti sigá'lni par looy. Dios xtuni, ranába lólo bicadiag xcudxlo órni layibu guininéyibu looy né guica'yibu lóoyibu niis lagary re'.

Órni Salomón ralox raniné Jehová, rietj guii guibá, né rasa'ijni guirá nimal ni biscatyibu Jehová. Né toib guii rasanídxich guidopynac lainy yo' xiro' re'. Nde' raduidy diitz que Jehová cacadiag, né rabaladxbu que ma sob yo' xiro' re', né que Salomón caniné láabu. Nigore' yo' xiro' ni bisa' Salomón radxiin rac lagary ro rony adoraryibu Jehová, né diti raquiinyibu yo' mitien ni bisa'yibu nirdiguié.

Por xidal íz Salomón gop galnann órni buny mandarybu, né buñ rabaladx. Per Salomón rabesné xidal buñgona' de stipnés gudx ni diti rony adorar Jehová. ¿Labúu rabilo toibtica de layibu cayen toib dioxh la? Radxiin midid guirá buñgona' re' ronyibu que Salomón guieen stipnés dioxh. ¿Nanlo xí rasaló rac nigore' la? Salomón racbu toib buñ ni nigolú nagudx xcalnabany, nigore' gudx ni rony mandarybu ma diti rabaladx.


Nde' rony que Jehová radzuitz, né raibybu Salomón: Cue'ya looy ló galmandary re' né guidudi láani a stoib buñguieeu. Diti goni láani la'ga nabanylo, soni láani órni xiinlo ma cayony mandary. Per sasiana tidxo buñ ni xiinlo gony mandary. Guibino guidoni ximod rac guirá nde'.

1 Crónicas 28:9-21; 29:1-9; 1 Reyes 5:1-18;  
2 Crónicas 6:12-42; 7:1-5; 1 Reyes 11:9-13.





¿NANLO xigony buñgüieeu re' cabe' bala' lairy re' la? Jehová góoch láabu gonybu nde'. Né láabu ngú Ahías profeta xtuny Dios. ¿Nanlo xí ngú toib profeta la? Láabu ngú toib buñ ni Dios raqiin par guini' xí gac dzú ni sietra.



Re' Ahías cayooy diitz né Jeroboán. Jeroboán láabu toib buñguieeu ni bisa' yo' par Salomón. Órni Ahías radzagláo Jeroboán ló néz, ronybu toib cós ni diti rony buñ. Rabébu lairy copy ni nócbu né rabébu láani doce la'. Raibybu Jeroboán: Cua' chii la' lairy re' par looy. ¿Nanlo xigony raduidy Ahías chii la' lairy re' a Jeroboán la?

Ahías rabexa que Jehová cué galmandary ladxña Salomón. Ranibu que Dios guiduidy láabu chii family xiro' xtuny Jeroboán par gony mandarybu. Nde' raduidy diitz que nosi chop family xiro' guia'an par gony mandary Rehoboam xiin Salomón.

Órni Salomón racadiag ni Ahías góoch a Jeroboán, radzuitzgolúbu. Rayopybu mod guigaitybu Jeroboán, per Jeroboán raxony riée Egipto. Radxiin dzú, Salomón raity. Láabu buny mandary cuarent íz, per nigore' ma xiimbu Rehoboam no' xalagarybu. Jeroboán no'bu Egipto órni racábu cuent ma goity Salomón, por ngú rabiguetbu Israel.

Rehoboam diti natzaay xcalriembu par gony mandary. Nigolú nagudx góoc xcalnabany Rehoboam, que bixiosbu Salomón. Jeroboán né stipnés buñxirop rieiibu né raibybu a Rehoboam que gac buñtzay né guirá buñ. Per diti racadiagbu. Más nagudx ronybu xcalnabanybu que antes. Por ngú, buñ rony que Jeroboán gony mandary chii family xiro', per chop family xiro' xtuny Benjamín né Judá, Rehoboam rony mandary layibu.

Jeroboán dinaidy que xcudxbu tze Jerusalén gony adorar lainy yo' xiro' ro rac adorar Jehová. Por ngú rasa'bu chop torien de or né ronybu que buñ de chii family xiro' guieen láamu. Diti xidzú racla gudx radzani de cós mal né ma diti goyo' galronladx.

Láaca goyo' galnagan lad gobierno xtuny chop family xiro' gudx Israel. Diti ma bisa' gáay íz de goló rasaló Rehoboam rony mandary, buñguieeu ni rony mandary Egipto rieved racaló Jerusalén. Raca'bu xidal cós ni rasac ni no' lainy yo' xiro' ro rac adorar Jehová. Por tidxo dzú, yo' xiro' re' bia'anni xomod dzú ni bisa'yibu láani.

# JEZABEL GONA' MAL NI RONY MANDARY

66

ÓRNI goity Jeroboán, cada toib buñguieeu ni radxiin rony mandary gobierno xtuny chii family xiro' de Israel pór buñ mal gocyibu. Buñ ni más mal góc órni buny mandary, ngú Acab. ¿Nanlo xigony la? Nde' gocni scú, portín tzeelbu Jezabel góc toib gona' nigoló mal.

Jezabel diti gócbu buñ israelita. Bixiosbu ngú ni rony mandary gudx Sidón. Láabu riembu dioxh falz Baal, né ronybu que Acab né stipnés israelitas guieen Baal. Jezabel rianladxbu Jehová né ragaitybu xidal buñguieeu ni Dios raquiin par guini' xí gac dzú ni sietra. Stipnésyibu racachlan lainy bile' par labúu guilaa. Órni Jezabel no' ni rioladxbu, ragaitybu buñ par labúu guica'bu ni nainy láabu.

Toibtica dzú Acab no'bu nabann. Jezabel ranabdiitz láabu: ¿Xigony nólo nabann dzure'?

Por ni Nabot góoch na', racapy Acab. Goniiny na' nasiya xalioobu ro napbu balach, per láabu diti gosaguelbu.

Jezabel raiby láabu: Diti tzólo ló xcalrrasani. Na' guiyobi mod par guica'lo láani.

Por ngú Jezabel raxel guiich ló tipnés buñxirop ni no' ro rabés Nabot. Né ranibu: Colgony que tipnés buñ ni diti no' pu raquiin guini' que Nabot goníbu mal de Dios né de buñguieeu ni cayony mandary. Né colcue' láabu de gudxcú né colguigasguiee láabu hasta gaitybu.

Órni Jezabel raca' cuent que Nabot ma goity, raibybu a Acab: Nigore' goyee cua' xalioobu. Por cós mal ni buny Jezabel, ¿diti raluladxlo que non gac castigar láabu la?

Por ngú, radudy dzú Jehová raxel toib buñguieeu ni laa Jehú par gony castigar Jezabel. Órni Jezabel raca' cuent que Jehú ma sieed, ratiébu bisalóbu, rayopybu mod par guiembu toib gona' móz. Per órni Jehú radxiin rabí láabu sobbu ro' bentan, Jehú raibybu tipnés buñguieeu ni dxee cú: ¡Colguisal láabu layoo! Layibu rasobbu ni ná Jehú, xomod rabilo ló dibuj. Rasalbu Jezabel layoo né Jezabel raity. Modre' ranitló Jezabel gona' mal ni buny mandary.




# JEHOSAFAT NAP CONFIANZ LÓO JEHOVÁ

67

¿NANLO chú layibu guirá buñguieeu ni no' ló dibuj né xí cayonyibu la? Séeyibu ló guerr, né tipnés buñguieeu ni sanir cay'o'olyibu cántico. Looy sigory ranabdiitzlo: ¿Xigony tipnés buñguieeu ni cay'o'ol cántico diti néyibu espad né lanza par tilyibu? Guibino guidoni.

Jehosafat rony mandary gobierno xtuny chop family xiro' de Israel. Nabanybu ló dzú ni nabany Acab né Jezabel ni rony mandary chii family xiro' de Israel. Per Jehosafat galán rony mandary, né bixiosbu Asá láaca galán buny mandary. Por ngú, por xidal íz buñ ni goyo' xan mandary chop family xiro' de Israel golésyibu sacrodiguie'.

Per nigore' no' ni rac né ronyni que buñ radzuiby. Tipnés buñ raiby a Jehosafat: Sieed xidalguixo soldad ni sieed de gudxrop ni



laa Moab, Amón né Seír par guicaló looy. Xidal israelitas radopyibu Jerusalén né rayopyibu mod gacné Jehová layibu. Radopyibu lainy yo' xiro', né cú Jehosafat raniné Jehová: Jehová, Dios xtunyo, diti nánndo xi gonydo. Diti labúu guicalódo guixo soldad ni sieed. Gocné lóodo.

Jehová racadiag, né ronybu que toibtica buñguieeu ni rony xchiimbu gaiby xcudxbu: Guerr re' diti xtunyo láani, nací xtuny Dios. Diti non títlo. Colguigua'dzu né colguibí ximod Jehová ralaá lóoto.

Raraa stoib gue'el cú, Jehosafat raiby a gudx: ¡Gapto confiaz lóo Jehová! Ór cú raxelbu buñ ni nann ro'ol cántico nisló guirá soldad, né órni casaayibu ro'olyibu cántico a Jehová. ¿Nanlo xí rac órni ma cabigaxyibu ló guerr la? Jehová rony que xi enemigyibu racaló sa'. ¡Né órni israelitas radxiin, guirá soldad ni rianladx layibu ma gue'et nac!

¿Diti naní góe xcalrrien Jehosafat ni gopbu confiaz lóo Dios la? Pal ronyno mod buny Jehosafat láaca naní xcalrrieno.

1 Reyes 22:41-53; 2 Crónicas 20:1-30.





# CHOP MBIOXIEN RABANY STOIB 68

**P**AL toib mbioxien ñaity, ¿ximod nasac xina'bu pal nabiguët nabanybu stoib? ¡Nigolú nabaladxbu! Per ¿labúu guibany toib buñ ni ma goity la? ¿Ma goyo' dzú gocni scú la?

Bibi' buñguieeu, buñgona' né mbioxien ni no' ló dibuj. Buñguieeu ni no' ca laa Elías, né Jehová raquiin láabu par guini' xí gac dzú ni sietra. Buñgona' re' toib viod de gudx ni laa Sarepta láabu, né xiimbu mbioxien re'. Toibtica dzú mbioxien re' raxo'. Rac xiro' xcalguitzbu, né raitybu. Ór cú Elías raiby a buñgona' re': Godané xiinlo na'.

Elías riné mbioxien ni ma goity lainy toib cuart de chop piis né ragui'xbu mbioxien re' ló lo'on. Ór cú raninébu Jehová: Jehová, buny que mbioxien re' guibany stoib. ¡Né mbioxien re' rasaló raca' buu! Ór cú Elías riné láabu rono' xina'bu né raibybu gona' re': ¡Bibi' gannlo, xiinlo ma nabany stoib! Nde' rony que nigolú rabaladx xina'bu.

Stoib buñguieeu ni rani' diitz ni rasac ni Jehová raquiin par guini' xí gac dzú ni sietra, laa Eliseo. Láabu racnébu Elías. Per después Jehová láaca ronybu que Eliseo rony galrradziguia'. Toibtica dzú riebu gudx ni laa Sunem, né lagarycu no' toib buñgona' ni nigolú buñtzay nac né láabu. Buñgona' re' rio' toib xiimbu.

Toib rosil, órni mbiox re' ma napbu más íz, riebu ro cayony bixiosbu dxiin lainy layoo. Tisintiempsi raca'bu rudx: ¡Cayo'ob guica! Órni radxiinnébu mbioxien re' rio', nidxiyen re' raity. ¡Nigolú nabann rio' xina'bu! Gona' re' ni maca riebu rayopybu pu niis no' Eliseo.

Órni Eliseo radxiin, rio'bu lainy cuart rono' mbioxien ni ma gue'ët nac. Raninébu Jehová, né ratbu laidy gue'ët re'. Órcuca bilaguii guidopyzoo mbioxien re', né rasaló raxixesbu gatz buelt. ¡Balaati rabaladx xina'bu órni rio'bu lainy cuart né rabíbu que nabany xiimbu!

Xidalguixo buñ ma goity. Nde' rony que xhomilyibu né ximigyibu rio' nabann. Lóono diti labúu ronyno que gue'ët guibany stoib. Per Jehová labúu rony láani. Ló historias ni sietra guisuidyno ximod Jehová labúu sony que xidalguixo buñ guíais stoib.



# MBIOXGONA'YEN RACNÉ BUÑXIROP

69

**¿**NANLO xí cani' mbioxgona'yen re' la? Cayaibybu gona' re' chú ngú Eliseo, toib buñguieeu ni Jehová raquiin par guini' xí gac dzú ni sietra, ximod Jehová racné láabu gonybu galrradziguia'. Gona' re' diti rimbubu Jehová, portín diti buñ israelita láabu. Por ngú, guisuidyno xigony mbioxgona'yen re' no'bu lidx gona' re'.

Gona' re' buñ siria láabu. Tzeelbu laa Naamán, buñguieeu ni rasanir ló xidalguixo soldad de sirio. Layibu gonásyibu mbioxgona'yen re' ni nac de gudx Israel, né nigore' xcriat tze'el Naamán láabu.

Naamán nap toib galguitz mal ni laa lepra. Galguitz re' labúu ronyni que beel laidy buñ rayaani. Nde' ni cani' mbioxgona'yen re': Pal xpixuanna labúu ñée rono' buñguieeu ni Jehová raquiin par guini' xí gac dzú ni sietra ni no' gudx Israel, láabu nasialbu xpixuanna. Ór cú gona' re' raiby láani tze'el.



Naamán nainy láabu guialbu, por ngú rago'bu guicbu tzébu Israel. Órni radxinbu Israel, riebú lidx Eliseo. Ór cú Eliseo rony que xomós guiré né gaibybu Naamán guinich gatz buelt lainy gu'uc Jordán. Naamán radzuitzgulu, né ranibu: ¡Gu'uc ni no' xcudxi más sacró gu'uc láani que ni nap Israel! Ralox ranibu nde' rabiguetcabu.

Per toibtica xomósbu raiby láabu: Xpixuanna, pal Eliseo nanab looy ñonylo toib cós nagann, looy ñonylo láani. Por ngú, ¿xigony diti nosi ronylo ni gonabbu looy? Naamán racadiag ni rani' xomósbu né ranichbu lainy gu'uc Jordán gatz buelt. ¡Órni ronybu nde', xpe'elbu radxiin rac nasacdxiih!

Naamán nigolú rabaladx. Rabiguetcabu rono' Eliseo né raibybu: Nigore' ma nandxichi que Dios ni rony adorar Israel láabu ngú toibguielot ló guidopynac Gudxlio. Por ngú, ranába lólo, cua' ni cascad looy. Per Eliseo racapy: Yaca, diti guica'ya láani. Eliseo nann que mal láani guica'bu ni cascad Naamán láabu, portín ni bisial Naamán de xcalguitz ngú Jehová. Per Guehazi xomós Eliseo rasobladx ni Naamán cascad Eliseo.

Por ngú ronybu nde'. Diti xiro' ór de goló bire' Naamán rono' Eliseo, Guehazi raxony riga'l láabu. Guehazi raibybu Naamán: Eliseo bixel na' par gaiby looy que ma nainy láabu guica'bu tidxo ni cascadlo láabu, portín bidxin buñ rono'bu. Nde' toib galrrascú láani. Per Naamán diti nann láani; por ngú raduidybu tidxo xcósbu raca' Guehazi.

Órni Guehazi rabiguetc lidx, Eliseo ma nann xí ni bunybu. Jehová ma góoch láani láabu. Por ngú, nde' raibybu a Guehazi: Por ni bunylo' cós mal re', lepra ni gop Naamán saca'lo láani. ¡Né órcuca Guehazi racá lepra re'!

¿Xí rasuidyno de guirá nde'? Primer, non gacno xomod mbioxgonayen re' né guinino xtiitz Jehová. Nde' labúu gacnéni xidal buñ. Ni rarop, diti gacno farmay xomod góc Naamán órni yása guialbu, siino guisobno ni ranab guirá ni rony ni ná Jehová. Ni rion, diti non guiscúno xomod buny Guehazi. ¿Diti raduidy nde' diitz que labúu guisuidyno xidal cós pal rolno la Biblia la?

**B**IBI' buñguieeu ni no' lainy nís. Nigolú mal cayeeni láabu. ¡Beel re' caiby láabu! ¿Nanlo chú ngú buñguieeu re' la? Laabu Jonás. Guisuidyno ximod goyo'bu ló xiro' galnagan.

Jonás láabu toib buñguieeu ni Jehová raquiin par guini' xí gac dzú ni sietra. Diti xidzú de goló goity Eliseo Jehová raibybu Jonás: Goyee gudxrop ni laa Nínive. Cós mal ni cayony buñ ni rabés cú nigolú ma bidalni, né nainy na' gaipylo layibu mal láani ni cayonyibu.

Per Jonás naya', diti ná tze Nínive. Por ngú rio'bu lainy toib bark ni sée stoib lad. Jehová diti rioladx ni Jonás ranás gadzé lad. Por ngú Jehová rony que rac toib buro'dant. Nigolú nadip cayacni que bark cú ma guiguichni. Ni rony dxiin lainy bark cú radzuibyibu, né rasaló raca'yibu rudx lóo xtioxhyibu par gacné layibu.

Último Jonás rani': Na' rony adorar Jehová, Dios ni bisa' guibá né Gudxlio. Caxony de rono' Jehová portín diti buny mod ni gochbu na'. Por ngú ni rony dxiin lainy bark ranabdiitzyibu Jonás: ¿Xí non gonyno par cués ló buro'dant re'?

Colguisal na' lainy nísda', né nísda' sió'dzuni, racapy Jonás. Ni rony dxiin lainy bark cú diti nainy layibu gonyibu ngú, per órni buro'dant re' rac xiro' más, rasalyibu Jonás lainy nísda'. Ni maca buro'dant re' rabésni, né nísda' ma no'dzuni stoib.

Órni Jonás raguich lainy nís, toib beel xirop ragaiby láabu. Per láabu diti raitybu. Por tzón govitz né tzón gue'el rio'bu lainy beel xirop re'. Jonás nigolú rio'obni láabu ni diti bisobbu Jehová ni diti goyebu Nínive. Por ngú, ¿nanlo xí ronybu la?

Jonás ranab lóo Jehová gacné láabu. Ór cú Jehová rony que beel re' radxib Jonás ló yoo roloo nísda'. Ór cú, Jonás ranás néz riée Nínive. ¿Diti rasuidy nde' lóono que nigolú rasac gonyno guirá ni Jehová raiby lóono la?




# DIOS RANI' GUIDUIDY GUDXLIO MÓZ

71

**D**IBUJ ni rabilo re' nací toib Gudxlio móz, né raibyno que scare' nac ni bilooy Dios a Isaías. Isaías bibany después de Jonás.

Paraíso rarexani scare' «lagary sacroyen» o «Gudxlio móz». ¿No' toib dibuj ni rasetnaladxlo órni rabilo dibuj re' la? Scú láani, rasetnaladxlo lagary sacroyen ni Dios bisa' par Adán né Eva. Per ¿sácní ló guidopynac Gudxlio la?





Jehová góoch a Isaías buñguieeu ni raquiimbu par guini' xí gac dzú ni sietra que guica'bu ximod gac Gudxlio móz ni Jehová guiduidy xcudx. Gonibu: Lob né xiil saga'yimu sacró. Yósién né betz ons lassien guáyimu toibsi, né mbioxien gap layimu ni bada' ni kit ro xcarió toib béel ni rot né ragaity diti no' xí gacbu.

Nga diti sadxin dzú sac, nac xpensary xidal buñ. Guirá ór cayac xiro' galnagan ló Gudxlio né diti saloxni, per bunysi xpensarylo, ¿ximod góe lagary ni Jehová biduidy ro golés Adán né Eva?

Dios golo' Adán né Eva lainy toib lagary sacroyen. Layibu bisnityibu lagary sacroyen re' portín diti bisobdiitziyibu Jehová, por ngú bioxyibu né goityibu. Dios raduidy xtiitz a guirá ni nadxi láabu que saca'yibu guirá cóe ni Adán né Eva bisnit.

Ló Gudxlio móz ni sietra diti no' chú sony mal né diti no' chú sanitló cóe ni no' ló Gudxlio re'. Buñ saga' goxtiguie. Guirá buñ sac nasacdxiih né sabaladx xomod goniiny Dios ñac nirdiguié. Ló historias ni sietra guisuidyno ximod gac ndé.

¿NANLO xigony buñguieeu re' caniné Jehová la? ¿Xigony ma godi'xbu guirá guiich re' nisló Dios? Buñguieeu re' laa Ezequías. Láabu ni rony mandary chop family xiro' de Israel. Né noyibu ló xiro' galnagan. ¿Nanlo xigony la?

Portín xidalguixo soldad asirios ma binitlóyibu chii family xiro' de Israel. Jehová biduidy lagary que nde' nadudy por ni gocyibu buñ mal. Né nigore' xidalguixo soldad xtuny asirios sieed par guicaló gobierno xtuny chop family xiro' de Israel.

Ni rony mandary Asiria diti xidzú de goló ma bixelbu guiich ló Ezequías. Láani ngú guirá guiich re' ni Ezequías godi'x nisló Jehová. Ló guiich cú caani que raxiichyibu de Jehová, né nayibu que Ezequías non



guirégann. Por ngú Ezequías ranab lóo Jehová: Jehová, bilaa lóodo ladxña buñguieeu ni rony mandary Asiria. Ór cú guirá gudxrop gann que toibguielotlo nacló' Dios. ¿Sacadiag Jehová ni canab Ezequías la?

Ezequías natzaay xcalrriembu par gony mandary. Diti nacbu xomod stipnés ni rony mandary ni diti natzaay xcalrrien de chii family xiro' de Israel, láaca diti nacbu xomod bixiosbu ni rony mandary ni laa Acaz. Ezequías rasobdiitzbu né racaatzaybu cuidad guirá xiley Jehová. Por ngú, órni ralox raninébu Jehová, Isaías, ni rani' xí gac dzú ni sietra, raxel diitzre' lóbu ni sieed de Jehová: Ni rony mandary Asiria diti sío'bu lainy gudx Jerusalén. Ni toib soldadbu sadxin gahx. Diti sacua'cyibu ni toib flecha par guicalóbu gudx re'.

Bibi' dibuj ni sieed ló guiih re'. ¿Nanlo chú guirá soldad ni ma goity ni dxee ca la? Nacyibu asirios. Jehová bixel ángel xtuny, né ló tipgue'elsi bigaitybu 185,000 soldad asirios. Por ngú, ni rony mandary Asiria rabiguet lidx.

Gobierno xtuny chop family xiro' de Israel rala, né gudx rio' goxt por guxeesi dzú. Per órni ma goity Ezequías, Manasés xiimbu radxiin rony mandary. Buñguieeu re' ni laa Manasés né xiimbu Amón ni buny mandary después diti natzaay xcalrrienyibu par gony mandary. Por ngú Gudxlio radza de pór cós mal né diti goyo' galronladx. Órni Amón buñguieeu ni rony mandary ragaity tipnés xomósbu láabu, ni rian xalagarybu par gony mandary chop family xiro' de Israel, ngú xiimbu Josías.

2 Reyes 18:1-36; 19:1-37; 21:1-25.





# ÚLTIMO NI RONY MANDARY TZAAY ISRAEL

73



**J**OSÍAS nosi xhoon íz nap órni rasaló rony mandary chop family xiro' xtuny Israel. Midid re' mbioxsa buñ par guidxin gony mandary. Por ngú órni Josías rasaló rony mandary, buñ ni ma nigox racné láabu par gony mandarybu gudx Israel.

Órni rasa' gatz íz ni ma cayony mandary Josías, rasalóbu rayopybu Jehová. Rasu'bu mod tzaay de buñguieeu ni buny mandary xomod David, Jehosafat né Ezequías. Mbioxhలా láabu ronybu toib cós ni raquiin balory.

Por xidzú íz, xidal israelitas gocyibu nigolú buñ mal. Rienyibu dioxh falz. Raxixipyibu nisló dioxh falz. Por ngú, Josías né buñguieeu ni racné láabu rasaló rabe' religión ni diti rasuidy xinésni lainy gudx Israel. Nde' toib dxiin xiro' láani, portín xidal buñ rien dioxh falz. Re' labúu rabilo Josías né tipnés buñguieeu ni racné láabu casioy dioxh falz ni nap guirá buñre'.

Ór cú Josías raduidy dxiin a tzón buñguieeu par gann ximod gactzaay yo' xiro' ro rac adorar Jehová. Ratop gudx bidxiich par guiax dxiin ni cayac né yo' xiro' re'. Órni cayonyibu dxiin lainy yo' xiro' ro rac adorar Jehová, Hilquías buñguieeu ni rasanir nisló

israelitas par gony adoryyibu Jehová, no' ni radzelbu ni rascagulu: láani ngú libro ni nap xiley Jehová ni biduidybu Moisés ma xidzú iz ni diti no' chú gon pu bia'anni.

Órni rinéyibu libro cú rono' Josías, láabu ranab que go'lyibu láani. Órni Josías racadiag, raduidybu cuent que gudx Israel diti casob xiley Jehová. Nigolú nabann rio'bu, né por ngú rachésbu xtónbu, mod rabilo ló dibuj. Né ranibu: Jehová cadzuitz né lóono, portín bixiosno diti bisob xiley Jehová ni caa ló libro re'.

Josías raxel Hilquías, ni rasanir nisló israelitas par gony adoryyibu Jehová, par gann ni Jehová gony layibu. Hilquías riée riguen Huldá buñgona' ni rani' xí gac dzú ni sietra, né ranabdiitzbu gona' re'. Huldá raiby láabu diitz ni ná Jehová par gaibybu láani Josías: Jerusalén né guirá gudx ni napni, gac castigar layibu portín bieenyibu dioxh falz né lagarycu bidzani de cós mal. Josías, por ni bunylo' cós tzaay, castig re' diti sánci xtzúlo, sánci órni looy ma goitylo.

2 Crónicas 34:1-28.



# TOIB BUÑGUEEU NI DITI RADZUIBY

**B**IBI' guirá buñ ni caxiich de mbioxhlas ni no' ló dibuj. ¿Nanlo chú láabu la? Mbioxhlas re' laa Jeremías, toib buñgueeu ni rani' diitz ni rasac ni Jehová raquiin par guini' xí gac dzú ni sietra.

Diti xidzú de goló Josías rasaló ranitlóbu dioxh falz lainy gudx Israel, Jehová golú a Jeremías par gacbu buñgueeu ni guini' xí gac dzú ni sietra. Jeremías raluladx que mbioxhlasa láabu par guinibu xí gac dzú ni sietra. Per Jehová ná que gacné láabu.

Jeremías raiby a israelitas que guisianyibu de gonyibu cós mal. Jeremías rani': Dioxh ni xidal buñ rien nacní dioxh falz. Per xidal israelitas más raniiny layibu guienyibu dioxh falz, diti a Jehová Dios ni rasuidy xinésni. Órni Jeremías rani' que Dios sony castigar layibu por cós mal ni cayonyibu, raxiichyibu Jeremías.

Radudy xidal íz. Josías raity, né radudy tzón be'ò de goló goitybu, xiimbu Jehoaquim rasaló rony mandary. Jeremías diti rasian raibybu gudx: Jerusalén guinitló pal lóoto diti rasiante mod nacto. Guirá buñgueeu ni rasanir par gony go'ox, ranásyibu Jeremías né raibyibu a guirá buñxirop: Jeremías non gaity, goníbu mal de xcudxno.

¿Xí gony Jeremías nigore'? ¡Jeremías diti radzuiby! Láabu raibybu a guirá buñ: Jehová bixel na' par gaiby lóoto guirá ndé'. Pal diti rasiante mod ni nacto, Jehová sanitlóbu gudx Jerusalén. Per non guiluladxto ndé': Pal ragaityto na', guigaityto toib buñgueeu ni diti no' xí cós mal cayony.

Guirá buñxirop raduidy lagary que Jeremías guibany, per buñ israelitas diti rasian de gonyibu cós mal. Diti xidzú, Nabucodonosor ni rony mandary Babilonia, rieved par guicaló Jerusalén. Radxiin midid, Nabucodonosor ronybu que israelitas radxiin rac xomósbu. Rinéyibu xidalguixo buñ israelitas gudx Babilonia. ¡Bunysi xpensarylo que buñbio'os niné looy a stoib gudxrop ni diti ma rimbulo!



# TAP MBIOXHLASIEN GUDX BABILONIA

75

**B**UÑGUIEEU ni rony mandary ni laa Nabucodonosor rinébu a Babilonia tipnés israelitas ni nap más galnann. Radudy dzú, rabúbu lad buñre' a tipnés mbioxhlasien ni más móz ni nap más galnann. Ló dibuj re' labúu rabilo tapyibu. Toibbu laa Daniel, né tzón mbioxhlasien ni no' né láabu babilonios gole' laayibu Sadrac, Mesac né Abednego.

Nabucodonosor nainy láabu guisuidy tzaaybu a mbioxhlasien re' par labúu gonyibu dxiin lagary ro rony mandarybu. Ralox tzón íz de goló ma bisuidyibu, ór cú Nabucodonosor sabúbu ni más naní guic par gacné láabu cuéxa galnagan. Nabucodonosor nainy láabu que guirá mbioxhlasien gac nadip, por ngú rony mandarybu que non guáyibu galrro né gue'yibu vino ni xhomillbu raca'.



Bibi' mbioxhliasien ni laa Daniel. ¿Nanlo xí cayaibybu a Aspenaz, toib mós ni racné Nabucodonosor la? Daniel cayaiby láabu que diti nainy guábu galrro naníx ni ro Nabucodonosor. Per Aspenaz rio' ló xcalrrasani. Nabucodonosor ma goníbu xí non guáto né gue'to, ná Aspenaz. Né pal diti nasacto xomod stipnés mbioxhliasien, labúu guigaitybu na' xtolni.

Por ngú Daniel raiby a soldad ni Aspenaz goléschin par gann láabu né guionca ximigbu. Golo' prueby lóodo por chii govitx. Biduidy cuánnya' par guádo, né niis par gueedo, ná Daniel. Ór cú bibi' stipnés mbioxhliasien ni ro xalrro Nabucodonosor, né bibi' lóodo, né stip looy biduidy cuent chú layibu más nasac.

Soldad re' rasaguelbu. Né dzú ni ria' chii govitx de prueby, Daniel né guionca ximig más nasac rienyibu que stipnés mbioxhliasien cú, por ngú raduidyibu lagary que guáyibu cuánnya', né ma diti rooyibu galrro ni Nabucodonosor raduidy layibu.

Órni ria' tzón íz, rinéyibu guirá mbioxhliasien re' nisló Nabucodonosor. Ralox raninébu guirá mbioxhliasien re', Nabucodonosor raduidy cuent que Daniel né guionca ximig más nani guic. Por ngú, raduidyibu lagary tap biinre' guia'an gacné láabu lagary ro rony mandarybu. Né órni Nabucodonosor ranabdiitzbu né rinébu cós nagann a Daniel, Sadrac, Mesac né Abednego, layibu chii buelt nanyibu más que stipnés buñnan ni nap Nabucodonosor.

Daniel 1:1-21.





**M**A GODUDY más de chii íz de goló buñguieeu ni rony mandary ni laa Nabucodonosor binébu israelitas ni más nap galnann Babilonia. ¡Né nigore', bibi'! Jerusalén cacáa guii, né israelitas ni diti raity rieyibu xomod buñ ni sée press Babilonia.

Bisednaladx, guirá buñguieeu ni Jehová raquiin par guini' xí gac dzú ni sietra, goníyibu que nde' gac pal israelitas diti ratzáyibu mod nacyibu. Per israelitas diti bicadiagyibu tipnés buñguieeu ni bixel Jehová. Bieenyibu dioxh falz xalagary ñony adoryyibu Jehová. Por ni bunyibu sac castigar layibu. Nánno láani portín Ezequiel buñguieeu ni Jehová raquiin par guini' xí gac dzú ni sietra, raiby lóono guirá cós mal ni buny israelitas.

¿Nanlo chú ngú Ezequiel la? Láabu ngú toib mbioxhla ni Nabucodonosor biné Babilonia chii íz dzú yása gunitló Jerusalén. Ló dzúcu láaca binéyibu Daniel né guionca ximig ni góc laa Sadrac, Mesac né Abednego.

La'ga Ezequiel no'sa gudx Babilonia, Jehová ralooy láabu cós mal ni cayac lainy yo' xiro' ro rac adorar láabu ni no' lainy gudx Jerusalén. Jehová raquiin toib galrradziguia' par guieen tzaaybu láani. Ezequiel no'bu lainy gudx Babilonia, per Jehová raduidy lagary guibíbu guirá cós mal ni cayac lainy yo' xiro' ni no' Jerusalén. ¡Ni rabíbu nadzu'py naci!

Jehová raibybu Ezequiel: Bibi' guirá cós nadzab ni cayony buñ lainy yo' xiro' ro rac adorar na'. Bibi' cué yo' bidza dibuj de be'el né stipnés nimal. ¡Né bibi' israelitas ximod cayenyibu guiráni! Ezequiel rabí tzaay guirá cós re', né raca'bu guirá ni cayac.

Jehová ranabdiitzbu Ezequiel: ¿Rabilo ni cayony nagach tipnés buñguieeu ni rasanir nisló Israel la? Scú láani, Ezequiel láaca labúu rabí nde'. No' 70 buñguieeu ni cayen dioxh falz, né raniyibu: Jehová diti cabí lóono. Ma diti no'bu né gudx re'.



Ór cú Jehová ralooybu Ezequiel tipnés buñgona' ni sob ro' toib puert ni nap yo' xiro' re'. Sobyibu cayenyibu diohx falz ni laa Tamuz. ¡Né bibi' veinticinco buñguieeu ni no' niis ro ralainy Govitz ro puert xiro' re'! Ezequiel rabí layibu. ¡Caxixipyibu né cayenyibu Govitz!

Jehová ná: Buñre' diti nap respet na'. ¡Diti nosi ronyibu cósmal, láaca rieedyibu né ronyibu láani lainy yo' xiro' ro rony adorarto na'! Por ngú Jehová raduidy xtiitz: Sienyibu ximod ngú radzutzi. Né diti sio'obni na' órni guintlóyibu.

Nosi ma godudy tzón íz de goló Jehová bilooy nde' a Ezequiel, israelitas rac naya'yibu nisló Nabucodonosor. Por ngú láabu racalóbu israelitas. Radudy toib íz gorol, babilonios raxalyibu muros xtuny Jerusalén né rio'yibu né rasa'ijyibu gudxcú. Xidal buñ raity, né buñ ni diti raity riefyibu xomod buñ ni sée press gudx Babilonia.

¿Xigony biduidy Jehová lagary que israelitas nadzu'py binitlóyibu? Portín diti bicadiagyibu né diti bisobdiitziyibu xiley Jehová. Nde' raslooy lóono que nigolú rasac gonyno ni ná Dios guirá ór.

Primer raduidyibu lagary que tidxóyen buñ rian lainy gudx Israel. Nabucodonosor raloyñabu toib buñguieeu judío ni laa Guedalías par gann guirá buñre'. Per ór cú tipnés israelitas ragaityibu Guedalías. Nigore' buñ radzuiyibu que babilonios guieed guintló layibu por ni bunyibu. Por ngú rony lafuersbu Jeremías tze né layibu, né raxonyibu riefyibu Egipto.

Nde' rony que ni toib buñ rian lainy gudx Israel. Por 70 íz ni toib buñ rabés lainy gudx Israel. Nigolú scási' rian gudxcú. Per Jehová raduidy xtiitz que sonybu que israelitas guibiguéet xcudx órni ma godudy 70 íz. La'ga radudy guirá íz re', ¿xí rasacloó israelitas lainy gudx Babilonia? Guibino guidoni.

***Dzú ni séeyibu Babilonia  
hasta dzú ni bisa'yibu muros  
ni nap Jerusalén***

*La'ga israelitas goyo'yibu xomod buñ ni no' press lainy Babilonia, xiro' prueby goyo' fe xtunyibu. Bisalyibu Sadrac, Mesac né Abednego lainy horno laguii, per Dios bilaa layibu. Diti xidzú, órni Babilonia biab ladxña medos né ladxña persas, goyo' ni bisal Daniel lainy xcarió betz ons, per Dios bisieg ro' betz ons, modre' bilaabu Daniel.*

*Bidxin midid, buñguieeu ni rony mandary Persia ni laa Ciro biduidy lagary nare' israelitas. Layibu bibiguetyibu Jerusalén nontís goya' 70 iz de goló goyo'yibu Babilonia. Toibtica cós ni nirdiguié bunyibu órni bidxinyibu, ngú yo' xiro' ro rac adorar Jehová. Per ni maca xi enemigyibu bicaa ló xchiinyibu. Por ngú godudy veintidós iz ni ma noyibu Jerusalén labúu bilox bisa'yibu yo' xiro' ro rac adorar Jehová.*

*Láaca guisuidyno ximod nga góc par bibigué Esdras Jerusalén par gony móz yo' xiro' ro rac adorar Jehová. Dxiinre' gosalani 47 iz de goló bilox goya' yo' xiro' re'. Ór cú, trece iz de goló bidxin Esdras Jerusalén, Nehemías racné par guilisyibu muros ni nap Jerusalén. Midid GÁAY rasa'ni 152 iz ló historia.*

¿RASETNALADXLO que ma bicadiaglo de tzón mbioxhlas re' la? Scú láani, nacyibu ximig Daniel ni diti gosaguel ño galrro ni diti góc galrro nasac par layibu. Babilonios gole' laayibu Sadrac, Mesac né Abednego. Bibi' layibu nigore'. ¿Xigony diti caxixipyibu nisló dioxh de or naso' xomod cayony stipnés buñ láani? Guibino xigony cayacni scú.

¿Rasetnaladxlo xiley Jehová ni láacabu bica'bu ni góc laa Chii Diitz la? Ni primer nú: Nosi na' gony adorarto diti a stipnés dioxh. Mbioxhlas re' casobdiitziyibu ley re', ná naganni.

Nabucodonosor, ni rony mandary gudx Babilonia, bixelca'bu xidal buñxirop par guieen a dioxh ni bisa'bu. Gochbu a guirá buñ: Órni guicadiagto xirudx dxitguic nimal, arpas né stipnés guip ni racudx buñ, colguixixip né colguien dioxh de or ni bisa'ya. Ni diti guixixip né guieen dioxh re', órcuca tzó ni guisal layibu lainy horno laguii.

Órni Nabucodonosor racadiag que Sadrac, Mesac né Abednego diti bixixip, radzuitzgolúbu. Raxelca'bu tzón mbioxhlas re' guieed rono'bu. Raduidybu stoib oportunida mbioxhlas re'. Per layibu napyibu confianz lóo Jehová. Né raniyibu: Dios ni rony adorardo labúu guilaa lóodo. Ná diti gonybu láani, lóodo diti guixixipdo nisló dioxh de or ni bisa'lo.

Órni Nabucodonosor bicadiag nde', nigolú bidzuitzbu. No' toib horno gahx rono'bu, né rony mandarybu: ¡Colco' guii lainy horno ca par guidza'ni, como si natza'to láani gatz buelt! Ór cú ronybu que tipnés buñguieeu ni más nadip ni no' lad xidalguixo soldad ni napbu, racado'yibu Sadrac, Mesac né Abednego né rasalyibu mbioxhlas re' lainy horno. Horno cú nigolú radudyla'ni né belguii ni rabe'ni ragaity guirá buñguieeu nadip re'. Per ¿xí rac né tzón mbioxhlas ni bisalyibu lainy horno cú?

Nabucodonosor raguixlóo lainy horno, né radzuibygolúbu. ¿Diti bicado'no tzón buñguieeu né bisalno layibu lainy horno laguii la? ranabdiitzbu.


Scú láani, ngú bunydo, racapy xomósbu.

Nabucodonosor ná: Na' rabiya tap buñguieeu casaa ló guii. Diti cado'yibu, né diti caya'ijyibu. Né ni rasa' tap ni no' cú ralooypani toib diohx láabu. Nabucodonosor raguixlóo ro' horno cú né raca'bu rudx: ¡Sadrac! ¡Mesac! ¡Abednego! ¡Colguire', lóoto ni rony xchiin Dios ni no' más Guia'!

Órni rare'yibu lainy horno, buñ labúu rabí layibu diti no' xí gocyibu. Nabucodonosor rani': ¡Gonyxiro'no Dios ni rony adorar Sadrac, Mesac né Abednego! Bixelbu ángel xtunybu né bilaa layibu portín diti no' chú labúu buny par naxixipyibu né nienyibu a stoib diohx xalagary Jehová.

¿Diti rasuidy nde' lóono toib mod galán par diti guisianno Jehová la?

Éxodo 20:3; Daniel 3:1-30.



¿XÍ GALNADX cayac re'? Buñ no' ló toib lanii ro'. Ni rony mandary Babilonia buny invitarbu mil buñxirop. Caquiinyibu tazones, copas de or né de plata ni cua'yibu lainy yo' xiro' ro rac adorar Jehová ni no' lainy Jerusalén. Tisintiempsi, bicuña toib buñguieeu rienni labu né rasalóni raca'ni diitz cué yo'. Guiráyibu radzuiby.

Buñguieeu ni cayony mandary nigore' laa Belsasar, bixiogolbu góc Nabucodonosor. Belsasar raxelca'bu guirá buñnan né raibybu buñre': Ni labúu go'ol diitzre' né gaiby na' ximod rarexani, sascada láabu xidal cós né guidxin gacbu ni rion buñnan ni gony mandary lainy gobierno re'. Per ni toib buñnan ni napbu labúu ro'ol diitz ni caa cué yo' né láaca diti labúu rabexayibu láani.

Órni xina' Belsasar racadiag ruid ni cayac, rio' ro dxeeyibu cayoyibu né raibybu Belsasar: Ranába lólo diti guidzuibylo. Lainy



gobierno xtunylo no' toib buñguieeu ni rimbu tipnés diohx ni diti nap galkié. Ló dzú ni buny mandary bixiogol lo, Nabucodonosor, goleschinbu buñguieeu re' ñony mandary tipnés buñnan. Laabu Daniel. Bixelca' láabu guieed, né cuéxabu guirá diitzre' looy.

Ni maca ritnéyibu Daniel. Después ni Daniel diti gosaguel naca' ni cascad Belsasar láabu, rasaló ranibu xigony Jehová gole' bixiogolbu Nabucodonosor ló galmandary. Láabu nigolú farmay gócbu, ná Daniel. Né Jehová buny castigar láabu.

Per looy nanlo xi guirá gócbu né láabu, raiby Daniel a Belsasar, looy diti rasianlo mod nacló, buñ farmay looy xomod gócbu bixiogol lo. Bitnélo copas né tazones ni goyo' lainy yo' xiro' ro rac adorar Jehová né go'lo lainy. Bunyxiro'lo laa diohx ni goya' de yac né guiee, né diti bunyxiro'lo laa Dios ni Bisa' guiráxadit cósbu né diti no' chú Riga'l láabu. Por ngú Dios buny que toib ña naca' diitzre'.

Daniel racapy, diitz ni cabíto re' ná scare': MENÉ, MENÉ, TEKEL né PARSÍN.

MENÉ rarexani que Dios ma bigab dzú ni gonylo mandary né ma bislo'oxbu láani. TEKEL rarexani que ma goyobu'lo ló balanz né bienni que diti raquiinlo. PARSÍN rarexani que gobierno xtunylo guica' medos né persas láani.

La'ga Daniel cani', medos né persas rasaló racalóyibu Babilonia. Río'yibu raca'yibu gudx né ragaityibu Belsasar. ¡Diitz ni caa cué yo' rac cumplirni gue'el cuca! Per ¿xí gac né israelitas nigore'? Ló historias ni sietra guisuidyno más de láani, per nigore' guibino xí rasaclóo Daniel.



**¡B**IBI' gannlo! Ralooypani Daniel no' ló toib galnagan. ¡Per diti no' xí rony guirá betz ons láabu! ¿Nanlo xigony la? ¿Chú bisal Daniel lad guirá betz ons re'? Guibino guidoni.

Ni cayony mandary Babilonia nigore', ngú toib buñguieeu ni laa Darío. Darío rioladx mod nac Daniel portín nacbu buñtzay né buñnan, por ngú Darío rony láabu toib buñxirop ni rony mandary lainy gobierno xtunybu. Por ngú tipnés buñguieeu radzuitzyibu Daniel, né ronyibu nde':

Rieyibu né raibyibu Darío: Guirádo racladxdo que looy ni cayony mandary, cuélo toib ley ni guini' que ló treint dzú ni toib buñ guininé dioxh né buñgudxlio nosi looy. Pal no' ni diti rasob láani, non tzébu lainy xcarió betz ons. Darío diti nann xigony guirá buñguieeu re' canab guiré ley re'. Per Darío raluladx que galán mod ni cani'yibu, né raca'bu láani. Nigore' ley re' diti labúu guidza'ni.





Órni radxiin nde' guidiag Daniel, riebú lidxbu né raninébu Jehová mod ronybu guirá dzú. Guirá buñguieeu mal re' nanyibu que Daniel diti sasian guininé Jehová. Rabaladxibu portín ralooypani guirebu' ni náni layibu, gaity Daniel.

Órni Darío raduidy cuent xí ni cayac, nabann rio'bu. Per diti labúu guitzábu ley re', né non gony mandarybu par guisalyibu Daniel lainy xcarió betz ons. Per Darío raibybu

Daniel: Napa confianz lóo Dios ni rony adorarlo labúu guilaabu looy.

Darío nigolú rio'bu ló xcalrrasani né diti ranás bacá'al láabu gue'el cú. Raraa stoib gue'el cú Darío raxony riée ro' xcarió betz ons. Ló dibuj labúu rabilo láabu. Darío raca'bu rudx: ¡Daniel, buñguieeu ni rony xchiin Dios ni nabany! ¿Labúu bilaa Dios ni looy rony adorarlo de betz ons la?

Daniel racapy: Dios bixel ángel xtuny, né bisieg ro' guirá betz ons par diti ñonymu xitcal na'.

Darío nigolú rabaladx. Rony mandarybu guiré Daniel lainy garió. Ór cú rasalbu lainy xcarió betz guirá buñ mal ni ná nagaity a Daniel. Guirá buñ mal re' labusa séeyibu betz ons ranás layibu né raxo'ox xchityibu.

Ór cú Darío raxel guiich lóo guirá buñ ni rony mandarybu: Guiráto colguisanadx Dios ni rony adorar Daniel. Dios ni rony adorarbu, láabu ngú ni rony cós ni nigolú radziguia' buñ. Láabu bilaabu Daniel de guirá betz ons.



**M**A YAACA guia' chop íz de goló medos né persas goyo' né cua'yibu gudx Babilonia. ¡Bibi' xí ni cayac nigore'! Scú láani, israelitas care'yibu gudx Babilonia. ¿Ximod góe par labúu nare'yibu? ¿Chú biduidy lagary layibu?

Ni biduidy lagary layibu ngú Ciro, ni buny mandary Persia. Xidzú íz dzú ni yása gál Ciro Jehová gochbu Isaías, buñguieeu ni raquimbu par guini' xí gac dzú ni sietra, naca'bu de Ciro: Gonylo ni nainy na' gonylo. Puert xobialsaa sia'anni par labúu guio'lo né guicálo gudxcú. Né scú gocni Ciro gosanir par bio'yibu né cua'yibu Babilonia. Medos né persas bio'yibu gue'el lainy gudx Babilonia niis ro puert ni bian xobialsaa.

Per Isaías láaca gonibu que Ciro sony mandary que Jerusalén né yo' xiro' ni goyo' lainy gudxcú guisa'yibu láani stoib. ¿Buny Ciro ni goní Jehová la? Bunybu láani. Nde' ni gochbu israelitas: Coltzé Jerusalén, né colguisa' yo' xiro' ro gony adorarto Jehová. Né nde' ni sée saguny israelitas.

Per diti guirá israelitas ni no' lainy gudx Babilonia labúu riée Jerusalén portín nigolú sit ria'anni. Nigolú xiro' rasaa buñ par guidxin Jerusalén, 800 kilómetros sitni, né xidal israelitas ma nigolú buñgol né



ma diti nasacyibu. Né láaca no' stipnés razón por ni diti rieyibu. Per buñ ni diti riée gudx Jerusalén, Ciro raiby layibu: Colguiduidy plata, or né stipnés cós a guirá buñ ni guibigué guisa' gudx Jerusalén né guisa' yo' xiro' ro buny adorarto Jehová.

Por ngú, israelitas ni rabigué gudx Jerusalén racáyibu xidal cós. Ciro láaca raduidy layibu tazones né copas ni Nabucodonosor gole' lainy yo' xiro' ro rac adorar Jehová órni binitlóbu Jerusalén. Xidal cós riné israelitas Jerusalén.

Tap be'o de goló bire'yibu Babilonia radxiinyibu Jerusalén, dzú non guidxinyibu. Nontís bisa' 70 íz de goló binitló gudx Jerusalén dzú ni toib buñ bian lagarycu. Ná israelitas ma bibigué xcudx stoib, sadudyibu ló gálnagan, xomod guisuidyno.

Isaías 44:28; 45:1-4; Esdras 1:1-11.



# CONFIANZ QUE JEHOVÁ RACNÉ 81

**X**IDALGUIXO buñ rare' gudx Babilonia né rieyibu gudx Jerusalén ni rian nigolú sit. Per órni radxiinyibu, gudx Jerusalén nací toib lagary ni nigolú binitló. Diti no' chú rabés lagarycu. Israelitas nap xi de guisa'yibu láani stoib.

Ni nirdiguié rasa'yibu ngú toib lagary ro rasa'ijyibu nimal par guiscadyibu láamu Jehová. Diti radudy xidal be'ó israelitas rasaló rasa'yibu yo' xiro' ro rac adorar Jehová. Per xi enemigyibu ni rabés lainy gudxrop ni no' gahx, rayopy mod guitzuiby né guicaa ló xchiinyibu. Xi enemigyibu rony que buñguieeu ni rasaló rony mandary Persia cué toib ley par guicaa dxiin ni cayonyibu.

Radudy xidal íz. Ma godudy diecisiete íz de goló israelitas bire'yibu gudx Babilonia. Dios bixel chop buñguieeu ni rani' xí gac dzú ni sietra ni laa Ageo né Zacarías par gaiby a israelitas que saló guisa'yibu stoib yo' xiro' ro rac adorar Jehová. Buñ rasob portín rapyibu confianz que Dios gacné layibu. Rasaló rasa'yibu láani stoib, ná no' toib ley ni ná que diti gonyibu láani.

Por ngú, toib buñxirop ni laa Tatenai de gudx Persia rieved rono'yibu né ranabdiitz chú láabu biduidy lagary guisa'yibu yo' xiro' ro rac adorar Jehová. Israelitas racapy láabu que órni no'sayibu Babilonia buñguieeu ni buny mandary gudxcú ni laa Ciro góoch layibu: Coltzé Jerusalén né colguisa' yo' xiro' ro rac adorar Jehová, Dios xtunyto.

Tatenai raxel toib guiich gudx Babilonia né ranabdiitzbu pal Ciro nigolú goni' nde', par ló naare' Ciro ma goity. Ni maca buñguieeu ni cayony mandary xalagary Ciro, radxiguet stoib guiich ro racapybu que scú láani. Por ngú buñguieeu re' raca'bu: Colguiduidy lagary que israelitas guisa' yo' xiro' ro rac adorar Jehová. Né raxela lóoto gacnéto layibu. Ló tap íz yo' xiro' ro rac adorar Jehová raloxtzaayni, né israelitas nigolú rabaladxyibu.

Radudy xidal íz. Nigore' ma godudy casi 48 íz de goló bilox goya' yo' xiro' ro rac adorar Jehová. Buñ ni rabés lainy gudx Jerusalén buñ pobre

layibu, gudxcú né yo' xiro' ro rac adorar Jehová diti sacró rienni. Ruc lainy gudx Babilonia no' toib buñ israelita ni laa Esdras, né radxiin guidiagbu que yo' xiro' ro rac adorar Jehová raquin gactzaayni. Por ngú, ¿nanlo xí ronybu la?

Esdras riée rono' Artajerjes, né buñguieeu re' buñtzay góc portín biscatbu xidal cós a Esdras par tzanébu gudx Jerusalén. Esdras ranab a israelitas ni no' gudx Babilonia gacné láabu, gahxca 6,000 buñ rasaguel riée né láabu par tzanéyibu xiro' plata né or né stípnés cós ni rasac.

Esdras rio'bu ló galrasa', portín no' gobáan ló néz. Guirá buñ mal re' cuann plata né or ni néyibu, né labúu guigaity layibu. Por ngú Esdras ratop guirá buñ, xomod rabilo ló dibuj. Ór cú raninéyibu Jehová par gann layibu ló néz, portín nigolú sit saayibu par guidxinyibu Jerusalén.

Jehová nigolú ran layibu. Né ló tap be'o ni casaayibu ló néz, radxiinyibu Jerusalén. ¿Diti raduidy nde' diitz que Jehová labúu ran buñ ni nap confianz láabu la?

Esdras, capítulos 2 a 8.



**N**IGORE' guisuidyno xi góe dzú yása guidxin Esdras Jerusalén. Mardoqueo né Ester nacyibu israelitas ni más buñxirop ni no' lainy gobierno xtuny Persia. Ester nacbu tze'el buñguieeu ni rony mandary ni laa Asuero né nacbu xprim Mardoqueo ni nac buñxirop ni canal xiitz Asuero. Guisuidyno ximod góe guirá nde'.

Ester goity bixiosbu né xina'bu dzú niye'ensabu, por ngú Mardoqueo bisnís láabu. Asuero napbu toib lagary ro rony mandarybu lainy gudx xirop ni laa Susa, né Mardoqueo nac toibtica xomósbu. Toibtica dzú Vasti, tze'el Asuero, diti rasobdiitz láabu, por ngú Asuero rayopy stoib buñgona' par guia'an xalagary Vasti par gac tzeelbu. ¿Nanlo chú láabu rabú Asuero la? Scú láani, láabu golúbu gona' móz Ester.

¿Rabilo buñguieeu farmay ni casanadx buñ la? Láabu ngú Hamán, toib buñxirop ni no' lainy gudx Persia. Nainy láabu que Mardoqueo, ni rabilo sob ca, láaca guisanadx láabu. Per Mardoqueo diti rony láani, diti rabíbu galán guisanadx buñ toib buñguieeu ni nigolú mal. Hamán nigolú radzuitz. ¡Gannlo xí ronybu nigore'!

Hamán pór galrrascú ranibu de israelitas nisló Asuero, né ranibu: Buñ mal layibu né diti rasobyibu xileylo. Non gaityibu. Asuero diti nann que tzeelbu Ester nac buñ israelita. Por ngú racadiagbu



Hamán, né rabébu toib ley ro raca'bu dzú ni non gaity guirá israelitas.

Órni Mardoqueo racadiag ni ná ley re', rio'golubu ló xcalrrasani. Raxelbu diitzre' lóo Ester: Goyee nisló ni rony mandary né gonab láabu guilaabu lóono. Ley ni nap Persia ná que pal tzó ni tze nisló buñguieeu ni rony mandary, buñguieeu re' nír non guixelca' láabu. Per Ester riée sin que raxelca' Asuero láabu. Órni radxinbu Asuero rasca' xiac de or, nde' raduidy diitz que diti non guigaityibu Ester. Ester rony invitarbu Asuero né Hamán toib galrro ni gonybu. Lagarycu Asuero ranabdiitzbu Ester pu labúu gacnébu Ester né Ester racapy que saibly láani láabu pal Hamán guieed né láabu stoib dzú órni gonytzaaybu stoib galrro.

Ló ro cayoyibu, Ester raiby Asuero: Guigaityibu xcudxi né na'. Asuero buñguieeu ni rony mandary radzuitz. Né ranabdiitzbu. ¿Chú láabu ma riga'lni gony nga?

Ester ná: ¡Buñguieeu ni nac enemig, buñ mal re' láabu Hamán!

Nigore' Asuero radzuitz. Rony mandarybu gaity Hamán. Ralox rac guirá nde' Asuero rony a Mardoqueo toib buñxirop ni canal xiitzbu. Mardoqueo ran que guiré stoib ley ni raduidy lagary israelitas tíil par labúu guilaayibu dzú ni raloyini gaityibu. Por ni Mardoqueo ma nac toib buñxirop nigore', xidal buñ racné a israelitas, né ralaayibu de xi enemiyibu.


Ester, toib libro ni sieed ló Biblia.




**¡B**IBI' balaati nadip cayonyibu dxiin re'! Israelitas casa'yibu muros ni nap Jerusalén. Ma godudy 152 íz de goló Nabucodonosor binitló Jerusalén dzú bicantabu muros né bisa'ijbu xpuertni. Israelitas diti suusi bibiguetyibu de Babilonia gosaló golísyibu muros ni nap Jerusalén.

¿Ximod ronylo pensary gosacyibu guirá íz ni godudy ni diti goyo' muros ni nalaa layibu? Ló galnazu'py bigua'yibu, portín diti nagann par nacaló xi enemigyibu layibu. Radxiin midid, buñguieeu re' ni laa Nehemías, rabino láabu cayacnébu a guirá buñ par gactzaay muros stoib. ¿Nanlo chú ngú buñguieeu re' ni laa Nehemías la?

Nehemías nacbu toib buñ israelita ni sieed de gudxrop ni laa Susa ro rabés Mardoqueo né Ester. Nehemías ronybu dxiin lagary ro buñguieeu ni rony mandary rony dxiin, por ngú sigory nacbu ximig





Mardoqueo né Ester. Per la Biblia diti ná que Nehemías buny xchiin tze'el Ester ni laa Asuero. Láabu bunybu dxiin par stoib buñguieeu ni buny mandary xalagary Asuero ni laa Artajerjes.

Bisednaladx, Artajerjes ngú buñguieeu tzaay ni biscat a Esdras bidxiich par ninébu gudx Jerusalén né nasa'bu yo' xiro' ro rac adorar Jehová. Per Esdras diti golis muros ni náaxh layoo. Guibino ximod góc par ñony Nehemías láani.

Ma godudy trece íz de goló Artajerjes biduidy a Esdras bidxiich par nasa'bu yo' xiro' ro rac adorar Jehová. Nigore' Nehemías nacbu buñguieeu ni rago' ni re' Artajerjes. Láabu rago'bu vino par gue' buñguieeu re' né randxichbu que diti gapni venen. Dxiin ni ronybu rasacni.

Toibtica dzú Hananí buch Nehemías né stipnés buñguieeu de gudx Israel rievedtxlóbu Nehemías.



Raibyibu a Nehemías guirá galnagan ni cadudy israelitas ló, né que digundi guilísyibu muros ni nap Jerusalén. Nehemías nigolú rio' nabann, né raibybu Jehová galrasa' ni no'bu ló.

Toibtica dzú buñguieeu ni rony mandary ni laa Artajerjes raduidy cuent que Nehemías no' nabann, né ranabdiitzbu Nehemías: ¿Xigony nóolo nabann? Nehemías raiby láabu que no'bu nabann mod no' Jerusalén né ni muros náaxh layoo. Artajerjes ranabdiitz láabu: ¿Xí nainy looy?

Nehemías raiby láabu: Biduidy lagary na' tzaaya gudx Jerusalén, par labúu guilís muros stoib. Artajerjes nigolú natzaaybu. Raduidybu lagary tze Nehemías, né racnébu rayopybu yac par guisa' Nehemías muros ni nap Jerusalén. Diti xidzú de goló bidxinbu Jerusalén, raibybu guirá buñ gudx ni no' guicbu gonybu. Gudx rioladx mod nac xpensary Nehemías né raniyibu: Salóno gonyo dxiin.

Órni guirá xi enemig israelitas rabíyibu que ma moda naso' sée muros ni nap Jerusalén, raniyibu: Guia'pyno né guigaityno layibu né modre' guicaano ló xchiinyibu. Órni nde' radxiin guidiag Nehemías. Nehemías raduidybu a guirá buñ ni cayony dxiin espad né lanza né ranibu: Diti guidzuibyto layibu. Coltil por bucho, bisanto, xiinnto, tzeelto né lidxto.

Gudx nigolú nap balory. Dzúna gue'el ca'yibu pueyt xquipyibu, né diti rabés ronyibu dxiin. Por ngú, nosi ló 52 dzú raslo'oxyibu muros ni nap Jerusalén. Nigore' ma diti noyibu ló galnadzu'py lainy gudx. Nehemías né Esdras rasuidyibu xiley Dios, né gudx rabaladx.

Per diti rabésyibu mod golésyibu dzú ni yása guinás Babilonia layibu. Buñguieeu ni rony mandary Persia láaca cayony mandary gudx Jerusalén por ngú layibu non gonyibu ni ná buñguieeu re'. Per Jehová ma biduidy xtiitz layibu que saxel stoib buñguieeu ni gony mandary layibu, né buñguieeu re' sony que buñ guigua' goxtiguie. ¿Nanlo chú láabu la? ¿Ximod gonybu par guigua' buñ goxt ló Gudxlio? Casi 450 iz radudy par guirexa tzaay guirá nde'. Ór cú rál toib bada' ni radxiin rac toib buñxirop. Per nde' ma stoib historia láani.

## ***Dzú gool Jesús hasta dzú goitybu***

*Ángel ni laa Gabriel goyee rono' toib mbioxhlas tzaay ni laa María. Láabu gochbu María que sio' toib xiimbu ni gony mandary por tipzó. Jesús golbu lainy xcorraa nimal, ro tipnés ni rap xiil goyee goyguen láabu. Láaca toib vitzón gosanir nisló tipnés buñguieeu ni bieed niis ro ralainy Govitz par bidxin rono'bu. Guisuidyno chú láabu buny par labúu nabi'yibu vitzón cú, né ximod bilaa Jesús ladxña guirá ni ná nagaity láabu.*

*Láaca guisuidyno órni Jesús ma nap doce íz, ro cayoooybu diitz né tipnés mextra lainy yo' xiro' ro rac adorar Jehová. Dieciocho íz de goló góe' nde' Jesús goyonis, né gosalo gosaabu yo' por yo' né bisuidybu de Gobierno, par gonybu guirá ni Dios bixel láabu gonybu lo Gudxlio. Par ño' ni ñacné láabu lo dxiinre', golúbu doce buñ par gac xpiimbu.*

*Jesús láaca bunybu xidal galrradziguia'. Nosi chop tzón beel né chop tzón páa biquiimbu par biya'anbu xidalguixu buñ. Bisialbu buñguitz né láaca golisbu gue'et. Órni mápa mer guidopy Midid re' guisuidyno xidal cóe' ni gosaclobu dzú ni ma yaaca gaitybu, né láaca ximod bigaity buñ láabu. Jesús gosaabu yo' por yo' por tzón íz gorol, por ngú Midid XHOOP rasa'ni más de 34 íz.*

**G**ONA' móz ni rabilo ló dibuj re' laa María. Buñ israelita láabu, né rabésbu gudx Nazaret. Dios nandxich que nacbu toib gona' tzaay. Por ngú bixelbu toib ángel ni laa Gabriel par guininé María. ¿Nanlo xí ni cayaiby Gabriel a María la? Guibino guidoni.

Gabriel rani' dioxh María né raiby láabu: Xiro' xilaay Jehová naplo, né no'bu né looy. María ni toib buelt ma bibi'bu buñ de clas cú. Rio'bu ló galrasa' portín diti nambu xí láani ná Gabriel. Órcuca Gabriel racné láabu par diti tzóbu ló galrasa'.

Gabriel raibybu María: Diti guidzuibylo, Jehová rabaladx mod naclo'. Por ngú gonybu toib galrradziguia' né looy. Diti saclani sio' toib xiinlo. Né non cuélo laabu Jesús.

Bada' re' gacbu toib buñxirop, né gac laabu Xiin Dios ni no' más Guia', ná Gabriel. Jehová sony láabu toib buñ ni gony mandary xomod góc David. ¡Per Jesús sony mandary por tipzó né Gobierno xtunybu diti saduidy xtzúni!

María ranabdiitz láabu: Per ¿ximod gac guirá nde'? Na' diti no' tze'ela né diti rabesnéya buñguieeu, ¿ximod labúu tzó toib xiinna?

Gabriel raiby láabu: Saca'lo xcalnadip Jehová. Mbioxien re' gac laabu Xiin Dios. Ór cú Gabriel raiby láabu: Bisednaladx xfamilylo Elisabet. Buñ goní que ma nigolú buñgol láabu par tzó xiimbu. Per mápa mer tzó xiimbu. Por ngú, biduidy cuent que diti no' cós nagann par Jehová.

Órcuca María racapy láabu: ¡Na' no'ya xan xomandary Jehová! Sa gac né na' mod goni'lo. Órcuca ángel re' rare' rono'bu.

María rac naguel par tze tzatixlóo Elisabet. Órni Elisabet racadiagbu rani' María, bada' ni no' lainy Elisabet rasandop portín rabaladxbu. Elisabet raca'bu xiro' fuers ni Dios raquuin par gonybu ni nábu né Elisabet raiby a María: Looy nigolú naplo xiro' xilaay Jehová lad buñgona'. María rian yaaca tzón be'o rono' Elisabet, né ór cú rabiguethu Nazaret.

Diti xidzú María ma tze guica' José láabu. Per órni José ran que María ma nacxiin, ronybu pensary diti galán guica'bu María. Ór cú ángel xtuny Dios raiby láabu: Diti guidzuibylo guica'lo María par gac tze'el lo. Portín bada' ni gapbu Xiin Dios láabu. Por ngú José né María ronyibu galtze'el, né rabésbu gál Jesús.

Lucas 1:26-56; Mateo 1:18-25.



# JESÚS RÁL LAINY XCORRAA NIMAL

85

¿NANLO chú ngu bada' re' la? Scú láani, Jesús láabu. Suusi golbu lainy xcorraa nimal, láani ngu toib lagary ro rieg nimal. María cagui'xbu Jesús lainy toib canoo, láani lagary ro rio' ni ro bor né stipnés nimal. Per ¿xigony no' María né José ro dxee guirá nimal? ¿Nacní toib lagary galán par gál toib bada' la?



Yaca, diti nacı toib lagary galán. ¿Xigony bidxinyibu Belén? Buñgüieeu ni rony mandary Roma ni laa César Augusto bica'bu toib ley que guirá buñ guibiguet gudx ro gool par guica' laayibu ló toib libro. Scú láani, José golbu gudx Belén. Per órni láabu né María goyo'bu gudx Belén diti bidzelyibu lagary ro nadxínyibu. Ngú buny que ñeyibu ro dxee nimal. ¡Dzúcu María gosann Jesús! Mod rabilo ló dibuj, golbu nasac.



¿Labúu rabilo buñ ni cayap xiil sieed par guibíyibu Jesús la? Layibu dxeyibu gu'ix gue'el cú órni toib guii bicaptzadit roloo ro dxeyibu. ¡Toib ángel bixiin rono'yibu! Ni cayap xiil nigolú bidzuibyibu. Ángel re' góoch layibu: ¡Diti guidzuibyto! Sitnéya diitz sacró par lóoto. Dzure' gudx Belén gool Cristo ni Dios golú. ¡Láabu guilaabu gudx! Labúu guidzeldo láabu lainy toib canoo ro náaxhbu né narelbu lairy. Tisintiempsi, xidalguixo ángeles radxiin par gonyxiro' Jehová. Órcuca ni cayap xiil raxonyibu rayopyibu Jesús, né nigore' xomod rabilo ló dibuj ma bidzelyibu Jesús.


¿Nanlo xigony góe Jesús toib buñxirop la? ¿Nanlo chú ngú *nigolú* góe Jesús la? Bisednaladx, ló primer historia ni sieed ló libro re' bisuidyno ni góe primer Xiin Dios. Láabu bunybu dxiin né Jehová órni goya' guibá né Gudxlio né guirá cós. ¡Nde' Jesús!

Scú láani, Jehová buny que María gocxiin. Né ór cú, gosaló gonís Jesús lainy María xomod ranís toib bada' lainy xina'. Per bada' re' Xiin Dios láabu. Bidxin midid Jesús gool lainy toib xorraa nimal ni no' gudx Belén. ¿Labúu raduidylo cuent xigony bibaladx guirá ángeles órni goníyibu que Jesús ma gool la?

¿LABÚU rabilo vitzón ni cacaptzadit ni caloyña toibtica buñguieeu ni no' ló dibuj ca la? Órni bire'yibu gudx Jerusalén, vitzón re' bien caani guibá. Layibu sieedyibu niis ro ralainy Govitz, né nacyibu buñ ni raluladx que rabexa mod caa vitzón. Raluladx yibu que vitzón copy re' siné layibu rono' toib buñxirop.

Órni layibu radxiinyibu Jerusalén, ranabdiitz yibu: ¿Pú no' mbioxien ni guidxin gony mandary a judíos? «Judíos» láani nací stoib laa ni racá buñ israelitas. Raniyibu: Nirdiguié bibi'do xpitzónbu niis ro ralainy Govitz, né sieldo par gony adorardo láabu.

Órni Herodes buñguieeu ni rony mandary Jerusalén bidxin guidiagbu nde', nigolú bidzuitzbu. Herodes diti náni láabu que stoib tzó xalagarybu par gony mandary. Por ngú, ranabdiitzbu guirá buñguieeu ni rasanir nislóyibu par gony go'ox: ¿Pu lagary gál buñ ni





nayibu gony mandary? Layibu cuapyibu: La Biblia ná que lainy gudx Belén.

Ór cú Herodes gochbu buñ ni sieed niis ro ralainy Govitz: Colguiyopy mbioxien re'. Órni guidzelto láabu colgaiby láani na'. Láaca nainy na' gony adorar láabu. Herodes ni náni láabu ngú guigaitybu bada' re'.

Ór cú vitzón rasanir nislóyibu, né rasagadzuni lagary rono' mbioxien cú gudx Belén. Órni layibu rio'yibu lanio', radzelyibu María né xiinienbu Jesús ni niye'ensa. Layibu rascadyibu cós a Jesús. Per Jehová ló toib baca'al raiby layibu que diti guibiguetyibu rono' Herodes. Por ngú, ranásyibu stoib néz né rabiguetyibu xcudxyibu.

Órni Herodes ran que guirá buñguieeu re' ma gonás stoib néz, nigolú radzuitzbu. Rony mandarybu gaity guirá mbioxien ni nap chop íz né ni más niye'ensa. Per órni Herodes goni nde', ór cú Jehová ló toib baca'al buny mandarybu a José par tze Egipto né xfamily. Diti xidzú, órni José ran que Herodes ma goity, rabiguetybu né María, né Jesús gudx Nazaret. Né lagary re' ni laa Nazaret ranís Jesús.

Looy xí ronylo pensary, ¿chú láabu buny que nacaptzadit vitzón copy lainy guibá? Bisednaladx, guirá buñguieeu nír goyeyibu gudx Jerusalén par nabi'yibu vitzón. Buñdzab goniiny nagaitybu Xiin Dios, né láabu gonbu que Herodes ni rony mandary gudx Jerusalén nayopy mod par nagaitybu Jesús. Scú láani, Buñdzab láabu bunybu que nacaptza' vitzón re'.



# JESÚS MBIOXHLASIEN LAINY YO' XIRO'

87

**B**IBI' mbioxhlasien ni caniné pór buñgox. Layibu nac mextra lainy yo' xiro' ro rac adorar Jehová ni no' lainy Jerusalén. Né mbioxhlasien re' láabu ngú Jesús. Ma gonísbu né par nigore' ma napbu 12 íz.

Mextra ni dxee re' nigolú radziguia'yibu Jesús nigolú nambu de Dios né guirá ni caa ló la Biblia. Per ¿xigony diti no' José né María re'? ¿Pu noyibu? Guibino guidoni.

Guirá íz José ritné xfamily a Jerusalén par tzóyibu ló lanii ni laa Pascua ni rac toibsi buelt ló toib íz. Xiro' rasaayibu de Nazaret par guidxinyibu gudx ni laa Jerusalén. Diti no' chú nap camión, láaca yadi roplan, portín diti goyo'ni ló dzúcu. Guirá buñ rasañe', né par guidxinyibu Jerusalén rinéni layibu tzón govitiz.

Par nigore' ma no' xidal xiinyibu. Por ngú racáyibu cuidad bisan né buch ni más nahuin lóo Jesús. Par ló íz re' José, María né xiinyibu ma cabiguetyibu Nazaret. Par layibu Jesús no' lad tipnés buñ ni goyee lanii ni láaca casañe'. Per órni rasaladxibu godzu cú, raduidyibu cuent yadi Jesús. ¡Rayopyibu Jesús lad xfamilyibu, ximigyibu per ni toib lagary radzelyibu Jesús! Por ngú rabiguetyibu Jerusalén par guiyopyibu Jesús.

Radudy dzú, radzelyibu Jesús cacadiag né canabdiitz xidal cós a guirá mextra. Né guirá buñ radziguia' xcalnanbu. Per María raiby láabu: Xiinga'na, ¿xigony bunylo' nde' lóodo? Bixioslo né na' cayopydo looy portín golo'lo lóodo ló galrasa'.

Jesús racapy: ¿Xigony cayopyto na'? ¿Xí diti nanto que tzóya lidx bixiosa la?

Jesús rioladxbu tzóbu lagary ro ganbu más de Dios. Looy, ¿xí nálo láaca non gacno scá la? Órni bibiguetbu lidxbu gudx Nazaret, goyebu lagary ro rony adorarbu Jehová guirá xomal. Por ni bicadiag tzaaybu órni goyebu reunión, por ngú bisuidyibu xidal cós ni caa ló la Biblia. Guisu'no mod buny Jesús.



**B**IBI' palom ni cayetj niis guic buñguieeu ca. Buñguieeu re' ngú Jesús. Nigore' mápa mer gapbu 30 íz. Né ni no' né láabu ngú Juan. Ma bisuidyno tidxo de Juan. ¿Rasetnaladxlo órni María goyguen xfamilybu Elisabet, né bada' ni no' lainybu bisandop portín bibaladxbu la? Bada' ni yása gál dzúcu láabu ngú Juan. Per ¿xí cayony Juan né Jesús nigore'?

Juan bilox binidxbu Jesús lainy nís gu'uc Jordán. Scá rionis buñ. Buñ rio' guidopynac lainy nís, né ór cú rare'bu. Nde' ni rony Juan, por ngú rani' buñ láabu Juan ni Ragonis. Per ¿xigony golonisbu Jesús?



Juan buny láani portín Jesús bieed rono'bu par tzonis. Juan ragonis buñ ni ná guislooy que rio'obni layibu por cós mal ni bunyibu. Per ¿no' cós mal ni buny Jesús ni rio'obni láabu par tzonisbu la? Yaca, Jesús diti bunybu cós mal, portín Xiin Dios láabu ni bietj guibá. Por ngú, napbu stoib razón par guinabbu Juan conis láabu. Guisuidyno xí razón gopbu.

Dzú yása ñeed Jesús rono' Juan, toib carpinter láabu. Toib carpinter ngú ni ronytzaay yac, xomod mexh, xilet né bank. José, tze'el María gócbu buñ ni bunytzaay yac, né láabu bisuidybu Jesús dxiinre'. Per Dios diti bixel Xiin par gac toib buñ ni gontzaay yac ló Gudxlio. Napbu toib dxiin ni rasac par Jesús, né ma bidxin ór par gony Jesús láani. Por ngú, par guislooybu que bieedbu par gonybu xchiin Bixiosbu, Jesús ranab Juan que conis láabu. ¿Rioladx Dios nde' la?

Scú láani, rioladxbu portín órni rare' Jesús lainy nís, toib rudx ni sieed guibá ná: Nde' xiinga'na ni rony que rabaladx. Láaca, ralooypani guibá raxal né palom re' rietj rono' Jesús. Ralooypani toib palom per diti scú láani, nacní fuers ni Dios raquiin par gonybu ni nábu.

Nigore' Jesús nap xí de gony pensary ló xidal cós, por ngú riebu toib lagary ro yadi buñ por 40 dzú. Lagarycu Buñdzab radxiin rono'bu. Tzón buelt Buñdzab rayopy mod que Jesús diti guisob xiley Dios. Per Jesús diti riab ló xto' Buñdzab.

Ralox radudy Jesús ló nde', rabiguetsbu né rimbubu tipnés buñgueeu ni radxiin rac primer xpiimbu. Tipnéyibu nac: Andrés, Pedro (ni láaca laa Simón), Felipe né Natanael (ni láaca laa Bartolomé). Jesús né guirá biinre' riefybu niis roloo Galilea. Radxinbu xcudx Natanael ni laa Caná, lagary re' Jesús riée ro cayac toib galtze'el, né ronybu primer galrradziguia'. ¿Nanlo xí láani la? Ronybu que nís radxiin rac vino.

¿CADZUITZ Jesús re' la? Scú láani. ¿Nanlo xigony la? Portín tipnés buñgueieu ni no' lainy yo' xiro' ro rac adorar Jehová



ni sob Jerusalén nacyibu buñ ni rasobladx. Rayopyibu mod cuéyibu xpídxíich guirá buñ ni ríeed rony adorar Jehová.

¿Rabilo yós né xiil né palom ni dxee ca la? Buñguieeu ni dxee lainy yo' xiro' xtuny Jehová, re'ca rato'yibu guirá nimal re'. ¿Nanlo xigony la? Nacní portín israelitas raquiinyibu nimal né manybiguin par guiscadyibu Dios.

Xiley Dios goní que órni toib israelita rony galkié, non tzó ni guiscadbu Dios per láaca goyo' stoib ór israelitas bunyibu nde'. Per ¿pu labúu guidzelyibu manybiguin né nimal par guiscadyibu Dios?

Tipnéyibu bital manybiguin né nimal par guiscadyibu Dios. Per xidal israelitas diti gop nimal ni manybiguin. Stipnéyibu golés sit Jerusalén né diti labúu ritnéyibu nimal par guiscadyibu Jehová lainy yo' xiro'. Por ngú buñ ríeed lagary re' rasi' nimal né manybiguin ni raquiinyibu. Per guirá buñre' nigolú car bito'yibu nimal re'. Golannyibu xpídxíich guirá buñ. Diti láani ni bunyibu, ni bito'yibu nimal lainy yo' xiro' ro rac adorar Jehová.

Nde' rony que radzuitz Jesús. Por ngú rachi'ixbu mexh ronó' bidxiich, né nilas raretzlasni layoo. Láaca rasa'bu toib do' né raquiimbu láani par cuébu guirá nimal lainy yo' xiro'. Rony mandarybu ni rato' palom: ¡Colcue' layimu lagary re'! Diti gonyto que lidx bixiosa gac toib lagary ro gonyto xiro' bidxiich.

Tipnés xpiimbu no' né láabu lainy yo' xiro' ni sob lainy gudx Jerusalén. Radziguia'yibu órni rabi'yibu ni rony Jesús. Ór cú rasetnaladxlyibu ni la Biblia rani' gony Xiin Dios: Galnadxi por lidx Dios sooni láabu xomod toib guii.

La'ga Jesús no' Jerusalén ló lanií ni laa Pascua, ronybu xidal galrradziguia'. Ór cú, Jesús rare' Judea né rabiguet Galilea. Per radudybu roloo gudx Samaria. Guibino xí rac lagarycu.

**J**ESÚS casualadx ro' toib pós ni no' gahx gudx Samaria. Xpiimbu sée Samaria par si' galrro. Buñgona' ni Jesús caniné bieed par cué nís lainy pós. Jesús raiby láabu: Biduidy nís gueeya.

Ni rony Jesús rony que radziguia' gona' re'. ¿Nanlo xigony la? Portín Jesús buñ judío láabu, né gona' re' buñ samaritana, né xidal judíos diti rioladx guidzak né buñ samaritanos. ¡Diti raninéyibu samaritanos! Per Jesús nadxibu guiráxadit buñ. Láabu ranibu: Pal ñanlo chú canab nís looy par gue', looy nanablo láabu, né láabu naduidybu nís par labúu guibanylo tipzó.

Gona' re' racapy: Xo', pós re' nigolú gue'et napni nís, né looy diti naplo toib cubet, ¿pu cuélo nís ni rony que guibany buñ tipzó?

Pal re'lo nís ni no' lainy pós sala'nlo nís stoib, ná Jesús. Per nís ni guidudi looy labúu sonyni que buñ guibany tipzó.

Gona' re' racapy: ¡Biduidy nís ca na'! Ór cú diti sala'na nís né ma diti sieela re' par cue'ya nís.

Buñgona' re' raluladx que Jesús cani' de nís ni raquinno. Per láabu cani'bu de xtiitz Dios né Gobierno xtuny, ni nac xomod nís ni rony que guibany buñ tipzó.

Jesús raibybu gona' re': Goyee né góoch láani tze'el lo né bibiguet re'.

Na' diti no' tze'ela, racapybu.


Cuapytzaaylo, ná Jesús, per looy ma goyo' gáay tze'el lo, né buñgueieu ni rabesnélo diti tze'el lo láabu.

Gona' re' radziguia', portín guirá ni góoch Jesús láabu nigolú láani. ¿Ximod gon Jesús guirá nde'? Scú láani, portín Jesús ngú ni Dios biduidy xtiitz guieed ló Gudxlio né por ngú nambu guirá

nde'. Nigore' xpiin Jesús radxiin rono'bu, né radziguia'yibu que Jesús caniné toib buñgona' samaritana.

¿Xí rasuidyno de guirá nde'? Que Jesús buñtzay nac né guiráxadit buñ. Lóono non gacno xomod láabu, diti gonyno pensary que toib buñ nac buñ mal por ni nacbu gadzé color o de stoib gudx. Jesús raniiny láabu que guirá buñ guimbu xtiitz Dios ni riné lóono guibanyno tipzó. Non guiniiny lóono gacnéno buñ par guimbuyibu xtiitz Dios.

Juan 4:5-43; 17:3.





# JESÚS RASUIDY BUÑ LAIDY TOIB DAINY

91

**B**IBI' Jesús sob re'. Casuidybu guirá buñ laidy toib dainy de Galilea. Ni no' más gahx ronó'bu ngú xpiimbu. Láabu golúbu doce de layibu par gac xpiimbu. Xpiimbu ngú ni golúbu par guicanal láabu. ¿Nanlo ximod laayibu la?

Ni primer golú Jesús ngú Simón Pedro né buchbu Andrés. Ór cú golúbu Santiago né Juan, buch sa'yibu. Stoib xpiimbu láaca laa Santiago, né stoib laa Simón. Chopyibu laa Judas, toib ngú Judas Iscariote né stoib laa Judas ni láaca laa Tadeo. Golúbu Felipe né Natanael ni láaca góc laa Bartolomé, né golúbu Mateo né Tomás.

Órni rabiguet Jesús de Samaria, ór cú rasaló ranibu diitzre': Gobierno xtuny Dios ma no'ni gahx. ¿Nanlo xí ngú Gobierno re' la? Láani ngú toib Gobierno xtuny Dios ni gony xinésni ló



Gudxlio. Jesús ngú ni gony mandary ló Gobierno re' lainy guibá né desde lagary re' sonybu que buñ saga' goxt ló Gudxlio. Guidopynac Gudxlio sácní toib lagary sacroyen né Gobierno xtuny Dios sony láani.

Ló dibuj re' Jesús casuidybu stipnés buñ ni Gobierno xtuny Dios gony. Jesús rani': Scá non guininéto Dios. Bixiosdo ni nóolo guibá, gac xiro' laalo. Saguieed Gobierno xtunylo. Né gac ni nálo ló Gudxlio re' xomod racní lainy guibá. Xidal buñ rimbu diitzre' xomod laay. ¿Labúu guinilo guidopy diitzre' la?

Jesús láaca casuidybu ximod gac buñ né sa'. Láabu ranibu: Buny stipnés ni nainy looy gonybu looy. ¿Rioladxló' órni buñ rani' mal de looy la? Yaca, por ngú non gacno buñtzay né stipnés. ¿Diti sacró sácní órni Gudxlio re' sadxin sac toib lagary móz ro' ma diti sio' ni sony mal lóono la?

Mateo, capitulos 5 a 7; 10:1-4.



**M**BIOXGONA'YEN ni rabilo re' napbu 12 íz. Ni nanás ñabu ngú Jesús, né ni no' gahx rono'bu ngú xina'bu né bixiosbu. ¿Nanlo xigony nigolú rabaladxibu la? Guibino guidoni.

Bixios mbioxgona'yen re' nac toib buñxirop ni laa Jairo. Toibtica dzú xiinzapyenbu bixo', né godi'xbu xiinzapyenbu ló lo'on. Per diti rialbu, conforma godudy dzú góe xiro' xcalguitzbu. Jairo né tze'el nigolú rio'yibu ló galrasa', portín ralooypani



gaity nidxigona'yen re'. Mbioxgona'yen re' nac xiindzap guielótbu. Por ngú Jairo riée rayopy Jesús. Láabu ma bicadiagbu guirá galrradziguia' ni rony Jesús.

Órni radxinbu rono' Jesús, nagoo xidalguixo buñ láabu. Per Jairo radudy lad guirá buñre' né raxixip nislóbu. Jairo raiby láabu: Xiindzapa nigolú caxo'. Ranába lólo, goda' né bisial láabu. Jesús rasaguel.

La'ga casaayibu, xidalguixo buñ ni no' lagarycu raga'ny sa' par guibigax rono' Jesús. Tisintiempsi Jesús rasagadzu né ranabdiitz: ¿Chú láabu godan na'? Jesús biduidy cuent que de láabu bire' galnadip, né gonibu que no' ni godan láabu. Per ¿chú buny nde'? Nde' nac toib buñgona' ni caxo' né ma napbu doce íz né galguitz re'. ¡Bieedbu né godanbu xhap Jesús, né bialbu!

Órni Jairo rabí nde' rasac sacróbu, portín raduidybu cuent que par Jesús diti nagann guisialbu buñ. Per ór cú ried toib buñguieeu ni raduidy abís láabu né rani': Diti cuélo xchiin Jesús. Xiindzaplo ma goity. Jesús racadiag nde' né raibybu Jairo: Diti tzólo ló galrasa', láabu sió'bu sacró.

Órni bidxinyibu lidx Jairo, buñ dxee nigolú ribdxa'doot. Per Jesús raiby layibu: Diti cudxa'to. Mbioxgona'yen re' diti ma goity. Nosi natiasybu. Per layibu raxiichyibu né ronyibu borla Jesús, portín nanyibu que mbioxgona'yen re' ma goity.

Ór cú Jesús né tzón xpiin, xina' né bixios nidxigona'yen re' rio'yibu ro náaxh gue'et re'. Jesús ranás ñabu né ranibu: ¡Biás! Né nidxigona'yen re' rabany stoib, xomod rabilo ló dibuj. ¡Riásbu né rasaabu! Por ngú bixiosbu né xina'bu nigolú rabaladxyibu.

Nde' diti nac primer buñ ni Jesús ralís lad gue'et. Ni primer golísbu ngú xiin toib viod ni golés lainy gudx Naín. Después Jesús láaca ralís Lázaro, bisan María né Marta. Órni Jesús gony mandary lainy Gobierno xtuny Dios, salísbu xidalguixo buñ. ¿Diti rabaladxno por ni gonybu la?

# JESÚS RAYA'AN XIDALGUIXO BUÑ

**T**OIB cós nadzu'py góe. Mer ma bigaityibu Juan ni Ragonis. Herodías, tze'el ni rony mandary nigolú bianladxbu Juan. Né bunybu gann que Herodes ñony mandary guiroc guic Juan.

Órni Jesús ran nde' rio' nabann né riebu sit toib lagary ro diti no' buñ. Per buñ racanal láabu. Órni rabíbu xidalguixo buñ ronladxbu guirá buñre', né por ngú ranibu de Gobierno xtuny Dios, né rasialbu guirá buñguitz.

Gue'el cú xpiimbu rieed rono'bu né rani': Mápa cayogue'el, né lagary re' nigolú sitni. Bixel guirá buñre' par guiyopyibu ni guáyibu lainy ranch ni no' gahx.

Jesús racapy: Layibu diti guieyibu, lóoto colguiduidy ni guáyibu. Rabíbu Felipe né ranabdiitzbu: ¿Pu lagary labúu siino xiro' galrro par guirá buñ ni dxee re'?

Felipe racapy láabu: Nigolú xiro' bidxiich saquino par siino galrro, par siga'l guáyibu. Andrés rani': Mbioxhlasien re' napbu gaáy paa né chop beel. Nde' diti siga'l par guirá buñre'.

Jesús rani': Colgaiby guirá buñ cuubu ló guixbata'. Ór cú Jesús raduidybu guixquix Jehová por galrro né rasaló ratzobu paa. Xpiimbu raduidyibu paa né beel guirá buñ ni dxee cú. No' 5,000 buñguieeu, né láaca no' xidalguixo buñgona' né mbiox. Guirá buñ ro né radza lainy. ¡Órni xpiin Jesús rasaló ratopyibu ni bian, rian doce dzoim!

Jesús nigore' rony que xpiimbu rio' lainy bark par tudyibu nisda' Galilea. Gue'el re' rac toib buro'dant né ronyni xcuann ló nisda' né rasisni bark. Xpiin Jesús radzuibygolú. Ór cú galague'el, rabiyibu toib buñ sieed casaa ló nisda'. Racadzu'pyibu rudx, portín diti nambu chú cabíyibu.

Jesús ná: Diti guidzuibyto. ¡Na' nde! Per layibu diti raluladxyibu, ór cú Pedro rani': Pal Jesús looy, góoch na' saaya ló nisda' par guidxin rono'lo. Jesús racapy: ¡Goda! ¡Pedro rietj lainy bark né rasaa ló nís! Ór cú radzuibybu né rasaló raguichbu, per Jesús ralaa láabu.

Stoib ór, Jesús láaca raduidybu ni guá xidalguixo buñ. Ronybu láani né gatz páa né chop tzón beel. Láaca rio' xiro' galrro par guiráyibu. ¡Sacroyen rasacno órni rabino ximod Jesús ranbu buñ! ¡Órni láabu gony mandarybu Gobierno xtuny Dios diti sio'no ló galrasa'!

Mateo 14:1-32; 15:29-38; Juan 6:1-21.



**B**IBI' Jesús cagu'dx mbioxien re'. Raduidyno cuent que rio'bu galrasa' por mbioxien. Tipnés buñguieeu ni cabí xí ni cayac ngú xpiimbu. ¿Nanlo xí cayaiby Jesús layibu la?

Jesús né xpiin suusi bibiguetyibu de toib lagary. Ro sieedyibu ló néz xpiimbu godíldiitz. Por ngú, órni radxiinyibu Jesús ranabdiitz layibu: ¿Xigony godíldiitzto ló néz? Jesús nann xigony ngú godíldiitzzyibu. Per láabu ranabdiitz par ganbu pal xpiimbu guiset.

Xpiimbu diti racapy, portín ló néz godíldiitzzyibu chú ngú ni non guisanir lóoyibu. Tipnésyibu raniiny gac buñxirop ladyibu. ¿Ximod gaiby Jesús layibu que diti xinésni guisobladxyibu gacyibu buñxirop?

Jesús ragobioo toib mbioxien, né rasaga' láabu nisló guirá xpiin. Ór cú ranibu: Nainy na' guientzaayto nde': Pal diti ratzátto mod nacto né diti racto xomod toib mbioxien, diti sio'to lainy Gobierno xtuny Dios. Buñ ni más buñxirop lainy Gobierno xtuny Dios ngú ni rac xomod mbioxien re'. ¿Nanlo xigony goní Jesús nde' la?

Jesús goní nde' portín mbioxien ni niye'ensa diti rony pensary guisanir o gac buñxirop ló stipnés buñ. Por ngú xpiimbu non guisuidy gac xomod mbioxien, né modre' diti tiilyibu par gacyibu buñxirop.

Ló stoib ór láaca Jesús raslooybu balaati nadxibu mbioxien. Radudy chop tzón be'o, tipnés buñ ritné xiin rono' Jesús, per xpiimbu rayopy mod guicaa layibu par diti gonynutzyibu Jesús, per láabu ranibu: Colguiduidy lagary guirá mbioxien guieed rono'ya diti guicaato layibu, portín lainy Gobierno xtuny Dios rio' buñ ni nac xomod layibu. Ór cú ragu'dxbu guirá mbioxien, né Jesús raduidy xilaay layibu. ¿Diti sacró láani ganno ximod Jesús gondxi' guirá mbioxien la?





**T**OIB dzú Jesús raibybu toib buñguieeu non gandxi' sa'. Buñguieeu re' ranabdiitzbu Jesús: ¿Chú ngú buñ ni non gandxi'ya? Jesús nann xí cayony pensary buñguieeu re'. Cayonybu pensary que nosi buñ xcudxbu né xireligiónbu ngú ni non gandxi'bu. Por ngú, guisuidyno ni raiby Jesús láabu.

Rio' ór Jesús par guisuidy rani' de toib historia. Ngú ni ronybu nigore'. Ranibu historia xtuny toib judío né toib samaritano. Ma bisuidyno que xidal judíos diti rioladx guininéyibu buñ samaritanos. Nde' historia cú:

Toibtica dzú toib judío casañe'bu cayetjbu ló néz laidy toib dainy ni sée Jericó. Per tipnés gobáan bire' lóbu. Golann xpidxiichbu né bunynaa láabu né mersi ñaitybu.

Diti xiro' ór, toib judío ni rasanir nisló israelitas par gony go'ox láaca godudy ló néz cú. Bibi'bu buñ ni gocnaa re'. ¿Nanlo xí bunybu la? Diti golóbu cuent, godudybu stoib lad. Ór cú stoib buñ ni láaca nap xireligión godudy ló néz cú. Nacbu toib levita. ¿Gocnébu la? Yaca, diti gocnébu samaritano re'. ¿Labúu rabilo ni rasanir nisló israelitas par gony go'ox né levita ni ma gosaa xiro' lainy guet ló néz ca la?

Per bibi' chú láabu no' cayacné buñ ni bire' herid. Nacbu toib buñ samaritano né cayacnébu judío re'. Láabu rago'bu remeidy ló xi herid buñguieeu re'. Láaca rinébu judío re' toib lagary par labúu guisaladx né guiaal.




Ralox rani' Jesús historia re', raibybu ni gonabdiitz láabu: De tzón biinre', ¿chú láabu ngú ni gondxi' sa'? ¿Ni rasanir nisló israelitas par gony go'ox, levita, o samaritano la?


Buñguieeu re' racapy: Láabu ngú samaritano ni góc buñtzay né ni gocnaa.

Jesús ná: Xinésni goni'lo. Por ngú, goyee né buny a stipnés xomod bunybu láani.

¿Diti rioladxlo' mod bisuidy Jesús la? Lóono labúu guisuidyno xidal cós ni rasac ló la Biblia ni rani' de Jesús.

Lucas 10:25-37.





**L**A'GA Jesús rasaa lainy gudx, rasialbu buñguitz. Xidal buñ radxiin ran galrradziguia' ni ronybu roloo gudx. Por ngú, rinéyibu buñ ni diti labúu rabí, xot, né bisa' clas buñguitz. Né Jesús rasial guiráyibu.

Ma godudy más de tzón íz de goló golonis Juan Jesús. Jesús raiby xpiin que ma yaaca tzébu Jerusalén, ro tzó ni guigaity láabu, né ór cú siásbu lad buñ ni ma goity. Láabu diti rasiambu de guisialbu buñguitz.

Toibtica dzú Jesús no' casuidy dzú sádba. Dzú sádba nací dzú ni rasaladx judíos. Buñgona' ni rabilo re' por dieciocho íz diti labúu golondopbu laidybu. Por ngú, Jesús ragui'x ña laidybu, né laidybu riondop. ¡Ma nasacdxiiichbu!

Nde' rony que buñguieeu ni rasanir lainy toib religión radzuitz. No' xhoop govitz par gac dxiin, raca' toibbu rudx a xidalguixo buñ ni dxee. ¡Dzúcu nací par guieed buñ né guial, diti dzú sádba!

Per Jesús racapy: ¡Buñ mal! Cualquier de lóoto naxach xpor né niné láamu par gue'mu nís dzú sádba. Por ngú, ¿diti non guiaal buñgona' re', ni bixo' dieciocho íz la? Ni racapy Jesús raduidy galnatoy guirá buñguieeu mal re'.

Más godzu, Jesús né xpiin rieyibu Jerusalén. Órni radxiinyibu gahxca gudx Jericó, chop buñ pobre ni diti labúu rabí raca' rudx: Jesús, gocné lóodo.

Jesús raca' rudx chop biinre' né ranabdiitz: ¿Xí nání lóoto gony né lóoto? Layibu raniyibu: Xo', nainy lóodo guixal bisalódo. Jesús ragann bisalóyibu, ¡né ni maca rien lóoyibu! ¿Nanlo xigony rony Jesús guirá galrradziguia' re' la? Portín nadxibu buñ né nainy láabu gap buñ fe láabu. Nde' raduidy diitz órni gony mandarybu ló Gudxlio diti sio' ni guixo' stoib.


# JESÚS RIEED XOMOD NI RONY MANDARY

97

**D**ITI xidzú de goló bisial Jesús chop buñ pobre ni diti labúu rabí, rievedbu toib ranch ni no' gahxca Jerusalén. Raibybu chop xpiimbu: Coltzó lainy ranchcu né cú sadzelto toib borlás, colguixach láamu né colguitné láamu rono'ya.

Órni radxiinéyibu bor cú, Jesús rabuby láamu. Né guidopy ló néz goruby Jesús láamu par radxiin Jerusalén. Órni ma cadxinbu gahxca Jerusalén, xidalguixo buñ rare' racacuent láabu né xidalyibu rabe' tiplá' lairy ni nap né ragui'x láani ló néz. Stipnéyibu ragui'x xquix palmeras ló néz, né raca'yibu rudx: ¡Dios guiduidy xilaay ni gony mandary ni sieed ni golúbu!

Lainy gudx Israel gocni scú órni toib ni radxiin gony mandary rio' lainy gudx Jerusalén rabuby toib bor par gudx guibí láabu. Nde' ni rony Jesús. Né



buñre' caslooy que rioladx yibu gony mandary Jesús layibu. Per diti guirá buñ rioladx gony mandary Jesús. Raduidyno cuent de láani órni Jesús radxiin lainy yo' xiro' ro rac adorar Jehová.

Lainy yo' xiro' re', Jesús rasial buñ ni diti rabi né buñ xot né bisa' clas buñguitz. Órni mbioxien rabi ni rony Jesús, rony xiro'yibu Jesús. Per nde' rony que ni rasanir nisló israelitas par gony go'ox radzuitz, né raibyibu Jesús: ¿Racadiaglo xí láani cani' guirá mbiox ca la?

Jesús racapy: Scú, ¿xí diti ma bílto ló Biblia ro náni de ro' mbioxien Dios sony que guiré diitz ni gonyxiro' láabu la? Por ngú mbioxien diti rasian rony xiro'yibu ni Dios biduidy par gony mandary.

¿Diti rioladxno gacno ximod guirá mbioxien re' la? Rio' ór no' tipnés buñ ni ná guisianno guinino de Gobierno xtuny Dios. Per lóono diti guisianno guinino de galrradziguia' ni Jesús gony par buñ.

Dzú Jesús goyo' ló Gudxlio diti gocni ór par nasaló ñony mandarybu. ¿Pu dzú guidxin gacni? Xpiimbu goniiny ñan láani. Nigore' guisuidyno láani.

Mateo 21:1-17; Juan 12:12-16.



**N**I RABILO ló dibuj re' ngú Jesús ló dainy Olivos. Tap buñguieeu ni no' né láabu ngú xpiimbu. Andrés né Pedro buchbu sa'yibu, né Santiago né Juan láaca buchbu sa'yibu. Yo' xiro' ni sob sit ni rabilo ca, nacní yo' xiro' ro rac adorar Jehová ni no' lainy gudx Jerusalén.

Ma godudy chop govitz de goló Jesús goyo' lainy gudx Jerusalén dxiip toib bor. Dzure' ma marty láani. Jesús láaca goyo'bu lainy yo' xiro' ro rac adorar Jehová dzú yása guidxin dzú marty. Lagarycu tipnés buñguieeu ni rasanir nisló toib religión biyopyibu mod nagaityibu Jesús. Per bidzuibyibu portín buñ rioladxyibu mod nac Jesús.

Jesús góoch guirá buñguieeu ni gosanir ló toib religión: ¡Be'el né xiin be'el! Ór cú Jesús láaca góoch que Dios sony castigar layibu por guirá cós mal ni ma bunyibu. Bilox goní Jesús guirá nde' bia'pybu laidy dainy Olivos, né tap xpiimbu gosalo gonabdiitz láabu. ¿Nanlo xí ranabdiitziyibu la?

Xpiimbu ranabdiitz láabu xí láani gac ló dzú ni sietra. Nanyibu que Jesús sanítló guirá cós mal ni rac ló Gudxlio. Per xpiimbu nainy gann *pu dzú* ma gonybu guirá nde'. ¿Nanlo pu dzú guieed Jesús stoib par gony mandary la?

Jesús nann que guirá ni racanal láabu ló Gudxlio diti labúu sabí' láabu órni guieedbu stoib. Nde' nací scú portín láabu sony mandarybu lainy guibá, né diti no' chú sabí' láabu. Por ngú, Jesús raibybu xpiimbu tipnés cós ni gac ló Gudxlio órni ma saló gony mandarybu lainy guibá. ¿Xí cós goní Jesús gac?

Jesús raiby layibu que sio' xiro' guerr, galguitz, galrralán, buñ mal ni guigaity sa', né sio'golu xo rodann. Láaca nábu que diitz sacró ni rani' de Gobierno xtuny Dios sann buñ láani ló guidopynac Gudxlio. ¿Ma rabino guirá nde' ló xtzúno la? ¡Scú láani! Labúu gapnó confianz que Jesús ma cayony mandary lainy guibá. Mápa mer guinitlóbu guirá cós mal ni no' ló Gudxlio.





## LAINY CUART NI SOB GUIC YO' 99

**M**A GODUDY chop govitz, nigore' ma nóono dzú juevy goxin. Jesús né doce xpiin bidxinyibu lainy cuart xiro' ni sob guic yo' par guáxtzuyibu, nde' ni rimbuno xomod Pascua. Ni cabilo care' ro' puert, ngú Judas Iscariote. Séebu sagudxbu guirá ni rasanir nisló israelitas par gony go'ox ximod labúu guiga' Jesús.

Toib dzú antes, Judas gochbu guirá buñre': ¿Xí guiduidyto na' pal racnéya lóoto guiga' Jesús? Layibu racapyibu: Treint nilas de plata. Nigore' Judas sée par guidop toibsi né layibu né guilooy pu lagary no' Jesús. ¿Diti nac nde' toib cós nadzu'py la?

Pascua raloxni, né nigore' Jesús rasaló stoib galroxotzu ni nigolú rasac. Raduidybu xpiimbu tlá páa né ranibu: Colguá láani, portín nde' nací xomod ladi ni guidudi lóoto. Láaca raduidybu tipcop vino, né



ranibu: Colgue' láani, portín nde' naciní xomod xiruni ni guixúya por lóoto. La Biblia rimbu láani xomod Galrroxtzu ni rasetnaladx Jesús.

Israelitas godóyibu Pascua, bunyibu láani guirá íz xomod toib galrrasenaladx órni ángel xtuny Dios godudy lidxyibu dzú ni goyo'yibu gudx Egipto, per ángel re' bigaity guirá xiin lagol egipcios. Nigore' Jesús nainy que guirá ni racanal láabu guisetnaladx láabu, né ximod goitybu por layibu. Por ngú galrroxtzu re' racni guirá íz.

Ralox rooyibu Galrroxtzu ni rasetnaladx Jesús. Raibybu xpiimbu que gapyibu balory né gac nadip fe xtunyibu. Ralox ronyibu guirá nde' ro'olyibu cánticos par gonyxiro'yibu Dios né rieyibu stoib lad. Sigory ma gac tayoo nde'. ¿Pu séeyibu nigore'?

Mateo 26:14-30; Lucas 22:1-39; Juan, capítulos 13 a 17; 1 Corintios 11:20.





# JESÚS LAINY LAGARY SACROYEN

ÓRNI bire'yibu lainy cuart, Jesús né xpiin riée lagary sacroyen ni laa Getsemaní. Xidal buelt ma bieedyibu lagary re'. Jesús nigore' raiby layibu guiguanáyibu né guinabyibu lóo Dios. Jesús ralsit tidxo, raxixipbu né ranabbu lóo Dios.

Órni rabiguetbu rono' xpiimbu. ¿Nanlo xí cayony xpiimbu la? ¡Dxeeyibu natiasyibu! Tzón buelt Jesús raiby layibu guiguanáyibu, per guirá ór ni rabiguetbu xpiimbu dxee natiasy. Jesús rani' por último órni rabiguetbu: ¿Ximod nga raduidyto lagary guinás baca'al lóoto nigore'pa? Ma bidxin ór tzó ni gonycuent na' a xi enemiga.

Ralox ranibu nde', rien xiruid xidalguixo buñ ni sieed. ¡Bibi'! ¡Sieed buñ né xí espad né yac! Né néyibu guur par guisaní ro dxeeyibu. Órni rabigaxyibu, toib ni sieed lad xidalguixo buñre' radxiin rono' Jesús. Raduidybu toib bixit Jesús, mod rabilo ló dibuj re'. ¡Buñguieeu re' nac Judas Iscariote! ¿Xigony raduidybu toib bixit Jesús?

Jesús ranabdiitz: Judas, ¿por toib bixit ronycuentlo na' la? Scú láani, né bixit re' biduidy Judas diitz chú ngú Jesús, ni layibu cayopyibu. Por ngú xi enemig Jesús rasanir par guinásyibu Jesús. Per Pedro diti saduidy lagary guinásyibu Jesús sin gonybu xitcal. Rabébu espad ni nébu né rachocbu guidiag ladbu' buñguieeu ni saga' gahx rono'bu. Per Jesús ragann guidiag buñguieeu re' né rasialbu láani.

Jesús raiby Pedro: Bidxiguet espad lidxni. ¿Diti raluladxlo que labúu guinaba Bixiosa guixel xidalguixo ángeles par guilaa na' la? Scú, labúu ñonybu láani. Per Jesús diti ranab lóo Dios gacné láabu portín ma nambu que ma bidxin ór que xi enemigbu guinás láabu. Láabu raduidybu lagary que gonyibu nde'. Guibino nigore' xí rasacloó Jesús.



**¡B**IBI' cós nadzu'py ni cayac re! Cagaityibu Jesús. Nalxiga'bu ló toib yac nadop. Caa clab ñabu né ñe'bu. ¿Xigony no' buñ ni ná gony nde'?

Nacní portín tipnés buñ rianladx láabu. ¿Nanlo chú layibu la? Toibticabú ngú toib ángel mal ni laa Buñdzab. Láabu bunybu que Adán né Eva nasianyibu nasobdiitziyibu Jehová. Né Buñdzab buny que xi enemig Jesús buny cós nadzu'py re' né bigaity láabu.

Órni yása guigalxiga'yibu Jesús ló yac nadop ronyibu xidal cós mal Jesús. ¿Rasetnaladxlo bieedyibu lainy lagary sacró ni laa Getsemani né gonásyibu Jesús la? ¿Chú layibu góc guirá enemig cú? Scú láani, nacyibu guirá ni rasanir nisló toib religión. Nigore' guibino xí láani rac.

Órni guirá ni rasanir ló toib religión ranásyibu Jesús, xpiimbu radzuilby né raxony, rasilyibu Jesús toib né xí enemig. Per Pedro né Juan ni nac xpiin Jesús diti ralsityibu. Racanalyibu gahx par ganyibu ni cayac né Jesús.

Guirá ni rasanir par gony go'ox rinéyibu Jesús nisló toib xogol ni laa Anás, ni láaca gosansir nisló israelitas par gony go'ox. Xidalguixo buñ ni no' cú diti raclayibu lagary re'. Ór cú rinéyibu Jesús lidx Caifás, ni nigore' ma nac ni rasanir nisló isrelitas par gony go'ox. Lagarycu no' xidal buñ ni rasanir ló toib religión.

Re' lidx Caifás rieedyibu par ganyibu pal Jesús nap dool né ritnéyibu tipnés buñguieeu par guini' pór galrrascú de Jesús. Guirá ni rasanir ló toib religión rani': Guigaityno Jesús. Ór cú rasaló rachixunyibu lóo Jesús, né raca'bu panet Jesús.

La'ga cayac guirá nde', Pedro no' láachlu'. Toib gue'el nachich láani, né buñ ni dxee cú rago' guii. La'ga dxeeyibu cadza'yibu roloo guii, toib criat ni no' cú rabíbu Pedro né ranibu: Buñguieeu re' láaca goyo'bu né Jesús.

Pedro ni maca racapy: ¡Yaca, na' diti goyo'ya né láabu!

Tzón buelt buñ ni dxee cú raibyibu Pedro, que láabu goyo'bu né Jesús. Per ló tzón buelt re' Pedro racapy que ditini nigolú. Ni rion buelt racapy Pedro nde', Jesús radxiguet lóo né rabí láabu. Pedro rasac nabann por ni biscú, rare'bu né ribdxá'dootbu.

Órni rare' lóo Govitz vierna rosil, ni rasanir nisló israelitas par gony go'ox rinéyibu Jesús ro radop Sanedrin. Lagary re' rooyibu diitz xi gonyibu Jesús. Rinéyibu Jesús rono' Poncio Pilato, ni rony mandary guidopynac Judea.

Raibyibu Pilato: Buñguieeu re' mal láabu. Non gaitybu. Órni ralox ranabdiitz Pilato a Jesús, ranibu: Na' diti rabíya que bunybu cós mal. Ór cú Pilato rony que guinéyibu Jesús rono' Herodes Antipas, ni rony mandary Galilea, ni no' Jerusalén. Nde' láaca rabí que Jesús diti buny cós mal, por ngú radxiguetbu Jesús rono' Pilato stoib.

Pilato ná guisla' Jesús. Per buñ ni nac xi enemig Jesús nainy que stoib buñ ni no' press guiré, láabu ngú toib gobáan ni laa Barrabás. Nigore' mápa gac galadzú órni Pilato rabe' Jesús fuer. Pilato raiby buñ ni dxee cú: ¡Colguibí! ¡Ni rony mandary lóoto! Per ni rasanir nisló israelitas par gony go'ox raca'yibu rudx: ¡Gole' láabu! ¡Bigaity láabu! Scú gocni, rinéyibu Jesús par gaity, né Barrabás rare' press.

Vierna ma godudy galadzú ragalxiga'yibu Jesús ló yac nadop. Ló dibuj diti labúu rienlóló láani, per guirop lad cué Jesús nalxiga' toib buñ mal, par gaity. Órni mápa gaity Jesús toibticabú raiby a Jesús: Bisednaladx na' órni ma cayony mandarylo lainy Gobierno xtunylo. Jesús racapy láabu: Radudi xtiidza looy si'lo né na' lainy Gudxlio móz.

¿Diti nac nde' toib diitz sacró ni goní Jesús gony la? ¿Nanlo de xi Gudxlio móz cani' Jesús la? ¿Pu goyo' lagary móz ni Dios bisa' nirdiguié? Scú láani, looca Gudxlio. Né órni Jesús gony mandary lainy guibá, salísbu buñguieeu re' par guibanybu goxt ló Gudxlio móz re'. ¿Diti rabaladxno por ni gony Jesús la?

## *Dzú ni biás Jesús lad gue'et hasta dzú ni Pablo goyo' press*


*Tzón govitz de goló goity Jesús, biásbu lad gue'et. Dzúcu bire'bu nisló xpiimbu gáay buelt. Né bunybu láani por 40 dzú. La'ga tipnés buñ ni racanal láabu cabi rabiguetbu guibá. Chii govitz de goló góe' nde', Dios bisiab fuers ni raquiimbu par gonybu ni nábu laidy guirá buñ ni racanal Jesús ni bian lainy gudx Jerusalén.*

*Diti xidzú de goló góe' nde', xi enemig Dios bisalyibu xpiin Jesús press, per toib ángel bilaa layibu. Toib buñguieeu ni cuanal Jesús ni góe' laa Esteban, buñ bigasguiee né bigaity láabu. Láaca guisuidyno que Jesús golú toib de layibu par gony xchiimbu ni rasac, né nde' bidxin góe' laa Pablo, ni góe' toibtica xpiin Jesús. Tzón iz gorol de goló goity Jesús, Dios bixelbu Pedro par tze guini' xtiitz Dios nisló Cornelio né xfamilybu, layibu diti gocyibu buñ judío.*

*Godudy yaaca trece iz, Pablo gosalo gosaa xidal gudx goní xtiitz Dios ni primer buelt. Ni rarop buelt goyebu, Timoteo buny compañer láabu. Pablo né guirá xcompañerbu gosacloyibu xidal cóe' ni radziguia' buñ la'ga bunyibu xchiin Dios. Después Pablo goyo'bu press lainy gudx Roma. Per lo chop iz ni goyo'bu press bire'bu, né diti xidzú biabbu press stoib né goyo' ni bigaity láabu. Midid GATZ rasa'ni 32 iz de historia.*



¿NANLO chù láabu buñgona' né chù layibu chop buñguieeu ca la? Buñgona' re' nac María Magdalena, ximig Jesús. Chop buñguieeu ni nóc lairyquich nacyibu ángeles. María no' caguixlóo lainy



ba' ro bigach Jesús, ¡per nigore' ma diti no'bu lagarycu! ¿Chú sané láabu? Guibino guidoni.

Órni Jesús goity, ni rasanir nisló israelitas par gony go'ox raibyibu Pilato: Órni Jesús nabanyisa goníbu que guiásbu lad gue'et ló tzón govit. Por ngú, Pilato rony mandary que ganyibu ro bigach Jesús. ¡Modre' xpiin Jesús diti labúu cuannyibu laidy Jesús né guini'yibu que ma biásbu lad gue'et! Pilato rony mandary layibu guixelyibu soldad.

Órni bisa' Jesús tzón govit de goló goity, rosilcú toib ángel xtuny Jehová radxiin tisintiempsi. Rabébu guiee ni náaxh ro' ba', ro bigach Jesús. Tipnés soldad ni cayap láabu radzuibygolú né diti no' xí labúu ronyibu. ¡Ralox radudy nde', órni raguixlóyibu lainy ba' ro bigach Jesús, Jesús ma diti no'bu cú! Layibu rio'yibu lainy gudx né raibyibu láani a tipnés buñguieeu ni rasanir nisló israelitas par gony go'ox. ¿Nanlo xí rony guirá buñguieeu mal re' la? Raguiixyibu soldad par guini' por galrrascú. Raibyibu soldad: Colguini' que xpiimbu gole' né sané láabu la'ga lóoto natiasyto.

La'ga cayac guirá nde', tipnés ximig Jesús ni nac buñgona' ried ridguen ba' ro bigach Jesús. ¡Ma nadachni! Tisintiempsi, chop ángeles ni nóc lairyquiich no' cú. ¿Xigony rayopyto Jesús re'? ranabdiitzyibu. Láabu ma biásbu lad gue'et. Coltzé ni maca né colgaiby láani xpiimbu. Layibu raxyonyibu riefyibu. Per ló néz toib buñguieeu rare' lóoyibu. ¿Nanlo chú láabu la? ¡Nachu Jesús! Ranibu: Coltzé coltzagúdx láani xpiina.

Órni tipnés buñgona' re' raibyibu biinre' que Jesús nabany né ma bibi'yibu Jesús, nagann par layibu guiluladxzyibu láani. ¡Pedro né Juan raxyony ro ba' ro bigach Jesús per láani ma nadachni! Órni layibu rare'yibu de lagarycu, María Magdalena rian stiprat lagarycu. Ór cú raguixlóbu lainy ba' ro bigach Jesús né rabíbu chop ángeles.

¿Nanlo xí góe né laidy Jesús órni goitybu né bigachbu la? Dios buny que ma diti nadzelyibu laidy Jesús. Dios diti golís Jesús né laidy ni gopbu dzú ni yása gaitybu. Biduidybu Jesús toib laidy copy xomod nap guirá ángeles. Par gann xpiimbu que láabu nabanybu, Jesús racbu xomod toib buñ ni labúu rabíyibu.

ÓRNI Pedro né Juan rare'yibu ro' ba' ro bigach Jesús, toib María rian. Rasaló ribdxa'bu. ¡Ór cú raguixlóbu lainy ba' né rabíbu chop ángeles! Layibu ranabdiitzyibu María: ¿Xigony cayibdxa'lo?

María racapy: Ma sanéyibu Jesús né diti naana pu lagary no'bu. Ór cú rabiguethbu né rabíbu toib buñguieeu. Buñguieeu re' ranabdiitz láabu: ¿Chú láabu cayopylo?

Xpensary María ngú que buñguieeu re' rap lagary re', né que sigory láabu ngú ni sané laidy Jesús. Por ngú ranibu: Pal looy sanélo láabu góoch ná pu bisianlo láabu. Per buñguieeu re' ngú Jesús. Ma nachu toib buñ ni María diti rimbu. Per órni buñguieeu re' rani' láabu, María raduidy cuent que Jesús caniné láabu. Né ni maca raxonybu raibybu láani a xpiin Jesús: ¡Ma bibi'ya Jesús!

Dzúcu la'ga chop xpiimbu riée ranch ni laa Emaús, toib buñguieeu goyo' ladyibu ló néz. Xpiimbu nigolú noyibu nabann por ni goity Jesús. La'ga casaayibu buñguieeu re' rabexa xidal cós ni rasetlaa la Biblia né layibu rasacyibu sacró. Radxiin midid, órni rasagadzuyibu par guáyibu, xpiimbu raduidy cuent que buñguieeu re' nac Jesús. Láabu tisintiempsi ranitbu, né xpiimbu rabigueth Jerusalén par tzágudxyibu stipnés xpiin Jesús xi ni góc.

La'ga cayac guirá nde', Jesús tisintiempsi radxiin rono' Pedro. Stipnés xpiin Jesús nigolú rabaladxyibu órni racadiagyibu nde'. Ór cú chop xpiin Jesús ríeyibu Jerusalén né radzelyibu stipnés xpiin Jesús. Raniyibu que Jesús bire' lóoyibu ló néz. Né órni cani'yibu guirá ni gosacloyibu, ¿nanlo xí galrradziguia' rac la?

Bibi' dibuj re'. Jesús tisintiempsi radxiin rono'yibu lainy cuart ro dxeyibu, ná puert cú nayegni. ¡Xpiimbu rabaladx! ¡Dzúcu rio'yibu goxt! ¿Labúu guigaplo balac buelt bibi'yibu Jesús la? ¿Nacní gáay buelt la?

Toibtica xpiimbu ni laa Tomás diti no' né layibu órni rabíyibu Jesús. Por ngú, xpiin Jesús raiby láabu: ¡Bibino Jesús! Tomás ná que

par guiluladxbu que nigolú Jesús nabany la'pabu non guibibu Jesús.  
Radudy xhoon govitz, xpiin Jesús stoib buelt noyibu lainy cuart ni  
nayeg, né par nigore' Tomás ma no' né layibu. Tisintiempsi rabiyibu  
Jesús lainy cuart. Nigore' Tomás raluladx. Juan 20:11-29; Lucas 24:13-43.




**R**ADUDY dzú, Jesús raduidy lagary que xpiimbu guibí láabu xidal buelt. Toibtica buelt, gahxca 500 buñ ni racanal láabu rabí láabu. Órni layibu tisintiempsi rabíyibu Jesús, ¿nanlo xí raiby Jesús layibu la? Ranibu de Gobierno xtuny Dios. Jehová bixel Jesús ló Gudxlio par guisuidybu buñ ni gony Gobierno re'. Né diti bisiambu goníbu de Gobierno re' después ni biásbu lad gue'et.

¿Rasetnaladxlo xí ngú Gobierno xtuny Dios la? Scú, láani ngú toib Gobierno xtuny Dios ni no' guibá ni gony xinésni, né Jesús ngú ni Jehová Golú par gony mandary lainy Gobierno re'. ¡Xomod ma bisuidyno, Jesús bislooy mod galán ni gony mandary, órni biduidybu ni godó buñ, bisialbu buñguitz né láaca golísbu gue'et!

Por ngú, órni Jesús gony mandary desde lainy guibá tipmil íz, ¿xí gac ló Gudxlio? Scú láani, guidopynac Gudxlio sácni toib





lagary móz. Diti sio' más guerr, buñ mal ni guigaity sa', galguitz, láaca ma diti sio' galgoity. Nánno que scú gacni portín Dios bisa' Gudxlio par ñacni toib lagary sacroyen par nabés buñ loni goxtiguie. Por ngú bisa'bu lagary sacroyen ni góc laa Edén. Guidxin midid xcuent Jesús tzó gac ni ná Dios.

Ma bidxin ór guibigué Jesús guibá. Por 40 dzú biduidybu lagary que xpiimbu nabi' láabu, nigore' layibu ma nanyibu que nabanybu stoib. Per antes ni guibiguébu guibá raibybu guirá xpiimbu: Colguia'an Jerusalén hasta órni ma cua'to fuers ni Dios raquiin par gonybu ni nábu. Fuers re' nací xomod buu ni ralopy, láani sacnéni guirá xpiin Jesús gonyibu ni ná Dios. Ralox ranibu nde' raibybu xpiimbu: Lóoto sasaato yo' por yo' né sani'to ni ma bisuidy lóoto guirá lagary ni no' más sit ló Gudxlio.

Ralox ranibu nde', rac toib galrradziguia'. Jesús rabigué guibá mod rabilo ló dibuj re'. Ór cú toib xcaay radudy né láani ronyni que ma diti labúu rabíyibu Jesús. Rabiguébu guibá, né desde lagarycu rasaló rony mandarybu a guirá ni racanal láabu ló Gudxlio.

1 Corintios 15:3-8; Revelación 21:3, 4; Hechos 1:1-11.



# RIA'ANYIBU LAINY GUDX JERUSALÉN

**B**UÑ ni rabilo ló dibuj re' nacyibu ni racanal Jesús. Bisobdiitzyibu Jesús né bia'anyibu Jerusalén. La'ga cabésyibu re', toib ruid xiro' rac guidopy lanio' ro dxeeyibu. Nacní xomod toib buro'dant ni radudy naguel. Né nigore' rasaló rien guii xomod loch guic cada toib ni racanal a Jesús. ¿Labúu rabilo guii cú guicyibu la? ¿Xí raduidy diitz guirá nde'?

¡Nacní toib galrradziguia'! Jesús ma no'bu lainy guibá né bixiosbu stoib, né casiabbu fuers ni Dios raquiin par gonybu ni nábu, laidy ni racanal láabu. ¿Nanlo xí láani rachiin fuers re' gonyibu la? Guiráyibu rasaló rani' bisa' clas diitz.

Xidal buñ de Jerusalén rien ruid ni nac xomod toib buro'dant, né rieedyibu par ganyibu xí ni cayac. Tipnésyibu sieed de xidal gudxrop par tzóyibu ló lanii Pentecostés ni rony israelitas. ¡Ni radxiin lagary re' radziguia'yibu! Ni racanal Jesús rasaló rani' de galrradziguia' ni buny Dios en xtiitzyibu.

Guirá ni radxiin par gann xí cayac raniyibu: Buñre' pór buñ Galilea layibu. Por ngú, ¿ximod nga labúu raniyibu xtiitzno?

Pedro nigore' rasaga' par cuéxa láani. Rasaló ranibu fuers né raibybu a guirá buñre' ximod goity Jesús, né ximod Jehová ma golís láabu lad gue'et. Nigore' Jesús ma no'bu ladbu' Dios lainy guibá, ná Pedro. Né láabu ma bisiabbu fuers ni Dios raquiin par gonybu ni nábu, ni goníbu guiduidybu. Por ngú góe guirá nde' ni lóoto radziguia'to.

Órni Pedro rani' guirá nde', xidal buñ ni racadiag ni cani'bu rio'obni layibu ni góe né Jesús. Ranabdiitzyibu: ¿Xí láani non gonydo? Pedro raiby layibu: Non guisianto mod nacto né tzonisto. Dzúcu gahxca 3,000 buñ rionis né radxiin racanal Jesús.



**B**IBI' ángel ni nanás puert ni xobial. Láabu cabe'bu xpiin Jesús press. Guisuidyno xigony goyo'yibu press.

Diti ma godudy xidal dzú de goló fuers ni Dios raquiin par gonybu ni nábu, biab laidy xpiin Jesús. Nde' ni rac: Toib godzu Pedro né Juan rieyibu lainy yo' xiro' ro rac adorar Jehová. Gahxca ro puert no' toib buñ xot ni goolné galguitz re'. Buñ riné láabu lagarycu guirá dzú par guinabbu bidxiich guirá ni rio' lainy yo' ro rac adorar Jehová. Órni buñguitz re' rabíbu Pedro né Juan, ranabbu bidxiich. ¿Xí gony chop biinre' nigore'?

Pedro né Juan rasagadzu né rabíyibu xiindiohx re', ór cú Pedro raiby láabu: Diti napa bidxiich, per ni napa ngú guidudi looy. ¡Ló laa Jesús biás né gosaa! Ór cú Pedro ranás ñabu niis ladbu', né ni maca buñguieeu re' rasandop né rasaló rasaa. Ni Pedro bisial xot re' ronyini que buñ nigolú radziguia' né rabaladx.



Pedro rani': Bunydo nde' por xcalnadip Dios, ni golís Jesús lad gue'et. Lá'ga Pedro né Juan cani'yibu, tipnés ni rasanir ló toib religión radxiin. Nigolú cadzuitzyibu por ni chop biinre' raiby a guirá buñ que Jesús ma biás lad gue'et. Por ngú ranázyibu Pedro né Juan né rasalyibu chop biinre' press.

Raraa stoib dzúcu guirá ni rasanir ló toib religión radopyibu. Raxelca'yibu Pedro, Juan né láaca buñgueieu ni bisialyibu. Ranabdiitzyibu: ¿Xí galnadip gocné lóoto bunyto nde'?

Pedro rani' que bunyibu láani por xcalnadip Dios, ni golís Jesús lad gue'et. Guirá ni rasanir nisló israelitas par gony go'ox diti radzel xí gonyibu, portín diti labúu guini'yibu que galrradziguia' re' diti gocni. Por ngú, nachóng rac xtiitzyibu né biinre' par diti guini'yibu más de Jesús, né rasla'yibu chop biinre'.

Radudy dzú, raniyibu de Jesús né rasialyibu buñguitz. Notísy de guirá galrradziguia' re' xidal buñ ran láani. Né por ngú xidalguixo buñ ni rabés lainy gudx ni no' roloo Jerusalén ritnéyibu buñguitz par guisial xpiin Jesús layibu. Por ngú, buñ ni rasanir ló toib religión, radzuitzyibu né rago'yibu xpiin Jesús press. Guibino xí galnadx rac.

Ló gue'el cú, ángel xtuny Dios raxal xpuert press, xomod rabilo ló dibuj. Ángel re' rani': Coltzé né colguisaga' lainy yo' xiro' ro rac adorar Jehová né colguininé buñ. Raraa stoib dzúcu, órni ni rasanir ló toib religión raxelca'yibu xpiin Jesús, diti radzelyibu guirá biinre'. Lagary ro radzelyibu xpiin Jesús ngú lainy yo' xiro' ro rac adorar Jehová ór cú ranázyibu biinre' né rinéyibu biinre' nisló Sanedrín.

Guirá buñgueieu ni rasanir ló toib religión raniyibu: Gochdo lóoto que diti nasuidyto más de Jesús. Per lóoto ma bunyto que guirá buñ Jerusalén ma nann de Jesús. Xpiin Jesús racapy: Napdo xi de guisobdo Dios xomod ni rony mandary, diti buñgudxlio. Xpiin Jesús diti rasian raniyibu xtiitz Dios. ¡Galán mod bisianyibu par guicanalno!

**B**UÑGUIEEU ni rabilo naxixip, laabu Esteban. Nacbu toibtica buñ ni racanal Jesús. ¡Per bibi' ni cayac né láabu! Tipnés buñguieeu cagasguiee láabu. ¿Xigony rianladxgolúyibu Esteban? Guibino.

Dios racné Esteban par gony xidal galrradziguia'. Tipnés buñguieeu diti rioladx ni ronybu né radíldiitzyibu né Esteban por ni rasuidybu stipnés buñ ni ná Jesús. Per Dios raduidy xiro' galnann Esteban, né rabébu loguia' que guirá buñguieeu re' pór galrrascú casuidy. Nde' rony que layibu radzuitzgolúyibu, né por ngú ranásyibu Esteban né raxelca'yibu tipnés buñguieeu par guini' pór galrrascú de láabu.

Ni rasanir nisló israelitas par gony adoryibu Jehová ranabdiitz láabu: ¿Nigolú ni raniyibu la? Esteban racapy né toib discurs ni golébu ló la Biblia. Órni ma caslo'oxbu xtiscursbu rasetlabu que tipnés buñguieeu mal bianladxyibu buñ ni Jehová bixel nírcu, par guini' xí gac dzú ni sietra. Láaca goníbu: Lóoto scúca nacto. Bigaityto Jesús ni rony xchiin Jehová, né diti rasobto ni ná xileybu.

¡Ni rony Esteban ratzuitzgolúni guirá ni rasanir lainy toib religión! Né por ni cadzuitzgolúyibu ro ló láayibu. Per órni Esteban ralís guic ranibu: ¡Colguibí! Rabíya Jesús saga' ladbu' Dios lainy guibá. Racañayibu guidiagyibu par diti guienyibu né ranásyibu Esteban. Rasobioyibu Esteban hasta fuer de gudxcú.

Lagary re' rabe'yibu xhapyibu né raduidyibu láani toib mbioxhla ni laa Saulo par gann láani. ¿Rabilo Saulo ló dibuj re' la? Ór cú rasaló ragasguieeyibu Esteban. Láabu raxixipbu mod rabilo, né rasaló ranabbu lóo Dios: Jehová, diti gony castigarlo layibu pór cós mal re'. Láabu nambu que tipnésyibu bicadiag pór galrrascú ni goní ni rasanir lainy toib religión. Órni ralox ranibu nde' raitybu.

Órni no' toib ni rony mal looy, ¿ronylo láabu scúca o ranaplo lóo Dios gony castigar láabu la? Esteban né Jesús diti bunyibu ngú. Layibu gocyibu buñtzay né buñ ni góc nigolú mal né layibu. Lóono non gonyno mod bunyibu.




¿NANLO chú láabu náaxh layoo la? Nacbu Saulo. Láabu gop xhap guirá buñ ni bigasguiee Esteban. ¡Bibi' guii ni racaptza'! ¿Xí láani cayac?

Órni Esteban goity, Saulo riebú rayopybu guirá ni racanal Jesús par gonybu mal biinre'. Hasta lanió' rio'bu rabébu né rasalbu press guirá ni racanal Jesús. Xidal xpiin Jesús raxony riée stipnés gudxrop né lagary ro radxiinyibu rasaló raniyibu «diitz sacró» xtuny Dios. Per Saulo riée rayopy xpiin Jesús lainy stipnés gudxrop. Nigore' ma séebu gudx Damasco. Per ló néz ro séebu rac toib cós ni radziguia' buñ.

Tisintiempsi toib guii ni sieed guibá rasanídxich rono' Saulo. Láabu riabbu layoo, mod rabino ló dibuj re'. Ór cú toib rudx raíby láabu: ¡Saulo, Saulo! ¿Xigony cayonylo mal na'? Tipnés buñguieeu ni no' né láabu rabíyibu guii ni racaptza' né racadiagyibu rudx re', per diti labúu rienyibu láani.

Saulo ranabdiitz: Xo', ¿chú looy?

Rudx ni racadiagbu náni: Na' ngú Jesús ni cayonylo mal. Jesús rani' nde'



portín órni Saulo rony mal xpiimbu, rio'obni Jesús suusi ñonyibu láani láabu.

Saulo ranabdiitz nigore': ¿Xí láani non goni?

Jesús raiby Saulo: Biás né goyee Damasco. Lagary re' gannlo xí ni non gonylo. Órni Saulo riás né raxal bisaló, má diti labúu rabíbu. ¡Ma nachep bisalóbu! Por ngú, tipnés buñguieeu ni no' né láabu ma ló ñayibu rinéyibu Saulo gudx Damasco.

Nigore' Jesús raninébu toibtica xpiimbu ni no' Damasco né raibybu buñguieeu re': Ananías biás, goyee ló néz ni laa Recta. Órni ma bidxinlo lidx Judas gonabdiitz por toib buñguieeu ni laa Saulo. Portín ma golúya láabu par gacbu toib buñ ni gony xchiina ni rasac.

Ananías rasobdiitz. Órni radxinbu rono' Saulo, ragui'xbu ñabu laidy Saulo né ranibu: Jesús bixel na' par labúu guibilo stoib né guicálo xiro' fuers ni Dios raquiin par gonybu ni nábu. Órcuca ni raloopya nac xomod laaz ni caa bisaló Saulo riab layoo, né ma labúu rabíbu stoib.

Jehová nigoló raquiimbu Saulo par gony xchiimbu guininébu buñ de xidal gudxrop. Radxiin rimbu buñ láabu xomod Pablo toib xpiin Jesús, né guisuidyno más de láabu. Per primer guisuidyno ni raxel Dios gony Pedro.

Hechos 8:1-4; 9:1-20; 22:6-16; 26:8-20.



**L**Ó DIBUJ rabilo Pedro saga', né xiitzbu no' tipnés ximigbu. Per ¿xigony caxixip buñguieeu re' nisló Pedro? ¿Non gonybu láani la? ¿Nanlo chú láabu la?

Buñguieeu re' laa Cornelio. Nacbu toib buñxirop ni rony mandary xidalguixo soldad de gudx Roma. Cornelio diti rimbubu Pedro, per no' ni góoch láabu que gony invitarbu Pedro lidxbu. Ganno ximod góc nde'.

Buñ ni primer cuanal Jesús gocyibu pór buñ judíos, per Cornelio diti buñ judío láabu. Ná scú láani, láabu nadxibu Dios, raninébu Dios né racnébu buñ. Toibtica godzu toib ángel raiby láabu: Dios rioladx mod naclo', né láabu sacapybu ni gonablo láabu. Bixel buñ



tze tzayopy toib buñguieeu ni laa Pedro. Láabu no'bu lainy gudx ni laa Jope, lidx Simón, ni rabés gahx ro' nisdá.

Ni maca Cornelio rony ni raiby ángel re' láabu. Stoib dzúcu, Pedro no' guic yo' lidx Simón. Lagarycu Dios rony que Pedro raloopya cabí toib lairygue'el ni sietj guibá. Loni dxee bisa' clas nimal. Ley ni Dios biduidy náni que guirá nimal re' diti nayaamu par guá buñ láamu, per toib rudx ná: Pedro, biás bigaity né godó.

Pedro racapy: ¡Yaca! Diti ma goyo' dzú godóya galrro ni diti nayaa. Per rudx cú raiby láabu: Ma diti guinilo diti nayaa, ni Dios nigore' rani' nayaa. Tzón buelt rudx cú rabyni nde' Pedro. La'ga Pedro cayony xpensary xí raduidy diitz guirá nde', radxiin rono'bu tipnés buñguieeu ni Cornelio bixel par guiyopy láabu.

Pedro rietj né rani': Na' ngú buñguieeu ni cayopyto. ¿Xigony cayopyto na'? Órni layibu raibyibu Pedro que toib ángel góoch Cornelio ñony invitarbu Pedro lidxbu, ór cú Pedro rasaguel tze né layibu. Stoib dzúcu, Pedro né tipnés ximig rieyibu riguenyibu Cornelio gudx Cesarea.

Cornelio ma bitop guirá xfamily né ximigdxin toibsi lagary. Órni Pedro radxiin, Cornelio raxixip nisló Pedro, xomod rabilo ló dibuj re'. Pedro ni maca raiby láabu: Biás portín láaca toib buñgudxlio na'. Scú láani, la Biblia rasuidy que diti láani ngú guixixipno par gony adorarno toib buñgudxlio. Nosi Jehová non gony adorarno.

Nigore' Pedro rasaló rani' xtiitz Dios nisló guirá buñ ni dxee cú. Pedro rani': Radudi cuent que Dios racacuent guirá clas buñ ni ná gony xchiimbu. La'ga cani'bu, Dios rasiab fuers ni raquiin par gonybu ni nábu, né guirá buñ ni dxee cú rasaló rani' xidal clas diitz. Nde' rony que radziguia' tipnés ni racanal a Jesús ni nac buñ judíos ni buny compañer Pedro, portín layibu bunyibu pensary que Dios nosi ragobioo buñ ni nac judíos. Nde' rasuidy layibu que Dios diti rabíbu que toib gudx más rasac que stipnés. ¿Diti galán guisetnaladxno nde' la?



**M**BIOXHLAS ni rabilo sagané Pablo, laabu Timoteo. Láabu rabésbu né xfamilybu lainy gudx Listra. Xina'bu laa Eunice né soiscólbu laa Loida.


Nde' ma rion buelt ni Pablo rieed Listra. Ma godudy toib íz de goló Pablo né Bernabé goyo'yibu né gonyíyibu xtiitz Dios lagary re' primerdiguie'. Nigore' Pablo ma bibiguetbu né ximigbu Silas.

¿Nanlo xí ranabdiitz Pablo a Timoteo la? Pablo ranabdiitz láabu: ¿Rioladxlo' gony compañerlo na' né Silas la? Looy labúu gacnélo lóodo guisuidyno xtiitz Dios buñ ni rabés lainy gudx ni rian sit de lagary re'.

Timoteo racapy: Rioladxi tzaaya né lóoto. Por ngú, diti xidzú Timoteo rasian xfamily né rony compañerbu Pablo né Silas. Per nír ganno xi gosacloó Pablo, ór cú guisuidyno pu guirá lagary goyebu né Timoteo. Ma godudy diecisiete íz de goló Jesús bire' lóo Pablo ló néz ni sée niis Damasco.

¡Bisednaladx, Pablo bieedbu Damasco par gonybu mal guirá ni racanal Jesús, per nigore' láabu ma nacbu xpiin Jesús! Diti xidzú, tipnés xi enemigbu rayopyibu mod guigaityibu Pablo, per buñ ni racanal a Jesús racné par labúu guilaabu. Lainy toib dzoim ralityibu Pablo ló muro ni nap gudxcú né rare'bu fuer, modre' ralaabu.

Ór cú Pablo radudy niis Antioquia par guinibu xtiitz Dios. Lagary re' ro primer rare' laa ni racanal a Jesús cristianos. Pablo né Bernabé noyibu Antioquia ór cú





no' ni raxel layibu tzeyibu niis tipnés gudx ni no' sit. Toibtica gudx ro rieiye bu laa Listra, lagary ro rabés Timoteo.

Ma yaaca godudy toib íz, Pablo rabiguet Listra stoib nde' ma nací rarop buelt ni riedebu lagary re'. Órni Timoteo rasaló rony compañerbu Pablo né Silas, ¿nanlo pu lagary rieiye bu la? Bibi' dibuj ro sieed xidal gudx, né ganno pu lagary goyeyibu.

Primer rieiye bu Iconio toib gudx ni rian gahx Listra, gudx ni rarop rieiye bu laa Antioquia. Lagary re' rare'yibu rieiye bu Troas, láaca rieiye bu Filipos, Tesalónica né Berea. ¿Rienlolo pu lagary rian Atenas la? Pablo láaca rani' xtiitz Dios lagary re'. Láaca por toib íz gorol raniye bu xtiitz Dios lainy gudx ni laa Corinto. Radxiin midid rio'yibu Éfeso por tidxósi dzú. Né rabiguetyibu lainy bark gudx Cesarea, né ria'pyibu niis Antioquia, lagary re' rian Pablo.

Xomod ma bisuidyno, Timoteo gosaabu sit par gocnébu Pablo goniyibu «diitz sacró» xtuny Dios ro gocnébu goya' xidal congregación. Órni looy ni'slo, ¿gonylo xchiin Dios xomod Timoteo la?

# TOIB MBIOX NI GONÁS BACA'AL 111

¡GANNLO! ¿Xí láani cayac re'? ¿Gocnaa mbiox ni náaxh layoo la? ¡Bibi', toibtica buñguieeu ni care' ro' yo', láabu ngú Pablo! ¿Labúu rabilo Timoteo ca la? ¿Ro' bentan birexcoo mbiox ca, né biabbu la?

Scú láani, nga ni gosaclobu. Pablo cago' toib discurs par guicadiag guirá buñ ni racanal Jesús ni rabés lainy gudx Troas. Láabu ma nambu que sacla par guibíbu guirá buñ de Troas portín stoib dzúcu tzóbu lainy toib bark tzébu stoib lad. Por ngú xtiscursbu gocla hasta galague'el.

Mbioxhlaas re' ni góc laa Eutico, ro' bentan gorúbu, né gonás baca'al láabu. ¡Birexcobu ro' bentan de tzón piís! Por ngú, buñ ni dxee cú noyibu ló galrasa' xomod rabilo ló dibuj. Órni tipnés buñguieeu ralis mbiox re', ¡ma gue'et láabu!

Órni Pablo raduidy cuent que mbiox re' ma goity, ratbu laidy né ragu'dxibu mbiox re'. Ór cú ranibu: Diti tzóto ló galrasa'. ¡Láabu nasa'cbu! ¡Né scú láani! ¡Nacní toib galrradziguia'! ¡Pablo buny que nabanybu stoib! Xidalguixo buñ ni dxee rabí láani né rabaladxibu.

Guiráyibu rabiguet stoib lainy yo' de tzón piís né rooyibu galrro. Guidopynac gue'el rago' Pablo discurs. ¡Per labúu guinino que Eutico ma diti saisybu stoib! Ór cú Pablo, Timoteo né ni rony compañer layibu rio'yibu lainy bark. ¿Nanlo pu lagary rieyibu la?

Pablo ma caslo'oxbu ni rion buelt ni láabu riebu ranibu xtiitz Dios lainy xidal gudx. Lósi gudx ni laa Éfeso goyo'bu tzón íz. Por ngú ni rion buelt ni casaabu cani'bu xtiitz Dios goclabu más que ni rarop buelt.

Órni bire'yibu Troas, bark ni noyibu lainy goclani tidxo dzú gudx ni laa Mileto. Né como Éfeso diti nigolú sit ria'anni de gudx ni laa Mileto, Pablo raxelca' tipnés buñguieeu ni nap más íz ni no' lainy congregación de gudx re' par guieed rono'bu né guininébu biinre' por

último. Per órni bark re' rare', jnigolú nabann rio'yibu órni Pablo rasian layibu!

Radxiin dzú bark re' rabiguet Cesarea. La'ga Pablo rian lidx Felipe, toib buñguieeu ni rani' xi gac dzú ni sietra ni laa Ágabo nábu que órni Pablo guidxin Jerusalén no' ni sago' láabu press. Né ngú ni rac, mod goní Ágabo. Né órni Pablo ma godudy chop íz press gudx Cesarea, raxelyibu Pablo gudx Roma rono' César, buñguieeu ni rony mandary Roma, par guinibu pal Pablo nap dool. Guisuidyno xí láani rac órni séebu Roma.

Hechos, captulos 19 a 26.



**¡B**IBI' gannlo bark re' caguichni! ¡Cabílni! ¿Rabilo buñ ni ma no' lainy nís la? Tipnésyibu ma cadxin ro' nísda'. ¿No' Pablo ladyibu la? Guisuidyno xí láani casaclóo Pablo.

Bisednaladx, por chop íz no' Pablo press lainy gudx Cesarea. Ór cú raxelyibu Pablo lainy toib bark né tipnés buñ ni no' press par tzeyibu gudx Roma. Ma yaaca guidxinyibu isla ni laa Creta, rasaló rac toib buro'dant nadzu'py né nigolú rasisni bark cú. Guirá buñguieeu ni no' lainy bark diti labúu raxonyibu láani. Rodzu diti labúu rabíyibu Govitz né gue'el diti labúu rabíyibu vitzón. Radxiin midid ni ma xidal dzú noyibu lainy nísda' xpensaryibu ma gaityibu.



Ór cú Pablo riás né raiby layibu: Ni toibto gaity, nosi bark re' gunitló. Portín goxin re' toib ángel xtuny Dios bieed rono'ya né góoch na': ¡Pablo, diti guidzuibylo! Naplo xi de guidxinlo nisló César buñguieeu ni rony mandary gudx Roma. Né Dios guilaa guirá buñ ni no' né looy lainy bark re'.

¡Ma godudy catorce dzú de goló gosalo buro'dant né gala' gue'el de dzure', guirá buñ ni cayony dxiin lainy bark raduidyibu cuent que ló nisda' rono'yibu diti guelni. Como ma gue'el láani radzuibyibu guicá bark re' laidy guiee, por ngú rasalyibu lainy nisda' anclas par guicaani bark né diti guixonyni más. Raraa stoib dzúcu rabi'yibu roloo nisda' ro nabich. Rago' guicyibu mod tzanéyibu bark cú lagary re'.

Órni ma cabigaxyibu roloo nisda', bark re' ria'isyini laidy tip montón yohx né ragni cú. Ór cú xcuann nisda' rasaló racáni cué bark re'

né rasaló rabilni. Buñ ni cayaan layibu ni nac buñxirop ni rasanir nisló xidalguixo soldad raiby layibu: Guirá ni labúu rasobló, colguisobló hasta guidxinto roloo nisda' ló yoovich. Stipnésto láaca colguisandop después lainy nís né colguiquiin yac bala' xtunyca bark par diti guiguichto. Ngú ni ronyibu, né guirá 276 buñ ni no' lainy bark radxiinyibu ro nabich né ralaayibu, mod goní ángel cú.

Isla ro bidxinyibu laani Malta. Buñ ni rabés lagary re' nigolú buñtzay layibu, racnéyibu guirá buñ ni bieed lainy bark cú. Órni rabés rac buro'dant cú, rago'yibu Pablo lainy stoib bark né rinéyibu Pablo gudx Roma.

Hechos 27:1-44; 28:1-14.





**B**IBI' caden ni no' yainyña Pablo, né láaca bibi' soldad ni cayap láabu. Pablo no'bu press gudx Roma. Láabu cabésbu que César ni rony mandary Roma gann xí gony láabu. La'ga no'bu press, nitisi buñ labúu ridguen láabu.

Tzón govitz de goló bidxinbu Roma, Pablo ranab que tipnés buñguieeu ni rasanir nisló judíos guiedtixlóo láabu. Por ngú, xidal buñ judíos de gudx Roma rieved rono'bu. Pablo raniné layibu de Jesús né de Gobierno xtuny Dios. Tipnésyibu raluladx né racanalyibu Cristo, per stipnésyibu diti raluladx.

Pablo láaca raninébu xtiitz Dios xidal soldad ni rap láabu. Ló chop íz ni rio'bu press lagary re' raninébu guirá buñ ni riga'lni láabu. Por ni bunybu guirá ndé, hasta guirá xfamily César racadiag diitz sacró de Gobierno xtuny Dios, né tipnésyibu radxiin racanal Jesús.

Per ¿chú láabu ngú ni biedtixlóo a Pablo né sob ro' mexh caca'? ¿Nanlo chú láabu la? Scú láani, nachu Timoteo. Láabu láaca goyo'bu press portín gonibu de Gobierno xtuny Dios, per nigore' ma diti no'bu press. Bieedbu par gacnébu Pablo. ¿Nanlo xí raca'bu la? Guibino guidoni.

¿Rasetnaladxlo gudx ni laa Filipos né Éfeso ni bíilno ló Historia 110 la? Pablo gocné goya' congregaciones lagarycu. Nigore' ni ma no'bu press, Pablo raxelbu guich ló guirá ni racanal Jesús ni rabés lagarycu. Guich cú laani Efesios né Filipenses, guiropani sieetni ló la Biblia. Pablo nigore' cayaibybu Timoteo xí láani guica'bu ló guich ni guixelbu par ximigyibu ni racanal Jesús ni no' gudx Filipos.

Guirá buñ filipenses nigolú buñtzay gocyibu né Pablo. Raxelyibu xidal galrrascad lainy press rono' Pablo, por ngú raduidybu guixquix biinre'. Epafrodito ngú ni bitné galrrascad re'. Per láabu bixo'golúbu né mersi ñaitybu. Per nigore' ma nasa'cbu stoib né ma guibiguetbu xcudxbu. Láabu tzanébu xquiich Pablo né Timoteo gudx Filipos.



Lainy press, Pablo raca'bu xchop guiich ni sieed ló la Biblia. Toibni par buñ ni racanal Cristo ni no' lainy gudx Colosas. ¿Nanlo ximod laani la? Laani Colosenses. Stoibni nac xquiich Pablo ni bixelbu nosi par ximigbu Filemón, ni rabés lainy gudx Colosas. Guiich re' rasetlani de Onésimo, toib xomós Filemón.

Onésimo bixonybu lidx Filemón né bidxinbu Roma. Láabu gonbu que Pablo no' press lagary re'. Né bieedbu biedtixlóbu Pablo, ór cú Pablo goniné láabu xtiitz Dios. Onésimo láaca ni maca gócbu buñ ni racanal Jesús. Nigore' Onésimo rio'obni láabu por ni bixonybu lidx Filemón. Por ngú, ¿nanlo xí raca' Pablo ló guiich ni caxelbu lóo Filemón la?

Pablo ranab lóo Filemón guituidy scási' ni buny Onésimo. Né ló guiich ni raxelbu náni scare': Radxiguet láabu rono'lo. Per nigore' diti nosi nacbu xomóslo láaca ma nacbu xhermanlo, toib buñtzay. Órni Onésimo rabiguet Colosas, rinébu chop guiich re', toibni par buñ colosenses né stoibni par Filemón. ¡Bunysi xpensarylo balaati bibaladx Filemón órni gonbu que xomósbu Onésimo, ma nac toib ni racanal Cristo xomod láabu!

Órni Pablo raxelbu guiich lóo filipenses né lóo Filemón, ló guiich re' sieed xidal diitz sacró. Pablo raiby a buñ filipenses: Caxela Timoteo ro nóoto. Per na' láaca mápa mer tzáguena lóoto. Né guiich ni raxelbu lóo Filemón ná: Biyopy toib lagary ro guía'ana.

Órni Pablo rare' press, riebú riguenbu xiermanbu ni no' xidal lagary. Per diti xidzú ranásyibu né rago'yibu Pablo press lainy gudx Roma stoib. Nigore' nambu que tzó ni guigaity láabu. Por ngú, raca'bu guiich lóo Timoteo que guieed ni maca rono'bu. Pablo raca'bu: Buni guirá ni ná Dios, né láabu saduidybu xiro' xilaaybu na'. Diti xidzú de goló goity Pablo, Jerusalén binitlóni stoib, per nigore' buñ romanos binitló gudxcú.

Per ló la Biblia sieed más guiich. Jehová rony que Juan toib xpiin Jesús guica' tipnés libros ro radopy la Biblia, toibticani laa Revelación. Ló libro re' rani' xí gac. Guisuidyno nigore' ximod guigua'no ló dzú ni sietra.

## *Ni sieed ló la Biblia radxiin racni*

*La Biblia diti nosi rani' ni nigolú góe, láaca rabyini lóono xí ni gac ló dzú ni sietra. Buñgudxlio diti labúu raniyibu xí ni gac ló dzú ni sietra. Por ngú nánno que Biblia sietni de Dios. ¿Xí láani ná la Biblia gac ló dzú ni sietra?*

*Xtiitz Dios rani'ni de toib guerr xiro' ni guiné Dios. Ló guerr re' Dios sanitlóbu guirá cóe mal né buñyox ni no' ló Gudxlio, per salaabu buñ ni rony xchiimbu. Jesucristo ni Dios golú par gony mandary, xcuentbu sio'ni que buñ ni rony xchiin Jehová saga'iyibu goxt né sacroyen ló Gudxlio, né ma diti saxo'yibu né saityibu.*

*¿Diti rioladxno que Dios gony Gudxlio re' toib lagary móz la? Per no' ni gonyno pal nainy lóono guigua'no ló Gudxlio móz. Ló última historia ni sieed ló libro re' guisuidyno xí raquiin gonyno par labúu guica'no xilaay Jehová ni napbu par guirá ni rony ni nábu. Por ngú, biil Midid XHOON né bisuidy ximod labúu gannlo ni rani' la Biblia ni gac ló dzú ni sietra.*

# DZÚ NI GUILOX GUIRÁ CÓS MAL 114

¿XÍ LÁANI rabilo ló dibuj re'? Scú láani, xidalguixo buñ dxiip pór mainyquich. Per bibi' pu lagary sieedyimu. ¿Guirá mainy re' caxony cayetj guibá ló xcaay! Per xí ronylo pensary, ¿no' mainy lainy guibá la?

Yaca, ditimu mer mainy. Náanno nde' portín mainy diti labúu raxony ló xcaay. Xtiitz Dios la Biblia rani' de mainy ni no' guibá. ¿Nanlo xigony la?

Nde' nacin scú portín goyo' dzú, mainy biquingolu'mu ló guerr. Por ngú la Biblia rani' que tipnés buñ ni rietj lainy guibá dxiip laidy mainy par guislooy que Dios nap toib guerr né buñgudxlio ni nac xi enemigbu. ¿Ximod laa guerr ni guitné Dios? Laani Armagedón nde' Xtzú rodann Jehová, ro guinitlóbu guirá cós mal ni no' ló Gudxlio.

Jesús Ngú ni guisanir ló Xtzú rodann Jehová ni laa Armagedón, bisednaladx Jehová golúbu Jesús par gony mandary Gobierno Xtunybu. Por ngú Jesús no' toib corona guicbu. Né espad ni ca'bu raslooy que guigaitybu guirá xi enemig Dios. ¿Non guidziguia'no que Dios guinitló guirá buñ mal la?

Biyopy Historia 10. ¿Xí rabilo ló historia re'? Scú láani, toib guiérodann ni bigaity xidalguixo buñyox ni diti bisob Jehová. ¿Chú buny que ñac guiérodann re'? Jehová buny láani. Nigore' bibi' Historia 15. ¿Rabilo xí cayac ca la? Sodoma né Gomorra canitlóni né guii ni Jehová bixel.

Nigore' biyopy Historia 33. Bibi' xí ni cayac mainy né carret ni nap egipcios. ¿Chú láabu buny que nís ñotz laidy guirá egipcios? Láabu ngú Jehová. Bunybu láani par nalaa xcudxlu Israel. Biyopy Historia 76. Ló historia cú guibilo que Jehová biduidybu lagary que xcudxlu binitló por cós mal ni bunyibu.

Por ngú, diti non guidziguia'no que Jehová guixel xidalguixo ángeles par guinitlóbu guirá cós yohx ni no' ló Gudxlio. ¿Nanlo xí gac órni ma godudy guirá nde' la? Bichi'ix guich né guisuidyno xí ni gac.



# GUDXLIO SAC TOIB LAGARY MÓZ <sup>115</sup>

**B**IBI' guirá yac naso' ni saga', guie' móz né dainy naso'. Looy xi nálo, ¿nigolú sacróni la? Bibi' bidxin ni cayo ló ña mbioxien ca. Né láaca bibi' betz ons né mainy ni saga' ló guixbata' ló láach. ¿Ñoladxlo nabanylo lainy toib lagary sacroyen mod rabilo ló dibuj re' la?

Dios nainy láabu que looy guibanylo tipzó ló Gudxlio lainy toib lagary móz, ro ma diti guieen yoob looy xomod rasac buñ láani ló naare'. Scare' ná la Biblia modre' cués buñ lainy lagary móz ló Gudxlio. Dios sio' né layibu. Galgoity ma diti sio'ni más, ma diti sio' ni guicalas rudx, né diti sio' ni tudy ló galrrioop. Cós ni ma góc ma godudyni.

Xcuent Jesús láani gac guirá cós sacró ni ma goní Jehová. ¿Nanlo pu dzú gacni la? Scú láani, sonybu guirá nde' órni ma binitlóbu guirá cós mal né guirá buñyox ni no' ló Gudxlio. Bisednaladx, órni




Jesús goyo'bu ló Gudxlio bisialbu buñ de bisa' clas galguitz, né láaca golísbu tipnés buñ lad gue'et. Modre' bislooybu ni gonybu ló guidopynac Gudxlio órni gony mandarybu lainy Gobierno xtuny Dios.

¡Bunysi xpensarylo nigolú sacró sac dzú ni guibanyno ló Gudxlio móz re'! Jesús né tipnés buñ ni cabúbu gony mandary né láabu lainy guibá. Layibu ganyibu guirá buñ ni guibany ló Gudxlio né xcuentiyibu sío' que guirá buñ guibany goxtiguie. Guisuidyno xí láani non gonyno par labúu guiduidy Dios toib lagary móz ro guibanyno tipzó.

Revelación 21:3, 4; 5:9, 10; 14:1-3.





Xi libriya ni rasuidy  
HISTORIAS XTUNY  
**LA BIBLIA**

**Santa  
Biblia**

¿NANLO ni mbioxgona'yen re' né ximig cayó'ol la? Scú láani, libro ni cayó'olcalo ngú ni cayó'olyibu, *Xi libriya ni rasuidy historias xtuny la Biblia*. Historia ni cayó'olcabu ngúca cayó'ol lo ni laa, «Ximod guibanyno tipzó».

¿Nanlo xí casuidyibu la? Nír non guisuidyno de Jehová né de Xiimbu Jesús par labúu guibanyno tipzó. La Biblia ná: Nde' néz ni riné par guibanyno tipzó. Bisuidy par gannlo de toibguielot Dios ni rasuidy xinésni, né de Xiimbu Jesucristo.

¿Ximod labúu guisuidyno de Jehová né de Xiimbu Jesús? Toib mod ni labúu gonyo láani ngú golno guidopynac, *Xi libriya ni rasuidy historias xtuny la Biblia*. Libro re' rasetlagoluni xidal cós ni Jehová né Jesús ma bunyibu né ni gonyrayibu. Per no' stoib libro ni non golno.

¿Rabilo libro ni náaxh layoo ca la? Láani nga la Biblia. Biyopy ni gacné looy guisuidylo ni ná la Biblia ro bire' guirá historias ni sieed ló libro ni cayó'olcalo. La Biblia rasuidytzaayni lóono ni non gonyo par gonyo xchiin Dios mod nání láabu né scú labúu guibanyno tipzó. Por ngú, diti non guisianno de golno la Biblia guirá dzú.

Per ni guisuidyno de Jehová né Jesucristo diti ngúsi láani. Labúu nimbutzaayno layibu né ni rasuidyibu, per ná scú diti labúu ñonyno gann nabanyo tipzó. ¿Nanlo xí más raquiinni la?

Láaca raquiin guibanyno mod cayenno ló la Biblia. ¿Rasetnaladxlo Judas Iscariote la? Láabu gócbu toibtica de doce buñ ni Jesús golú par ñac xpiin. Judas bimbutzaaybu xtiitz Jehová né Jesús. Per ¿xí gosaclobu? Bidxin midid bunybu pensary en lásibu né bunycuentbu Jesús por 30 nilas de plata. Judas diti sabanybu tipzó ló Gudxlio.



¿Rasetnaladxlo Guehazi, buñgieeu ni bisuidyno ló Historia 69 la? Láabu bisobladxbu lairy né bidxiich ni diti góe xtunybu. Biscúbu par labúu cua'bu láani, né por ngú Jehová buny castigar láabu. Láaca sony castigarbu lóono pal diti rasobdiitzno xileybu.

Per no' xidal buñtzay ni buny ni ná Jehová mod náapabu. ¿Nigolú rioladxno gacno mod gocyibu la? Samuel toib mbioxien ni bisian toib galán mod par guisu'no. Rasetnaladxlo mod bisuidyno ló Historia 55, láabu napbu nosi tap o gáay íz órni gosalobu bunybu xchiin Dios lainy yo' ro rac adorar Jehová. Por ngú ná naclo' mbiox, diti gonylo pensary que diti labúu gonylo xchiin Dios.

Scú láani, guiráno raniiny guicanalno Jesucristo. Historia 87 raslooy que desde dzú nacbu mbioxien goyo'bu lainy yo' xiro' ro rac adorar Jehová né goníbu de Bixiosbu ni no' guibá. Guisu'no mod bunybu. Guininéno xidal buñ ruti riga'lni lóono xí ni ná Jehová, né Xiimbu Jesucristo. Pal ronyno guirá nde', labúu guibanyno tipzó lainy lagary móz ló Gudxlio ni Dios guiduidy lóono.

Juan 17:3; Salmo 145:1-21.



# Ni guinabdiitzno órni guisuidyno

## *Xi libriya ni rasuidy*

### *historias xtuny la Biblia*

#### Historia 1

##### Dios rasaló rasa' xidal cós

1. ¿Chú biduidy guirá cós tzaay lóono? ¿Goní xí biduidybu lóono?
2. ¿Chú láani nirdiguié bisa' Dios?
3. ¿Xigony más gondxi' Dios ángel ni bisa'bu nirdiguié?
4. Golexa ximod góe Gudxlio nírcu (bibí dibuj).
5. ¿Ximod gosaló Dios bunytzaay Gudxlio par buñ né nimal?

##### Stipnés diitz ni non guicapyno:

1. *Bül Jeremías 10:12.*
- ¿Ximod raduidy diitz guirá ni bisa'bu xí clas Dios nachu? (Isa. 40:26; Rom. 11:33.)
2. *Bül Colosenses 1:15-17.*
- ¿Ximod gocné Jesús órni goya' guirá cós, né ximod racné lóono guirá ndé' guienno chú ngú Jesús?
3. *Bül Génesis 1:1-10.*
- a) ¿Ximod ngú bidxin goya' Gudxlio? (Gén. 1:1.)
- b) ¿Xí góe primer dzú, dzú ni Jehová gosaló bisa' guirá ni rabino? (Gén. 1:3-5.)
- c) ¿Xí góe ni rarop dzú, dzú ni Jehová gosaló bisa' guirá ni rabino? (Gén. 1:7, 8.)

#### Historia 2

##### Toib lagary sacroyen

1. ¿Ximod ngú bunytzaay Dios Gudxlio par lóono? Dios bisa' xidal nimal, ¿labúu guinilo laa chop tzón la? (Bibí' dibuj.)
3. ¿Xí láani buny que Edén diti ño' stoib lagary mer láani?
4. ¿Ximod goniiny Dios ñac guidopy Gudxlio?

##### Stipnés diitz ni non guicapyno:

1. *Bül Génesis 1:11-25.*
- a) ¿Xí ni buny Dios ni rion govitz dzú ni láabu bisa'bu guirá cós? (Gén. 1:12.)
- b) ¿Xí góe lo tap govitz, dzú ni Jehová bisa' guirá cós? (Gén. 1:16.)
- c) Ló gáay né lo xhoop govitz, ¿xí guirá nimal bisa' Dios? (Gén. 1:20, 21, 25.)
2. *Bül Génesis 2:8, 9.*
- ¿Xí chop clas yac cuánnax golo' Jehová lainy lagary sacroyen cú, né xí biduidy ni diitz?

#### Historia 3

##### Primer buñgueieu né primer buñgona'

1. ¿Xí rabilo ni sieed lo dibuj historia 3 ni diti sieed lo dibuj historia 2?
2. ¿Chú bisa' primer buñgueieu, né ximod góe laabu?
3. ¿Xí dxiin biduidy Dios Adán?
4. ¿Xigony buny Dios que nanás toib baca'álnix Adán?
5. ¿Balac tiemp labúu nabany Adán né Eva, né xí dxiin goniiny Dios ñonyibu?

##### Stipnés diitz ni non guicapyno:

1. *Bül Salmo 83:18.*
- ¿Ximod laa Dios, né xí lagary lásibu napbu lo Gudxlio re'? (Jer. 16:21; Dan. 4:17.)
2. *Bül Génesis 1:26-31.*
- a) ¿Xí láani bilox bisa' Jehová último lo xhoop govitiz, né ndé' ximod góe gadzé dxiin ni buny Jehová órni bisa'bu nimal? (Gén. 1:26.)
- b) ¿Xí galrro biduidy Jehová par buñ né par nimal? (Gén. 1:30.)
3. *Bül Génesis 2:7-25.*
- a) ¿Xí buny Adán par labúu nabe'bu laa guirá nimal? (Gén. 2:19.)
- b) ¿Ximod racné Génesis 2:24 par guienno xí rony Dios pensary de galtze'el, de toib buñ ni rasian sa' o ni rabil xaltzeel? (Mat. 19:4-6, 9.)

#### Historia 4

##### Ximod bisnityibu lidxyibu

1. Bibí' lo dibuj, ¿xí cayac Adán né Eva?
2. ¿Xigony buny castigar Jehová layibu?
3. ¿Xí góoch toib be'el a Eva?
4. ¿Chú láabu buny que toib be'el naní?
5. ¿Xigony bisnit Adán né Eva lidx lainy lagary sacroyen cú?

##### Stipnés diitz ni non guicapyno:

1. *Bül Génesis 2:16, 17 né 3:1-13, 24.*
- a) ¿Xigony ni gonabdiitz be'el cú Eva gadzé mod biduidy diitz mod nac Jehová? (Gén. 3:1-5; 1 Juan 5:3.)

b) ¿Xigony raquiin guienno ni gosacloó Eva par diti gonyo scúca? (Fili. 4:8; Sant. 1:14, 15; 1 Juan 2:16.)  
c) ¿Ximod biyopy Adán né Eva mod par diti ñony castigar Jehová layibu por ni bunyibu? (Gén. 3:12, 13.)

d) Órni guirá querubines cú gosaga'yibu gopyibu Edén, ¿ximod biduidiyibu diitz que goyo'yibu xilad xcalmandary Jehová? (Gén. 3:24.)

2. *Bül Revelación 12:9.*

¿Nanlo balaati ma buny gann Buñdzab que stipnés buñ guicaló Gobierno xtuny Dios la? (1 Juan 5:19.)

## Historia 5

### Rasaló galnagan

1. ¿Ximod bibany Adán né Eva dzú ni bire'yibu lainy Edén?
2. ¿Xí gosaló góe Adán né Eva, né xigony?
3. ¿Xigony ngú non ño'x né non ñaity xiin Adán né Eva?
4. Pal Adán né Eva nasobdiitziyibu Jehová, ¿ximod ngú non nabanyibu né xiinyibu?
5. ¿Ximod ngú bio'obni Eva ni diti bisobbu Jehová?
6. ¿Ximod góe laa chop xiin lagol Adán né Eva?
7. ¿Chú ngú stipnés mbiox ni no' ló dibuj?

### Stipnés diitz ni non guicapyno:

1. *Bül Génesis 3:16-23 né 4:1, 2.*  
a) ¿Xí gosacloó Adán órni góe maldecir layoo? (Gén. 3:17-19; Rom. 8:20, 22.)  
b) ¿Xigony láani bire' laa primer buñgona' Eva, ni rarexa «ni nabany»? (Gén. 3:20.)  
c) ¿Ximod ngú bietj' xcalnabany Jehová par né Adán né Eva órni bichéyibu? (Gén. 3:7, 21.)
2. *Bül Revelación 21:3, 4.*  
¿Xí «cós ni ma godudy» racladkno guinitló?

## Historia 6

### Toib góe buñtzay né toib góe buñ mal

1. ¿Xí dxiin rasaló rony Cain né Abel?
2. ¿Xí láani rascad Cain né Abel a Jehová?
3. ¿Xigony rioladx Jehová ni rascad Abel láabu, né xigony diti rioladxbu ni Cain rascad láabu?
4. ¿Xí clas buñ nac Cain, né ximod rony Jehová par co' láabu ló razón?
5. ¿Xí láani ngú ni rony Cain órni no'bu toibsi né buchbu lainy layoo?
6. Golexa xí góe né Cain órni bigaityibu buchbu.

### Stipnés diitz ni non guicapyno:

1. *Bül Génesis 4:2-26.*  
a) ¿Ximod bislooy Jehová galnagan ni no' Cain ló? (Gén. 4:7.)

b) ¿Ximod ngú bislooy Cain ni no' lainy xcalnabany? (Gén. 4:9.)

c) ¿Ximod rabí Jehová órni no' ni ragaity toib buñ ni diti nap dool? (Gén. 4:10; Isa. 26:21.)

2. *Bül 1 Juan 3:11, 12.*

a) ¿Xigony bidzuitzxian Cain, né xí rasuidyno ni bunyibu? (Gén. 4:4, 5; Pro. 14:30; 28:22.)

b) ¿Ximod raslooy la Biblia que ná no' xfamilno ni racaló a Jehová, loono diti sasianno láabu? (Sal. 27:10; Mat. 10:21, 22.)

3. *Bül Juan 11:25.*

¿Xí ná Jehová guiduidy a guirá ni raity ló ro cayony xinésni? (Juan 5:24.)

## Historia 7

### Toib buñgieeu ni gop balory

1. ¿Ximod nga góe Enoc gadzé clas buñ?
2. Guirá buñ ni bibany ló xtzú Enoc, ¿xigony bunyibu pór cós mal?
3. ¿Xí cós mal buny buñ dzúcu? (Bibi' dibuj.)
4. ¿Xigony biquiin balory Enoc?
5. ¿Balac iz bibany buñ ló xtzú Enoc, né Enoc balac iz bibany?
6. ¿Xí góe después ni goity Enoc?

### Stipnés diitz ni non guicapyno:

1. *Bül Génesis 5:21-24, 27.*  
a) ¿Ximod bidzak Enoc a Jehová? (Gén. 5:24.)  
b) Mod sieed ló la Biblia, ¿chú ngú buñgieeu ni bibany más xidzú iz, né balac iz napbu dzú ni goitybu? (Gén. 5:27.)
2. *Bül Génesis 6:5.*  
¿Balaati midid bidal cós mal ló Gudxlio órni goity Enoc, né ximod nac xtzúno xomod góe dzúcu? (2 Tim. 3:13.)
3. *Bül Hebreos 11:5.*  
¿Xí clas buñ góe Enoc, «ni Dios bioladx» né ximod cua'bu xilaay Dios? (Gén. 5:22.)
4. *Bül Judas 14, 15.*  
¿Ximod labúu guisu' guirá ni racanal Jesús balory ni gop Enoc órni guini'yibu que ma guieed Xtzú rodann Jehová? (2 Tim. 4:2; Heb. 13:6.)

## Historia 8

### Nefilim ló Gudxlio

1. ¿Xí góe órni tipnés ángeles xtuny Dios góe toibsi né Buñdzab?
2. ¿Xigony tipnés ángeles bisian dxiin ni gop lainy guibá né bietjyibu ló Gudxlio?
3. ¿Xigony mal láani ñetj' ángeles ló Gudxlio né ñachu xomod buñ Gudxlio?
4. ¿Xigony guirá xiin ángeles re' diti gócbu xomod buñgudxlio?

5. Xomod rabilo ló dibuj, ¿xí láani buny xiin guirá ángeles re' dzú ma gocyibu nefilim?

6. Órni Enoc ma goity, ¿chú ngú buñguieue tzaay ni bibany ló Gudxlio, né xigony gondxi' Dios láabu?

### Stipnés diitz ni non guicapyno:

1. *Büil Génesis 6:1-8.*

¿Xí ná Génesis 6:6 de ximod rasac Jehová órni rabíbu mudo ronyno? (Sal. 78:40, 41; Pro. 27:11.)

2. *Büil Judas 6.*

¿Xí rasuidyno ni buny guirá ángeles «ni diti gopyibu lagary ro Jehová biduidy layibu»? (1 Cor. 3: 5-9; 2 Ped. 2:4, 9, 10.)

## Historia 9

### Noé rasa' toib arca

1. ¿Balac góe xfamily Noé, né ximod góe laa guionca xiin buñguieue Noé?

2. ¿Xí cós ni diti ma bibi' buñ góoch Dios nasa' Noé, né xigony?

3. ¿Ximod cuapy guirá ni golés gahxca Noé órni láabu gonibu de toib arca?

4. ¿Xí góoch Dios Noé ñony né nimal?

5. Dzú ni Dios bisieg ro' xpuert arca cú, ¿xí ngú ni buny Noé né xfamily?

### Stipnés diitz ni non guicapyno:

1. *Büil Génesis 6:9-22.*

a) ¿Xí buny que Noé ñac toib buñ ni nigolú buny xchiin Dios ni rasuidy xinésni? (Gén. 6:9, 22.)

b) ¿Xí rony Jehová pensary de cós mal, né xí rasuidyno de láani órni rayopyno cós par tzóno nakit? (Gén. 6:11, 12; Sal. 11:5.)

c) ¿Ximod labúu guisu'no Noé órni raiby xcudx Jehová lóono ni non gonyo? (Gén. 6:22; 1 Juan 5:3.)

2. *Büil Génesis 7:1-9.*

¿Ximod racné lóono ni Jehová goní que Noé góe toib buñ ni buny xinésni ná góoch buñ galkié? (Gén. 7:1; Pro. 10:16; Isa. 26:7.)

## Historia 10

### Toib guiérodann

1. ¿Xigony ma diti no' chú labúu goyo' lainy arca órni gosaló guiérodann cú?

2. ¿Balac dzú né balac gue'el buny Jehová que ñac guié né hasta púti bidxin nés cú?

3. ¿Xí góe né arca órni gosaló bidzaguel ló guidopynac Gudxlio?

4. ¿Bilaa guirá nefilim órni bieed guiérodann lá? ¿Xí góe né bixiosiyibu?

5. ¿Xí góe né arca gáay be'ó después?

6. ¿Xigony biduidy Noé lagary que nare' toib bia'ij lainy arca?

7. ¿Ximod nga gon Noé que ma bia'ach ló nís?

8. Después ni Noé né xfamily goyo'yibu más de toib iz lainy arca, ¿xí góoch Dios láabu?

### Stipnés diitz ni non guicapyno:

1. *Büil Génesis 7:10-24.*

a) ¿Balaati midid binitló guirá ni nabany ló Gudxlio? (Gén. 7:23.)

b) ¿Balac dzú gocla par bia'ach ló nís órni bilox guiérodann? (Gén. 7:24.)

2. *Büil Génesis 8:1-17.*

¿Ximod raslooy Génesis 8:17 ni goniiny Jehová ñony ló Gudxlio dzú bisa'bu láani que diti ma bitzá xpensarybu? (Gén. 1:22.)

3. *Büil 1 Pedro 3:19, 20.*

a) ¿Xí castig cuá guirá ángeles ni diti bisob a Jehová órni bibiguetyibu lainy guibá stoib? (Jud. 6.)

b) ¿Ximod racnéni lóono guiluladxno que Jehová labúu ralaa xcudx xomod bunybu né Noé né xfamily? (2 Ped. 2:9.)

## Historia 11

### Primer bip ni gonaa lóo

1. Xomod rabilo ló dibuj, ¿xí láani ni primer buny Noé órni bire'bu lainy arca?

2. ¿Xí góoch Dios a Noé né xfamily órni bilox góe guiérodann?

3. ¿Xí láani goní Dios gony?

4. Órni guibino toib bip, ¿xí láani guisetnaladxno?

### Stipnés diitz ni non guicapyno:

1. *Büil Génesis 8:18-22.*

a) ¿Xí labúu gonyo par guiduidyno «toib buxiin ni rioladx Dios»? (Gén. 8:21; Heb. 13:15, 16.)

b) ¿Xí bibi' Jehová ni no' lainy xcalnabany buñ ni rachiin gonybu, né xí cuidad gapnó? (Gén. 8:21; Mat. 15:18, 19.)

2. *Büil Génesis 9:9-17.*

a) ¿Xí acuerdo buny Jehová né guirá ni nabany ló Gudxlio? (Gén. 9:10, 11.)

b) ¿Balac dzú gacla acuerdo ni buny Jehová ni biduidybu toib bip? (Gén. 9:16.)

## Historia 12

### Buñ rasa' toib torre naso'

1. ¿Chú ngú góe Nemrod, né ximod bibi' Dios láabu?

2. Buñ ni no' ló dibuj, ¿xigony cabeyibu basoyáay?

3. ¿Xigony diti bioladx Jehová que nasa'yibu toib torre naso'?

4. ¿Ximod bicaa Dios ló guirá buñre' par diti nasa'yibu toib torre naso'?

5. ¿Ximod góe laa gudxrop ro golésyibu, né ximod rarexa diitze'?

6. ¿Xí buny guirá buñ órni Dios bitzá xtiitzyibu?

## Stipnés diitz ni non guicapyño:

1. *Bül Génesis 10:1, 8-10.*

¿Xí clas buñ góe Nemrod, né xí ná Biblia que gap-no cuidad? (Pro. 3:31.)

2. *Bül Génesis 11:1-9.*

¿Xigony bisa'yibu toib torre, né xí biduidy diitz que diti sarebu' ni gonyibu? (Gén. 11:4; Pro. 16:18; Juan 5:44.)

## Historia 13

### Abrahán ximig Dios

1. ¿Xí clas buñ bibany lainy gudx Ur?

2. ¿Chú ngu' buñgueieu ni rabilo ló dibuj? ¿Pu dzú golbu? ¿Pu lagary bibanybu?

3. ¿Xí buny mandary Dios gony Abrahán?

4. ¿Xigony góe laabu ximig Dios?

5. ¿Chú buny compañer Abrahán órni bire'bu de Ur?

6. ¿Xí góoch Dios a Abrahán órni bidxinbu lainy gudx Canaán?

7. Órni Abrahán gop 99 iz, ¿xí goní Jehová guiduidy láabu?

## Stipnés diitz ni non guicapyño:

1. *Bül Génesis 11:27-32.*

a) ¿Xfamily Abrahán góe Lot la? (Gén. 11:27.)

b) Ná la Biblia rani' que Taré láabu ngu' ni bire-né xfamily né sanébu ngu' stiudad, ¿xigony ranino que ni gosaní ngu' Abrahán, né xigony bunybu láani? (Gén. 11:31; Hech. 7:2-4.)

2. *Bül Génesis 12:1-7.*

Órni Abrahán bidxin Canaán, ¿ximod Jehová buny más xiro' acuerdo ni gonibu? (Gén. 12:7.)

3. *Bül Génesis 17:1-8, 15-17.*

a) ¿Ximod bitzá Jehová laa Abrán órni gopbu 99 iz, né xigony? (Gén. 17:5.)

b) ¿Xí galnasác goní Dios guiduidybu Sara? (Gén. 17:15, 16.)

4. *Bül Génesis 18:9-19.*

a) Ló Génesis 18:19, ¿xí rani' texto re' ni non gony guirá ni ma no' xiin? (Deu. 6:6, 7; Efe. 6:4.)

b) ¿Xí gosacloé Sara ni raduidy diitz que diti labúu guicacxlanno xitcal nisló Jehová? (Gén. 18:12, 15; Sal. 44:21.)

## Historia 14

### Dios rago' prueby fe xtuny Abrahán

1. ¿Xí goní Dios guiduidybu Abrahán, né ximod bunybu láani?

2. Xomod rabilo ló dibuj, ¿ximod goló' Jehová prueby fe xtuny Abrahán?

3. Ná Abrahán diti biembu ni Dios buny mandary láabu, ¿xí bunybu?

4. ¿Xí góe órni Abrahán gole' toib gudxil par guigaitybu ximbu?

5. ¿Balaati fe gop Abrahán lóo Dios?

6. ¿Xí biduidy Dios Abrahán par guiscadbu, né ximod buny Dios láani?

## Stipnés diitz ni non guicapyño:

1. *Bül Génesis 21:1-7.*

¿Xigony bichoc Abrahán triplá' be'el ro Isaac nac buñgueieu órni bisa'bu xhoon govtz? (Gén. 17:10-12; 21:4.)

2. *Bül Génesis 22:1-18.*

¿Ximod bislooy Isaac que bisobbu bixiosbu, né nde' ximod biduidy diitz ni gac ló dzú ni sietra ni más rasac? (Gén. 22:7-9; 1 Cor. 5:7; Fili. 2:8, 9.)

## Historia 15

### Tze'el Lot bidxiguet lóo

1. Abrahán né Lot, ¿xigony diti toibsi lagary séeyibu?

2. ¿Xigony golú Lot Sodoma par cués?

3. ¿Ximod góe buñ ni golés gudx Sodoma?

4. ¿Xí abis biduidy chop ángeles Lot?

5. ¿Xigony góe tze'el Lot toib pilary de suudy?

6. ¿Xí rasuidyno ni gosacloó tze'el Lot?

## Stipnés diitz ni non guicapyño:

1. *Bül Génesis 13:5-13.*

¿Xí rasuidyno de Abrahán órni gony reglarno toib galradilditzy né stoib buñ? (Gén. 13:8, 9; Rom. 12:10; Fili. 2:3, 4.)

2. *Bül Génesis 18:20-33.*

Órni rasuidyno mod Abrahán biyy diitz né Jehová, ¿xigony gapnó confianz que Jehová né Jesús gonyibu xinésni órni cuébu triplad buñ mal de buñtzay? (Gén. 18:25, 26; Mat. 25:31-33.)

3. *Bül Génesis 19:1-29.*

a) Órni rolno historia re', ¿xigony diti rioladx Dios gacno buñ moxh? (Gén. 19:5, 13; Lev. 20:13.)

b) ¿Abrahán né Lot ximod diti toibsi mod bisobyibu xiley Dios, né xí rasuidyno de láani? (Gén. 19:15, 16, 19, 20; 22:3.)

4. *Bül Lucas 17:28-32.*

¿Ximod nga bibi' tze'el Lot guirá cóe ni rasac ni gopbu, né xí rasuidyni lóono par diti gonyo scúca? (Luc. 12:15; 17:31, 32; Mat. 6:19-21, 25.)

5. *Bül 2 Pedro 2:6-8.*

Pal rasu'no Lot, ¿ximod non guibino guirá cóe mal ni no' ló gudxliogoxre? (Eze. 9:4; 1 Juan 2:15-17.)

## Historia 16

### Toib gona' tzaay ni guica' Isaac

1. ¿Chú layibu ngu' buñgueieu né buñgona' ni rabilo ló dibuj?

2. ¿Xí láani buny Abrahán par labúu bidzelbu tze'el xiinga'nbu, né xigony bunybu láani?
3. ¿Ximod nga birebu' ni gonab xomós Abrahán lóo Dios?
4. Órni gonabdiitzyibu Rebeca pal nainy tze'bu guica' Isaac láabu, ¿ximod cuapybu?
5. ¿Xí láani buny que Isaac nabaladx stoib?

### Stipnés diitz ni non guicapyno:

1. *Büil Génesis 24:1-67.*
- a) Órni Rebeca gonbu xomós Abrahán ro' pós, ¿ximod biduidybu diitz xí clas buñ nacbu? (Gén. 24: 17-20; Pro. 31:17, 31.)
- b) Lóono ni racanal Jesús, ¿xí rasuidyno mod buny Abrahán por Isaac? (Gén. 24:37, 38; 1 Cor. 7:39; 2 Cor. 6:14.)
- c) ¿Xigony cuéno tiemp par gony xpensaryno mod buny Isaac? (Gén. 24:63; Sal. 77:12; Fili. 4:8.)

### Historia 17

#### Cuach ni diti góe toibsi clas

1. ¿Chú layibu góe Esaú né Jacob, né ximod goc-yibu gadzé clas buñ?
2. ¿Balac íz nap Esaú né Jacob órni goity bixio-golbu Abrahán?
3. ¿Xí buny Esaú ni gosac nabann bixiosbu né xi-na'bu?
4. ¿Xigony nigolú bidzuitz Esaú né buchbu Jacob?
5. Isaac, ¿xí gochbu xiinga'nbu Jacob ñony?

### Stipnés diitz ni non guicapyno:

1. *Büil Génesis 25:5-11, 20-34.*
  - a) ¿Xí goní Jehová ni gac guiropca xiinga'n Rebeca? (Gén. 25:23.)
  - b) ¿Xigony diti toibsi mod bibi' Jacob né Esaú laay ni non guica' ni nac lagol? (Gén. 25:31-34.)
  2. *Büil Génesis 26:34, 35; 27:1-46, né 28:1-5.*
  - a) ¿Ximod biduidy diitz Esaú que diti bioladxbu cób ni Dios biduidy láabu? (Gén. 26:34, 35; 27:46.)
  - b) Par labúu guica' Jacob xilaay Jehová, ¿xí góoch Isaac láabu ñonybu? (Gén. 28:1-4.)
  3. *Büil Hebreos 12:16, 17.*
- Ni buny Esaú, ¿xí rasuidyni lóono ni rascalóo guirá ni diti rioladx gac ximig Jehová?

### Historia 18

#### Jacob riée Harán

1. ¿Chú ngú mbioxhlas gona' ni no' ló dibuj, né ximod goené Jacob láabu?
2. ¿Xí gosaguel Jacob gony par labúu guica'bu Raquel?
3. ¿Xí buny Labán órni bidxin dzú guica' Jacob a Raquel?
4. ¿Xí buny Jacob par labúu bitzñabu né Raquel?

### Stipnés diitz ni non guicapyno:

1. *Büil Génesis 29:1-30.*
- a) Ná Labán biscú láabu, ¿ximod biduidy Jacob diitz que buñtzay nacbu, né xí labúu guisuidyno de láani? (Gén. 25:27; 29:26-28; Mat. 5:37.)
- b) ¿Ximod rasloy mod buny Jacob que nigolú gondxibu Raquel, né xí rasuidyno de láani? (Gén. 29:18, 20, 30; Cant. de Cant. 8:6.)
- c) ¿Chú layibu ngú góe tap buñgona' ni golesné Jacob né ni gosann xiimbu? (Gén. 29:23, 24, 28, 29.)

### Historia 19

#### Xidal xiin Jacob

1. Lea góe primer tze'el Jacob ni gosann xiimbu, ¿ximod góe laa xhooch mbiox ni gobpu né Jacob?
2. ¿Ximod góe laa chop mbiox ni gop Jacob né Zil-pá, xcriat Lea?
3. ¿Ximod góe laa xhooch mbiox ni gop Jacob né Bilhá, xcriat Raquel?
4. ¿Ximod góe laa chop mbiox ni gosann Raquel, né xí gosaclobu órni gool ni rarop mbiox cú?
5. Xomod rabilo ló dibuj, ¿balac xiin Jacob goyo', né xí gudx bire' de layibu?

### Stipnés diitz ni non guicapyno:

1. *Büil Génesis 29:32-35; 30:1-26, né 35:16-19.*
- Xomod rienni mod buny Jacob né xiin, ¿nanlo xí costumbre gop guirá hebreos órni goleyibu laa xiinyibu la?
2. *Büil Génesis 37:35.*
- Ná la Biblia nosi laa Dina rasetlaa, ¿ximod ra-duidyno cuent que goyo' más de toib xiindzap Jacob? (Gén. 37:34, 35.)

### Historia 20

#### Dina riab ló galnagan

1. ¿Xigony diti goniiny Abrahán né Isaac que xiin-yibu naca' buñ ni rabés lainy gudx Canaán?
2. ¿Bioladx Jacob que xiindzapbu nadzak né guirá mbioxhlas de gudx Canaán la?
3. ¿Chú ngú buñgueueu ni no' ló dibuj ni cabi a Dina, né xí cób mal bunybu?
4. ¿Xí buny Simeón né Leví, bisan Dina, órni gonyibu ni góe?
5. ¿Bioladx Jacob ni buny Simeón né Leví la?
6. ¿Ximod gosalo galnagan rono' xfamly Jacob?

### Stipnés diitz ni non guicapyno:

1. *Büil Génesis 34:1-31.*
- a) ¿Toibsi buelt goyee Dina xiin Jacob goyguen mbioxhlas de gudx Canaán la? Golexa láani (Gén. 34:1).
- b) ¿Xigony labúu guinino que Dina láaca gobpu dool ni Siquem bixiin láabu? (Gál. 6:7.)

c) ¿Ximod labúu guiduidy mbioxhlaas diitz que ni-golú rienyibu ni gosaclóo Dina? (Pro. 13:20; 1 Cor. 15:33; 1 Juan 5:19.)

## Historia 21

### Rianladxyibu José

1. Tipnés buch José, ¿xigony bidzuitzyibu José, né xí bunyibu?
2. ¿Xí goniiny buchyibu gonyibu José, per xí goní Rubén?
3. ¿Xí rac órni radxiin tipnés buñ ismaelitas?
4. ¿Xí rony buchyibu a José par que bixiosbu gony xpensary que José ma goity?

### Stipnés diitz ni non guicapyno:

1. *Bil Génesis 37:1-35.*

- a) ¿Ximod labúu guisu' guirá ni racanal Jesús mod ni xony José al guisetzyibu cós mal ni rony stipnés xiermanbu? (Gén. 37:2; Lev. 5:1; 1 Cor. 1:11.)
- b) Tipnés buch José, ¿xí bichiin layibu par ñony centyibu buchbu? (Gén. 37:11, 18; Pro. 27:4; Sant. 3:14-16.)
- c) ¿Xigony raibyno que láani ngú ni buny Jacob órni gonbu ni gosaclóo José? (Gén. 37:35.)

## Historia 22

### José no' press

1. ¿Balac íz nap José órni no' ni sané láabu Egip-to, né xí rasaclobu órni radxinbu lagarycu?
2. ¿Xigony rasalyibu José press?
3. ¿Xí dxiin raca' José órni no'bu press?
4. ¿Xí láani rony José por ni rago' ni re', né ni rabe' xpáa Faraón órni noyibu press?
5. ¿Xí láani rac órni buñguieeu ni rago' ni re' Fa-raón rare' press?

### Stipnés diitz ni non guicapyno:

1. *Bil Génesis 39:1-23.*

Ná ló dzú ni bibany José diti goyo' toib guich ni biduidy Dios ni ná que diti labúu tzone bony tze'el stoib, ¿xí bichiin a José par naxonybu de tze'el Potifar? (Gén. 2:24; 20:3; 39:9.)

2. *Bil Génesis 40:1-23.*

- a) Golexa tidxóyen ximod goní xca'al ni rago' ni re' Faraón né ximod bisaní Jehová a José par labúu nabexabu baca'al cú (Gén. 40:9-13).
- b) ¿Xí goní xca'al ni gole' xpáa Faraón né ximod rarexa baca'al cú? (Gén. 40:16-19.)
- c) Ló xtzúno, ¿ximod casu' esclavo fiel né discreto mod ni buny José? (Gén. 40:8; Sal. 36:9; Juan 17:17; Hech. 17:2, 3.)
- d) Órni rolno Génesis 40:20, ¿ximod rasaníni a guirá ni racanal Jesucristo mod ni guibiyibu cumpleany? (Ecl. 7:1; Mar. 6:21-28.)

## Historia 23

### Xpaca'al Faraón

1. ¿Xí rascalóo Faraón toib gué'el?
2. ¿Xigony rasatnaladx buñguieeu ni rago' ni re' Faraón a José?
3. Xomod rabino ló dibuj, ¿xí chop baca'al gop Faraón?
4. ¿Ximod golexa José guiropp baca'al ni gop Faraón?
5. ¿Ximod radxiin José rac toib buñxirop lainy gudx Egipto ni canal xiitz Faraón?
6. Tipnés buch José, ¿xigony rieyibu Egipto, né xigony diti bimbuyibu José?
7. ¿Xí baca'al rasatnaladx José, né xí racné láabu guieumu láani?

### Stipnés diitz ni non guicapyno:

1. *Bil Génesis 41:1-57.*

- a) ¿Ximod goliskia' José laa Jehová, né ximod labúu guisu' guirá ni racanal Jesús ni bunyibu? (Gén. 41:16, 25, 28; Mat. 5:16; 1 Ped. 2:12.)
  - b) Xomod góe lainy gudx Egipto ro goyo' xiro' galrrro ro láaca goyo' govinn galrrro, ¿xigony labúu guinino que scú nagni ló xtzúno lainy xcudx Jehová, né de guirá ni rani' que racanal Jesús? (Gén. 41:29, 30; Amós 8:11, 12.)
2. *Bil Génesis 42:1-8 né 50:20.*

¿Mal láani que toib ni rien Jehová guixixip par gonyxiro'bu toib buñ né guiduidybu respet por nacbu buñnan, pal lainy toib gudx diti rienni mal la? (Gén. 42:6.)

## Historia 24

### José rago' prueby buch

1. ¿Xigony rani' José que buchbu riée Egipto par guiláach?
2. ¿Xigony raduidy Jacob lagary que xiimbu, Benjamín, ni más nahuinn tze Egipto?
3. ¿Ximod radxiin copa ni nac de plata xtuny José lainy sac Benjamín?
4. ¿Xí ná Judá gony par guisla'yibu Benjamín?
5. Guirá buch José, ¿ximod ma bisianyibu mod ni gocyibu?

### Stipnés diitz ni non guicapyno:

1. *Bil Génesis 42:9-38.*

Guirá diitz ni goní José ló Génesis 42:18, ¿xigony nigolú racnéni guirá ni nap xiro' dxiin lainy congregación? (Neh. 5:15; 2 Cor. 7:1, 2.)

2. *Bil Génesis 43:1-34.*

- a) Ná Rubén góe lagol ló guirá xiin Jacob, ¿ximod raduidy diitz que Judá ngú ni goní por guirá buch? (Gén. 43:3, 8, 9; 44:14, 18; 1 Cró. 5:2.)
- b) ¿Ximod golo' José prueby a guirá buch, né xigony? (Gén. 43:33, 34.)

3. *Bül Génesis 44:1-34.*

a) ¿Xí buny José par que guirá buchbu diti labúu nimbu láabu? (Gén. 44:5, 15; Lev. 19:26.)

b) Guirá buch José, ¿ximod biduidiyibu diitz que ma diti radzuitzyibu José suusi antes? (Gén. 44: 13, 33, 34.)

## Historia 25

### Family ni radxiin Egipto

1. ¿Xí láani rac órni José raset a guirá buch que láabu ngú José?

2. ¿Xí láani rabexa José nadadiguié' a guirá buch?

3. ¿Xí láani rani' Faraón órni gonbu que bidxin buch José?

4. ¿Balac buñ ma nac xfamily Jacob órni bidxin-yibu Egipto?

5. ¿Ximod bire' laa xfamily Jacob, né xigony?

### Stipnés diitz ni non guicapyno:

1. *Bül Génesis 45:1-28.*

¿Ximod raslooy historia xtuny José que Jehová labúu coxinés toib cós ni raloyni gonynaa a guirá ni racanal láabu? (Gén. 45:5-8; Isa. 8:10; Fili. 1:12-14.)

2. *Bül Génesis 46:1-27.*

¿Ximod gocné Jehová a Jacob órni gosaabu ló néz par nadxiimbu Egipto? (Gén. 46:1-4, nota.)

## Historia 26

### Job rony ni ná Dios

1. ¿Chú láabu góe Job?

2. ¿Xí goniiny Buñdzab ñony, né birebu' ni goni-bu la?

3. ¿Xí biduidy Jehová lagary buny Buñdzab, né xigony bunybu láani?

4. ¿Xigony tze'el Job góoch láabu, «goní mal de Dios né goity?» (Bibi' dibuj.)

5. Xomod rabilo ló rarop dibuj, ¿ximod biduidy Jehová xilaay a Job, né xigony?

6. Pal loono ronyo guirá ni ná Jehová xomod Job, ¿xí laay saca'no?

### Stipnés diitz ni non guicapyno:

1. *Bül Job 1:1-22.*

¿Ximod labúu guisu' guirá ni racanal Jesús mod ni buny Job? (Job 1:1; Fili. 2:15; 2 Ped. 3:14.)

2. *Bül Job 2:1-13.*

¿Xigony diti toibsi mod cualó Job né tze'el galnagan ni goló Buñdzab layibu? (Job 2:9, 10; Pro. 19:3; Miq. 7:7; Mal. 3:14.)

3. *Bül Job 42:10-17.*

a) ¿Xigony laay ni cua' Job né ni cua' Jesús ngúca gocni por ni bisobyibu guirá ór ni ná Jehová? (Job 42:12; Fili. 2:9-11.)

b) Guirá laay ni cuá Job ni buny xinésni, ¿ximod racnéni loono? (Job 42:10, 12; Heb. 6:10; Sant. 1: 2-4, 12; 5:11.)

## Historia 27

### Toib Faraón mal rony mandary Egipto

1. ¿Chú ngú buñgüeeu ni cagasguit toib buñ ni cayony dxiin, né chú ngú ni cagasguitbu?

2. ¿Xí gosacloó guirá israelitas órni goity José?

3. ¿Xigony bidzuiby egipcios a israelitas?

4. ¿Xí góoch Faraón a guirá buñgona' ni gon a guirá israelitas ni gosann bada'?

### Stipnés diitz ni non guicapyno:

1. *Bül Éxodo 1:6-22.*

a) ¿Ximod gosaloó Jehová buny guirá ni goníbu guiduidybu a Abrahán? (Éxo. 1:7; Gén. 12:2; Hech. 7: 17.)

b) Guirá buñgona' ni gon buñgosann, ¿ximod biduidiyibu diitz que toib bada' rasac nisló Dios? (Éxo. 1:17; Gén. 9:6.)

c) Guirá buñgona' ni gon buñgosann ni buny ni ná Jehová, ¿ximod cua'yibu xilaay Jehová? (Éxo. 1: 20, 21; Pro. 19:17.)

d) Buñdzab goniiny que Dios diti labúu ñony ni goníbu que Jesús guieed de Abrahán, né ¿xí buny-bu? (Éxo. 1:22; Mat. 2:16.)

## Historia 28

### Bada' ni laa Moisés ralaa

1. ¿Chú ngú bada' ni no' ló dibuj, né chú ña canás bada'yen re'?

2. ¿Xí buny xina' Moisés par diti ño' chú nagaity a Moisés?

3. ¿Chú ngú nidxigonayen ni no' ló dibuj, né xí bunybu?

4. Órni xiindzap Faraón bidzelbu bada'yen re', ¿xí góoch Miriam láabu?

5. ¿Xí góoch princes a xina' Moisés?

### Stipnés diitz ni non guicapyno:

1. *Bül Éxodo 2:1-10.*

¿Ximod buny xina' Moisés par labúu nasnísbu né nasuidybu Moisés órni nac mbioxien, né xí rasuidyini a guirá ni no' xiin? (Éxo. 2:9, 10; Deu. 6: 6-9; Pro. 22:6; Efe. 6:4; 2 Tim. 3:15.)

## Historia 29

### Xigony bixony Moisés

1. ¿Pu lagary gonís Moisés, né xí gonbu de bixios-bu né xina'bu?

2. ¿Xí buny Moisés órni gopbu 40 iz?



3. ¿Xí góoch Moisés a toib israelita ni cayonynaa a stoib israelita, né xí cuapy buñgüeeu re' láabu?
4. ¿Xigonyo bisian Moisés Egipto?
5. ¿Pu lagary goyee Moisés, né chú bimbubu lagary ro bidxinbu?
6. ¿Xí buny Moisés ló cuarent iz ni goyo'bu lagarycu?

### Stipnés diitz ni non guicapyno:

1. *Bül Éxodo 2:11-25.*

Ló iz ni goyo' Moisés gudx Egipto cua'bu xiro' galnann ná scú, ¿ximod biduidybu diitz que no'bu né Jehová né xcudx? (Éxo. 2:11, 12; Heb. 11:24.)

2. *Bül Hechos 7:22-29.*

¿Xí rasuidyno ni goniiyn Moisés nalaa por stip láabu a guirá israelitas ni no' xan xomandary Faraón? (Hech. 7:23-25; 1 Ped. 5:6, 10.)

## Historia 30

### Yac gúch ni cacáa guii

1. ¿Ximod laa dainy ni rabilo ló dibuj?
2. ¿Xí cós ni radziguia' buñ bibi' Moisés órni cayaphu xiil laidy dainy?
3. ¿Xí diitz bicadiag Moisés ni bire' ló yac gúch ni cacáa guii, né chú láabu goní diitzre'?
4. Órni Dios gochbu Moisés que cuébu Xcudx bu de Egipto, ¿xí cuapy Moisés?
5. ¿Xí góoch Dios a Moisés nacapy órni nanabdiitz-yibu que chú bixel láabu?
6. ¿Ximod labúu naduidy Moisés diitz que Jehová bixel láabu?

### Stipnés diitz ni non guicapyno:

1. *Bül Éxodo 3:1-22.*

Órni raloyni diti labúu gonyno toib dxiin ni Jehová raduidy lóono, ¿ximod labúu gapnó confianz que Jehová gacné lóono xomod bunybu né Moisés? (Éxo. 3:11, 13; 2 Cor. 3:5, 6.)

2. *Bül Éxodo 4:1-20.*

a) Ló cuarent iz ni Moisés goyo' ló gudx Madián, ¿ximod bitzábu mod ni gócbu, né xí rasuidy guirá ni nainy gap privilegio lainy xcudx Jehová? (Éxo. 2:11, 12; 4:10, 13; Miq. 6:8; 1 Tim. 3:1, 6, 10.)

b) Órni Jehová raquinn xcudx par co'bu lóono ló néz, ¿xí confianz raduidyini lóono mod bunybu né Moisés? (Éxo. 4:12-14; Sal. 103:14; Heb. 12:4-11.)

## Historia 31

### Moisés né Aarón rieiynu nisló Faraón

1. ¿Ximod gocné a israelitas galrradziguia' ni buny Moisés né Aarón?
2. ¿Xí láani góoch Moisés né Aarón a Faraón, né xí cuapy Faraón layibu?

3. Xomod rabino ló dibuj, ¿xí láani góoch órni Aarón bisal xiac layoo'?

4. ¿Ximod góoch Jehová a Faraón xalagary, né xí buny Faraón?

5. ¿Xí láani góoch órni bilox godudy chii plaga?

### Stipnés diitz ni non guicapyno:

1. *Bül Éxodo 4:27-31 né 5:1-23.*

¿Xí láani biduidy diitz Faraón né diitzre': «Diti rimbuya Jehová?» (Éxo. 5:2; 1 Sam. 2:12; Rom. 1:21.)

2. *Bül Éxodo 6:1-13, 26-30.*

a) ¿Ximod ngú Jehová diti biduidy lagary que Abraham, Isaac né Jacob ñan ximod laabu? (Éxo. 3:13, 14; 6:3; Gén. 12:8.)

b) ¿Xí rasacno ni ma nánno que Jehová biquiin a Moisés, ná láabu diti goyo'bu puect par gonybu dxiin ni Jehová biduidy láabu? (Éxo. 6:12, 30; Luc. 21:13-15.)

3. *Bül Éxodo 7:1-13.*

a) Órni Moisés né Aarón cua'yibu balory né goyeyibu nisló Faraón par guini'yibu xi ná Jehová, ¿ló xtzúno xí labúu rasuidy guirá ni rony ni ná Dios mod ni bunyibu? (Éxo. 7:2, 3, 6; Hech. 4:29-31.)

b) ¿Ximod bilooy Jehová que no'bu más guia' que guirá diohx egipcios? (Éxo. 7:12; 1 Cró. 29:12.)

## Historia 32

### Chii plagas

1. Bibi' guirá dibuj, goní primer laa tzón plagas ni bixel Jehová Egipto.
2. ¿Xigonyo tzón plagas diti toibsi mod gocni que stipnés gatz plagas cú?
3. ¿Xí láani ngú plagas tap, gáay né xhoop?
4. ¿Xí láani góoch plagas gatz, xhoon né ga'?
5. ¿Xí láani goní Jehová ñony israelitas órni yása nasaló plaga chii?
6. ¿Xí láani góoch última plaga ni bisa' chii, né xí góoch después?

### Stipnés diitz ni non guicapyno:

1. *Bül Éxodo 7:19-8:23.*

a) Ná guirá buñ chiser ni goyo' xan xomandary Faraón labúu bunyibu ni primer né ni rarop plagas ni bixel Jehová, ¿xí biduidyibu cuent, né xí goní-yibu órni bilox godudy ni rion plagas? (Éxo. 8:18, 19; Mat. 12:24-28.)

b) ¿Ximod biduidy diitz ni rasa' tap plagas que Jehová labúu ralaa xcudx, né ximod racnéni layibu gualcáyibu ni guieed ni laa «gran tribulación»? (Éxo. 8:22, 23; Rev. 7:13, 14; 2 Cró. 16:9.)

2. *Bül Éxodo 8:24; 9:3, 6, 10, 11, 14, 16, 23-25, né 10:13-15, 21-23.*

a) Ni buny Faraón né guirá buñ chiser ni goyo' ló xtzúbu, ¿xí chop clas grupo buny representaryi-

bu ni no' ló xtzúno, né xí láani diti labúu rony chop grupo ni no' ló xtzúno? (Éxo. 8:10, 18, 19; 9: 14.)

b) ¿Ximod racné lóono Éxodo 9:16 par guienno xigony Jehová raduidy lagary que Buñdzab guibany hasta ló xtzúno? (Rom. 9:21, 22.)

3. *Biil Éxodo 12:21-32.*

¿Ximod bilaa Pascua xidal buñ ló xtzú israelitas, né xí láani biduidy diitz Pascua re'? (Éxo. 12:21-23; Juan 1:29; Rom. 5:18, 19, 21; 1 Cor. 5:7.)

## Historia 33

### Cadudyibu nisdá' Xináa

1. ¿Balac buñgueieu israelitas bire' toibsi né buñgona' né mbiox órni bisianyibu Egipto, né chú stipnés buny compañer layibu?

2. ¿Ximod bisac Faraón órni biduidybu lagary sée israelitas de Egipto, né xí bunybu?

3. ¿Xí buny Jehová par bicaa ló egipcios par diti nacalóyibu Israel, xcudx Jehová?

4. ¿Xí láani góe órni Moisés bisca' ña né xiac ló nisdá' Xináa, né xí buny guirá israelitas?

5. Órni egipcios bisobnalyibu a guirá israelitas lainy nisdá', ¿xí láani góe?

6. ¿Ximod bibaladx né biduidy guixquix israelitas a Jehová por ni bilaayibu?

### Stipnés diitz ni non guicapyno:

1. *Biil Éxodo 12:33-36.*

¿Ximod ngú xcuent Jehová goyo' que guirá israelitas nacayibu xidal cóe por guirá dxin ni bunyibu órni goyo'yibu xan xomandary Faraón? (Éxo. 3:21, 22; 12:35, 36.)

2. *Biil Éxodo 14:1-31.*

¿Ximod rachiin diitz ni bica' Moisés ló Éxodo 14: 13, 14 a guirá ni rony ni ná Dios por ni rabiyibu que Xtzú rodann Jehová ma no' gaxtiguíe? (2 Cró. 20:17; Sal. 91:8.)

3. *Biil Éxodo 15:1-8, 20, 21.*

a) ¿Xigony guirá ni rony ni ná Jehová non go'olyibu cántico? (Éxo. 15:1, 2; Sal. 105:2, 3; Rev. 15: 3, 4.)

b) ¿Xí buny Míriam né stipnés buñgona' ro' nisdá' Xináa ni labúu gisu' guirá buñgona' ni racanal Jesús órni buny xiro'yibu laa Jehová? (Éxo. 15:20, 21; Sal. 68:11.)

## Historia 34

### Toib galrró copy

1. ¿Xí láani catop buñ layoo mod rabilo ló dibuj, né ximod laa ni catopyibu?

2. ¿Xí láani raiby Moisés a gudx Israel órni guitopyibu maná?

3. ¿Xí láani ná Jehová gony gudx Israel ló xhoop govitx, né xigony?

4. Órni maná riotzaayni hasta ló gatz govitx, ¿xí ni radziguia' buñ rony Jehová?

5. ¿Balac íz raya'an Jehová gudx Israel né maná?

### Stipnés diitz ni non guicapyno:

1. *Biil Éxodo 16:1-36 né Números 11:7-9.*

a) ¿Ximod raduidy diitz Éxodo 16:8 que gapno' respet a guirá ni nap privilegio lainy congregación? (Heb. 13:17.)

b) ¿Ximod biduidy israelitas cuent guirá dzú órni goyo'yibu ló yoovich que nosi Jehová ngú ni gočné layibu? (Éxo. 16:14-16, 35; Deu. 8:2, 3.)

c) ¿Ximod buny representar Jesús maná, né ximod racnéni lóono «páa ni sieed guibá»? (Juan 6:31-35, 40.)

2. *Biil Josué 5:10-12.*

¿Balac iz israelitas godóyibu maná, láaca ximod goló'ni prueby layibu, né xí rasuidy historia re' lóono? (Éxo. 16:35; Núm. 11:4-6; 1 Cor. 10:10, 11.)

## Historia 35

### Jehová raduidy xiley

1. Chop tzón be'o de goló bire' israelitas Egipto, ¿pu lagary bigua'yibu?

2. ¿Xí nainy Jehová gony gudxcú, né xí racapyibu?

3. ¿Xigony raduidy Jehová a Moisés chop guieetabla?

4. Jehová biduidy Chii Diitz israelitas, per láaca, ¿xí stipnés leyes cua'yibu?

5. ¿Xí chop ley goní Jesucristo ni más rasac?

### Stipnés diitz ni non guicapyno:

1. *Biil Éxodo 19:1-25; 20:1-21; 24:12-18, né 31:18.*

¿Ximod racné lóono diitz ni sieed ló Éxodo 19:8 par guienno xí non gonyono órni goninéno Jehová que ma nainy lóono gonyono xchiumbu? (Mat. 16: 24; 1 Ped. 4:1-3.)

2. *Biil Deuteronomio 6:4-6; Levítico 19:18, né Mateo 22:36-40.*

¿Ximod raduidy diitz ni racanal Jesús que nadxiyibu Dios né sa'yibu? (Mar. 6:34; Hech. 4:20; Rom. 15:2.)

## Historia 36

### Torien ni góe de or

1. ¿Xí cayony buñ ni no' ló dibuj, né xigony?

2. ¿Xigony cadzuitz Jehová, né xí buny Moisés órni bibi'bu ni cayony buñre'?

3. ¿Xí rony mandary Moisés gony tipnés buñgueieu?

4. ¿Xí rasuidy historia re' lóono?

## Stipnés diitz ni non guicapyno:

1. *Bül Éxodo 32:1-35.*

a) ¿Ximod raslooy historia re' lóono mod ni rony Jehová pensary pal ragotzno religiún ni rasuidy xinésni né religiún falz? (Éxo. 32:4-6, 10; 1 Cor. 10: 7, 11.)

b) ¿Xí láani raquiin gap cuidad ni racanal Jesús órni guiyopyibu mod par tzó nakityibu, xomod canción né galrrayá? (Éxo. 32:18, 19; Efe. 5:15, 16; 1 Juan 2:15-17.)

c) ¿Ximod biduidy xfamily Leví toib mod galán órni goyo'yibu xilad Jehová? (Éxo. 32:25-28; Sal. 18:25.)

## Historia 37

### Toib yo' ro rac adorar

1. ¿Ximod laa yo' ni no' ló dibuj, né pu raquiinni?

2. ¿Xigony góoch Jehová a Moisés nasa' yo' re' par labúu nabilni naguel?

3. ¿Xí láani ngú cajien ni no' lainy cuart mitien ni caa cué yo' xiro', né xí no' lainyni?

4. ¿Chú láabu rabú Jehová par guisanir nisló Israel, né xí dexiin ronybu?

5. ¿Xí tzón cós no' lainy cuart xiro' lainy yo' ro rac adorar Jehová?

6. ¿Xí chop cós goyo' láachlu' ro góoch adorar Jehová, né ximod biquiinyibu láani?

## Stipnés diitz ni non guicapyno:

1. *Bül Éxodo 25:8-40; 26:1-37; 27:1-8, né 28:1.*

¿Xí buny representar chop querubines ni goyo' laidy «caj ni rasetnaladx acuerdo ni buny Jehová né Israel»? (Éxo. 25:20, 22; Núm. 7:89; 2 Rey. 19:15.)

2. *Bül Éxodo 30:1-10, 17-21; 34:1, 2, né Hebreos 9: 1-5.*

a) ¿Xigony goní Jehová que guirá ni rasanir nisló israelitas par gony go'ox gacyibu buñ nayaa, né ximod racné lóono ni Dios góoch layibu? (Éxo. 30: 18-21; 40:30, 31; Heb. 10:22.)

b) ¿Ximod raslooy Pablo que yo' ro rac adorar né caj ni rasetnaladx acuerdo ni buny Jehová né Israel ma diti raquiinni lo dzú ni bixelbu guüich lóo hebreos? (Heb. 9:1, 9; 10:1.)

## Historia 38

### Doce buñ ni riée raláach

1. ¿Ximod rabilo rasim balach ni no' ló dibuj? ¿Pu lagary sieetni?

2. ¿Xigony raxel Moisés doce buñ par guiláach gudx Canaán?

3. ¿Xí rani' chíi buñ ni goyee biláach gudx Canaán órni rabiguetyibu ronó Moisés?

4. ¿Ximod raduidy diitz chop buñguieeu ni biláach gudx Canaán que napyibu confianz lóo Jehová, né ximod laayibu?

5. ¿Xigony radzuitz Jehová, né xí raibybu Moisés?

## Stipnés diitz ni non guicapyno:

1. *Bül Números 13:1-33.*

a) ¿Chú gólyyibu par ñee naláach gudx Canaán, né xí oportunita gopyibu? (Núm. 13:2, 3, 18-20.)

b) Josué né Caleb, ¿xigony diti toibsi mod góoch xpensaryibu né stipnés ni goyee né layibu par guiláach, né xí rasuidy nde' lóono? (Núm. 13:28-30; Mat. 17:20; 2 Cor. 5:7.)

2. *Bül Números 14:1-38.*

a) ¿Xí sasaclono pal sanino mal de guirá ni rony representar a Jehová ló Gudxlio? (Núm. 14:2, 3, 27; Mat. 25:40, 45; 1 Cor. 10:10.)

b) ¿Ximod raslooy Números 14:24 que Jehová no'bu galrasa' por cada toib ni rony xchiimbu? (1 Rey. 19:18; Pro. 15:3.)

## Historia 39

### Xiac Aarón riala guie'

1. ¿Chú layibu diti ná guisob ni ná Moisés né Aarón, né xí raibyibu Moisés?

2. ¿Xí láani ranab Moisés gony Coré né 250 buñ ni góoch toibsi né láabu?

3. ¿Xí láani raiby Moisés a gudx Israel, né xí láani rac órni rabés ranibu?

4. ¿Xí rac Coré né 250 buñ ni góoch toibsi né láabu?

5. ¿Xí rony Eleazar xiin Aarón né guirá cós ni biquiin buñ ni ma goity par gony go'ox, né xigony ronybu láani?

6. ¿Xigony rony Jehová que xiac Aarón riala guie'? (Bibi' dibuj.)

## Stipnés diitz ni non guicapyno:

1. *Bül Números 16:1-49.*

a) ¿Xí láani buny Coré né guirá buñ ni góoch toibsi né láabu, né xigony cós mal ni bunyibu ni diti bisobyibu gocni mal nisló Jehová? (Núm. 16:9, 10, 18; Lev. 10:1, 2; Pro. 11:2.)

b) ¿Xí mal pensary gop Coré né 250 «ancianos ni rasanir lainy gudx Israel»? (Núm. 16:1-3; Pro. 15: 33; Isa. 49:7.)

2. *Bül Números 17:1-11 né 26:10.*

a) ¿Xí bislooy que xiac Aarón gole'ni guie', né xigony goní Jehová ñotzaayni lainy caj ni rasetnaladx acuerdo ni bunybu né Israel? (Núm. 17:5, 8, 10.)

b) ¿Xí ni rasac labúu guisuidyno ni buny Jehová né xiac Aarón? (Núm. 17:10; Hech. 20:28; Fili. 2: 14; Heb. 13:17.)

## Historia 40

### Moisés raguin xiac ló guiee

1. ¿Ximod ran Jehová israelitas lağa noyibu ló yoo- vich?

2. ¿Xigony ratzotz ro' israelitas órni ragu'a'yibu lagary ni góe laa Qadés?
3. ¿Ximod ngú raduidy Jehová nís par gue' buñ né nimal?
4. ¿Chú láabu buñguieeu ni no' ló dibuj ni caloyña lachda', né xigony cayonybu láani?
5. ¿Xigony raduiztné Jehová Moisés né Aarón, né xí castig raduidy Jehová layibu?
6. ¿Xí rac laidy dainy ni góe laa Hor, né chú láabu rian xalagary Aarón lainy gudx Israel?

### Stipnés diitz ni non guicapyno:

1. *Biil Números 20:1-13, 22-29 né Deuteronomio 29:5.*
- a) ¿Xí láani rasuidyno mod ni Jehová gon israelitas ló yoovich? (Deu. 29:5; Mat. 6:31; Heb. 13:5; Sant. 1:17.)
- b) ¿Ximod bibi' Jehová que Moisés né Aarón diti bunyxiro' laabu nisló gudx Israel? (Núm. 20:12; 1 Cor. 10:12; Rev. 4:11.)
- c) ¿Xí rasuidyno mod ni buny Moisés órni Jehová golo' xinés xcalrriumbu? (Núm. 12:3; 20:12, 27, 28; Deu. 32:4; Heb. 12:7-11.)

## Historia 41

### Be'el de cobre

1. ¿Xí láani ngú ni narel laidy yac ni no' ló dibuj, né xigony góoch Jehová a Moisés gony láani?
2. ¿Ximod biduidy diitz israelitas que diti rioladxbu ni rony Jehová por layibu?
3. ¿Xí láani ranab israelitas a Moisés órni Jehová bixel be'el ni rot né ragaity par gac castigar-yibu?
4. ¿Xigony raiby Jehová a Moisés que gonybu toib be'el de cobre?
5. ¿Xí rasuidy historia re' lóono?

### Stipnés diitz ni non guicapyno:

1. *Biil Números 21:4-9.*
- a) Israelitas bitzotz ro'yibu por guirá ni cua'yibu de Jehová, ¿xí sasaclono pal gonyno scúca? (Núm. 21:5, 6; Rom. 2:4.)
- b) Órni ma godudy xidal iz, ¿ximod biquiín israelitas be'el de cobre, né xí buny Ezequías ni buny mandary dzúcu? (Núm. 21:9; 2 Rey. 18:1-4.)
2. *Biil Juan 3:14, 15.*
- ¿Ximod bislooy be'el de cobre ni birel laidy yac, que scúca ñaity Jesús? (Gál. 3:13; 1 Ped. 2:24.)

## Historia 42

### Toib bor ni rani'

1. ¿Chú ngú Balac, né xigony raxelca'bu Balaam?
2. ¿Xigony rat xpor Balaam ló néz?
3. ¿Xí racadiag Balaam órni rani' bor?

4. ¿Xí raiby toib ángel a Balaam?
5. ¿Xí rac órni Balaam rony por guini' mal de Israel?

### Stipnés diitz ni non guicapyno:

1. *Biil Números 21:21-35.*
- ¿Xigony buny gann Israel a Sehón, ni buny mandary guirá amorreos, né Og ni buny mandary Basán? (Núm. 21:21, 23, 33, 34.)
2. *Biil Números 22:1-40.*
- ¿Xí razón gop Balaam par goniiny nani'bu mal de xcudx Jehová, né xí rasuidyno de historia re'? (Núm. 22:16, 17; Pro. 6:16, 18; 2 Ped. 2:15; Jud. 11.)
3. *Biil Números 23:1-30.*
- Balaam buny sani cayony ni ná Jehová, ¿ximod biduidybu diitz por ni bunybu que diti gocni scú? (Núm. 23:3, 11-14; 1 Sam. 15:22.)
4. *Biil Números 24:1-25.*
- ¿Ximod rony historia re' más nadip confianz ni napnó, que Jehová sony guirá ni ma goníbu? (Núm. 24:10; Isa. 54:17.)

## Historia 43

### Josué buñguieeu ni rasanir

1. ¿Chú layibu chop buñguieeu ni no' né Moisés ló dibuj?
2. ¿Xí raiby Jehová a Josué?
3. ¿Xigony ria'py Moisés guic dainy ni laa Nebo, né xí raiby Jehová láabu?
4. ¿Balac iz nap Moisés órni goity?
5. ¿Xigony goyo' nabann gudx Israel, per xí láani buny que nabaladxyibu?

### Stipnés diitz ni non guicapyno:

1. *Biil Números 27:12-23.*
- ¿Xí dxiiín ni rasac raduidy Jehová a Josué, né ló naare' ximod Jehová no'bu galrasa' por Xcudx? (Núm. 27:15-19; Hech. 20:28; Heb. 13:7.)
2. *Biil Deuteronomio 3:23-29.*
- ¿Xigony diti biduidy Jehová lagary que Moisés né Aarón ño'yibu lainy Gudxlio ni Jehová Goní guiduidy a Israel, né xí rasuidyno de láani? (Deu. 3:25-27; Núm. 20:12, 13.)
3. *Biil Deuteronomio 31:1-8, 14-23.*
- Órni ma yaaca gaity Moisés goninébu gudx Israel, ¿ximod bienni ló xtiitzbu que nigolú bicadiagbu órni Jehová golo' láabu ló néz? (Deu. 31:6-8, 23.)
4. *Biil Deuteronomio 32:45-52.*
- ¿Ximod ratzá la Biblia mod nacno? (Deu. 32:47; Lev. 18:5; Heb. 4:12.)
5. *Biil Deuteronomio 34:1-12.*
- Ná Moisés diti bibi'bu Jehová, ¿ximod raduidy diitz Deuteronomio 34:10 que bidzakgolúbu Jehová? (Éxo. 33:11, 20; Núm. 12:8.)

## Historia 44

### Rahab racachlan ni raláach

1. ¿Pu lagary rabés Rahab?
2. ¿Chú láabu chop buñgüeeu ni no' ló dibuj, né xigony no'bu gudx Jericó?
3. ¿Xí ná buñgüeeu ni rony mandary Jericó que gony Rahab, né xí racapy Rahab?
4. ¿Ximod racné Rahab a chop biinre', né xí ranab Rahab lóoyibu?
5. ¿Xí diitz raiby guiroppa buñgüeeu ni goyee biláach gudx Jericó a Rahab?

#### Stipnés diitz ni non guicapyno:

1. *Bül Josué 2:1-24.*

¿Ximod birecaa diitz ni goní Jehová ni sieed ló Exodo 23:28 órni israelitas cualóyibu gudx Jericó? (Jos. 2:9-11.)

2. *Bül Hebreos 11:31.*

Mod buny Rahab, ¿ximod raduidyni diitz que nigolú rasac gapnó fe? (Rom. 1:17; Heb. 10:39; Sant. 2:25.)

## Historia 45

### Cadudyibu gu'uc Jordán

1. ¿Xí galrradzigua' rony Jehová par labúu tudy israelitas gu'uc Jordán?
2. ¿Ximod guiduidy israelitas diitz que napyibu fe par tudyibu gu'uc Jordán?
3. ¿Xigony raiby Jehová a Josué que guitopbu doce guieerop lainy gu'uc Jordán?
4. ¿Xí láani raiby guiroppa buñgüeeu ni goyee biláach gudx Jericó a Rahab?

#### Stipnés diitz ni non guicapyno:

1. *Bül Josué 3:1-17.*

a) Xomod sieed ló historia re', ¿xí non gonyo par labúu gaené Jehová né guiduidybu xilaaybu lóono? (Jos. 3:13, 15; Pro. 3:5; Sant. 2:22, 26.)

b) ¿Ximod góe gu'uc Jordán órni israelitas godudyibu par guidxinyibu Gudxlio ni Jehová Goní guiduidy layibu, né ximod bunyxiro' nde' laa Jehová? (Jos. 3:15; 4:18; Sal. 66:5-7.)

2. *Bül Josué 4:1-18.*

¿Xigony bitopyibu doce guiee lainy gu'uc Jordán ni bicuatzaayibu Guilgal? (Jos. 4:4-7.)

## Historia 46

### Muros ni nap gudx Jericó

1. ¿Xí rony mandary Jehová gony soldad né guirá ni rasanir nisló Israel ló xhoop govit? 2. Órni radxiin gatz govit, ¿xí non gony buñgüeeu ni no' né Josué?

3. Xomod rabilo ló dibuj, ¿xí cayac né muros ni nap Jericó?

4. ¿Xigony nal toib do' xináa ro' toib bentan?

5. ¿Xí ná Josué gony soldad a guirá buñ né a gudx Jericó, plata, or, cobre né hierro ni napni?

6. ¿Xí rony mandary Josué gony chop buñgüeeu ni goyee biláach Jericó?

#### Stipnés diitz ni non guicapyno:

1. *Bül Josué 6:1-25.*

a) ¿Xigony ranino que ni buny israelitas órni biduidyibu xaij roloo gudx Jericó, né ni cayony testigos xtuny Jehová ni rasaayibu yo' por yo' ló dzure' ni ma guidubylagá láacani ngú? (Jos. 6:15,16; Isa. 60:22; Mat. 24:14; 1 Cor. 9:16.)

b) ¿Ximod góe cumplir Josué 6:26, órni godudy 500 iz, né xí rasudy nde' lóono de guirá ni ma goní Jehová gony? (1 Rey. 16:34; Isa. 5:11.)

## Historia 47

### Toib gobáan gudx Israel

1. ¿Chú ngú buñgüeeu ni no' ló dibuj ni racach xidal cós ni rasac ni cua'bu lainy gudx Jericó, né chú stipnés ni cayacné láabu?
2. ¿Xigony nigolú mal ni buny Acán né xfamily?
3. ¿Xí racapy Jehová, órni Josué ranabdiitz láabu xigony buny gann gudx Hai layibu?
4. ¿Xí láani ronyibu a Acán né xfamily órni radxiinéyibu biinre' nisló Josué?
5. ¿Xí ni rasac rasuidyni lóono ni gosaclóo Acán?

#### Stipnés diitz ni non guicapyno:

1. *Bül Josué 7:1-26.*

a) Órni Josué goniné Jehová, ¿ximod biduidybu diitz que bidzakbu Jehová? (Jos. 7:7-9; Sal. 119:145; 1 Juan 5:14.)

b) ¿Xí láani raslooy mod ni buny Acán, né xigony gapnó cuidad par diti gonyo scúca? (Jos. 7:11, 14, 15; Pro. 15:3; 1 Tim. 5:24; Heb. 4:13.)

2. *Bül Josué 8:1-29.*

¿Ló xtzúno xí compromis napnó né la congregación? (Jos. 7:13; Lev. 5:1; Pro. 28:13.)

## Historia 48

### Gabaonitas naní xcalrrien

1. ¿Ximod gadzé mod góe xpensary gabaonitas de stipnés buñ cananeos ni golés gahx de layibu?
2. Xomod rabilo ló dibuj, ¿xí rony gabaonitas, né xigony?
3. Josué né ancianos ni rasanir lainy gudx Israel, ¿xí acuerdo ronybu né gabaonitas, per xi láani raduidyibu cuent órni godudy tzón govit?
4. ¿Xí rac órni tipnés buñgüeeu ni rony mandary stipnés gudx racadiagyibu que gabaonitas góe toibsi né Israel?

## Stipnés diitz ni non guaicapno:

1. *Bül Josué 9:1-27.*

a) Jehová goní que «nagaityibu guirá buñ de gudxcú», ¿ximod raduidy diitz xí clas Dios nacbu, órni bituidybu scási' xcalkie gabaonitas? (Jos. 9:22, 24; Mat. 9:13; Hech. 10:34, 35; 2 Ped. 3:9.)

b) Órni Josué buny cumplir acuerdo ni bunybu né gabaonitas, ¿xí rasuidy nde' a guirá ni racanal Jesús ló xtzúno? (Jos. 9:18, 19; Mat. 5:37; Efe. 4:25.)

2. *Bül Josué 10:1-5.*

Xomod gabaonitas gocyibu toibsi né israelitas, ló naare', ¿ximod xidalguixo buñ ni cués ló Gudxlio né guirá ni tze guibá racyibu toibsi né xí rasacloyibu por guirá nde'? (Jos. 10:4; Zac. 8:23; Mat. 25:35-40; Rev. 12:17.)

## Historia 49

### Govitz ria'anni toibsi lagary

1. ¿Xí láani cani' Josué ló dibuj, né xigony?

2. ¿Ximod racné Jehová a Josué né soldad ni no' né láabu?

3. ¿Balac buñguieeu mal ni buny mandary stipnés gudx binitló Josué, né balac íz bunybu nde'?

4. ¿Xigony ratzoo Josué layoo ni nap gudx Canaan?

5. ¿Balac íz nap Josué órni raity, né xí láani rac né buñ órni raitybu?

## Stipnés diitz ni non guaicapno:

1. *Bül Josué 10:6-15.*

¿Xí confianz raca'no que Jehová bunybu que Govitz né Be'ó diti gosaani par gocnébu Israel? (Jos. 10:8, 10, 12, 13; Sal. 18:3; Pro. 18:10.)

2. *Bül Josué 12:7-24.*

Ná Josué cualó guirá buñre', ¿chú láabu ngú ni binitló 31 buñguieeu ni buny mandary gudx Canaan, né xigony raquiin ganno guirá nde' ló xtzúno? (Jos. 12:7; 24:11-13; Deu. 31:8; Luc. 21:9, 25-28.)

3. *Bül Josué 14:1-5.*

¿Ximod bidzoo layoo lad family xtuny Israel, né xí raslooy nde' lóono mod ni guidzoo layoo ló Gudxlio móz ló dzú ni sietra? (Jos. 14:2; Isa. 65:21; Eze. 47:21-23; 1 Cor. 14:33.)

4. *Bül Jueces 2:8-13.*

Xomod Josué bicaabu israelitas par diti nasianyibu de nienyibu Jehová, ló xtzúno, ¿chú layibu racaa xcudx Jehová par diti guisianyibu guienyibu a Jehová? (Jue. 2:8, 10, 11; Mat. 24:45-47; 2 Tes. 2:3-6; Tito 1:7-9; Rev. 1:1; 2:1, 2.)

## Historia 50

### Chop buñgona' ni gop balory

1. ¿Chú layibu nac jueces, né ximod laa tipnés-yibu?

2. ¿Xí privilegio nap Débora que stipnés buñgona' diti nap, né xí dxiin ronybu?

3. Órni Israel bicadiag que Jabín buñguieeu ni rony mandary Canaan né Sisara ni rony mandary soldad ná guicaló Israel, ¿xí raiby Jehová a Débora par gaibybu a juez Barac, né chú láabu rani' Débora que buñ guisanadx?

4. ¿Ximod raslooy Jael que nacbu toib gona' ni nap balory?

5. ¿Xí rac después órni raity Jabín ni rony mandary Canaan?

## Stipnés diitz ni non guaicapno:

1. *Bül Jueces 2:14-22.*

¿Xigony bidzuitné Jehová israelitas, né xí rasuidyno de nde'? (Jue. 2:20; Pro. 3:1, 2; Eze. 18:21-23.)

2. *Bül Jueces 4:1-24.*

¿Xí labúu guisuidy guirá buñgona' ni racanal Jesús de fe né balory ni gop Débora né Jael? (Jue. 4:4, 8, 9, 14, 21, 22; Pro. 31:30; 1 Cor. 16:13.)

3. *Bül Jueces 5:1-31.*

Barac né Débora biliyibu cántico a Jehová órni bunyibu gann, ¿ximod labúu guisu'no layibu órni guinabno lóo Jehová por Xtzú rodannbu ni ma no' gaxtiguié? (Jue. 5:3, 31; 1 Cró. 16:8-10; Rev. 7:9, 10; 16:16; 19:19-21.)

## Historia 51

### Rut né Noemí

1. ¿Xigony goyee Noemí gudx ni laa Moab?

2. ¿Chú layibu ngú Rut né Orpá?

3. ¿Ximod racapy Rut né Orpá órni Noemí raiby layibu que guibiguetiyibu xcudxyibu?

4. ¿Chú ngú Boaz, né ximod racnébu a Rut né Noemí?

5. ¿Ximod golé' Boaz né Rut laa xiin, né xigony non guisetnaladxno láabu?

## Stipnés diitz ni non guaicapno:

1. *Bül Rut 1:1-17.*

a) ¿Xí diitz móz goní Rut ni biduidy diitz que diti sasiambu Noemí? (Rut 1:16, 17.)

b) ¿Rut goyo' puext par gocné a Noemí, ló xtzúno ximod rony «stipnés xiil» scúca né guirá ni gué gibá? (Juan 10:16; Zac. 8:23.)

2. *Bül Rut 2:1-23.*

¿Ximod godi'x Rut toib mod ni labúu guisu' guirá mbioxhlas? (Rut 2:17, 18; Pro. 23:22; 31:15.)

3. *Bül Rut 3:5-13.*

a) ¿Ximod bibi' Boaz ni Rut goyo' puext par ñac tzeelbu xalagary naca' toib más mbioxhlas láabu?

b) ¿Xí rasuidyno mod buny Rut par guienno ximod nac galnadxi? (Rut 3:10; 1 Cor. 13:4, 5.)

#### 4. *Bül Rut 4:7-17.*

¿Ximod labúu guisu' buñgüieeu ni no' lainy congregateción mod ni buny Boaz? (Rut 4:9, 10; 1 Tim. 3:1, 12, 13; 5:8.)

### Historia 52

#### Gedeón né 300 buñgüieeu

1. ¿Xí gálnagan no' guirá israelitas ló, né xigony?
2. ¿Xigony raiby Jehová a Gedeón que napbu xidalgüixo soldad?
3. ¿Balac buñgüieeu riané Gedeón órni raxelbu guirá ni radzuiby lidz?
4. Xomod rabilo ló dibuj, ¿ximod bilit Jehová ló soldad Gedeón par nosi 300 buñgüieeu ñañan né láabu?
5. ¿Ximod ratzoo Gedeón a 300 buñgüieeu ni no' né láabu, né ximod rony Israel gann?

#### Stipnés diitz ni non guicapyno:

##### 1. *Bül Jueces 6:36-40.*

- a) ¿Ximod gontzaay Gedeón xí ni ná Jehová?
- b) ¿Ximod labúu ganno xí ni ná Jehová ló xtzúno? (Pro. 2:3-6; Mat. 7:7-11; 2 Tim. 3:16, 17.)

##### 2. *Bül Jueces 7:1-25.*

- a) ¿Xí rasuidyno de 300 buñgüieeu ni goyo' nani órni go' nis, ni diti buny xomod buny stipnés láani? (Jue. 7:3, 6; Rom. 13:11, 12; Efe. 5:15-17.)
- b) Xomodca 300 buñgüieeu bisuidyibu mod buny Gedeón, ¿láaca ximod no' ni rasuidyno de Jesús ni láaca laa Gedeón Lagol? (Jue. 7:17; Mat. 11:29, 30; 28:19, 20; 1 Ped. 2:21.)
- c) ¿Ximod racné Jueces 7:21 lóono par tzóno puext gacnéno rotísi guixel xcudx Jehová lóono? (1 Cor. 4:2; 12:14-18; Sant. 4:10.)

##### 3. *Bül Jueces 8:1-3.*

Órni gony reglarno galradíil ni napno né toib xhermanno, ¿xí rasuidyno de Gedeón mod buny reglarbu galradíiditzi ni goyo' né eframitas? (Pro. 15:1; Mat. 5:23, 24; Luc. 9:48.)

### Historia 53

#### Jefté raduidy xtiitz

1. ¿Chú ngú Jefté, né pu dzú bibanybu?
2. ¿Xí rani' Jefté guiduidy a Jehová?
3. ¿Xigony rasaló rio' nabann Jefté órni radxiin lidz después ni ronybu gann guirá ammonitas?
4. ¿Xí rani' xiindzap Jefté órni ranbu ni góoch bi-xiosá a Jehová?
5. ¿Xigony randxi' buñ israelitas a xiindzap Jefté?

#### Stipnés diitz ni non guicapyno:

##### 1. *Bül Jueces 10:6-18.*

Israelitas diti guirá ór bunyibu ni ná Jehová, lóono, ¿xí sasaclono pal gonyo scúca? (Jue. 10:6, 15, 16; Rom. 15:4; Rev. 2:10.)

#### 2. *Bül Jueces 11:1-11, 29-40.*

- a) Jefté goní que guiduidybu xiindzapbu a Jehová xomod toib «galrrascad», ¿ximod náno que ndé diti raduidy diitz que nagaitybu xiimbu par Jehová? (Jue. 11:31; Lev. 16:24; Deu. 18:10, 12.)
- b) ¿Ximod biduidy Jefté xiindzap xomod toib galrrascad a Jehová?
- c) Ná nagann gocni par Jefté gonybu ni goníbu, ¿xí rasuidyno de láabu? (Jue. 11:35, 39; Ecl. 5:4, 5; Mat. 16:24.)
- d) Guirá mbioxhlan ni racanal Jesús, ¿ximod labúu guisu'yibu mod buny xiindzap Jefté al gacyibu precursor? (Jue. 11:36; Mat. 6:33; Fili. 3:8.)

### Historia 54

#### Toib buñgüieeu ni más nadip

1. ¿Ximod laa buñgüieeu ni más nadip ni bibany, né chú buny que ñac nadipbu?
2. Xomod rabilo ló dibuj, ¿xí láani buny Sansón a toib betz ons?
3. ¿Xí láani cayaiby Sansón a Dalila ló dibuj, né xigony rony ndé' que filisteos guináyibu Sansón?
4. ¿Ximod rony Sansón par guigaity 3,000 filisteos ni nac xi enemigbu dzú láabu goitybu?

#### Stipnés diitz ni non guicapyno:

##### 1. *Bül Jueces 13:1-14.*

¿Xigony Manóah né tze'el nacyibu toib mod galán ni labúu guisu' guirá ni ma no' xiin par guisnisiyibu guirá ximboxyibu galán? (Jue. 13:8; Sal. 127:3; Efe. 6:4.)

##### 2. *Bül Jueces 14:5-9 né 15:9-16.*

- a) Fuers ni raquiin Jehová par gonybu ni nábu, gocné a Sansón par nagaity toib betz ons, par nachigdo'bu do' copy né órni biquiimbu bichgro' toib bor par nagaity 1,000 buñgüieeu, ¿xí rasloy guirá ndé' de fuers ni raquiin Jehová par gonybu ni nábu?
- b) Ló xtzúno, ¿ximod racné lóono fuers ni raquiin Jehová par gonybu ni nábu? (Jue. 14:6; 15:14; Zac. 4:6; Hech. 4:31.)

##### 3. *Bül Jueces 16:18-31.*

¿Ximod bunyni mal a Sansón que nadzakbu buñ ni diti rony ni ná Dios, né xí rasuidyno de láani? (Jue. 16:18, 19; 1 Cor. 15:33.)

### Historia 55

#### Toib mbiox rony xchiin Dios

1. ¿Ximod laa mbioxien ni no' ló dibuj, né chú layibu stipnés ni no' né láabu?
2. ¿Xí ranab Ana toibtica dzú órni riebhu yo' ro rac adorar Jehová, né ximod racapy Jehová láabu?
3. Órni rinéyibu Samuel lainy yo' ro rac adorar Jehová, ¿de balac iz Samuel, né xí láani raguib xi-ná'bu par láabu guirá iz?

4. ¿Ximod laa chop xiin Elí, né xí clas buñ nacbyu?

5. ¿Ximod rony Jehová par labúu guininébu Samuel, né xí raiby Jehová láabu?

6. Órni Samuel ranís, ¿xí dxiin raca'bu, né xí rac órni ma nacbu buñgol?

### Stipnés diitz ni non guicapyo:

1. *Büil 1 Samuel 1:1-28.*

a) ¿Xí galán mod bisian Elqaná par guirá ni rasanir laniolidx, órni gosanirbu ló adoración ni rasuidy xiénsni? (1 Sam. 1:3, 21; Mat. 6:33; Fili. 1:10.)

b) ¿Xí rasuidy mod cualó Ana toib galnagan? (1 Sam. 1:10, 11; Sal. 55:22; Rom. 12:12.)

2. *Büil 1 Samuel 2:11-36.*

¿Ximod ngú bisanadx Elí guiropeca xiin más que a Jehová, né xigony gapnó cuidad diti gonyo scúca? (1 Sam. 2:22-24, 27, 29; Deu. 21:18-21; Mat. 10:36, 37.)

3. *Büil 1 Samuel 4:16-18.*

¿Xí tap abís nadzúpy de lo guerr radxiin rono' Elí, né xí rascalobu?

4. *Büil 1 Samuel 8:4-9.*

¿Ximod goniná Israel a Jehová, né ximod labúu diti guisiano de gacnéno Gobierno xtuny Jehová ló xtzúno? (1 Sam. 8:5, 7; Juan 17:16; Sant. 4:4.)

## Historia 56

### Saúl ni primer buny mandary Israel

1. ¿Xí cayony Samuel ló dibuj, né xigony?

2. ¿Xigony rioladx Jehová mod nac Saúl, né xí clas buny nacbu?

3. ¿Ximod laa xiinga'n Saúl, né xí ronybu?

4. ¿Xigony góe naguel Saúl buny galrrascad a Jehová lagary nabésbu Samuel ñony láani?

5. ¿Xí rasuidy de historia xtuny Saúl?

### Stipnés diitz ni non guicapyo:

1. *Büil 1 Samuel 9:15-21 né 10:17-27.*

Ni Saúl diti góe buñ farmay, ¿ximod gocnéni láabu par diti ñac naguelbu ñonybu mal a tipnés buñguieeu ni goní mal láabu? (1 Sam. 9:21; 10:21, 22, 27; Pro. 17:27.)

2. *Büil 1 Samuel 13:5-14.*

¿Xí galkié buny Saúl lagary ni góe laa Guilgal? (1 Sam. 10:8; 13:8, 9, 13.)

3. *Büil 1 Samuel 15:1-35.*

a) ¿Xí galkié rodann buny Saúl órni cualóbu Agag, ni rony mandary Amaleq? (1 Sam. 15:2, 3, 8, 9, 22.)

b) ¿Ximod biyopy Saúl mod par xcalkiébu diti ñac xiro' né nagotzbu dool a stipnés? (1 Sam. 15:24.)

c) ¿Xigony gapnó cuidad órni tzó ni guiduidy litz lóono? (1 Sam. 15:19-21; Sal. 141:5; Pro. 9:8, 9; 11:2.)

## Historia 57

### Dios golú David

1. ¿Ximod laa mbioxhla ni rabilo ló dibuj, né xigony náno que napbu balory?

2. ¿Ximod laa gudx ro rabés David, né ximod laa bixiosbu né bixiogolbu?

3. ¿Xigony raiby Jehová a Samuel tze lidx Jesé ni rian Belén?

4. ¿Xí láani rac órni Jesé riné gatz de xiinga'n nisló Samuel?

5. ¿Xí láani raiby Jehová a Samuel órni radxiin David nislóbu?

### Stipnés diitz ni non guicapyo:

1. *Büil 1 Samuel 17:34, 35.*

¿Ximod raslooy guirá ni godudy David ló que gobu balory né confianz lóo Jehová? (1 Sam. 17:37.)

2. *Büil 1 Samuel 16:1-14.*

a) ¿Ximod racné Jehová lóono né diitz ni bica'bu ló 1 Samuel 16:7, par diti guidzakno toibsi clas buñ né gonyo mal pensary de buñ sin guimbu-no mod naciyibu? (Hech. 10:34, 35; 1 Tim. 2:4.)

b) ¿Ximod raslooy mod buny Saúl que órni Jehová ma diti raduidy fuers ni raquiimbu par gonybu ni nábu, labúu tzó toib espíritu mal xalagaryni ni guichiin lóono gonyo pór cóe mal? (1 Sam. 16:14; Mat. 12:43-45; Gál. 5:16.)

## Historia 58

### David né Goliat

1. ¿Ximod goní Goliat que israelitas diti labúu gony gann?

2. ¿Balac midid naso' Goliat, né xí guiscad Saúl a buñguieeu ni guigaity a Goliat?

3. ¿Xí racapy David órni Saúl raiby láabu que diti labúu tzébu guicalóbu Goliat portín mbioxsbu?

4. ¿Ximod raslooy David confianz lóo Jehová mod cuapybu a Goliat?

5. Xomod rabilo ló dibuj, ¿xí láani raquiin David par ragaitybu Goliat, né xí rac después né filisteos?

### Stipnés diitz ni non guicapyo:

1. *Büil 1 Samuel 17:1-54.*

a) ¿Xí láani buñ que David ñap balory, né ximod labúu guisu'no balory ni gobpu? (1 Sam. 17:37, 45; Efe. 6:10, 11.)

b) Guirá ni racanal Jesús, ¿xigony diti non guiás-ki'a'bu nisló stipnés ló galraguit o ló stipnés galnakit, xomod buñ Goliat? (1 Sam. 17:8; Gál. 5:26; 1 Tim. 4:8.)



c) ¿Ximod raduidy diitz xtiitz David que gopbu confianz que Dios gacné láabu? (1 Sam. 17:45-47; 2 Cró. 20:15.)

d) Historia re' diti nosi rani'ni mod chop gudx cualó sa', ¿ximod raslooyini que guerr re' gocni entre diohx falz né Jehová, Dios ni rasuidy xinésni? (1 Sam. 17:43, 46, 47.)

e) ¿Ximod rasu' tidxo buñ ni guié guibá mod buny David ni gop confianz lóo Jehová? (1 Sam. 17:37; Jer. 1:17-19; Rev. 12:17.)

## Historia 59

### Xigony raxony David

1. ¿Xigony bidzuitzné Saúl a David, per ximod diti toibsi mod nac xpensary Jonatán de bixiosbu Saúl?

2. ¿Xí rac toibtica dzú órni David cayo'ol arpa par guicadiag Saúl?

3. ¿Xí ná Saúl gony David par labúu guicábu Mical, né xigony ranibu nde'?

4. Xomod rabino ló dibuj, ¿xí rac ni rion buelt órni David ro'ol arpa par guicadiag Saúl?

5. ¿Ximod rony Mical par guilaabu David, né xí non gony David ló gatz iz?

### Stipnés diitz ni non guicapyno:

1. *Bül 1 Samuel 18:1-30.*

a) ¿Xí biduidy diitz galnadxí ni gop Jonatán a David que scú gac galnadxí de «stipnés xiił», né «tidxo buñ ni gony mandary lainy guibá»? (1 Sam. 18:1; Juan 10:16; Luc. 12:32; Zac. 8:23.)

b) Jonatán ngú non ñony mandary xalagary Saúl, ¿ximod raduidy diitz 1 Samuel 18:4 que láabu goyo'bu puext bisobbu a buñguieeu ni Jehová golú par gony mandary?

c) ¿Ximod raslooy mod buny Saúl que pal raso-bladxno ni nap stipnés nde' labúu sony que tza-guiabno ló toib galkié rodann, né xí sasaclono pal gonyo scúca? (1 Sam. 18:7-9, 25; Sant. 3:14-16.)

2. *Bül 1 Samuel 19:1-17.*

¿Ximod góe arriesgar Jonatán órni cualóbu Saúl? (1 Sam. 19:1, 4-6; Pro. 16:14.)

## Historia 60

### Abigail né David

1. ¿Ximod laa buñgona' ni no' ló dibuj ni cadxin rono' David, né xí clas buñ nacbu?

2. ¿Chú ngú Nabal?

3. ¿Xigony raxel David tipnés buñguieeu ni no' né láabu guinabyibu gacné Nabal layibu?

4. ¿Xí raiby Nabal a tipnés buñguieeu ni bixel David, né xí rony David órni ranbu nde'?

5. ¿Ximod raslooy Abigail que nacbu toib buñgona' ni naní xcalrrien?

### Stipnés diitz ni non guicapyno:

1. *Bül 1 Samuel 22:1-4.*

¿Ximod labúu gonyno xomod buny xfamily David órni gacnéno xhermanno lainy congregación? (Pro. 17:17; 1 Tes. 5:14.)

2. *Bül 1 Samuel 25:1-43.*

a) ¿Xigony la Biblia rasetlaa Nabal xomod toib buñ ni diti raquiin? (1 Sam. 25:2-5, 10, 14, 21, 25.)

b) Guirá buñgona' ni racanal Jesús ni ma no' tze'el, ¿ximod labúu guisu'yibu mod buny Abigail? (1 Sam. 25:32, 33; Pro. 31:26; Efe. 5:24.)

c) ¿Xí chop cóe mal diti biduidy lagary Abigail ñony David? (1 Sam. 25:31, 33; Rom. 12:19; Efe. 4:26.)

d) ¿Ximod racné a buñguieeu guibíyibu buñgona' mod ná Jehová, xomod bibi' David Abigail? (Hech. 21:8, 9; Rom. 2:11; 1 Ped. 3:7.)

## Historia 61

### David rony mandary

1. ¿Xí láani buny David né Abisai la'ga Saúl natiasy lad guirá soldad?

2. ¿Xí ranabdiitz David a Saúl?

3. ¿Pu lagary riée David órni ralox raninébu Saúl?

4. ¿Xigony nigolú rio' nabann David né raca'bu toib cántico móz?

5. ¿Balac iz nap David órni buñ raloyña láabu par gony mandarybu gudx Hebrón, né ximod laa tipnés xiimbu?

6. ¿Pu lagary rony mandary David después?

### Stipnés diitz ni non guicapyno:

1. *Bül 1 Samuel 26:1-25.*

a) ¿Ximod bislooy David ló diitz ni sieed 1 Samuel 26:11 que láabu bisobbu guirá ni ná Dios? (Sal. 37:7; Rom. 13:2.)

b) Pal ronyo por gacno buñtzay né toib buñ né láabu diti rioladx mod ronyo, ¿ximod labúu gacné lóono diitz ni goní David ló 1 Samuel 26:23 par gapnó toib pensary galán? (1 Rey. 8:32; Sal. 18:20.)

2. *Bül 2 Samuel 1:26.*

¿Ximod ni racanal Jesús labúu tzó «xiro' galnadxí ladyibu» mod ni gop David né Jonatán? (1 Ped. 4:8; Col. 3:14; 1 Juan 4:12.)

3. *Bül 2 Samuel 5:1-10.*

a) ¿Balac iz buny mandary David, né ximod bidzoo gobierno xtunybu? (2 Sam. 5:4, 5.)

b) David góchu toib buen soldad, bunybu gann xidal xi enemigbu né bidxin midid buny mandarybu, ¿ximod bunybu guirá nde', né xí rasetnaladx nde' lóono? (2 Sam. 5:10; 1 Sam. 16:13; 1 Cor. 1:31; Fili. 4:13.)

## Historia 62

### Rio' gálnagan lidx David

1. ¿Xí láani rac né gudx Canaán órni Jehová rac-né a israelitas?
2. ¿Xí rac toib godzu órni David no'bu guic yo' ro rony mandarybu?
3. ¿Xigony radzuitzné Jehová David?
4. ¿Chú ngú buñgüeeu ni no' ló dibuj ni bixel Jehová par guininé David por guirá galkié ni bunybu, né xí rani' buñgüeeu re' ni gac né David?
5. ¿Xí gálnagan nap David?
6. ¿Chú láabu rony mandary gudx Israel xalagary David órni láabu raitybu?

#### Stipnés diitz ni non guicapyño:

1. *Bül 2 Samuel 11:1-27.*
  - a) ¿Ximod ralaani lóono que gonyño xchiin Jehová guirá ór?
  - b) ¿Xí láani bichiin a David ñab ló galkié, né ni gosaclobu xí rasuidyini lóono ni cayony ni ná Dios par gapnó cuidad diti guisacloño mod gosacloó David? (2 Sam. 11:2; Mat. 5:27-29; 1 Cor. 10:12; Sant. 1:14, 15.)
2. *Bül 2 Samuel 12:1-18.*
  - a) ¿Xí labúu guisuidy ancianos né buñ ni ma no' xiin órni guiduidybu litz, xomod buny Natan órni biduidybu litz a David? (2 Sam. 12:1-4; Pro.12:18; Mat. 13:34.)
  - b) ¿Xigony binladx Jehová a David? (2 Sam. 12: 13; Sal. 32:5; 2 Cor. 7:9, 10.)

## Historia 63

### Salomón buñnan ni rony mandary

1. ¿Xí ranabdiitz Jehová a Salomón, né ximod rapybu?
2. Por ni Jehová bioladx ni gonab Salomón, ¿xí cós rani' Jehová guiduidy a Salomón?
3. ¿Xí gálnagan ritné chop buñgona' rono' Salomón?
4. Mod rabilo ló dibuj, ¿ximod rabexa Salomón gálnagan cú?
5. ¿Ximod nac xcalmandary Salomón, né xigony?

#### Stipnés diitz ni non guicapyño:

1. *Bül 1 Reyes 3:3-28.*
  - a) ¿Xí rasuidy a guirá buñgüeeu ni nap privilegio lainy xcudx Jehová diitz ni goní Salomón ló 1 Reyes 3:7? (Sal. 119:105; Pro. 3:5, 6.)
  - b) Mod gonab Salomón lóo Jehová, ¿ximod labúu guisuíno láabu órni tzó ni guinabno lóo Jehová? (1 Rey. 3:9, 11; Pro. 30:8, 9; 1 Juan 5:14.)
  - c) ¿Xí confianz raduidy lóono mod Salomón gole-xa gálnagan de chop buñgona', que ló dzú ni sietra

Salomón Lagol, Jesucristo, láaca sony mandary-bu galán? (1 Rey. 3:28; Isa. 9:6, 7; 11:2-4.)

2. *Bül 1 Reyes 4:29-34.*

- a) ¿Ximod cuapy Jehová órni Salomón gonab láabu toib gálnabany ni rasob? (1 Rey. 4:29.)
- b) Buñ ni bibany ló tztzú Salomón bunyibu tem por bicadiagyibu xcalnan Salomón, ¿ximod rasuidy nde' lóono mod guibino la Biblia órni guisuidyino láani? (1 Rey. 4:29, 34; Juan 17:3; 2 Tim. 3:16.)

## Historia 64

### Salomón rasa' yo' xiro'

1. ¿Balac íz rinéni Salomón rasa' yo' xiro' ro rac adorax Jehová, né xigony xiro' bidxiich gócx gaxt par goya'ni?
2. ¿Balac cuart ni más rasac nap yo' xiro', né xí rago'bu lainy cuart ni no' más lanio'?
3. ¿Xí ranab Salomón a Jehová órni ralox ria' yo' xiro' re'?
4. ¿Ximod raslooy Jehová que rabaladxbu ni Salomón raniné láabu?
5. Guirá tze'el Salomón, ¿xí láani ronyibu gann gony Salomón, né xí rasaclobu?
6. ¿Xigony radzuitzné Jehová a Salomón, né xí raibybu a Salomón?

#### Stipnés diitz ni non guicapyño:

1. *Bül 1 Crónicas 28:9, 10.*

Órni rolno diitz ni David goní ló 1 Crónicas 28: 9, 10, ¿xí láani non gonyño guirá dzú lağa nabany-no? (Sal. 19:14; Fili. 4:8, 9.)
2. *Bül 2 Crónicas 6:12-21, 32-42.*
  - a) ¿Ximod bislooy Salomón que ni toib yo' ni rasa' buñgudxlió labúu cués Dios ni no' más Guia' lainy-ni? (2 Cró. 6:18; Hech. 17:24, 25.)
  - b) ¿Xí rasuidyini lóono de Jehová diitz ni goní Salomón ló 2 Crónicas 6:32, 33? (Hech. 10:34, 35; Gál. 2:6.)
3. *Bül 2 Crónicas 7:1-5.*

Suusi guirá xiin israelitas bunyxiro'yibu laa Jehová órni bibiyibu galrradziguia' ni bunybu, ¿ximod labúu guichiinni lóono órni rabino guirá gálnasác ni raduidy Jehová xcudx? (2 Cró. 7:3; Sal. 22:22; 34:1; 96:2.)
4. *Bül 1 Reyes 11:9-13.*

¿Ximod raslooy mod gócx Salomón dzú bibanybu que nigoló rasac diti tzaguiaabno ló mal lağa nabanyo? (1 Rey. 11:4, 9; Mat. 10:22; Rev. 2:10.)

## Historia 65

### Gobierno radzoni

1. ¿Ximod laa chop buñgüeeu ni rabilo né dibuj, né chú layibu?

2. ¿Xí láani rony Ahiya né lairy ni nócbu, né xí rauidy diitz ni bunybu né láani?

3. ¿Xí ná Salomón gony a Jeroboán?

4. ¿Xigony raloyña buñ a Jeroboán par gony mandary chii family xiro'?

5. ¿Xigony rasa' Jeroboán chop torien de or, xí rac né gudx después?

6. ¿Xí láani rac né gobierno de chop family xiro' né yo' xiro' ni no' lainy gudx Jerusalén?

### Stipnés diitz ni non guicapyno:

1. *Bül 1 Reyes 11:26-43.*

¿Xí clas buñ góe Jeroboán, né xí goní Jehová guidy láabu pal rasobbu xiley Jehová? (1 Rey. 11: 28, 38.)

2. *Bül 1 Reyes 12:1-33.*

a) ¿Xí labúu guisuidy guirá ni ma no' xiin né ancianos mod buny Rehoboam, ni diti biquimbu galán xcalmandarybu? (1 Rey. 12:13; Ecl. 7:7; 1 Ped. 5:2, 3.)

b) ¿Chú layibu labúu gacné mbioxhlan ni labúu co' layibu lo' néz par labúu gonyibu cóe buny lága nabanyibu? (1 Rey. 12:6, 7; Pro. 1:8, 9; 2 Tim. 3:16, 17; Heb. 13:7.)

c) ¿Xigony bisa' Jeroboán chop lagary par guienyibu torien, né ximod bislooy mod bunybu que nigolú diti gopbu fe lóo Jehová? (1 Rey. 11:37; 12: 26-28.)

d) Gobierno xtuny chii family xiro' diti bunyibu ni ná religión ni rasuidy xinésni, ¿chú guic gool par bunyibu ngú? (1 Rey. 12:32, 33.)

## Historia 66

### Jezabel gona' mal ni rony mandary

1. ¿Chú ngú Jezabel?

2. ¿Xigony goyo' nabann Acab toib dzú?

3. ¿Xí rony Jezabel par labúu guica' tzeelbu, Acab, xalioo Nabot ro Nabot nap balach?

4. ¿Chú raxel Jehová par gony castigar a Jezabel?

5. Xomod rabilo lo' dibuj, ¿xí rac órni Jehú radxiin lagary ro rony mandary Jezabel?

### Stipnés diitz ni non guicapyno:

1. *Bül 1 Reyes 16:29-33 né 18:3, 4.*

¿Balaati midid goyo' cóe mal lainy gudx Israel dzú ni Acab buny mandary? (1 Rey. 14:9.)

2. *Bül 1 Reyes 21:1-16.*

a) ¿Ximod bislooy Nabot que goyo'bu xilad Jehová né gopbu balory? (1 Rey. 21:1-3; Lev. 25:23-28.)

b) ¿Xí rasuidy lóono mod buny Acab órni diti rabebu' ni raniiny lóono? (1 Rey. 21:4; Rom. 5:3-5.)

3. *Bül 2 Reyes 9:30-37.*

¿Xí rasuidy de Jehú que nigolú goniiny láabu gonybu xchiin Jehová? (2 Rey. 9:4-10; 2 Cor. 9:1, 2; 2 Tim. 4:2.)

## Jehosafat nap confianz lóo Jehová

1. ¿Chú ngú Jehosafat, né xí lo' xtzú nabanybu?

2. ¿Xigony radzuiby israelitas, né xí rony xidal-yibu?

3. ¿Ximod racapy Jehová órni raniné Jehosafat láabu?

4. ¿Xí láani rony Jehová que gac órni yása tzóyibu lo' guerr?

5. ¿Xí láani rasuidy de Jehosafat?

### Stipnés diitz ni non guicapyno:

1. *Bül 2 Crónicas 20:1-30.*

a) ¿Ximod bislooy Jehosafat ni non gony guirá ni rasob ni ná Dios órni cadudyibu lo' galnagan? (2 Cró. 20:12; Sal. 25:15; 62:1.)

b) Jehová guirá ór no' ni biquiin par goniné xcudx, ¿xí láani raquimbu lo' xtzúno? (2 Cró. 20:14, 15; Mat. 24:45-47; Juan 15:15.)

c) Órni Jehová saló guitré «Xtzú rodann Dios ni Más nap Galnadij que guirá ni nabany», ¿ximod nga guirá ni tudyno lo' sánci xomod ni góe Jehosafat? (2 Cró. 20:15, 17; 32:8; Rev. 16:14, 16.)

d) Xomodca buny levitas, ¿ximod láaca scúca rony precurosore né misioneros órni riei-yibu yo' por yo' lo' guidopynac Gudxlio? (2 Cró. 20:19, 21; Rom. 10: 13-15; 2 Tim. 4:2.)

## Historia 68

### Chop mbioxien rabany stoib

1. ¿Chú layibu guionca buñ ni no' lo' dibuj, né toib-tica dzú xí rac né mbioxien re'?

2. ¿Xí ranab Elías gony Jehová por mbioxien re', né xí rac ór cút?

3. ¿Ximod láa buñguieeu ni racné a Elías?

4. ¿Xigony rieb Eliseo lidx toib buñgona' ni rabés lainy gudx Sunem?

5. ¿Xí rony Eliseo, né xí rac né mbioxien ni ma goity?

6. ¿Xí galnadij nap Jehová, xomod bislooybu láani órni Elías né Eliseo buñ galrradziguia'?

### Stipnés diitz ni non guicapyno:

1. *Bül 1 Reyes 17:8-24.*

a) ¿Ximod góe prueya a Elías pal rasobbu né pal napbu fe? (1 Rey. 17:9; 19:1-4, 10.)

b) ¿Xigony fe ni gop gona'stoib ni golés lainy gudx Sarepta nigolú xiro' gocni? (1 Rey. 17:12-16; Luc. 4:25, 26.)

c) ¿Ximod raslooy ni lóono que nigolú sac cumplir diitz ni sieed lo' Mateo10:41, 42 mod gosacloó gona'stoib de gudx Sarepta? (1 Rey. 17:10-12, 17, 23, 24.)

2. *Bíl 2 Reyes 4:8-37.*

a) ¿Xí rasuidy buñgona' de gudx Sunem lóono mod gandxi'no a buñ ni diti rimbuno? (2 Rey. 4:8; Luc. 6:38; Rom. 12:13; 1 Juan 3:17.)

b) ¿Xí cós buen labúu gonyno a ni rony xchiin Jehová ló naare'? (Hech. 20:35; 28:1, 2; Gál. 6:9, 10; Heb. 6:10.)

## Historia 69

### Mbioxgona'yen racné buñxirop

1. ¿Xí láani cayaiby mbioxgona'yen ni rabilo ló dibuj a buñgona'?

2. ¿Chú láabu ngú buñgona' ni rabilo ló dibuj, né xigony no' mbioxgona'yen re' lidxbu?

3. ¿Xí láani raxel Eliseo a xomós gaiby a Naamán, né xigony radzuitz Naamán?

4. ¿Xí láani rac órni Naamán racadiag xomós?

5. ¿Xigony diti raca' Eliseo ni rascad Naamán láabu, per xí láani rony Guehazi?

6. ¿Xí láani rasacloó Guehazi, né xí rasuidyno ni gosaclobu?

### Stipné diitz ni non guicapyno:

1. *Bíl 2 Reyes 5:1-27.*

a) ¿Ximod labúu gacné mod buny mbioxgona'yen de gudx Israél a guirá mbioxhlas de ló xtzúno? (2 Rey. 5:3; Sal. 8:2; 148:12, 13.)

b) ¿Xigony láani ngú guisetnaladno mod buny Naamán órni tzó ni co' litz lóono né la Biblia? (2 Rey. 5:15; Heb. 12:5, 6; Sant. 4:6.)

c) Eliseo né Guehazi diti toibsi mod góo xcalrrienyibu, ¿xí rasuidyno de guiroppyibu? (2 Rey. 5:9, 10, 14-16, 20; Mat. 10:8; Hech. 5:1-5; 2 Cor. 2:17.)

## Historia 70

### Jonás né beel xirop

1. ¿Chú ngú Jonás, né xí raxel Jehová gonybu?

2. Jonás dinaidy tze ro Jehová caxel láabu por ngú, ¿xí láani ronybu?

3. ¿Xí ranab Jonás gony guirá ni rony dxiin lainy bark par cués buró'dant?

4. Xomod rabilo ló dibuj, ¿xí rac órni Jonás raguich lainy nisdá'?

5. ¿Balac dzú racla Jonás lainy beel xirop, né xí ronybu lainy beel re'?

6. ¿Pu lagary riée Jonás órni rare'bu lainy beel xirop re', né xí rasuidy ndé' lóono?

### Stipné diitz ni non guicapyno:

1. *Bíl Jonás 1:1-17.*

Mod raloyni, ¿ximod bisac Jonás órni Jehová góoch láabu tzebu rono' ninivitas par guinibu ni ná Jehová? (Jon. 1:2, 3; Pro. 3:7; Ecl. 8:12.)

2. *Bíl Jonás 2:1, 2, 10.*

¿Ximod raslooy mod ni gosacloó Jonás que labúu gapnó confianz lóo Jehová guicapynu ni ranabno lóbu? (Sal. 22:24; 34:6; 1 Juan 5:14.)

3. *Bíl Jonás 3:1-10.*

a) ¿Ximod racné lóono ni Jehová diti bisian biquiinn a Jonás, ná diti bisobbu ni Jehová góoch láabu ñonybu nirdiguié? (Sal. 103:14; 1 Ped. 5:10.)

b) ¿Xí rasuidy lóono mod ni gosacloó Jonás né ninivitas, que diti guinino de buñ sin guimbuno mod nacyibu órni rió'no yo' por yo'? (Jon. 3:6-9; Ecl. 11:6; Hech. 13:48.)

## Historia 71

### Dios rani' guiduidy Gudxlio móz

1. ¿Chú láabu góo Isaiás, pu dzú bibanybu, né xí biloy Jehová láabu?

2. ¿Ximod rarexa diitz *paraiso*, né xí ried ló xpensaryno órni racadiagno diitzre'?

3. ¿Xí góoch Jehová a Isaiás naca' de Gudxlio móz?

4. ¿Xigony bisnit Adán né Eva lagary sacroyen ro golésyibu?

5. ¿Xí láani rani' Jehová guiduidy a guirá ni ndxi láabu?

### Stipné diitz ni non guicapyno:

1. *Bíl Isaiás 11:6-9.*

a) ¿Ximod rabexa la Biblia que buñ saga' goxt toibsi né nimal lainy Gudxlio móz ló dzú ni sietra? (Sal. 148:10, 13; Isa. 65:25; Eze. 34:25.)

b) ¿Ximod carebu' lainy xcudx Jehová diitz ni bica' Isaiás? (Rom. 12:2; Efe. 4:23, 24.)

c) ¿Ló xtzúno né dzú ni sietra ro saga'no goxt, chú láabu ngú non gonyxiro'no por ni buñ casian mod nac né mod rony pensary? (Isa. 48:17, 18; Gál. 5:22, 23; Fili. 4:7.)

2. *Bíl Revelación 21:3, 4.*

a) ¿Ximod raslooy la Biblia ór rani'ni que Dios no'bu né buñgudxlio per diti no' chú labúu rabí láabu? (Lev. 26:11, 12; 2 Cró. 6:18; Isa. 66:1; Rev. 21:2, 3, 22-24.)

b) ¿Xí clas nís ni rare' bisaló buñ né yoob guinit-ló? (Luc. 8:49-52; Rom. 8:21, 22; Rev. 21:4.)

## Historia 72

### Dios racné Ezequías

1. ¿Chú láabu buñguieeu ni no' ló dibuj, né xigony no'bu ló xiro' gálnagno?

2. ¿Xí guichi ma godi'x Ezequías nisló Dios, né xí ranabbu lóo Jehová?

3. ¿Xí clas buñ ni rony mandary nac Ezequías, né xí diitz raxel Jehová a Isaiás par gaiby a Ezequías?

4. Mod rienni ló dibuj, ¿xí láani rony ángel xtuny Jehová a asirios?

5. Ná gobierno de chop family noyibu goxt por guxeesi dzú, ¿xí rac órni raity Ezequías?

### Stipnés diitz ni non guicapyno:

1. *Bül 2 Reyes 18:1-36.*

a) Rabsaqué, ni riné xtiitz asirio, ¿ximod rayopybu mod par diti gac nadip fe ni nap israelitas? (2 Rey. 18:19, 21; Éxo. 5:2; Sal. 64:3.)

b) ¿Ximod rasu' testigos xtuny Jehová mod buny Ezequías, órni no' buñ ni racaló layibu? (2 Rey. 18:36; Sal. 39:1; Pro. 26:4; 2 Tim. 2:24.)

2. *Bül 2 Reyes 19:1-37.*

a) Órni no' galrasa', ¿ximod rasu' xcudx Jehová ni no' ló naare' mod buny Ezequías? (2 Rey. 19:1, 2; Pro. 3:5, 6; Heb. 10:24, 25; Sant. 5:14, 15.)

b) ¿Xí tzón mod góe gann Senaquerib, buñguieeu ni buny mandary, né mod ni gosaclobu, chú láabu sasaclóo scúca xomod sieed ló la Biblia? (2 Rey. 19:32, 35, 37; Rev. 20:2, 3.)

3. *Bül 2 Reyes 21:1-6, 16.*

¿Xigony labúu guinino que Manasés nigolú mal góe más que stipnés ni buny mandary Jerusalén? (2 Cró. 33:4-6, 9.)

## Historia 73

### Último ni rony mandary tzaay Israel

1. ¿Balac iz nap Josías órni gosalo buny mandary, né xi rasaló ronybu órni rasa' gatz iz ni ma cayony mandarybu?

2. ¿Xí láani cayony Josías mod rabilo ló primer dibuj?

3. ¿Xí láani radzel ni rasanir nisló israelitas par gony adoraryibu Jehová lainy yo' xiro' órni cayony tzaayibu láani?

4. Xigony rachés Josías xhap?

5. ¿Xí diitz ni sieed de Jehová raiby Huldá, buñgona' ni Jehová raquiin par guini' xí gac dzú ni sietra, a Josías?

### Stipnés diitz ni non guicapyno:

1. *Bül 2 Crónicas 34:1-28.*

a) ¿Xí galán mod bisian Josías par guisu' guirá buñ ni godudy ló galnagan dzú gocyibu mbiox? (2 Cró. 33:21-25; 34:1, 2; Sal. 27:10.)

b) ¿Xí cós ni rasac buny Josías par labúu nareguia' religiún ni rasuidy xinésni ló iz xhoon, doce né dieciocho ló dzú buny mandarybu? (2 Cró. 34:3, 8.)

c) ¿Xí rasuidy mod buny Josías né Hilquías par ganno gactzaay Lagary ro radopno? (2 Cró. 34:9-13; Pro. 11:14; 1 Cor. 10:31.)

## Toib buñguieeu ni diti radzuiby

1. ¿Chú láabu mbioxhlas ni no' ló dibuj?

2. ¿Ximod rabí Jeremías ni ma gacbu toib buñ ni guini' xí gac dzú ni sietra, per xí raiby Jehová láabu?

3. ¿Xí diitz diti rasian raiby Jeremías a buñ gudx Israel?

4. Ni rasanir nisló israelitas par gony go'ox, ¿ximod rony por guicaayibu Jeremías, né ximod raslooy Jeremías que diti radzuiby?

5. ¿Xí rac a israelitas por ni diti rasianyibu de ronyibu cós mal?

### Stipnés diitz ni non guicapyno:

1. *Bül Jeremías 1:1-8.*

a) Xomod raslooy mod buny Jeremías, ¿xí rasuidy-tzaay a buñ par gony xchiin Jehová galán? (2 Cor. 3:5, 6.)

b) ¿Ximod racné a guirá mbioxhlas ni racanal Jesús mod buny Jeremías? (Ecl. 12:1; 1 Tim. 4:12.)

2. *Bül Jeremías 10:1-5.*

¿Ximod bislooy Jeremías par guientzaayni que diti labúu gapnó confianz lóo diohx falz? (Jer. 10:5; Isa. 46:7; Hab. 2:19.)

3. *Bül Jeremías 26:1-16.*

a) Tidxo buñ ni no' ló Gudxlio ni guíesa guibá, ¿ximod diti galraguít racáyibu diitz ni góoch Jehová a Jeremías ni gac, que diti cuébu diitz órni rasuidyibu de Jehová? (Jer. 26:2; Deu. 4:2; Hech. 20:27.)

b) ¿Xí galán mod bisian Jeremías par guirá testigos xtuny Jehová ni no' ló naare', órni guini'yibu ni ná Jehová gac a guirá buñgudxlio? (Jer. 26:8, 12, 14, 15; 2 Tim. 4:1-5.)

4. *Bül 2 Reyes 24:1-17.*

¿Xí gosacloó gudx Judá por ni bisianyibu Jehová? (2 Rey. 24:2-4, 14.)

## Historia 75

### Tap mbioxhlasien gudx Babilonia

1. ¿Chú layibu nac tap mbioxhlasien ni no' ló dibuj, né xigony noyibu Babilonia?

2. ¿Xí láani no' guic Nabucodonosor par gony tap mbioxhlasien, né xi dxiin rony mandarybu gony tipnés xomósbu?

3. ¿Xí ranab Daniel né guionca ximig par guáyibu né ni guéyibu?

4. Órni goya' chii govtiz ni godó Daniel né guionca ximig por cuánnya', ¿toibsi midid gocyibu né stipnés mbioxhlasien la?

5. ¿Xigony rinéyibu Daniel né guionca ximig ro no' Nabucodonosor, né ximod ronyibu gann a tipnés buñnan ni nap Nabucodonosor?

## Stipn s diitz ni non guicapyno:

1. *B il Daniel 1:1-21.*

a)  X  tem non gonyo par diti guiabno l  c s mal n  gony guantaryno  rni no' ni rachiin l ono par guich no? (Dan. 1:8; G n. 39:7, 10; G l. 6:9.)

b)  Ximod lab u n ' ni nachiin a mbioxhlas par  nyibu ni stipn s rabi xomod toib «galrro nanix»? (Dan. 1:8; Pro. 20:1; 2 Cor. 6:17-7:1.)

c)  X  l ani racn  l ono par guienno historias ni sieed l  la Biblia de tap mbioxhlas hebreos mod bi-b'i'yibu galnann ni cua'yibu gudx Babilonia? (Dan. 1:20; Isa. 54:13; 1 Cor. 3:18-20.)

## Historia 76

### Jerusal n ranitl 

1.  X  cayac gudx Jerusal n n  a israelitas ni no' l  dibuj?

2.  Ch  ng  Ezequiel, n  x  c s nadzu'py ralooy Jehov  l abu?

3. Israelitas diti gop respet a Jehov  por ng ,  x  rani' Jehov  gony?

4.  X  rony Nabucodonosor  rni israelitas rac nay'yibu nisl bu?

5.  Xigony biduidy Jehov  lagary que israelitas nadzu'py binitl yibu?

6.  Xigony ni toib bu  rian lainy gudx Israel, n  balac  z ria'anni sc si'?

## Stipn s diitz ni non guicapyno:

1. *B il 2 Reyes 25:1-26.*

a)  Ch  ng  Sedequ as, x  gosaclobu, n  ximod buny cumplir nd  diitz ni sieed l  la Biblia? (2 Rey. 25:5-7; Eze. 12:13-15.)

b) Gudx Israel bisian buny adaryibu Jehov ,  ch  l abu gon  Jehov  que gop dool por c s mal ni bunyibu? (2 Rey. 25:9, 11, 12, 18, 19; 2 Cr . 36:14, 17.)

2. *B il Ezequiel 8:1-18.*

 Ximod rasu' guir  ni rani' que racanal Jes s, a israelitas ni bisian a Jehov  ni bien Govitz? (Eze. 8:16; Isa. 5:20, 21; Juan 3:19-21; 2 Tim. 4:3.)

## Historia 77

### Diti bixixiyibu

1.  X  buny mandary Nabucodonosor gony bu ?

2.  Xigony diti caxixip guionca ximig Daniel nisl  dioxh ni goya' de or'?

3.  rni Nabucodonosor raduidy stoib oportunita a tz n hebreos par guixixip,  ximod raduidyibu diitz que napyibu confianz l o Jehov ?

4.  X  raxel Nabucodonosor gony tipn s bu guieeu nadip a Sadrac, Mesac n  Abednego?

5.  X  rabi Nabucodonosor  rni raguixl o lainy horno?

6.  Xigony ronyxiro' Nabucodonosor laa Dios ni rony adorar Sadrac, Mesac n  Abednego, n  ximod lab u guisu'no mod buny tz n mbioxhlas hebreos re'?

## Stipn s diitz ni non guicapyno:

1. *B il Daniel 3:1-30.*

a) Mod buny tz n mbioxhlas hebreos,  ximod lab u guisu' guir  ni rony ni n  Dios  rni cadudyibu l  prueby par guisiambu Jehov ? (Dan. 3:17, 18; Mat. 10:28; Rom. 14:7, 8.)

b)  X  bien Nabucodonosor  rni Jehov  godi'x l abu xalagarybu? (Dan. 3:28, 29; 4:34, 35.)

## Historia 78

### Diitz ni caa cu  yo'

1.  X  rac  rni bu guieeu ni rony mandary Babilonia rony toib lanii xiro' n  raquiin copas n  tazones de yo' xiro' ro rac adorar Jehov  ni goyo' lainy Jerusal n?

2.  X  raiby Belsasar a guir  bu nann ni napbu, per x  l ani diti lab u ronyibu?

3. Xina' Belsasar,  x  ranabbu gony Belsasar?

4. Merpa mod gooch Daniel a Belsasar,  xigony buny Dios que toib n  naca' diitz cu  yo'?

5.  Ximod rabexa Daniel diitz ni caa cu  yo'?

6.  X  l ani rac la'ga Daniel cani'?

## Stipn s diitz ni non guicapyno:

1. *B il Daniel 5:1-31.*

a)  Xigony galrradzuiby tzaay, diti l acani ng  galrradzuiby ni gosac Belsasar  rni bibi'bu diitz ni cua' cu  yo'? (Dan. 5:6, 7; Sal. 19:9; Rom. 8:35-39.)

b)  Ximod bislooy Daniel que gopbu xiro' balory  rni gonibu nisl  Belsasar n  bu xirop ni goyo' n  l abu? (Dan. 5:17, 18, 22, 26-28; Hech. 4:29.)

c)  Ximod raslooy capitulo 5 de Daniel que nosi Jehov  lab u gony mandary guidopynac Gudxlio? (Dan. 4:17, 25; 5:21.)

## Historia 79

### Daniel lad betz ons

1.  Ch  l abu ng  Dar o, n  x  pensary napbu de Daniel?

2. Xtol tipn s bu  mal,  x  rony Dar o?

3.  X  rony Daniel  rni radxiin guidiagbu que ma no' stoib ley copy?

4.  Xigony nigol  rio' nabann Dar o n  diti lab u ran s bacaal l abu, n  x  ronybu  rni raraa stoib gue'el c ?

- ¿Xí racapy Daniel a Darío?
- ¿Xí rascaló guirá buñgueeu mal ni gocladx nagaita a Daniel, né xi guich raxel Darío lóo guirá buni ni rony mandarybu?

### Stipnés diitz ni non guicapyno:

- Bül Daniel 6:1-28.*  
a) Ló naare' no' buñ ni ná guicaa xchiin testigos xtuny Jehová, ¿xí rasetnaladx nde' lóono ni bunyinu né Daniel? (Dan. 6:7; Sal. 94:20; Isa. 10:1; Rom. 8:31.)  
b) Lóono ni rony xchiin Jehová, ¿ximod labúu guisu'no mod buny Daniel lóo «buñchiin»? (Dan. 6:5, 10; Rom. 13:1; Hech. 5:29.)  
c) ¿Ximod labúu gonyno xchiin Jehová «guirá ór lağa nabanyno» xomod buny Daniel? (Dan. 6:16, 20; Fili. 3:16; Rev. 7:15.)

## Historia 80

### Israel care' Babilonia

- Xomod rabilo lóo dibuj, ¿xí cayony israelitas?
- ¿Ximod buny cumplir Ciro, diitz ni Jehová góoch a Isaías naca'?
- ¿Xí góoch Ciro a israelitas ni diti labúu bibiguet Jerusalén?
- ¿Xí cós raduidy Ciro tzané israelitas a Jerusalén?
- ¿Balac racla israelitas par guidxin Jerusalén?
- ¿Balac íz godudy de goló bian Jerusalén sin buñ?

### Stipnés diitz ni non guicapyno:

- Bül Isaías 44:28 né 45:1-4.*  
a) ¿Ximod goní Jehová que nigolú sac cumplir diitz ni sieed ló la Biblia, ni rani' de Ciro? (Isa. 55:10, 11; Rom. 4:17.)  
b) ¿Xí raslooy lóono diitz ni bica' Isaías ni sieed ló la Biblia ni rani' de Ciro, que Jehová labúu guini' ni gac dzú ni sietra? (Isa. 42:9; 45:21; 46:10, 11; 2 Ped. 1:20.)  
2. *Bül Esdras 1:1-11.*  
Ni lóono guisu'no guirá buñ ni diti labúu bibiguet Jerusalén, ¿ximod labúu gacnéno a guirá ni no' ló xchiin Jehová guirá dzú? (Esd. 1:4, 6; Rom. 12:13; Col. 4:12.)

## Historia 81

### Confianz que Jehová racné

- ¿Balac buñ rare' Babilonia né riée Jerusalén ni rian nigolú sit, per xi rabiyibu órni radxiinyibu?
- ¿Xí láani rasaló rasa' israelitas órni radxiinyibu, per xi rony xi enemigyibu?
- ¿Chú layibu ngú Ageo né Zacarías, né xi raib-yibu a buñ israelitas?

- ¿Xigony raxel Tatenai toib guich Babilonia, né xi racopy buñgueeu ni rony mandary Babilonia láabu?
- ¿Xí láani rony Esdras órni radxiin guidiagbu que yo' xiro' ro rac adorar Jehová raquiin gac-tzaayni?
- Xomod rabilo lóo dibuj, ¿xí ranab Esdras lóo Jehová? ¿Ximod racapy Jehová ni ranabbu? ¿Né xi rasuidy nde' lóono?

### Stipnés diitz ni non guicapyno:

- Bül Esdras 3:1-13.*  
Pal nóono toib lagary ro yadi ni toib congregación xtuny xcudx Jehová, ¿xí diti guisianno de gonyno? (Esd. 3:3, 6; Hech. 17:16, 17; Heb. 13:15.)  
2. *Bül Esdras 4:1-7.*  
¿Xí rasuidy xcudx Jehová mod buny Zorobabel ni diti góchu toibsi né stipnés religión ni diti rasuidy xinésni? (Éxo. 34:12; 1 Cor. 15:33; 2 Cor. 6:14-17.)  
3. *Bül Esdras 5:1-5, 17 né 6:1-22.*  
a) ¿Xigony xi enemig israelitas diti labúu bicaa dxiin ni gosalooybisa'yibu yo' xiro' ro rac adorar Jehová? (Esd. 5:5; Isa. 54:17.)  
b) ¿Ximod racné mod buny ancianos judíos a ancianos ni no' lóo xtuzno par guiciopyibu Jehová gacné órni buñ racaló layibu? (Esd. 6:14; Sal. 32:8; Rom. 8:31; Sant. 1:5.)  
4. *Bül Esdras 8:21-23, 28-36.*  
Antes ni co'no guicno gonyno toib cós ni rasac, ¿ximod labúu guisu'no mod buny Esdras? (Esd. 8:23; Sal. 127:1; Pro. 10:22; Sant. 4:13-15.)

## Historia 82

### Mardoqueo né Ester

- ¿Chú layibu ngú Mardoqueo né Ester?
- ¿Xigony rayopy Asuero stoib buñgona' par gac tzeelbu, né a chú rabúbu?
- ¿Chú láabu ngú Hamán né xigony nigolú radzuitzbu?
- ¿Xí ley rare', né xi rony Ester órni Mardoqueo raduidy toib abis láabu?
- ¿Xí rascalóo Hamán, né xi rascalóo Mardoqueo?
- ¿Ximod ralaá israelitas de xi enemig?

### Stipnés diitz ni non guicapyno:

- Bül Ester 2:12-18.*  
¿Ximod bislooy mod buny Ester que nigolú rasac gonyno por gacno «buñdzuu né natzaayxat»? (Est. 2:15; 1 Ped. 3:1-5.)  
2. *Bül Ester 4:1-17.*  
Suusi xomod Ester gopbu oportunida par gocnébu religión ni rasuidy xinésni, ló naare' ¿xí oportunida napnó par guiduidyno diitz que nadxino né nóono né Jehová? (Est. 4:13, 14; Mat. 5:14-16; 24:14.)

3. *Bül Ester 7:1-6.*

Xomodca gosacóllo Ester, ¿ximod láaca ló naare' xomudc Jehová radudy ló prueby? (Est. 7:4; Mat. 10: 16-22; 1 Ped. 2:12.)

## Historia 83

### Muros ni nap Jerusalén

1. ¿Ximod bisac israelitas por ni diti goyo' muros rolo Jerusalén?

2. ¿Chú ngú Nehemías?

3. ¿Xí dxiin nap Nehemías, né xigony rasacni?

4. ¿Xí abís radxiin guidiag Nehemías ni rago' nabann láabu, né xí ronybu?

5. ¿Ximod raslooy Artajerjes que buñtzay nacbu né Nehemías?

6. ¿Ximod ratzoo Nehemías dxiin ni gony israelitas par diti labúu guicaa xi enemigyibu ló xchiinyibu?

### Stipnés diitz ni non guicapyo:

1. *Bül Nehemías 1:4-6 né 2:1-20.*

¿Ximod biyopy Nehemías a Jehová par gacné láabu? (Neh. 2:4, 5; Rom. 12:12; 1 Ped. 4:7.)

2. *Bül Nehemías 3:3-5.*

¿Xí labúu guisuidy ancianos né ministeriales de teqoitas, ni diti góç xomod stipnés «buñxirop» ni goyo' ló xtzúyibu? (Neh. 3:5, 27; 2 Tes. 3:7-10; 1 Ped. 5:5.)

3. *Bül Nehemías 4:1-23.*

a) ¿Xí láani bichiin a israelitas par diti nasian de nasáyibu muros ná goyo' buñ mal ni cualó layibu? (Neh. 4:6, 8, 9; Sal. 50:15; Isa. 65:13, 14.)

b) ¿Ximod racné lóono mod buny israelitas?

4. *Bül Nehemías 6:15.*

¿Xí raslooy lóono galnadip ni nap fe órni rolno que muros xtuny Jerusalén bilox goya'ni dzú yása guía' chop béo? (Sal. 56:3, 4; Mat. 17:20; 19:26.)

## Historia 84

### Toib ángel riguen María

1. ¿Chú ngú buñgona' ni rabilo ló dibuj?

2. ¿Xí raiby Gabriel a María?

3. ¿Ximod rabexa Gabriel a María que sapbu toib bada' ná diti ma rabesnébu toib buñguieeu?

4. ¿Xí rac órni María riée riguen xfamilybu ni laa Elisabet?

5. ¿Xí láani rony José xpensary órni ranbu que María gap toib bada', per xigony ratzáabu mod nac xpensarybu?

### Stipnés diitz ni non guicapyo:

1. *Bül Lucas 1:26-56.*

a) ¿Xigony Jesús diti cua'bu galkié órni Jehová buny que María gocxin? (Luc. 1:35; Ageo 2:11-13; Juan 6:69; Heb. 7:26; 10:5.)

b) ¿Ximod bisanadxyibu Jesús dzú yása gálbu? (Luc. 1:41-43.)

c) ¿Xí galán mod bisian María par guirá herman ni raca' xiro' privilegios? (Luc. 1:38, 46-49; 17:10; Pro. 11:2.)

2. *Bül Mateo 1:18-25.*

Ná Jesús diti góç laabu Emmanuel, ¿ximod bi-duidy diitz mod bibanybu que bunybu xomod raxexa diitz Emmanuel? (Mat. 1:22, 23; Juan 14:8-10; Heb. 1:1-3.)

## Historia 85

### Jesús rál lainy xcorraa nimal

1. ¿Chú ngú bada' ni rabilo ló dibuj, né pu ragui'x María láabu?

2. ¿Xigony gool Jesús lainy xcorraa nimal?

3. ¿Chú ngú stipnés buñguieeu ni rabilo ló dibuj ni cadxin romo' Jesús, né xí góoch toib ángel layibu?

4. ¿Xigony nac Jesús toib buñxirop?

5. ¿Xigony labúu guinino que Jesús nac Xiin Dios?

### Stipnés diitz ni non guicapyo:

1. *Bül Lucas 2:1-20.*

a) ¿Xí láani buny César Augusto par labúu ñac cumplir diitz ni sieed ló la Biblia ni goní lagary ro gál Jesús? (Luc. 2:1-4; Miq. 5:2.)

b) ¿Ximod labúu tzó buñ lad ni Dios randxi'? (Luc. 2:14; Mat. 16:24; Juan 17:3; Hech. 3:19; Heb. 11:6.)

c) Tipnés buñdno ni cayap xiil de gudx Judea bibaladxyibu por ni gool Jesús par guilaa buñ, ¿xigony no' toib razón ni más rasac par guibaladx guirá ni rony ni ná Dios ló naare'? (Luc. 2:10, 11; Efe. 3:8, 9; Rev. 11:15; 14:6.)

## Historia 86

### Racanalxyibu toib vitzón

1. ¿Chú ngú tipnés buñguieeu ni no' ló dibuj, né xigony toib buñguieeu caloyña vitzón ni racaptza-dit?

2. ¿Xigony radzuitzgulu Herodes, né xí ronybu?

3. ¿Pu riné vitzón ni racaptzadit a tipnés buñguieeu, per xigony rabiguetyibu por stoib néz?

4. ¿Xí láani rony mandary Herodes, né xigony?

5. ¿Xí raiby Jehová a José?

6. ¿Chú láabu buny que nacaptza' vitzón copy ni rabilo ló dibuj, né xigony?

### Stipnés diitz ni non guicapyo:

1. *Bül Mateo 2:1-23.*

¿Balac iz nap Jesús, né pu lagary no'bu órni bidxin buñ ni raluladx que rabexa mod caa vitzón? (Mat. 2:1, 11, 16.)



## Historia 87

### Jesús mbioxhlasien lainy yo' xiro'

1. ¿Balac íz nap Jesús ló dibuj, né pu lagary no'bu?
2. ¿Xí rony José guirá íz né xfamily?
3. ¿Xigony rabiguet José né María gudx Jerusalen órni ma gosaayibu guidopynac dzú ló néz?
4. ¿Pu lagary radzel José né María a Jesús, né xigony buñ ni dxee có radziguiagobu?
5. ¿Xí láani raiby Jesús a xina'?
6. ¿Ximod labúu guicanalno mod buny Jesús órni guisuidyno de Dios?

### Stipnés diitz ni non guicapyño:

1. *Bíl Lucas 2:41-52.*

- a) Ná Xiley Jehová buny mandary que nosi buñ-guieeu tze lanii ni laa Pacua ni rac guirá íz, ¿xí galán mod bisian José né María par guirá ni ma no' xiin? (Luc. 2:41; Deu. 16:16; 31:12; Pro. 22:6.)
- b) ¿Xí galán mod bisian Jesús par guirá mbioxh-las ni no' ló xtúnno ximod nga guisobyibu bixios-yibu? (Luc. 2:51; Deu. 5:16; Pro. 23:22; Col. 3:20.)

2. *Bíl Mateo 13:53-56.*

¿Ximod laa tap buch Jesús ni rasetlaa la Biblia, né xí dxiiin cua' chopiyibu lainy congregación? (Mat. 13:55; Hech. 12:17; 15:6, 13; 21:18; Gál. 1:19; Sant. 1:1; Jud. 1.)

## Historia 88

### Juan ragonis Jesús

1. ¿Chú layibu chop buñguieeu ni rabilo ló dibuj?
2. ¿Ximod rionis toib buñ?
3. ¿Chú clas buñ ried ronó Juan par tzonis?
4. ¿Xí razón ni rasac gop Jesús par gonabbu Juan conis láabu?
5. ¿Ximod raslooy Dios que rabaladxbu goyonis Jesús?
6. ¿Xí láani rac órni Jesús riéee toib lagary ro diti rabés ni toib buñ por 40 dzú?
7. ¿Chú layibu góe primer xpiin Jesús, né xí primer galradziguia' bunybu?

### Stipnés diitz ni non guicapyño:

1. *Bíl Mateo 3:13-17.*

¿Xí galán mod bisian Jesús ni gony toib ni racanal láabu órni ma gonyis? (Sal. 40:7, 8; Mat. 28:19, 20; Luc. 3:21, 22.)

2. *Bíl Mateo 4:1-11.*

Jesús nigolú bimbuzaaaybu xtiitz Dios, ¿xigony rony animar nde' lóono par golno la Biblia guirá ór? (Mat. 4:5-7; 2 Ped. 3:17, 18; 1 Juan 4:1.)

3. *Bíl Juan 1:29-51.*

¿Chú ronó' raxel Juan xpiin ni no' toibsi né láabu, né ximod non guisúno láabu? (Juan 1:29, 35, 36; 3:30; Mat. 23:10.)

4. *Bíl Juan 2:1-12.*

¿Ximod bislooy primer galradziguia' ni buny Jesús que Jehová diti racaa cós tzaay par buñ ni rony Xchiimbu? (Juan 2:9, 10; Sal. 84:11; Sant. 1:17.)

## Historia 89

### Jesús rasiá yo' xiro'

1. ¿Xigony rado' nimal lainy yo' xiro' ni sob Jerusalén?
2. ¿Xigony radzuitz Jesús?
3. Xomod rabino ló dibuj, ¿xí rony Jesús, né xi rony mandarybu gony buñ ni rato' palom?
4. ¿Xí rasetnaladx xpiin Jesús órni rabiyibu ni cayonybu?
5. ¿Xí lagary radudy Jesús órni rabiguetiyibu Galilea?

### Stipnés diitz ni non guicapyño:

1. *Bíl Juan 2:13-25.*

Ni Jesús bidzuitz né guirá ni bitzá bidxiich lainy yo' xiro', ¿ximod non guibino pal galán láani gony-no negosy Lagary ro radop testigos xtuny Jehová? (Juan 2:15, 16; 1 Cor. 10:24, 31-33.)

## Historia 90

### Né toib buñgona' ro' pós

1. ¿Xigony gosagadzu Jesús ro' toib pós gudx Samaria, né xí raibybu a buñgona' ni bidxin cú?
2. ¿Xigony radziguia' buñgona' re', xí raiby Jesús láabu, né xigony?
3. ¿Xí clas nís buny pensary buñgona' re' órni Jesús goní de nís, per Jesús de xí clas nís rani'?
4. ¿Xigony radziguia' buñgona' re' ni Jesús nann de láabu, né ximod nann Jesús guirá né'?
5. ¿Xí labúu guisuidyno de historia re'?

### Tipnés diitz ni non guicapyño:

1. *Bíl Juan 4:5-43.*

a) Mod buny Jesús, ¿ximod non guibino buñ de stipnés gudx, buñ ric o buñ pobre? (Juan 4:9; 1 Cor. 9:22; 1 Tim. 2:3, 4; Tito 2:11.)

b) ¿Xí xcalnasac Dios raca' ni radxiin racanal Jesús? (Juan 4:14; Isa. 58:11; 2 Cor. 4:16.)

c) Samaritana nigolú bioladx bisuidy a stipnés buñ xtiitz Dios, ¿ximod labúu guisúno láabu? (Juan 4:7, 28; Mat. 6:33; Luc. 10:40-42.)

## Historia 91

### Jesús rasuidy buñ laidy toib dainy

1. Xomod rabino ló dibuj, ¿pu lagary no' Jesús casuidy buñ, né chú layibu sob gahxca láabu?

2. ¿Ximod laa doce ni golúbu par gac xpiimbu?
3. ¿Xi ngú Gobierno ni Jesús rasuidy a stipnés?
4. ¿Xi rasuidy Jesús buñ guinab órni guiniényibu Dios?
5. ¿Xi rani' Jesús mod gac buñ né stipnés?

### Stipnés diitz ni non guicapyno:

1. *Büil Mateo 5:1-12.*

¿Xi labúu gonyo par guiduidyno diitz que náno ni rony mandary Jehová lóono? (Mat. 5:3; Rom. 10:13-15; 1 Tim. 4:13, 15, 16.)

2. *Büil Mateo 5:21-26.*

¿Ximod raduidy diitz Mateo 5:23, 24 que nigolú rasac guigu'ano sacró né xhermanno né ór cú labúu guigu'ano sacró né Jehová? (Mat. 6:14, 15; Sal. 133:1; Col. 3:13; 1 Juan 4:20.)

3. *Büil Mateo 6:1-8.*

¿Xi ni buny fariseos ni diti non gonyo? (Luc. 18: 11, 12; 1 Cor. 4:6, 7; 2 Cor. 9:7.)

4. *Büil Mateo 6:25-34.*

¿Xi láani bisuidy Jesús par gapnó confianz lóo Jehová que saduidybu lóono ni caquiinno par tudy-no dzú? (Éxo. 16:4; Sal. 37:25; Fili. 4:6.)

5. *Büil Mateo 7:1-11.*

¿Xi rasuidyni lóono mod goni Jesús ló Mateo 7:5? (Pro. 26:12; Rom. 2:1; 14:10; Sant. 4:11, 12.)

## Historia 92

### Jesús ralis gue'et

1. ¿Chú ngú bixios mbioxgona'yen ni no' ló dibuj, né xigony buñguieeu re' nigolú goyo'bu ló galrasa' né tzeelbu?
2. ¿Xi rony Jairo órni radzelbu Jesús?
3. ¿Xi láani rac lağa Jesús sée lidx Jairo, né xí abis racá Jairo ló néz?
4. ¿Xigony buñ ni no' lidx Jairo raxiichyibu Jesús?
5. Órni Jesús, guionca xpiin, xina' né bixios mbioxgona'yen re' rio'yibu ro náaxh nidxiyen re', ¿xí láani rony Jesús?
6. ¿Chú layibu láaca ma golis Jesús lad gue'et, né xí raduidy diitz nde'?

### Stipnés diitz ni non guicapyno:

1. *Büil Lucas 8:40-56.*

¿Xigony labúu guinino que Jesús binladxibu né bieambu ni gosac gona' ni bixoné galrraxú, né xí labúu guisuidy guirá ancianos mod buny Jesús? (Luc. 8:43, 44, 47, 48; Lev. 15:25-27; Mat. 9:12, 13; Col. 3:12-14.)

2. *Büil Lucas 7:11-17.*

Mod gosac Jesús né mod bunybu órni bibi'bu gona' viod de gudx Nain, ¿xigony nigolú sacnéni a guirá ni ma goity xfamily? (Luc. 7:13; 2 Cor. 1:3, 4; Heb. 4:15.)

3. *Büil Juan 11:17-44.*

¿Ximod bislooy Jesús que diti ni mal cudxa'no órni raity toib buñ ni randxi'no? (Juan 11:33-36, 38; 2 Sam. 18:33; 19:1-4.)

## Historia 93

### Jesús raya'an xidalguixo buñ

1. ¿Xi cós nadzú'py góe né Juan ni Ragonis, né xí mod rasac Jesús?
2. ¿Ximod raduidy Jesús ni guá xidalguixo buñ ni cuanal láabu, né balac galrró rian?
3. ¿Xigony radzuiby xpiin Jesús gue'el cú, né xí rasacloó Pedro?
4. ¿Ximod raduidy Jesús ni guá xidalguixo buñ ni rarop buelt?
5. ¿Xigony nigolú sacroyen sac Gudxlio órni Jesús gony mandary ló Gobierno xtuny Dios?

### Stipnés diitz ni non guicapyno:

1. *Büil Mateo 14:1-32.*

a) Órni rolno Mateo 14:23-32, ¿xí clas buñ raslooy-ni lóono góe Pedro?

b) ¿Ximod raduidy textos re' diitz que Pedro góe-bu toib buñguieeu ni buñ pensary nír guinibu o gonybu toib cós? (Mat. 14:27-30; Juan 18:10; 21:7; Hech. 2:14, 37-40; 1 Ped. 5:6, 10.)

2. *Büil Mateo 15:29-38.*

¿Ximod bislooy Jesús que gopbu respet por galrró ni biduidy Bixiosbu láabu? (Mat. 15:37; Juan 6:12; Col. 3:15.)

3. *Büil Juan 6:1-21.*

Lóono ni racanal Jesús, ¿ximod labúu guisu'no mod bibi' Jesús buñchiin? (Juan 6:15; Mat. 22:21; Rom. 12:2; 13:1-4.)

## Historia 94

### Randxi'bu mbioxien

1. ¿Xigony radildiitz xpiin Jesús órni rabiaguetyibu de toib lagary nigolú sit?
2. ¿Xigony ragobioo Jesús toib mbioxien né rasaga'bu nidxiyen re' lad xpiimbu?
3. ¿Ximod ngú non gac xpiin Jesús xomod mbioxien?
4. Godudy chop tzón be'o, ¿ximod raslooy Jesús que nadxibu mbioxien?

### Stipnés diitz ni non guicapyno:

1. *Büil Mateo 18:1-4.*

¿Xigony biqiiin Jesús diitz ni bientzaay buñ órni bisuidybu? (Mat. 13:34, 36; Mar. 4:33, 34.)

2. *Büil Mateo 19:13-15.*

¿Ximod nac mbioxien ni non guisu'no pal nainy guica'no xilaay Gobierno xtuny Dios? (Sal. 25:9; 138:6; 1 Cor. 14:20.)

3. *Bül Marcos 9:33-37.*

¿Xí bisuidy Jesús xpiin órni gonibu que diti guisoblax buñ gac buñxirop? (Mar. 9:35; Mat. 20:25, 26; Gál. 6:3; Fili. 2:5-8.)

4. *Bül Marcos 10:13-16.*

¿Balaati midid biduidy Jesús lagary que buñ nabiknoo láabu, né xí labúu guisuidy ancianos mod bunybu? (Mar. 6:30-34; Fili. 2:1-4; 1 Tim. 4:12.)

## Historia 95

### Ximod rasuidy Jesús

1. ¿Xí ranabdiitz toib buñgueieu a Jesús, né xi-gony?
2. Rio' ór, ¿xí láani raquinn Jesús par guisuidy a buñ, né xí ma bisuidyno mod buny judíos né samaritanos?
3. Ló historia ni goni Jesús, ¿xí láani rascalóo toib buñ judío ni casaa ló néz ni sée Jericó?
4. ¿Xí láani rac órni toib judío ni rasanir nisló israelitas par gony go'ox né toib levita radudy ló néz cú?
5. Ló dibuj, ¿chú cayacné judío ni bire' herid?
6. Órni Jesús ralox rani' historia re', ¿xí ranabdiitzbu, né ximod racapy buñgueieu ca láabu?

### Stipnés diitz ni non guicapyno:

1. *Bül Lucas 10:25-37.*

a) Lagary ni Jesús nacapytzaay, ¿ximod gocnébu toib buñgueieu ni nann Ley ni cua' Moisés par guientzaaybu láani? (Luc. 10:26; Mat. 16:13-16.)

b) ¿Ximod bislooy Jesús par guientzaay guirá ni cacadiag láabu par diti cuéyibu tiplad stipnés buñ? (Luc. 10:36, 37; 18:9-14; Tito 1:9.)

## Historia 96

### Jesús rasial buñguitz

1. ¿Xí rony Jesús la'ga casaa lainy xidal gudx?
2. Tzón iz de goló goyonisbu, ¿xí raiby Jesús xpiin?
3. ¿Chú ngú tipnés buñ ni rabilo ló dibuj, né xí rony Jesús por toib buñgona'?
4. ¿Xigony ratoy tipnés buñ ni rasanir ló toib religión mod racapy Jesús layibu?
5. Órni Jesús né xpiin no' gahxca gudx Jericó, ¿xí rony Jesús pór chop buñ pobre ni diti labúu rabí?
6. ¿Xigony rony Jesús cós ni radziguia' buñ?

### Stipnés diitz ni non guicapyno:

1. *Bül Mateo 15:30, 31.*

¿Ximod bislooy Jesús xcalnadip Jehová, né ximod racnéni lóono guienno ni Jehová ma goní gony par Gudxlio móz? (Sal. 37:29; Isa. 33:24.)

2. *Bül Lucas 13:10-17.*

¿Ximod raslooy ni Jesús buny galrradziguia' ni más rascalóo ló dzú sábdá de que scúca gonybu dzú gony mandarybu ló Gobierno de tipmil iz ló Gudxlio? (Luc. 13:10-13; Sal. 46:9; Mat. 12:8; Col. 2:16, 17; Rev. 21:1-4.)

3. *Bül Mateo 20:29-34.*

¿Ximod raslooy historia re' que Jesús goyo' puxet gacnébu buñ ná goyo' xchiambu, né xí rasuidyno de láani? (Deu. 15:7; Sant. 2:15, 16; 1 Juan 3:17.)

## Historia 97

### Jesús rieved xomod ni rony Mandary

1. Órni Jesús radxiin toib ranch mitien gahxca Jerusalén, ¿xí rony mandarybu gony xpiimbu?
2. Xomod rienni ló dibuj, ¿xí láani rac órni Jesús radxiin gahxca Jerusalén?
3. ¿Xí láani rony mbioxien órni rabiyibu Jesús casual buñ ni diti rabí né buñ xot?
4. ¿Xí láani raiby Jesús a buñ ni rasanir nisló israelitas par gony go'ox ni cadzuitz?
5. ¿Ximod labúu gacno xomod mbioxien ni buny-xiro' laa Jesús?
6. ¿Xí láani ná xpiin Jesús gann?

### Stipnés diitz ni non guicapyno:

1. *Bül Mateo 21:1-17.*

a) ¿Ximod goyo' Jesús xomod ni rony mandary lainy gudx Jerusalén, né ximod goyo' tipnés buñgueieu ni rasanir ló xidalgúxo soldad gudx Roma? (Mat. 21:4, 5; Zac. 9:9; Fili. 2:5-8; Col. 2:15.)

b) ¿Xí labúu guisuidy guirá mbioxhlas mod buny mbioxien israelitas órni bisetlayibu ni ná Salmo 118 órni Jesús goyo' lainy yo' xiro' ro rac adorar Jehová? (Mat. 21:9, 15; Sal. 118:25, 26; 2 Tim. 3:15; 2 Ped. 3:18.)

2. *Bül Juan 12:12-16.*

¿Xí raduidy diitz ni israelitas biquinn xquix palmeras órni bunyxiro'yibu Jesús? (Juan 12:13; Fili. 2:10; Rev. 7:9, 10.)

## Historia 98

### Ló dainy Olivos

1. De guirá buñgueieu ni rabilo ló dibuj, ¿chú ngú Jesús, né chú layibu no' né láabu?
2. ¿Xí ná ñony guirá buñgueieu ni rasanir ló toib religión a Jesús lainy yo' xiro' ro rac adorar Jehová, né xí gooch Jesús layibu?
3. Xpiin Jesús, ¿xí ranabdiitz láabu?
4. ¿Xigony raiby Jesús xpiin tipnés cós ni gac ló Gudxlio órni saló gony mandarybu lainy guibá?

5. ¿Xí láani ná Jesús gac antes ni guinitlóbu guirá cós mal ni no' ló Gudxlió?

### Stipnés diitz ni non guicapyño:

1. *Bül Mateo 23:1-39.*

a) Biblia rani' que labúu guiquiinnó diitz ni raslooy respet a buñxirop, per ¿xí raduidy diitz ni goní Jesús ló Mateo 23:8-11 órni buñ raquiiin diitz ni rasanadx a stipnés lainy congregación? (Hech. 26:25; Rom. 13:7; 1 Ped. 2:13, 14.)

b) ¿Xí láani buny fariseos par guicaabu buñ par diti guicanal Jesús, né ximod scúca rony tipnés buñ ni rasanir lainy toib religión ló xtzúno? (Mat. 23:13; Luc. 11:52; Juan 9:22; 12:42; 1 Tes. 2:16.)

2. *Bül Mateo 24:1-14.*

a) ¿Ximod rabexa tzaay Mateo 24:13, que nigolú rasac gony guantaryno?

b) ¿Ximod rarexa diitz «fin» ni sieed ló Mateo 24:13? (Mat. 16:27; Rom. 14:10-12; 2 Cor. 5:10.)

3. *Bül Marcos 13:3-10.*

¿Xí diitz ni sieed ló Marcos 13:10 ná que guinino ni maca diitz sacró a stipnés buñ, né xí rachiin lóono diitz ni goní Jesús? (Rom. 13:11, 12; 1 Cor. 7:29-31; 2 Tim. 4:2.)

## Historia 99

### Lainy cuart ni sob guic yo'

1. Mod rabilo ló dibuj, ¿xigony no' Jesús né doce xpiin lainy toib cuart xiro' ni sob guic yo'?

2. ¿Chú láabu ngú ni care' ro' puert, né xí no' guicbu gonybu?

3. ¿Xí galroxtzu ni rasac rasaló Jesús, órni ma bilox godóyibu Pascua?

4. ¿Xí láani bisednaladx israelitas guirá íz ni bunyibu lanii Pascua, né xí láani guisetnaladx guirá ni racanal Jesús?

5. Órni ralox rooyibu Galroxtzu ni rasatnaladx Jesús, ¿xí raibybu xpiimbu, né xí ronyibu?

### Stipnés diitz ni non guicapyño:

1. *Bül Mateo 26:14-30.*

a) ¿Ximod raslooy Mateo 26:15 ni Judas nomba buny cuent Jesús par gaity?

b) Ni Jesús bixú xiruny, ¿xí chop mod raquiinni? (Mat. 26:27, 28; Jer. 31:31-33; Efe. 1:7; Heb. 9:19, 20.)

2. *Bül Lucas 22:1-39.*

¿Ximod goyo' Buñzab laidy Judas? (Luc. 22:3; Juan 13:2; Hech. 1:24, 25.)

3. *Bül Juan 13:1-20.*

a) Mod ná Juan 13:2, ¿nap Judas dool por ni bunyibu la, né lóono ni rony xchiin Dios xí rasuidyno? (Gén. 4:7; 2 Cor. 2:11; Gál. 6:1; Sant. 1:13, 14.)

b) ¿Xí bisuidy Jesús ni racné tzaay buñ? (Juan 13:15; Mat. 23:11; 1 Ped. 2:21.)

4. *Bül Juan 17:1-26.*

Órni Jesús gonab xpiin gacyibu «toibsi», ¿xí biduidybu diitz né nde'? (Juan 17:11, 21-23; Rom. 13:8; 14:19; Col. 3:14.)

## Historia 100

### Jesús lainy lagary sacroyen

1. ¿Pu lagary riée Jesús órni rare'yibu lainy cuart ni sob guic yo', né xí raiby Jesús ni gonyibu?

2. Órni Jesús rabiguert rono' xpiin, ¿xí cayac, né balac buelt rac nde'?

3. Mod rabilo ló dibuj, ¿chú layibu radxiin lainy lagary sacroyen, né xí rony Judas Iscariote?

4. ¿Xigony raduidy Judas toib bixit a Jesús, né xí rony Pedro?

5. ¿Xí raiby Jesús a Pedro, per xigony diti ranababu Dios guixel ángel gacné láabu?

### Stipnés diitz ni non guicapyño:

1. *Bül Mateo 26:36-56.*

a) ¿Xigony nac toib mod galán par guirá ancianos mod golo' litz Jesús xpiin? (Mat. 20:25-28; 26:40, 41; Gál. 5:17; Efe. 4:29, 31, 32.)

b) ¿Ximod bibi' Jesús órni no' ni raquiiin buñ par gonynaa sa'? (Mat. 26:52; Luc. 6:27, 28; Juan 18:36.)

2. *Bül Lucas 22:39-53.*

¿Raduidy diitz que fe xtuny Jesús diti góe nadip por ni toib ángel gocné láabu lagary Getsemaní la? Golexa láani (Luc. 22:41-43; Isa. 49:8; Mat. 4:10, 11; Heb. 5:7).

3. *Bül Juan 18:1-12.*

¿Ximod bilaa Jesús xpiin de xi enemig, né xí rasuidyno mod bunyibu láani? (Juan 10:11, 12; 18:1, 6-9; Heb. 13:6; Sant. 2:25.)

## Historia 101

### Ragaityibu Jesús

1. ¿Chú guic goolni par nagaityibu Jesús?

2. Órni tipnés ni rasanir ló toib religión ranásyibu Jesús, ¿xí rony xpiin Jesús ór cú?

3. ¿Xí láani rac lidx Caiífás?

4. ¿Xigony ralsit Pedro né ribdxa'dootbu?

5. Órni rabiguertnéyibu Jesús rono' Pilato, ¿xí racarudx tipnés buñgüeeu ni rasanir nisló israelitas par gony go'ox?

6. ¿Xí rac né Jesús dzú vierna órni ma godudy galadzú, né xí raibybu a toib buñgüeeu ni nalgixa' cuébu ló yac nadop?

7. ¿Pu tzó lagary móz ni goní Jesús?

### Stipnés diitz ni non guicapyño:

1. *Bül Mateo 26:57-75.*

¿Ximod bisloyo guirá buñ ni goyo' lainy tribunal judío que xcalnabanyu nigolú nagudx gocni'? (Mat. 26:59, 67, 68.)

2. *Bül Mateo 27:1-50.*

Judas ralooypani bio'obni láabu ni bito'bu Jesús, ¿xigony labúu guinino que diti nigolú bisacbu scú? (Mat. 27:3, 4; Mar. 3:29; 14:21; 2 Cor. 7:10, 11.)

3. *Bül Lucas 22:54-71.*

¿Xí rasuidyno ni Pedro goní diti rimbubu Jesús goxin ni biga' né góe cuent Jesús? (Luc. 22:60-62; Mat. 26:31-35; 1 Cor. 10:12.)

4. *Bül Lucas 23:1-49.*

¿Ximod buny Jesús órni cualóbu cóe mal ni góe né láabu ná diti gopbu dool, né xí rasuidyno de láani? (Luc. 23:33, 34; Rom. 12:17-19; 1 Ped. 2:23.)

5. *Bül Juan 18:12-40.*

Pedro goyo' ór bidzuihybu buñ, per después góebu toib xpiin Jesús ni cua' xidal privilegios, ¿xí raslooy ndé' lóono? (Juan 18:25-27; 1 Cor. 4:2; 1 Ped. 3:14, 15; 5:8, 9.)

6. *Bül Juan 19:1-30.*

a) ¿Ximod bibi' Jesús bidxiich, lairy né galrro? (Juan 2:1, 2, 9, 10; 19:23, 24; Mat. 6:31, 32; 8:20.)

b) ¿Xigony diitz ni goní Jesús órni mápa gaitybu bidzlooyni que goyo'bu xilad Jehová né biduidybu diitz que nosi Jehová labúu gony mandary? (Juan 16:33; 19:30; 2 Ped. 3:14; 1 Juan 5:4.)

## Historia 102

### Jesús nabany

1. ¿Chú láabu buñgona' ni no' ló dibuj, chú layibu chop buñguieeu, né pu noyibu?

2. ¿Xigony rony mandary Pilato buñ ni rasanir nisló israelitas par gony go'ox guixel soldad par gann ba' ro bigach Jesús?

3. ¿Xí láani rony toib ángel tzón rosil de goló goity Jesús, per xí láani rony ni rasanir nisló israelitas par gony go'ox?

4. ¿Xigony radziguia' tipnés buñgona' órni rieiyeu ro' xpa' Jesús?

5. ¿Xigony raxony Pedro né Juan riée ro' xpa' Jesús, né xí ranyibu?

6. ¿Xí rac né laidy Jesús, né xí láani ronybu par raslooybu xpiimbu que nabanybu?

### Stipnés diitz ni non guicapyno:

1. *Bül Mateo 27:62-66 né 28:1-15.*

Órni Jesús biás lad gue'et, ¿ximod guirá ni rasanir nisló israelitas néca fariseos né ancianos bunyibu galkié contra fuers ni Dios raquinn par gonybu ni nábu? (Mat. 12:24, 31, 32; 28:11-15.)

2. *Bül Lucas 24:1-12.*

¿Ximod raslooy ni Jesús biás lad gue'et que par Jehová buñgona' labúu gac testig ni rani' cóe nigolú? (Luc. 24:4, 9, 10; Mat. 28:1-7.)

3. *Bül Juan 20:1-12.*

¿Ximod racné Juan 20:8, 9 par guientzaayno que raquinn gacno buñ paseyns pal diti rientzaayno

ximod gac cumplir ni sieed ló la Biblia? (Pro. 4:18; Mat. 17:22, 23; Luc. 24:5-8; Juan 16:12.)

## Historia 103

### Lainy cuart ni nayeg

1. ¿Xí láani raiby María a buñguieeu ni xpensary-bu cayap lagary cú, per ximod raduidybu cuent que buñguieeu re' ngú Jesús?

2. ¿Xí rasacloó chop xpiin Jesús órni séeyibu ranch ni laa Emaús?

3. ¿Xí cóe ni radziguia' rac órni xpiin Jesús raiby a stipnés que ma bibi'yu Jesús?

4. ¿Balac buelt rabi'yu Jesús?

5. ¿Xí ná Tomás órni racadiagbu que stipnés xpiin Jesús ma bibi'yu Jesús, per xí rac órni radudy xhoon govtiz?

### Stipnés diitz ni non guicapyno:

1. *Bül Juan 20:11-29.*

¿Goní Jesús ló Juan 20:23 que buñgudxlio labúu gutuidy galkié xomod Dios la? Golexa láani (Sal. 49:2, 7; Isa. 55:7; 1 Tim. 2:5, 6; 1 Juan 2:1, 2.)

2. *Bül Lucas 24:13-43.*

¿Ximod gonyo que xcalnabanyo tzó puext par guica' guirá diitz ni nigolú rasuidy la Biblia? (Luc. 24:32, 33; Esd. 7:10; Mat. 5:3; Hech. 16:14; Heb. 5:11-14.)

## Historia 104

### Jesús rabiguet guibá

1. ¿Balac buñ ni racanal a Jesús labúu rabí láabu toibtica buelt, né xí raiby Jesús layibu?

2. ¿Xí ngú Gobierno xtuny Dios, né ximod guibany buñ ló Gudxlio órni Jesús gony mandary por tipml iz?

3. ¿Por balac dzú bire' Jesús lóo xpiin, per xí láani ma bidxin ór gonybu nigore'?

4. ¿Xí láani rony mandary Jesús gony guirá ni racanal láabu órni mápa guibiguetbu guibá?

5. ¿Xí láani cayac mod rabilo ló dibuj, né ximod tsintiimpi si ma diti labúu rabi'yu Jesús?

### Stipnés diitz ni non guicapyno:

1. *Bül 1 Corintios 15:3-8.*

¿Xigony gondxich Pablo que Jesús nigolú biás lad gue'et, né de xí cóe labúu guini' guirá ni racanal Jesús ló xtúnú? (1 Cor. 15:4, 7, 8; Isa. 2:2, 3; Mat. 24:14; 2 Tim. 3:1-5.)

2. *Bül 1:1-11.*

Mod caa ló Hechos 1:8, ¿hasta púti bidxin diitz sacro ni goní buñ ni cuanal Jesús? (Hech. 6:7; 9:31; 11:19-21; Col. 1:23.)

## Ria'anyibu lainy gudx Jerusalén

1. Mod rienni ló dibuj, ¿xí láani rac né guirá buñ ni racanal Jesús ni rian Jerusalén?
2. ¿Xigony radziguia' buñ ni riée Jerusalén?
3. ¿Xí láani rabexa Pedro a buñ?
4. ¿Ximod rasac xidal buñ órni ralox racadiagyibu ni rani' Pedro, né xí non gonyibu?
5. ¿Balacyibu rionis ló lanii Pentecostés ni góe íz 33 L.X.?

### Stipnés diitz ni non guicapyno:

1. *Bül Hechos 2:1-47.*
- a) ¿Ximod raslooy diitz ni goní Pedro ló Hechos 2: 23, 36 que guirá Judíos gopyibu dool ni bigaityibu Jesús? (1 Tes. 2:14, 15.)
- b) ¿Xí galán mod bisian Pedro mod golexa tzaaybu ni sieed ló la Biblia par labúu ñen buñ láabu? (Hech. 2:16, 17, 29, 31, 36, 39; Col. 4:6.)
- c) ¿Ximod biquini Pedro primer -day de Gobierno no' guibá' ni Jesús goní guica'bu? (Hech. 2:14, 22-24, 37, 38; Mat. 16:19.)

## Historia 106

### Rare'yibu press

1. ¿Xí rascaló Pedro né Juan toib godzu órni cayo'yibu lainy yo' xiro' ro rac adorar Jehová?
2. ¿Xí raiby Pedro a buñ xot, né xí raduidy Pedro láabu ni rasac más que bidxiich?
3. ¿Xigony radzuitz guirá buñguieeu ni rasanir ló toib religión, né xí ronyibu a Pedro né Juan?
4. ¿Xí raiby Pedro a guirá buñguieeu ni rasanir ló toib religión, né xí raibyibu xpíin Jesús?
5. Guirá ni rasanir ló toib religión, ¿xigony radzuitzyibu xpíin Jesús, per xí láani rac rarop buelt órni rago'yibu biinre' press?
6. ¿Ximod racapy xpíin Jesús órni no' ni riné la-yibu nisló Sanedrín?

### Stipnés diitz ni non guicapyno:

1. *Bül Hechos 3:1-10.*
- Ná diti napnó galnadip par gonyo galrradziguia' ló xtzúno, ¿ximod racné diitz ni goní Pedro ló Hechos 3:6 gandxi'no diitz ni rasac de Gobierno xtuny Dios? (Juan 17:3; 2 Cor. 5:18-20; Fili. 3:8.)
2. *Bül Hechos 4:1-31.*
- Órni no' ni racaló lóono ló ro casaano yo' por yo', ¿ximod labúu guisu'no guirá xhermanno ni bibany ló xtzú Jesús? (Hech. 4:29, 31; Efe. 6:18-20; 1 Tes. 2:2.)
3. *Bül Hechos 5:17-42.*
- ¿Ximod nga raslooy que natzaay nac xcalrrien tipnés buñ ni diti nac testigos xtuny Jehová ni no' ló xtzúno, né ni bibany ló xtzú Jesús ni láaca diti cuanal láabu? (Hech. 5:34-39.)

## Ragasguieeyibu Esteban

1. ¿Chú ngú Esteban, né xí labúu ronybu por ni Dios racné láabu?
2. ¿Xí rani' Esteban ni rony que radzuitz guirá ni rasanir lainy toib religión?
3. Bilox bísobioyibu né gole'yibu Esteban fuer gudx, ¿xí ronyibu Esteban?
4. ¿Chú ngú mbioxhlas ni no' ló dibuj ni saga' ni cayaan xhap buñ ni dxee cú?
5. ¿Xí ranab Esteban lóo Jehová órni mápa gaitybu?
6. ¿Ximod labúu gonyo mod buny Esteban órni no' ni rony mal lóono?

### Stipnés diitz ni non guicapyno:

1. *Bül Hechos 6:8-15.*
- ¿Xí galrrascú raquini guirá ni rasanir ló religión falz órni rayopyibu mod guicaayibu xchiin testigos xtuny Jehová? (Hech. 6:9, 11, 13.)
2. *Bül Hechos 7:1-60.*
- a) ¿Xí láani gocné Esteban par labúu nani'bu diitz sacró nisló Sanedrín, né xí rasuidyno mod bunybu? (Hech. 7:51-53; Rom. 15:4; 2 Tim. 3:14-17; 1 Ped. 3:15.)
- b) ¿Ximod gap xpensaryo de tipnés ni racaló dxiin ni ronyno por Jehová? (Hech. 7:58-60; Mat. 5:44; Luc. 23:33, 34.)

## Historia 108

### Ló néz ni sée Damasco

1. ¿Xí rony Saulo después ni ragaityibu Esteban?
2. ¿Xí galrradziguia' rac ló néz laga sée Saulo niis Damasco?
3. ¿Xí láani rony mandary Jesús gony Saulo?
4. ¿Xí raiby Jesús a Ananias gony, né xí láani rac par labúu rabí Saulo stoib?
5. ¿Ximod radxiin rimbuyibu Saulo, né ximod raquini Jehová láabu?

### Stipnés diitz ni non guicapyno:

1. *Bül Hechos 8:1-4.*
- ¿Ximod gocné que stipnés nacadiag diitz sacró órni goyo' ni cualó né cuanal congregación ni goyo' ló xtzú xpíin Jesús, né ximod súcra rac ló xtzúno? (Hech. 8:4; Isa. 54:17.)
2. *Bül Hechos 9:1-20.*
- ¿Xí tzón dxiin biduidy Jesús cua' Saulo? (Hech. 9: 15; 13:5; 26:1; 27:24; Rom. 11:13.)
3. *Bül Hechos 22:6-16.*
- ¿Ximod labúu guisu'no Ananias, né xigony rasac gonyo láani? (Hech. 22:12; 1 Tim. 3:7; 1 Ped. 1: 14-16; 2:12.)

#### 4. *Bül Hechos 26:8-20.*

Ni Saulo bitzá mod góe né buny xchiin Jehová, ¿ximod racnéni a guirá buñ ni ma no' tze'el ni diti nac testigos xtuny Jehová? (Hech. 26:11; 1 Tim. 1:14-16; 2 Tim. 4:2; 1 Ped. 3:1-3.)

### Historia 109

#### Pedro riguen Cornelio

1. ¿Chú ngú buñgueeu ni caxixip ló dibuj?
2. ¿Xí láani raiby toib ángel a Cornelio?
3. ¿Xí láani ralooy Dios a Pedro órni no'bu guic yo' lidx Simón lainy gudx Jope?
4. ¿Xigony raiby Pedro a Cornelio que diti láani guixixipbu né gony adorarbu Pedro?
5. ¿Xigony tipné buñ ni racanal Jesús ni nac judíos ni no' né Pedro radziguia'yibu?
6. ¿Xí cóe ni rasac rasuidyno ni Pedro goyguen a Cornelio?

#### Stipné diitz ni non guicapyno:

##### 1. *Bül Hechos 10:1-48.*

¿Xí láani raduidy diitz ni goní Pedro ló Hechos 10:42 mod nac diitz sacró de Gobierno xtuny Dios? (Mat. 28:19; Mar. 13:10; Hech. 1:8.)

##### 2. *Bül Hechos 11:1-18.*

¿Ximod góe xpensary Pedro órni biab fuers ni Dios raquini par gonybu ni nábu laidy buñ ni diti nac judíos, né ximod guisu'no mod bunybu? (Hech. 11: 17, 18; 2 Cor. 10:5; Efe. 5:17.)

### Historia 110

#### Timoteo ni racné Pablo

1. ¿Chú láabu mbioxhla ni rabilo ló dibuj, de xí gudx láabu, né ximod laa xina'bu né soiscólbú?
2. ¿Ximod racapy Timoteo órni Pablo ranabdiitz pal nainy láabu gony compañerbu Pablo né Silas par guini'yibu xtiitz Dios a buñ ni rabés sit?
3. ¿Pu lagary primer rare' laa xpiin Jesús, buñ ni racanal Cristo?
4. ¿Ximod laa chop tzón gudx ro riée Pablo, Silas né Timoteo órni rasiyanyibu Listra?
5. ¿Ximod racné Timoteo a Pablo, né mbioxhla ni no' ló xtzino xí non guinabdiitzbu láacabu?

#### Stipné diitz ni non guicapyno:

##### 1. *Bül Hechos 9:19-30.*

¿Ximod bilooy Pablo que gopbu cuidad órni goyo' ni cualó láabu par diti nani'bu xtiitz Dios? (Hech. 9:22-25, 29, 30; Mat. 10:16.)

##### 2. *Bül Hechos 11:19-26.*

¿Ximod ralooy Hechos 11:19-21, 26 que fuers ni Dios raquini par gonybu ni nábu racnéni lóono par saano yo' por yo'?

#### 3. *Bül Hechos 13:13-16, 42-52.*

¿Ximod ralooy Hechos 13:51, 52 que buñ ni cuanal Cristo diti biduidyibu lagary que nabegan buñ la-yibu ló dxiin ni goyo'yibu ló? (Mat. 10:14; Hech. 18:6; 1 Ped. 4:14.)

##### 4. *Bül Hechos 14:1-6, 19-28.*

¿Ximod racné lóono diitz «bisianyibu biinre' ladx-ña Jehová» par diti tzóno ló xcalrasa' gacnéno ni casalo casuidy o ni raca' toib privilegio? (Hech. 14: 21-23; 20:32; Juan 6:44.)

##### 5. *Bül Hechos 16:1-5.*

Ni Timoteo goyo' puent naroc ro nacbu buñgueeu, ¿ximod raslooy ni bunybu que gosac par láabu gonybu nde' por diitz sacró ni rani' de Gobierno xtuny Dios? (Hech. 16:3; 1 Cor. 9:23; 1 Tes. 2:8.)

##### 6. *Bül Hechos 18:1-11, 18-22.*

¿Xí láani ná Hechos 18:9, 10 ni raduidy diitz que Jesús láaca sanir nisló guirá ni racanal láabu par saa yo' por yo', né ló naare' ximod raduidy confianz lóono ganno nde'? (Mat. 28:20.)

### Historia 111

#### Toib mbiox ni gonás baca'al

1. ¿Chú láabu ngú mbiox ni náaxh layoo, né xí gosaclobu?
2. ¿Xí láani rony Pablo órni rabíbu que mbiox re' ma goity?
3. ¿Pu riée Pablo, Timoteo né ni rony compañer la-yibu, né xí rac órni radxiinyibu gudx Mileto?
4. ¿Xí láani raiby buñgueeu ni rani' xí gac dzú ni sietra ni laa Ágabo a Pablo, né ximod radxiin rac ni rani' buñgueeu re'?

#### Stipné diitz ni non guicapyno:

##### 1. *Bül Hechos 20:7-38.*

a) Mod ná diitz ni goní Pablo ló Hechos 20:26, 27, ¿xí labúu gonyo par diti gapnó dool por «xiruny guirá buñgudxlio»? (Eze. 33:8; Hech. 18:6, 7.)

b) ¿Xigony guirá anciano non guicaadxiich cuidad guini'yibu «ni sieed ló Xtiitz Dios» órni guisuidyibu? (Hech. 20:17, 29, 30; Tito 1:7-9; 2 Tim. 1:13.)

##### 2. *Bül Hechos 26:24-32.*

Ni Pablo gócbu buñ de gudx Roma, ¿ximod gocnéni láabu bisuidyibu xtiitz Dios né modre' bunybu dxiin ni bixel Jesús gonybu? (Hech. 9:15; 16:37, 38; 25:11, 12; 26:32; Luc. 21:12, 13.)

### Historia 112

#### Ralaayibu ló toib isla

1. ¿Xí láani rac bark ni Pablo no' lainy órni cadudyni gahx isla ni laa Creta?
2. ¿Xí raiby Pablo a buñ ni no' lainy bark cú?
3. ¿Xigony rabíl bark cú?

4. ¿Xí láani rani' buñgüieeu ni cayaan layibu, né balac buñ ni nabany radxiin ro' nisdá'?

5. ¿Ximod laa isla ro radxiinyibu, né xí ronyibu Pablo órni rabés rac buró'dant cú?

### Stipnés diitz ni non guicapyno:

1. *Bül Hechos 27:1-44.*

¿Ximod racné fe ni napnó que guirá ni caa ló la Biblia órni Pablo goyee gudx Roma scú gocni? (Hech. 27:16-19, 27-32; Luc. 1:3; 2 Tim. 3:16, 17.)

2. *Bül Hechos 28:1-14.*

Buñ ni golés isla Malta ná diti buny adoryaryibu Jehová bichiinni layibu ñapyibu «xiro' galronladx» a Pablo né stipnés buñ ni bieed lainy bark cú, ¿xí láani non guichiin gonyno lóono ni nacno buñ ni racanal Jesús né ximod non gonyno láani? (Hech. 28:1, 2; Heb. 13:1, 2; 1 Ped. 4:9.)

### Historia 113

#### Pablo lainy gudx Roma

1. ¿Chú layibu raniné Pablo xtiitz Dios lága no'bu press lainy gudx Roma?

2. ¿Chú láabu ngú ni biedtixlóo a Pablo ni sob ro mexh, né ximod cayacnébu Pablo?

3. ¿Chú láabu ngú Epafrodito, né xí láani rinébu órni rabiguetbu gudx Filipos?

4. ¿Ximod raxel Pablo guich lóo ximigdxinbu Filemón?

5. ¿Xí rony Pablo órni rare'bu press, né diti xidzú de goló güirébu xí rasaclobu?

6. ¿Chú láabu raquuin Jehová par guica' tipnés libros ro ralox la Biblia, né xí láani rani' libro ni laa Revelación?

### Stipnés diitz ni non guicapyno:

1. *Bül Hechos 28:16-31 né Filipenses 1:13.*

¿Ximod biquiin Pablo tiemp ni gobpu lága goyo'bu press gudx Roma, né ximod fe nadip ni gobpu gocnéni guirá herman ni goyo' ló xtzúbu? (Hech. 28:23, 30; Fili. 1:14.)

2. *Bül Filipenses 2:19-30.*

¿Xí diitz sacró bica' Pablo ni bislooyni que binladx-bu Timoteo né Epafrodito, né ximod labúu guisu'no mod bunybu? (Fili. 2:20, 22, 25, 29, 30; 1 Cor. 16:18; 1 Tes. 5:12, 13.)

3. *Bül Filemón 1-25.*

a) ¿Xí láani biquiin Pablo par gocnébu Filemón gony xinésni, né ximod rasaní ndé' toib mod galán par guicanal ancianos ni no' ló xtzúno mod bunybu? (File. 9; 2 Cor. 8:8; Gál. 5:13.)

b) ¿Ximod raslooy diitz ni goní Pablo ló Filemón 13, 14 que golóbu cuent mod nac xpensary stipnés xiermanbu? (1 Cor. 8:7, 13; 10:31-33.)

4. *Bül 2 Timoteo 4:7-9.*

Xomod góe xpensary Pablo, ¿xigony labúu gapnó confianz que Jehová saduidy xilaay lóono pal gony

guantaryno guirá dzú lága nabanyno? (Mat. 24:13; Heb. 6:10.)

### Historia 114

#### Dzú ni guilox guirá cós mal

1. ¿Xigony rasetlaa la Biblia que no' mainly lainy guibá?

2. ¿Ximod laa guerr ni guitné Dios, né xigony guitnébu láani?

3. Xomod rabino ló dibuj, ¿chú láabu ngú ni guisanir ló guerr, xigony guicbu no' toib corona, né xí raslooy espad ni ca'bu?

4. Órni rabino historias 10, 15 né 33, ¿xigony diti non guidziguia'no ni Dios guinitló guirá buñ mal ni no' ló xtzúno?

5. ¿Ximod raslooy historias 36 né 76 que Dios sanitlóbu guirá buñ mal ná raniyibu que rony adoryaryibu Jehová?

### Stipnés diitz ni non guicapyno:

1. *Bül Revelación 19:11-16.*

a) ¿Ximod nayadit ná la Biblia que buñ ni dxiip mainlyquich ngú Jesucristo? (Rev. 1:5; 3:14; 19:11; Isa. 11:4.)

b) ¿Ximod runy ni góos ló xhap loguia' Jesús raduidiny diitz que láabu sonybu gann né saslo'ox-bu guerr re'? (Rev. 14:18-20; 19:13.)

c) ¿Chú ngú stipnés ni sigory rony compañer xidalguixo buñ ni canal Jesús órni dxiipbu mainlyquich? (Rev. 12:7; 19:14; Mat. 25:31, 32.)

### Historia 115

#### Gudxlio sac toib lagary móz

1. Xomod ná la Biblia, ¿xí galnasác guica'no lainy Gudxlio móz cú?

2. ¿Xí rani' la Biblia guica' guirá ni guibany lainy lagary móz re'?

3. ¿Pu dzú ma saló Jesús gony guirá cós sacró re'?

4. Órni Jesús goyo'bu ló Gudxlio, ¿xí láani bunybu par bislooybu ni gonybu órni ma saló gony Mandarybu lainy Gobierno xtuny Dios?

5. ¿Xí láani gony Jesús né guirá buñ ni gony mandary né láabu ló Gudxlio desde lainy guibá?

### Stipnés diitz ni non guicapyno:

1. *Bül Revelación 5:9, 10.*

¿Xigony nandxichno que guirá ni gony mandary né Jesús lainy guibá ló Gudxlio por tipmil iz sacyibu buñ ni guieen mod rasac buñ né sapyibu xiro' galronladx? (Efe. 4:20-24; 1 Ped. 1:7; 3:8; 5:6-10.)

2. *Bül Revelación 14:1-3.*

¿Ximod rarexa que 144,000 ni guié guibá caa la-caayibu laa Bixios né laa Xii! (1 Cor. 3:23; 2 Tim. 2:19; Rev. 3:12.)



## **Ximod guibanyno tipzó**

1. ¿Xí láani raquiin ganno par labúu guibanyno tipzó?
2. ¿Ximod labúu guisuidyno más de Jehová né de Jesús xomod cayony mbioxgona'yen né ximig ni rabilo ló dibuj?
3. ¿Xí stoib libro rabilo ló dibuj, né xigony diti guisianno de golno láani?
4. Galán láani guisuidyno de Jehová né de Jesús, ¿xí más raquiinni par labúu guibanyno tipzó?
5. ¿Xí láani rasuidy historia 69 lóono?
6. ¿Xí rasuidy lóono mod buny Samuel, xomod sieed ló historia 55?

7. ¿Ximod labúu guisu'no mod buny Jesucristo, né pal gonyno láani, xí láani saca'no ló dzú ni sietra?

### **Stipnés diitz ni non guicapyno:**

1. *Bül Juan 17:3.*

Xomod raslooy la Biblia, ná nánno xidal cós de memory de Jehová né de Jesús, ¿xigony diti labúu guinino que ma rimbuno layibu? (Mat. 7:21; Sant. 2:18-20; 1 Juan 2:17.)

2. *Bül Salmo 145:1-21.*

a) ¿Goní tipnés mod ni no' par labúu gonyxiro'no Jehová? (Sal. 145:8-11; Rev. 4:11.)

b) ¿Ximod Jehová «natzaay par né guiráxadit», né ximod racné nd' lóono guibigno ronó'bu? (Sal. 145:9; Mat. 5:43-45.)

c) Pal nadxino Jehová, ¿xí láani guichiin lóono gonyno? (Sal. 119:171, 172, 175; 145:11, 12, 21.)

## ¿Náni looy gannlo más la?

Labúu guidzelo Testigos xtuny Jehová lainy Internet  
**[www.jw.org/zpa](http://www.jw.org/zpa)**